

Tujetsch

Igl andament da sia historia

ediu entras la Vischnaunca Tujetsch igl onn 1987

Cuntegn:

I La geografia

- Il territori da Tujetsch
- Il contact anoviars
- Tujetsch, la val da passadi
- Cuolm d'Ursera
- Ils emprems tschentanners
- Il stradun da l'Alpsu
- Cun auto e cul tren sur l'Alpsu
- Casas d'albiert sill'Alpsu
- Igl emprem auto en Tujetsch
- La viafier dalla Furca-Alpsu
- Fundaziun dalla societad per ina viafier
 - Acquist da dretgs e concessiuns
 - Schliata partenza (entschatta)
 - Vinavon cun forzas unidas
 - Participaziun dalla vischnaunca
 - Temps burasclus e decisivs
 - Agid e sustegn dil stadi
 - Influenza dil tunnel dalla Furca

II La val e sias parts

- Dadens igl uaul
 - E van per nitschuns
 - Il fraud da schiembra
 - Igl ei stau critic
 - Ei tucca da seproverder
 - Il mussader ha survegniu la torta
 - Culs purschals si dies
- Il Dutg grond
 - Ils vischins da Rueras
- Giudapeis al Cuolm da Vi
- Maunsut
- Nums da funs e da pastg
 - Val Nalps
 - Val Giuv

III Igl origin

- Igl uoppen da Tujetsch
- Igl origin dalla Val Tujetsch
 - Derivonza dil num
 - Ils emprems colonists arrivan
 - Ils Vallesans
 - Ord il temps mediaval
 - Traffic sul Cuolm d'Ursera
 - Emprema baselgia da Tujetsch
 - La libertad entscheiva e seregheglia
 - Ils ministerials svaneschan
 - Fuorma da viver - temps miez tardiv
 - Tratga da nuorsas

- Societad cooperativa
- Situazin speciala da Tschamut
- Colonists neu dil miezdi
- Sogn Vigeli a Sedrun
- Igl anniversari da 1456
- Il "Zinnsrodel" da 1555
- Novs burgheis
- Beins, uclauns e vitgs
- Il gissiatavel tschentaner
- Gronda activitad religiosa
- Fatgs alpesters
- Il schotgavel tschentaner
- Pader Placi a Spescha
- Dumbraziun dalla populaziun
- Ils Franzos ella Val Tujetsch 1799
- Il schenivavel tschentaner
- Emprem uorden da Tujetsch
- Relaziun cun la claustra da Mustér
- La vischnaunca cumpra l'Alp Tschamut
- Il moviment demografic dil 19 e 20avel tschentaner
- Utilisaziun dallas zonas
- Possess privat
- La pasculaziun cumina
- Pastiras da casa
- Ils mises
- Las alps
- Ils uauls
- Dalla vart economica
- Ils deivets
- Ils crediturs
- La politica dil vitg e far cavals
- Repartiziun dils uffecis 1838-1863
- Ils paupers
- Possess dils paupers
- Ils jasters en Tujetsch
- Il svilup dalla populaziun
- La mort
- La lètg
- Affons e famiglia
- Emigrar e ir naven
- Survetsch sut crunas
- Luvriers da stagiun
- Ils Americaners
- Ir naven

IV Religiun e cardientscha

- Igl onn ecclesiastic
- Usits religius
- En survetsch dalla baselgia
- La tuor-baselgia da Rueras
- In sguard el futur

V L'agricultura

- E Tujetsch sedivida
- Las alps
- Ils mises
- Ils uauls

Il funs da casa	
Graun e glin e truffels	
Il stan puril	
Il pur da biestga armentiva	
Il pur da cauras	
Il pur da nuorsas	
Ed il pur da tschels onns, endi!	(
- Siu bein puril	
- Clavau e nuegl	
- Iseglija e lavur da mintga di	
Pli baul fagevan ins fein a pastg	:
- Igl ingant	
- Preparativas per ir el cuolm	
- Far meidia	
- Il transport dil fein a pastg igl unviern	
Possess da tiara e tiers	
La cargada digl onn 1986	

VI Flora e fauna

Flurs e flurs	(
Coclas, ils fretgs dallas caglias	
Nus mein per cacs tgaper	(
- Lur origin	
- La raccolta	
- Vendita	
- Agen diever	
- Oz	
La cultura dil cardun blau	
Ils animals selvadis	

VII Il gudogn dil paun

Las rihezias naturalas	
- Il scalegl	
- Miners e minieras da fier	
- Las palius da turba	
- Las caltgeras da Pardatsch	
Cristals e cavacrappa)
- Negozi da cristallas e minerals	
- Patentas per ir per cristallas	
- Entradas	
- Collecziuns privatas e cabinet communal	
- L'explotaziun	
- Anfladas singularas	
Mistergners ed industria	
- Il Sep Antoni Hafner	
- Il taglialenna	?
- Il talper	
- La davosa brischavinars a Tschamut	
- Etg dalla Stena	
- La tissunza e siu taler	
- La scarsinaria da Salins	
- La fabrica da filar a Sedrun	
- Ils calgers che van a dis	
Il fravi per propi	(
- Sia truscha	
- Il luvratori	
- Sia manonza	

Mulins e muliners |
Smart SA a Sedrun |
- Igl origin sa Smart
- Harry
- Schau ora cups
- In bien cader
- La materia prima
- Plazs da lavur
- La sviulta digl onn 1986
- L'organisaziun dil menaschi |
Tujetsch e sia economia |
- Il di dad oz

VIII Il diever dallas auas

Aqueducts
Aua per vitgs ed uclauns
- Tschamut
- Selva
- Dieni
- Rueras
- Aquaduct Fontauna sogn Gions
- Enzacontas cefras
- Zarcuns
- Camischolas
- Sedrun
- Bugnei
- Surrein
- Cavorgia
Ovras hydraulicas
- In'atgna ovra hydraulica
Grond interess per l'utilisaziun da nossas auas
Situaziun favoreivla da realisaziun
Muntada dalla ORA pil svilup da Tujetsch
Slargar il fundament d'existenza
Utilisaziun dil territori communal
Entginas ponderaziuns

IX Il turissem

Il svilup dil turissem |
- La situaziun d'antruras
- Nos emprems turists
- Ils emprems skiturs
- L'emprema organisaziun
- Ei sefuorma ina industrietta
- Contraolla dad jasters 1921-1928
- Uniun da cura e scola da skis
- Survesta dalla avertura dallas fatschentas
- Survesta dalla avertura dils hotels
- In temps spir novaziuns
- Ir cun skis era buca in sport da femnas
- Las concurrenzas da skis
- Las pistas d'antruras
- Finanziaziun digl asphalt atras il vitg
- La secunda uiara mundiala
- L'economia dil turissem serevegn mo plaun
- Ils emprems sforzs da metter neu runals
- La sutgera Cungieri

- Ei suonda megliers temps
- Igl emprem runal sil Calmut
- Gronds territoris vegnan aviarts
- Survesta dalla erecziun dils runals
- Avertura d'in biro da cura e traffic
- Tgi ei la "Tuatschina"?
- Ils films vegls dalla val
- La tura da Valtelina
- Nossas sendas
- Sedrun ni Tujetsch
- Cuorsa liunga
- Las casas da colonias
- Piazza da sport Dulezi
- La historia dils skis cuorts
- Ils scolasts da skis ed ils menaschis da restauraziun
- Eveniments dils davos 20 onns
- Bunas prestaziuns da skiturs tuatschins
- Il svilup dil turissem els prospects
- Statistica da létgs e pernottaziuns

X L'organisaziun sociala

Fatgs publics

- Vegls uordens da vischnaunca
- La nova structura da vischnaunca suenter 1848
- Sistem departamental
- Parlament communal
- Administraziun communal e menaschis
- Ils vischinadis

Nodas - casa

La bilanza dil quen communal

La planisaziun locala

Las scolas da vischnaunca

- Survesta dallas scolas en Tujetsch

L'uniun purila

Ulteriuras uniuns

- Uniun professiunala
- Uniun da luvriers
- Uniun da dunnauns e mattauns
- L'uniun samaritana
- L'uniun dramatica da Rueras

Cant, teater e musica

- Chor viril Sedrun
- Chor da vallada (1959 - 1970)
- Chor baselgia Sedrun
- Chor mishedau Sedrun
- Resuns dil Rein
- Il cant da Rueras
- Ils cantadurs da Selva
- Societad da musica

Pauperesser

- Las spendas
- Gl'emprem uorden
- Spelar e segar fein
- La spenda da sal
- Las spendas svaneschan
- Il prau dils paupers
- Casa dils paupers

- Ils uordens da 1866,1935,1973

XI Casaments e casas, habitaziuns da proprietad

Hetta, casament e stabiliment

La casa da Tujetsch

Il casament dil Gottard

La prioritad

La habitaziun da proprietad

Casa Sogn Vigeli

Casa Cadruvi

Las auas piarsas

- La turera

- La serenera

Il museum La Truaisch

Il bogn cuvretg

Ovra da cuors Val Giuv

Caplaniias e la casa pervenda

XII Ei vegn detg

Cardientschas blauas

- Dil liug

- La surpussonza dil nauschaspert

- Ottilia Beer da Giuv

Al stariegn dal calgè

XIII Fenomens e motivs dalla mort

Cronica da disgrazias

Inaga la pestilenza - ed oz?

XIV Isonzas

Sontgaclau

Ir per biemaun

Daniev

- Ils affons

- La giuventetgna

- Ils carschi

Ils treis sogns Retgs

Il tscheiver d'avon onns

- Tscheiver da famiglia

- Tscheiver general

- Gliendisdis tscheiver

- Il temps dad oz

Magliar groma

Nozzas

Parada e perdanonza

- Far parada

- Ir per negla

- Perdanonzas

Vegls giugs

- Pitg pètg

- Dar prau

- Castrar la nebla

- Trer ora il cucu

- Mirar las steilas

- Tauna dall'uolp

- Bal cun bengel ni cun palutta

- Chis chès

- Trer paliats
- Suflar il tschanc
- Troccas
- Ils giugs dallas buobas
- Las colurs
- Dar il fazalet
- Ris e groma enta parvis...
- Mirar anen
- Dar cul crap
- Retg, retg, cons pass dei dar?
- Caputschinerum

XV Idiom e svilup dalla cuminonza

- Il patua da Tujetsch
- Impressiuns d'in contemporan
- Il trend dils numms
- Affons dian lur meini dalla Val Tujetsch
- Petra Berther
- Adrian Berther

XVI Persunas che stattan davontier

- Ils mistrals da Tujetsch
- Ils presidents communal da Tujetsch
- Anselm Capeder 1855 - 1924
- Gion Felici Monn 1876 - 1954
- Gion Andriu Berther 1868 - 1953
- Vigeli Venzin 1875 - 1951
- Vigeli Berther-Flury 1878 - 1964
- Baseli Berther 1887 - 1970
- Placi Jacomet 1896 - 1975
- Hans Giachen Decurtins 1885 - 1951
- Christian Berther 1910 - 1966
- Theofil Schmid- Valier 1912
- Vigeli Berther-Jacomet 1922
- Sep Fidel Berther 1929
- Ils amitgs dalla plema
- Pader Baseli Berther 1858 - 1931
- Toni Berther 1927
- Vic (Ludivic) Hendry 1920
- Gion Antoni Venzin 1896 - 1962
- Il legatur Oreste Zanetti (1892 - 1985)

I La geografia

Il territori da Tujetsch

Igl intsches da **Tujetsch** cumpeglia la fontauna dil **Rein** e s'extenda entochen il **Bostg** e las **Nislas** e sur l'aua vi encunter la **Braha** ed ils **Camahers** e siviars il **Run** e l'alp da **Pazzola**. Encunter mesanotg sesaulzan ils sumfils dil **Pez Tgietschen** dil **Pez Giuv** ed ils gleis dalla cadeina dattan encunter il **Badus** e fineschan culs spitgs dil **Pez Alv** e dil **Pez Blas** che mettan tiarms encunter miezdi.

La pezza che fa in rin tschincla in territori da 133,9 kilometers quadrat. Il contuorn senumna **Tujetsch** e sia posa ei buca semidada da num dapi passa in tozzel melli onns. Naven dil vonn dalla val entochen sils fils munta la pendenza biabein 1800 meters. Mess il cass ch'il letg dil **Rein** stetti sin in'altezia da 1230 meters, ein ils spitgs ferm 3000 meters sur mar. Duront l'epoca glaciale fuvan ils plauns da **Sedrun** sut ina tatschada da neiv e glatsch da bunamein 1200 meters altezia. Il **Pez Culmatsch** ed il **Pez Ner** pudevan ual orasi cun las cornas. Fertan che la neiv perpetna ed ils schelaus e las auas da latg ein scursaladas dallas costas giu. Ina pesanca semeglionta ed il miers dil glatsch han schau anavos fils e fastitgs. La bunaura ha fatg sgargliar ils glatschers. Plievgia e neiv e suffels endinai ein dai vitier ed han sfranzlau e sfrachegiau ils fils e las costas ein setratgas e vegnidas schelbas. Dutgs e darguns han ruis viaden en la membra dalla crappa loma e sгурtegiu giu la pial entochen sil massiv dall'ossa dil granit. Quella mularia ha cuzzau ditg e liung e las muotas isadas han survegniu in dies ault.

La neiv perpetna ellas vals lateralas ei setenida ditg e leu nua ch'ella ha pigliu en in funs dalla val principala fatg grop e magliu ora ina cava (**Prau Mulins** giudapeis alla **Val Val, Selva** odem la **Val Curnera, Rueras** sper la **Val Giuv** e **Sedrun** alla sbuccada dalla **Val Strem**). Bunamein negliu catischa la groppadad dalla mularia orasut sco ual els **Bauns** enamiez la **Val Strem**. La pial ei naven e l'ossadira dil granit dat els egl. Pressapauc el contuorn dils **Bauns**, sin in'altezia da ver 2000 meters, calan las aveinas dil granit neu dil **Gottard** ed il dentermassiv da **Tujetsch** pren il surmaun. A per va la plattamorta. Plattius da sericit e cavas da plattas cun sdrems da scalegl che van atras sefan empau dapertutanavon. In terren malruasseivel che sesmiula e che vegn cun caschun afuns.

Enaquella che la neiv ei tschessada, ein las crestas dalla pezza stadas messas ora. Dallah uisas auras ein dadas vidlunder e carpuna ei sedistaccada dil grep massiv ed ei ida ellas gondas. Egl entir rin che circumdescha la val ein las muschnas da crappa grossa numerusas. Il terren ei piars; silpli ch'ils cavacrappa discuvieran in fuorn.

Tocca datier dallas gondas tonschan las pastiras, silmeins quellas da nuorsas. Els plats e siper las spundas da pli pintga pendenza seslargan las alps dils tiers gronds. **Tujetsch** ha in'entira massada rodundas e giu per las muotas sederschan ils darguns. Darguns che miran meinsvart sco drags orasi dil funs e leventan sgarschur. Il mussament il pli eclatant ei bein il dargun dil **Cuolm da Vi**.

Il platter da sericit penda sco ina pellitscha cutta sur las schuialas dil cuolm ed il dartguir sbahuna trasora. Atras las crenas sema e cola l'aua che slucca e sdrappa gliet e sablun cun ella. Il suttapei darschalaun po buca resister e la broda clarmelna semaglia atras la plattamorta schi da rudien ch'il **Drun** ha tscheu e leu ina profunditad da biabein dudisch meters. El valzen da tons onns, dapi il temps da glatsch, ei ina mischiera immensa selischnada a val. Avon onns ha il **Dargun/Drun** midau zatgei gadas siu vau, inaga encunter l'aua da **Strem** ed encunter **Camischolas**, epi puspei sco in dragun vilau atras ils funs da **Sedrun**. E tgi ha sehanau da schar ir quei tartogn e palander atras ils megliers praus grass. La finala han ils purs mess tiarms definitivamein. Leu nua ch'el sederschi la proxima ga, dueigi el e restar ed ins vegli tener el a mistregn. El ei turnaus ed ils vischins da **Sedrun** han giu la pustetia. Els ein allura scochemai semess encunter ed han mess l'aua maltschecca en rempars. Schebi ch'il **Drun** ha aunc mintgatun fatg ina lumparia, pli da detschiert eis el tuttina buca vegnius a ste.

Ei lai supponer che la mischiera ch'ei ruclada giu dil **Cuolm da Vi** e che serasa sur ils plauns da **Sedrun** e **Camischolas** vi munti sin in'altezia da tschien meters. Conta crappa e miarda ch'ils vellers han dustau, gliez san ins gnanc far in quen. En tutta cass ein ils praus schubers e bials e neidis e sco fatgs dad ir cun la maschina da segar e

metter ora graun e truffels.

L'urdadira dil **Cuolm da Vi** ei apartia ed ils platters malguess. Mo era atras ils ulteriurs dartguirs, sco per semeglia giu dallas **Palas** encunter la **Val Bugnei** e giu da **Londadusa** e dalla **Pulanera** e perfin dil **Cuolm Val** ha il material schau luc ed ei vegnius a bass. Il plat da **Bugnei** muossa ora quei clamein e che las plauncas giudem ils plauns ein teissas ei il **Rein** la cuolpa, damai ch'el ha adina puspei magliau empau suto e fatg grop. Quels muments dad auas grondas ch'el ei ora ed ora vegnius tratgs d'ina ravera a l'autra e sefultscha vessamein encunter **Nislas**.

Ils spundivs spuretgs da **Londadusa** ein veramein mai stai crets e maneivels e l'aua da ruina secatscha cun vehemenza atras la draussa e las caglias da striaunas. Adina puspei ha il dargun fatg canera e tut plein ed ina lozza nauscha ei dada sur las spundas dil letg oragiu. Ils platters sin las plauncas da **Culmatsch** han semegliantamein buca teniu la dira. Empau allaga ei il gliet sedistacaus e cupitgaus, surtargend igl entir contuorn da **Rueras** e **Dieni** cun crappa marscha. Accurat sco las foppas ed ils plats anoragiu. Buca che la regiun da **Selva** vess per cass giu ina megliera sort. Atras il dartguir engrondi ei il terren lom seruschnaus giud la siala dil **Cuolm Val** ed ha ulivau maltscheccamein e manedlamein ils plauns.

L'ala dretga dalla val ha empau in'autra posa. Las uclivas da **Foppas** e **Surrein** (vicon la casamenta da **Nacla** e **Canadal**) sefetgan cun forza siper la spunda dil **Tgom**. Ed en verdad stattan las casas lu nuota sin tanientas combas; il caplut da songt Antoni han ils vischins stuiu ruclegiar malamein in tschancun dils praus en encunter munt. Vi da l'autra vart dall'aua da **Nalps** ein las casas da **Cavorgia** semessas giu. Il fundament ei nuot auter ch'ina mantunada da mischiera giu per las vals da **Nalps** e **Gierm**. Umbrivas sefan pli dabot e tschadila tila ei magari da lien, schebi ch'il terren ei fatgs plat e las casas van buca sur la greppa giu.

Mess il cass che tondanavon material seigi ruclaus a mun enteifer tons onns ed onnorums, vegn ei bein e a ver dau enqual retenida egl iral dalla val. Igl ei denton da supponer che la crappa grossa e la miarda seigien vegnidas plaun a plaun e l'aua dil **Rein** hagi dau dafertontier il damogn. Silmeins da fermadas pli grondas s'ei negliu raschieni. L'aua sto ver fatg vau ed ei semplamein dada sperasora; repetidamein ha ella attaccau maltscheccamein las preits dalla greppa e tratg suenter da tuttas uisas. In tec dapertut ha l'aua marscha midau il funs e las siaras en paliu e siper las gravas sederasan entiras battarias dad ogna.

Il contact anoviars

Ina vallada alpina sco **Tujetsch** maungla ad haver escha aviarta, casamai ch'ei vegn trentel e stretg. La plipart dils vischins vegn ad esser ida dalla val ora e vargada **Mustér**. Culs stiarls ein ils purs probablamein i sur il **Stagias** e vi sur il **Lucmagn** encunter **Ligiaun**. Perencunter ils marcadonts da purschals ein dai dil **Cuolm d'Ursera** si e silsuenter atras la **Val Scalina**. Ton ch'il traffic grond ei ius per liung dalla val, schebi la via vedra, silmeins quella entochen biabein tschien onns, ei semplamein stada ina via nauscha. Da sutensi ed atras las greufas da sut igl uaul **Bugnei** e buca il davos suls **Crests** ed encunter **Caspausa** epi afuns viers ils vitgs da dadens igl uaul siviars il **Cuolm d'Ursera**, damai che la stretga da **Sumsassi** era aunc buca rutta atras.

Encunter mesanotg ein las vals lateralas da **Tujetsch** plitost cuortas e la pezza che tschincla dosta. Soliamein ina crena ei da num; igl ei il passadi dallas **Cruschs** che meina atras la **Val Strem** e sul spitg ella **Val da Fier**, leu nua ch'ins sto trer ora las combas. Avon ch'ins arvi da detschiert la **Val Scalina**, ha la puraglia da **Tujetsch** fatg diever dil passadi. Cun ina purtadira purschals ein els semess sin via ed han empruau da tschercar cumpraders da l'autra vart dil cuolm.

Il miezdi ha trasatras giu in tec calamita. Ils vischins ein secunvegni ed han fatg comi. Buca oravontut enviars **Purtgera** ed il fil da **Bornengo**, plitost sur las cornas dil **Passo Vecchio** ella **Val Cadlimo**.

In'alp sco **Curnera** fuva buca tschercada, aschia d'in maun e malamein contonschibla. En tutta cass ha la claustra da **Mustér** fatg amogna **Curnera** alla glied da **Faido**; quei ei schabegiau ils anno 1540. Ilsezs han buca fatg dano ed han salvau **Curnera**

bunamein quatertschien onns. Ed els ein vegni stediamein cun lur muntanera sur il fil vi ed han paschentau las nuorsas allas rivas dil **Rein da Curnera**. Ils nursers e las nuorsas han rabbitschau empau variaziun viaden en la solitariadad dallas vals. Lur gatti ei staus d'engrau. Buca ina megliera sort ha l'alpetta da **Cavradi** giu. Per quella pastira leu siper la cresta ha semegliontamein negin spidau giun plaun. Ils Tuatschins han dau giu ella a vallers d'anoragiu. Era lezs ein vegni cun lur biestga. Aschia ch'il contact encunter miezdi ei sefatgs, in tec e pil profit dils **Dadens igl uaul**.

Onz pli liunga che las ulteriuras vals encunter il sid ei la **Val Nalps**. Ella s'auda e buca als da **Tujetsch** e mintga buob da vaccas per propi lai encrescher per ina tala pastira. Pursanavels da **Mustér** ein en possess da **Nalps**; quei ei semplamein in fatg. L'alp ha ina historia, buca ina macorta. L'aua permiez la val sparta ils stavel, ils da grass da quels dil maun da schetgs. Siper las puozas pasculeschan las nuorsas. Pli baul vevan las nuorsas da **Nalps** ina gronda muntada. Ellas fuvan apartias, in raz dapersei, levas e lingieras e plein forza, veramein in'era da daditg enneu che fageva entochen quater tschuts ad onn. La nuorsa da **Tujetsch** - sco ins scheva. Oz eis ella buca pli. Ils pigurèrs ein vegni cun las nuorsas da bia pli dalunsch che mo neu da **Sontga Maria** e sur la fuorcla dil **Rondadura** entagiu els muletgs dallas puozas. Ils pasturs bergamascs vevan tut in'atgna urdadira. Ins di che la sentupada cun la glied indigena fuvi singulara, il lungatg tuttavia ed aschia.

Tujetsch, la val da passadi Cuolm d'Ursera

Igl ei in fatg indiscutabel che bunas relaziuns da traffic ein premissas fundamentalas pil svilup e per l'existenza d'ina regiun. Tgei valan rihezias e bellezias dalla natira, sch'ei maunca las comunicaziuns necessarias cul contuorn ed el lontan. Quei fatg ei buca novs. Gia ils Romans mettevan gronda peisa sin l'erecziun da vias bein carrablas. Mussaments veseivels anflein nus aunc oz, sco punts e parts da straduns che traversavan las **Alps** ed unevan la part meridiunala cun las tiaras dil mesanotg.

Ils emprems tschantaners

Il **Cuolm d'Ursera** u **Alpsu** cun siu bi lag alpin formescha da vegl enneu ina traversala da num denter damaun e sera. In mussament da presenza humana els emprems tschantaners en quei territori ei l'anflada (1977) d'ina muneida romana ord il temps 253-260 suenter Cristus, probablamein in'unfrenda d'engraziament per la reussida dil viadi prigulus e stentus sul **Cuolm** (tenor «Zur Geschichte des Oberalppasses» da Myriam Meyer, **Andermatt**). L'emprema menziun a scret dil **Pass Alpsu** ei d'anflar en in urbari dils «Habsburgers» 1303-1305. Da gliez temps numnava ins quei pass **Crispalt**. Il num **Crispalt** duei derivar dall'empunadira dils dus plaids «cris alta» ni «cripp alt». Sin la pli veglia carta stampada en **Svizra** (entuorn 1513) anfla ins la confirmaziun da quella tesa, numnadamein il num «**Crispalt der berg**». Ils Uranes numnavan il pass semplamein «**S'Bergli**», ils Tuatschins denton adina **Cuolm d'Ursera**. La via veglia menava sur **Tiarms**, giu a **Val Val** e da leu a **Milez** e **Caspausa** ni a **Tschamut**.

Ina secunda pusseivladad fuva la senda naven da **Tschamut** a **Surpalits** entochen sil **Cuolm d'Ursera** (2044 m sur mar). Pervia dallas cruschadas dallas duas vias numnavan ils Uranes quei liug «**s'Chryzli**». Quei num vegneva lu savens scumbigliaus cul schinumnu «**Krüzlipass**» che meina da **Sedrun** vi ella **Val da Fier**. Tgei pass che haveva pli baul la gronda muntada, l'**Alpsu** u il «**Krüzlipass**», ei grev da constatar. Probablamein decideva il viandont la ruta tenor l'aura e las relaziuns da neiv.

Ils missiunaris Columban e Sigisbert seigien tenor la tradiziun arrivai igl emprer ella **Val d'Ursera**. Sigisbert, il fundatur dalla claustra da **Mustér**, hagi lu fatg il stentus viadi sur l'**Alpsu** per purtar a nies pievel la nuviala dil cristianissem. Dapi il novavel tschantaner mavan representants claustrals savens sul **Cuolm** per liquidar lur fatschentas ed enfirmir ils ligioms cun la **Val d'Ursera**. Las relaziuns dalla claustra da **Mustér** cun la populaziun da l'otra vart dil **Cuolm** che han cuzzau plirs tschantaners (entochen 1649-1665), ein descrettas da pader Iso Müller en siu cudisch «Geschichte der Abtei **Disentis**».

Ils Tuatschins fagevan mintg'onn ina processiu (via dalla crusch) tocca la caplutta dil sogn **Gottard** (inaugurada ils anno 1230). Perencunter era mintga famiglia dalla **Val d'Ursera** obligada da tarmetter silmeins ina persuna alla fiasta da sogn Placi. Ins serimnava ad **Andermatt** ella baselgia parochiala e pelegrinava lu sut il comando da sis commembers dil Cussegl sur l'**Alpsu**, fagend mintgamai in paus ed ina viseta allas capluttas da sogn Gion, sogn Vendelin (im **Wyler**) e sontg Antoni sil **Cuolm** e lu ad entgins sanctuaris dalla **Val Tujetsch**. Probablamein savess il **Cuolm d'Ursera** raquintar d'enqual eveniment legreivel e nunlegreivel che capitava a caschun da quellas liungas processions.

El decuors dils tschentanners han ins lu negligiu la participaziun da quella tradiziun religiosa. Sco mussament d'attaschadadad alla claustra da **Mustér** e regurdientscha da temps vargai, visetan il mistral dalla **Val d'Ursera** cun siu salter ed actuar dalla dertgira mintga onn la fiasta da sogn Placi. Speranza semantegn quei bi usit.

In agen capetel ell'istoria dil **Cuolm d'Ursera** ei segir era l'emigraziun dils Vallesans ch'ei succedida el 13avel tschentanner. Muort surpopulaziun e miseria ha in grond diember da familias bandunau la patria, surmundond la **Furca** e l'**Alpsu** per secasar ellas regiuns differentas da nies hodiern cantun **Grischun**. Quei pievel luvrus e spargnus ha runcau e cultivau spundas e terrassas e dau nova veta a nossas cuntradas.

Il stradun da l'Alpsu

Suenter che pelegrins, berniers, marcadonts ed auters viandonts ein i e vegni duront tschentanners per trutgs, vias e sendas da greppa, han ins plaunsiu patertgau alla construcziun d'in stradun carrabel sur l'**Alpsu**. Ils studis e la preparaziun per quella ruta atravers han caschunau duront quasi treis decennis grondas discussiuns e diras debattas politicas sin terren federal, cantunal e communal. Secapescha ch'il punct cardinal era la finanziaziun. En ina zun interessanta lavur ella «Tuatschina», el numer 1971, relata Beat Ritter detagliadamein concernent preparaziuns, surdadas, cuosts e repartiziun da quels.

Finalmein, igl onn 1862, ha il cantun **Grischun** surdau las lavurs dil stradun cantunal naven da **Mustér** entochen **Sontga Brida** (emprema e secunda secziun) ed in onn pli tard, ils 15 da zercladur 1863, la part naven da **Sontga Brida** als confins dil cantun **Uri**. Il stradun era projectaus cun ina ladezia da 4,20-4,50 m ed ina pendenza maximala da 9%. In per cefras pon illustrar prezis e pagas da gliez temps.

Construcziun da mirs schetgs

(1. e 2. secziun) 7 600 m³ a 2.80 frs.

Lavurs da tratsch

(1. e 2. secziun) 31 500 m³ a 0.40 frs.

Schluppentar crappa e greppa

(1. e 2. secziun) 850 m³ a 2.50 frs.

Conform a quels prezis eran era las pagas dils luvrers fixadas denter 2 e 3 frs. a di.

La secunda secziun dil stradun, pia la part naven dils confins denter **Tujetsch** e **Mustér** entochen a **Sontga Brida**, ei vegnida construida d'in impressari tuatschin, numnadamein da Duri Battista Berther. El haveva luvrau vid l'erecziun da vias e punts en **Tiaratudestga (Baden e Württemberg)**. Associaus cun el era siu frar Giachen Martin Berther che veva medemamein fatg enconuschientschas da baghegiar ella **Bassa** ed en autras tiaras vischinontas. Quels dus frars ein era ils erigiders dil caraun grond da vart uranesa, sut il **Nätschen**. Quel vegn aunc oz numnaus «**Berther's Kehr**».

Las lavurs vid il niev stradun cantunal ein vegnidas exequidas spert e per cumpleina cuntentientscha dils surdaders. Gia igl onn 1865 cursava la posta da cavals regularmein naven da **Mustér** sur l'**Alpsu** entochen ad **Ursera**, **Gletsch** e **Brig**.

Il temps dalla romantica da carrotschas cun 5 e 6 cavals era arrivaus. Pign e grond admirava quels bials vehichels sco stivas, ils fermes tgulis e buca il davos il postigliun sil buc, sia mondura e siu tgiern da posta. Ins selegrava da quei traffic modern e preziaua las bunas pusseivladads da viagiare cun carr e cavagl sin quella biala via lada.

Cun auto e cul tren sur l'Alpsu

Ina midada radicala ha ei dau igl onn 1921. Tutenina ha igl auto da posta remplazzau carrosschas e cavals. Malgrad l'opposiziun dils Grischuns han ins dau liber igl onn 1925 il transit sur l'**Alpsu** per tut ils automobilists; in onn suenter ha la viafier dalla **Furca-Alpsu** aviert las portas per la comunicaziun denter il **Rein** ed il **Rodan**. Ils emprems proprietaris d'autos, velos ed auters vehichels, selamentavan meinsvart petramein da stuer carrar sin quella via naturala, chisada malamein e per part plein ruosnas. Ei fuva savens torturas per glied e vehichels. E tuttina viaggiavan ins pli spert e pli confortablamein che cun las carrosschas.

Sin vischnaunca ha **Tujetsch** bess «la lescha cantunala d'automobilists» ver treis ga, numnadamein 1925, 1927 e 1929.

Ch'il Pass da l'**Alpsu** ha era ina gronda muntada strategica, ein ils menaders da noss'armada vegni pertscharts duront la davosa uiara mundiala. Bein ord quei motiv han ins baghegiu en tutta prescha las gallarias sil **Cuolm d'Ursera** e dadens **Tschamut** (1939-45) e slargau il stradun, principalmein davart grischuna, naven da **Sontga Brida** entochen sill'**Alpsu** (1941-47). La crappa pils mirs vegneva tagliada en **Plaun Pardé**, dadens **Camischolas**, e transportada da leu sil plaz da lavur.

Contemplond oz la situaziun dil stradun cantunal atras la **Surselva** savein nus constatar che quel sesanfla, cun pintgas excepziuns, en in fetg bien stan, sin l'entira lunghezia betunaus ni asfaltaus. Nus renconuschein quei fatg ed engraziein allas instanzas federalas e cantunalas ch'ellas han dau suatientscha allas diversas interpellaziuns e postulats che pertuccan correcziun da quei stradun, d'untgidas e megliuraziuns trals vitgs.

Casas d'albiert sill'Alpsu

Il traffic permanent sur l'**Alpsu** ha animau entginas famiglias da nezegiar la caschun per ereger casas d'albiert sil **Cuolm d'Ursera**. Alla fin dil davos tschentaner ha Leonard e pli tard Julius Christen baghegiu davart encunter sera dil lag in hotel cul num «Kur- und Posthotel Oberalp au Lac». Entuorn ils anno 1920 ei quei hotel vegnius acquistaus da Alderich Meyer. Enconuschents ei il hotelier «Miggi» Meyer, in um original, versaus en plirs lungatgs che fageva era guid da muntogna e scolast da skis. Denter ses renomai hosps ha el saviu beneventar igl onn 1921 il davos imperatur austriac, Carli I. Cun plascher e luschezia raquintava il «Miggi» da quei niebel hosp cun sia suite e dil Cabriolet luxerius, cul qual el carrava sul pass.

Suenter paucs onns ha la famiglia Nager, proprietaria dil hotel Sonne ad **Andermatt**, cumprau il hotel, fatg midadas e numnau el «Hotel Oberalpsee». Els han dirigiù quella casa entochen igl unviern 1951. Ina nauscha lavina ha destruiu il hotel totalmein e Paul Nager cun sia consorta Attilia ein vegni satrai sut las nevas e stuiu murir, probablamein sut circumstanzias crudeivlas (20-1-1951). Oz vesan ins mo aunc in per restonzas dils mirs da quei hotel.

Igl onn 1933 ha dunna Maria Nager (morta 1966) baghegiu al pei dil **Calmut** il restaurant «Piz Calmot» e dirigiù quei menaschi cun capientscha e perseveronza aschi ditg sco las forzas e la sanadad han lubiu. Anno 1964 han ils frars Russi d'**Andermatt** acquistau quella casa ch'ei lu pli tard vegnida scarpada giu. En siu plaz han ins erigiù igl onn 1977 ina casa nova cun in grond restaurant, ina stupenta e gronda sala, terrassa (circa 120 plazs) ed entginas combras per hosps. La fatschenta vegn dirigida cun bien success dallas duas famiglias Russi.

Da vart grischuna han Florentin Cavegn e Placi Mathias Berther acquistau igl onn 1894 la tegia da vinars sill'**Alpsu**. Cheu han els entschiet a vender las empremas bubrondas, denter auter gervosa da **Lucerna**. Florentin Cavegn ha lu successivamein engrondiù sia tegia ed aviert igl onn 1910 l'ustria ed il hospezi. Ils anno 1929 ha el baghegiu ina pulita sala sco annexa. In cantun da quella stat sin territori uranes. La famiglia dils Florentins ha menau la fatschenta comunablamein entochen 1941. Ord partiziun ha la feglia Catrina Soliva-Cavegn lu surpriu il menaschi ch'ei vegnius surdaus cugl onn 1963 al fegl Placi Soliva-Gartmann. Quel ha schau renovar la casa totalmein, aschia ch'ella

sesanfla oz en in bien stan. Grazia alla buna cuschina ed al menaschi bein organisau flurescha la fatschenta e porta ils fretgs da lavur endinada.

Il **Pass dall'Alpsu** ha manteniu sia muntada sco ligiom denter damaun e sera. Il traffic silla via e cun la viafier s'augmenta onn per onn e quei principalmein suenter l'erecziun dils tunnels dil **Munt Avellin** e dalla **Furca**. A **Caschinutta** essan nus ligiai cun il stradun naziunal (nord-sid). Bunas comunicaziuns ein e restan premissas fundamentalas per in saun e bien svilup, priu ch'ins fetschi dretg diever dad ellas.

Igl εμπrem auto en Tujetsch

Sche nus dein in'egliada anavos sils onns trenta, seregurdein nus ch'ei deva da gliez temps aunc negins vehichels a motor e neginas maschinas agricolas en nossa val, strusch velos. Ei fuva tut ruasseivel. Ignazi Monn da **Sedrun** ei staus in pionier, il proprietari digl εμπrem auto en **Tujetsch**.

Ils 2 d'october 1934 serenda Ignazi plein iniziativa e cun tutta curascha a **Cuera** per absolver l'autoscola ed acquistar la lubientscha da far il manischunz. Sco gia menziunau, ha ei da lezs temps trentels duvrau in tschuat curascha per ughegiar quei pass. A **Cuera** lavura il Nazi in tempset en ina garascha per aschia empender empau las funcziuns digl auto. Cun strusch 19 onns fa el igl examen e retscheiva la legitimaziun da carrar cun auto. Primarmein ha el l'intenziun da cumprar in auto da vitgira. Suenter empau ponderaziun sedecida el lu da cumprar in auto da persunas, in Chevrolet (ocasiun) per la summa da 1000. - francs. El ha vuliu far il taxist. Il pass ualti gagliard, quasi ina sensaziun pils Tuatschins. Cun ina certa luschezza arriva el il settember 1935 cun siu vehichel a **Sedrun**.

Sco Ignazi raquenta, hagi el mai emblidau quei di. In trest eveniment ei restaus ad el en buna memoria. Ei fuva il di ch'ins ha satrau la regina Astrid dalla **Belgia** ch'era sedisgraziada cun auto a **Küssnacht (Sviz)**. Cun siu Chevrolet viseta Nazi Monn il liug dalla disgrazia e contempla tut consternius la tribuna ornada cun flurs e tschupials agl ur dil **Lag dils quater Cantuns**. Quei ha fatg impressiun sigl giuven autist.

La primavera digl onn 1936, suenter haver absolviu la scola da recrut, venda el siu Chevrolet per 1000. - francs e cumpra in Fiat 522 da sis plazs per in prezi da 3200. - francs, in tschuat daners da gliez temps. Ussa basegna ei far igl examen sco taxist e quei gartegia. Cun quei vehichel cursescha il Nazi entochen igl onn 1942. Onns d'uiara, meins en e meins ora tucca ei da far survetsch militar e la lavur maunca. Ei dat schiglioc aunc enqual difficultad. Tgei fastedis dat ei, sch'il motor digl auto va buca en la damaun? El ei persuls e sa buca, nua sevolver per agid. Pitgiras e travaglias dat ei, sch'igl auto sfundra en ina chinetta, ni sch'ei dat schiglioc incaps en quellas schliatas vias, principalmein duront igl unviern.

Secapescha ch'ils organs dalla viafier vesan buca ton bugen la concorrenza digl auto, num ch'ei basegni da gidar els ord la miseria, cu la lingia ei interrutta ni bloccada. Lu tucca ei da segidar per transportar ils passagiers e la posta da **Sedrun** a **Mustér** ed anavos. Il prezi da transport munta a circa 50 centims per km. Las segiradas ein stadas da gliez temps ualti caras, il benzin raziunaus. Las spesas consumeschan quasi las entradas. Tgei far? Il Nazi sedecida da vender il vehichel. Ins sedamonda: Eisi stau bein fatg ni forsa in sbagl? Preveder pil futur ei ualti grev.

Cun plascher raquenta il Nazi ch'el hagi saviu profitar da sia lubientscha dad ir cun auto duront il survetsch als cunfins. El hagi giu la cuida da tgamunar giul **Tessin** duront in pulit temps il Mercedes dil capitani Reif dalla cumpagnia III/229. - Il giuven autist era spir plans. Suenter l'uiara fa el aunc igl examen per menar autos da vitgira. Denton dat ei outra lavur e Nazi sedecida lu definitivamein da schar far peiver la clamada da manischunz.

Oz ei la situaziun semidada radicalmein. Il svilup tecnic ha fatg in progress nunspitgau e la beinstonza ei carschida. Vehichels da tuttas sorts ed autists cattein nus en mintga streglia. Il traffic sin via crescha onn per onn e vegn gleiti insupportabels. Ils temps ein semidai e nus cun els.

Fontaunas

Archiv dalla vischnaunca da Tujetsch

Meyer, Myriam. Zur Geschichte des Oberalppasses. Andermatt 1979 (Manuskript)

Monn, Ignazi, indicaziuns orales

Ritter, Beat. Der Ausbau der Oberalpstrasse Disentis-Sedrun im Abschnitt Val Segnas-Val Bugnei. En: La Tuatschina, nr. 10, 1977

Ritter, Beat. Der Bau der Oberalpstrasse vor über 100 Jahren. En: La Tuatschina, nr. 11, 1977

Schmid, Theophil. Postulat betreffend Ausbau der Oberalpstrasse zwischen Disentis/Mustér-Sedrun. En: Grossratsprotokoll vom 28. Sept. 1971, S. 161-162; 25. Nov. 1971, S.316-317

La viafier dalla Furca-Alpsu

Entochen la secunda mesadad dil schenivavel tschentaner eran plitost carr e cavagl, sumaris e purtaders ils mieds da communicaziun. Cun l'invenziun ed erecziun da lingias da viafier ha ei dau ina gronda midada structurala dall'economia. Il traffic e commerci crescha era en nossas regiuns muntagnardas. Ins studegia differentas variantas da viasfier sur las **Alps**, sco per exempel l'idea d'ina lingia **Brünig-Grimsel-Brig, Luzern-Brünig-Oberwald-Bedretto-Airolo, Linthal-Lembra-Breil-Trun-Mustér** ed autras, lu era la traversala **Valleis-Uri-Grischun**.

Fundaziun dalla societad per ina viafier Brig-Furca-Muster (BFD)

Ils 27 da matg 1910 fundeschan ins a **Losanna** ina societad cul num «Compagnie suisse du chemin de fer de la **Furka**» (**Brig-Furca-Mustér**). Il capital d'acziun munta ad otg milliuns francs e deriva per gronda part dalla **Frontscha** e dalla **Svizra Franzosa**, medemamein il capital d'obligaziun egl importo da 30 milliuns. President da quella societad ei igl ambassadur franzos a **Berna**, cont d'Ormesson. Il cantun **Grischun** ei representaus el cussegl d'administraziun entras cusseglier guvernativ dr. Aluis Steinhäuser.

Ils 27 da schaner 1911 accepta il Cussegl federal il plan ed il mussament dalla finanziaziun da 38 milliuns ed ils 22 da zercladur entscheiva ins cun las empremas lavurs a **Naters**.

Igl onn 1912 occupescha ins pressapauc 3000 luvriers sil territori denter **Brig** e **Mustér**. Gia alla fin digl onn 1913 curseschan divers trens d'emprova sin certas lingias, sco per semeglia era denter **Sedrun** e **Mustér**.

Bein prestaziuns admirablas en in temps, nua ch'ins luvrava pli u meins senza maschinas. Digl'emprems viadi **Mustér-Sedrun** exista in interessant document che nus havein anflau el cudisch da hosps dil hotel Oberalp a **Sedrun**.

Ils 4 da november 1913 arriva la locomotiva BFD nr. 3 cun 5 carrs alla staziun da **Sedrun**. Probabel ei quei in summa igl'emprems viadi d'emprova. Tenor las notizias el numnau cudisch da hosps era

il tren partius da **Mustér** allas 14.40 ed arrivaus a **Sedrun** allas 16.30, quei cun retenidas en differentes loghens. Normalmein quintava ins per quei viadi 25 minutas. A quell'emprema excursiun ein 15 persunas presentas, denter quellas era in miedi, numnadamein dr. Stiafen Berther.

Acquist da dretgs e concessiuns sil territori dalla vischnaunca da Tujetsch

Per la suprastanza e la vischnaunca da **Tujetsch** ha l'erecziun dalla lingia da viafier dau in tschuat lavur supplementara cun correspondenzas e contractivas partenent trasse, dretgs, expropriaziuns e concessiuns. Per sustener e promover ils interess dalla vischnaunca en causa viafier **Brig-Furca-Mustér** elegia la radunanza da vischnaunca dils 16 da matg 1910 ina cumissiun che secumpona dils suandonts umens:

1. ils commembers digl «Oberkeit» en uffeci
2. genau Gion Antoni Berther, **Rueras**
3. Giachen Lorenz Caduff, fravi, **Rueras**
4. genau Tumaisch Berther, **Camischolas**
5. genau Gion Antoni Monn, **Sedrun**
6. Baseli Berther, **Dieni**

President Gion Felici Monn e statalter Hans Giachen Decurtins vegnan incaricai da contrahar culs representants dil Cussegl grond e cun las instanzas politicas regionalas en caussa viafier. Ei suonda in temps da contractivas intensivhas che pertuccan il project, la mesiraziun da schischom ed las expropriaziuns.

Ins damonda dalla vischnaunca il dretg d'astgar far crappa, gera e sablun gratuitamein ord ils vaus da nos uals. Quella damonda vegn tractada en ina radunonza communal dils 5 da fenadur 1911. La concessiun vegn ad interim refretga. Ins vegli igl emprem mirar, co ils impressaris ed ils organs dalla viafier corrispundien als giavischs arisguard expropriaziuns, midadas da plans ed aschia.

En in'ulteriura radunonza da vischnaunca dils 15 d'october 1911 vegn tenor protocol (punct 3) tractau e discussiunau il trasse dalla viafier. Ord il protocol:

3.«Dat il signur president rapport alla ludeivla vischnaunca che signur inschignier Solca cul signur inschignier districtual Ganzoni e sgr. inschignier Chessez, ils planisaders dalla viafier, seigien stai cheu per inspectar la lingia (trasse) dalla viafier projectada **Mustér-Brig** sin nies intschess e per era tedlar, tgei giavischs la vischnaunca hagi per midadas da trasse ecetera.

Suenter entginas conferenzas culs numnai signurs ei da part dalla vischnaunca vegniu exprimiu suandonts giavischs:

1. Che la lingia tras gl'uaul **Bugnei** vegni translocada tochen giusut la via vedra en.
2. Che la lingia tras gl'uaul da **Sontga Brida** vegni sbassada tochen giu tier il stradun, pressapauc sco igl ei vegniu stagiau ora la davosaga.
3. Ch'il «Bahnhof» a **Rueras** vegni, sche pusseivel, baghegius pli damaneivel dil vitg.»

Suenter che la ludeivla vischnaunca ha giu udiu ils differents giavischs che la suprastanza ha giu mess avon a quels signurs, ein ins generalmein stai cuntents da quellhas petiziuns.

Davart dils representants dil vischinadi da **Rueras** vegn exprimiu il giavisch ch'ins garegi dalla societad da viafier, ch'il «Bahnhof» a **Rueras** vegni sbassaus silmeins tochen giu las **Sorts** (baghetgs). Dapli vegn ei aunc da differentas varts pretendiu da furar il crest **Tschuppina** e pretender che la lingia vegni baghegiada suenter il **Rein**.

Ils organs forestals manegian da buca far midar il trasse projectau atras gl'uaul **Bugnei** per raschun ch'ins savessi cun quella caschun forsa far baghegiar la societad da viafier vias d'uaul egl uaul **Bugnei**. Generalmein ein ins dil meini che gliez seigi empau dubius ed ei seigi forsa meglier da far sbassar il trasse e schar baghegiar la societad ina via per il transport da lenna suenter (parallelamein) la lingia da viafier. Signur president dat rapport ch'igl inschignier dalla societad da viafier, Chessez, vegni aunc inagada a far in tur suenter la lingia e prender si midadas da trasse ni risguardar auters giavischs, aunc avon ch'ils plans definitivs vegnien. Suenter entgina discussiun en caussa concluda ins da surschar a mintga vischinadi da tarmetter ad ina tala uatga in ni plirs representants che mettien avon ils giavischs e las pretensiuns dils differents vischinadis.»

Ils 10 da mars 1912 sa il president comunicar alla radunonza da vischnaunca ch'ils plans dalla viafier **Brig-Furca-Mustér** seigien arrivai per nies intschess, naven dils confins dil cantun **Uri** entochen **Sedrun**, e che tals plans seigien deponi tier il president communal naven dils 11 da mars entochen ils 11 d'avrel 1912 per investa dad in e scadin.

Ord il protocol da vischnaunca dils 17 da mars 1912 legin nus il suandont:

«2. Fa il president enconuscent alla ludeivla vischnaunca ch'ei seigi, suenter esser stai entuorn cun ils plans dalla viafier en ils differents vischinadis e priu per notizia ils giavischs e las petiziuns concernent viadis e transits tras la lingia da viafier, aunc vegniu en treis petiziuns ni giavischs da natira publica.

1. Ch'ins petizioneschi tier la societad da viafier ch'ei vegni dau a **Tschamut** staziun enstagl «Haltestelle».

2. Ch'ei vegni dau per «Haltestelle» **Rueras** in indrez da cargar e descargar rauba. Che tala «Haltestelle» a **Rueras** vegni translocada tochen sut ils baghetgs da **Flurin** cun sbassar il trasse dalla lingia naven da **Camischolas Sura** anen.

3. Schebein la staziun per **Sedrun** dueigi vegnir translocada a **Sedrun** ni sch'ella dueigi restar a **Gonda** sco previu sin ils plans.

Suenter esser passaus tier la votaziun arisguard las sura numnadas petiziuns, concluda la vischnaunca:

1. Da petizionar per **Tschamut** staziun enstagl «Haltestelle».
2. Da petizionar, che la «Haltestelle» per **Rueras** vegni translocada tochen sut ils baghetgs da **Flurin** cun sbassar il trasse dalla lingia naven da **Camischolas Sura** anen e ch'ei vegni sin tala «Haltestelle» era dau in indrez da cargar e descargar rauba.
3. Arisguard la staziun da **Gonda/Sedrun** vegn ei, suenter haver tedlau ils differents meinis ed aviert la discussiun generala en caussa per **Gonda e Sedrun**, concludiu entras dumbraziun cun 97 encunter 73 vuschs, che la staziun **Sedrun/Gonda** dueigi restar sco previu els plans a **Gonda** e buca vegnir translocada a **Sedrun**.»

La questiu partenenent il plaz dalla staziun **Sedrun e Gonda** ha aunc dau dabia da tschintschar. Ella ei aunc vegnida reponderada en ina radunonza communal dils 8 d'avrel 1912, denton senza midar il conclus anteriur da baghegiar la staziun a **Gonda**. Liungas e ualti diras contractivas denter ils organs dalla viafier e la vischnaunca dat ei concernent prezis d'expropriaziun. La societad offerescha alla vischnaunca 15 centims il m² per pastira, cumpru tuttast incunvegrientschas, e 20 raps il m² per terren d'ual, cumpru tutta meinsvaleta dalla lenna per stuer pinar igl uaul aunc buca madirs e per part aunc en regiuvinaziun e cun la cundiziun che la lenna seigi sin la fin da fenadur 1912 giud il trasse dalla lingia sin donn e cuost dalla vischnaunca. Ultra da quei seigi la societad aunc intenziunada da schar vegnir tier alla populaziun indigena ina reducziun dallas taxas encunter ina furniziun gratuita da material da baghegiar, numnadamein crappa e sablun sin terren da vischnaunca.

La radunonza da vischnaunca (3-6-1912) accepta buca quella purschida e tarmetta alla societad ina risposta negativa.

Ils 7 da fenadur 1912 concluda la radunonza communal da dar alla societad dalla viafier **Brig-Furca-Mustér** la lubientscha da baghegiar sut cundiziuns, las qualas dueigien vegnir tschentadas si per mauns dalla ludeivla vischnaunca e dalla cumissiun stada eligida a sias uras per l'expropriaziun.

Quella cumissiun semetta ussa senza targlin alla lavur e gia ils 14 da fenadur sa ella presentar alla radunonza communal in'entelgientscha fatga en ina conferenza dils 12-7-12 a **Trun**. - Suenter quella orientaziun concludan ins d'approbar tala entelgientscha cun la cundiziun ch'ins metti era a scret el contract definitiv certas caussas ch'ei vegnidas tractadas a bucca.

En in'ulteriura radunonza da vischnaunca dils 4 d'uost 1912 fa il president communal enconuscent alla ludeivla vischnaunca ch'ils plans dalla staziun **Sedrun/Gonda** seigien deponi tier il president naven dils 5 entochen ils 15 d'uost inclusiv ad envesta generala e per dar en petiziuns ni giavischs da natira publica. Ord il protocol suandont:

«Plinavon metta il president en discussiun la damonda arisguard igl imponer taglia directa sin rauba, fadigia e virila. Suenter entgina discussiun en caussa, concluda la vischnaunca senza opposiziun da metter si suandontas taglias directas:

1. Sin rauba e fadigia 50 centims pro 0/oo a norma dalla gliesta da taglia cantunala.
2. Taglia virila 1 franc per um.»

Tenor la taxaziun dils 15 da november 1913 e dils 15 d'october 1914 entras igl uffeci forestal cirquital (forester cirquital Giusep Huonder) eisi vegniu pinau ni donnegiau suandonta lenna:

I.Uaul **Bugnei**, taxaziun dils 15 da november 1913

Lenna mesirada sil depot	donnegiada fetg	79 tocs = 51,08 m ³
Lenna deponida sper		
la cava da crappa	donnegiada pauc	19 tocs = 14,67 m ³
	donnegiada fetg	44 tocs = 25,80 m ³

Lenna dismessa totalmein		5 tocs = 3,05 m ³
Lenna ordeifer ils depots	donnegiada mo pauc	82 tocs = 63,59 m ³
Lenna ordeifer ils depots	donnegiada fetg	86 tocs = 54,71 m ³

II. Uaul **Sontga Brida**, taxaziun dils 15 d'october 1914

Lenna deponida dadens e dador	donnegiada pauc	141 tocs = 83,32 m ³
Sontga Brida e sper la via da Milez	donnegiada fetg	54 tocs = 21,90 m ³

Da quei quantum lenna ha la firma Specia Barboca surpriu 172 plontas cun ina mesira da meins che 16 cm diameter. Medemamein ha la societad da viafier surpriu 137 plontas satellas cun ina mesira da 6,62 m³. Per ulteriurs donns vid igl uaul a **Sontga Brida** han ins bonificau alla vischnaunca la summa da frs. 367. -.

La societad da viafier ha pagau ora ina indemnizaziun per praus e pastiras da 118 606. - francs. Pli u meins han ins contrahau cun mintga proprietari ed ei secunvegnius.

Schliata partenza (entschatta)

Cun l'entschatta dall'Emprema uiara mundiala, igl emprem d'uost 1914, dat ei ina midada radicala per nosa viafier. Las lavurs vegnan per part sistidas ed ins fa mo aunc transports pil militer. Culs 3,5 milliuns che stattan a disposiziun san ins finir il tunnel dalla **Furca** (25-9-1915). Sulettamein il traffic denter **Brig** ed **Oberwald** mantegn ins naven da 1919 e quei cun grond agid dalla Confederaziun. Ils deficits annuals creschan onn per onn e 1923 decida la dertgira federala d'arver il concuors dalla societad. Duront quei temps (1921-1925) cursescha igl auto da posta sur l'**Alpsu**.

Il trasse dalla lingia da viafier ei en in miserabel stan, las rodaias ein spir ruina e carschidas en cun pastg e zercllem. Ord ina corrispondenza da gliez temps san ins leger il suandont:

«Sco giuvens scholars eran nus en in quartier sin in mises dalla biala **Val Tujetsch**. Mond a spass sin la lingia da viafier selvadia e surcarschida, stueva ins constatar, co tut mava en decadenza e negin ughegiava da crer e sperar ch'ei curseschi aunc inaga trens sul **Cuolm d'Ursera**.»

Ins s'occupava gia cul patratg da spazzar las installaziuns fatgas. Quella situaziun pagadusa dalla viafier ed il quitau per l'impurtonza dalla traversala da damaun encunter sera ellas alps per nosa populaziun muntagnarda lai buca ruaus ad ina gruppa d'umens cun capientscha e senn da responsabladad.

Vinavon cun forzas unidas

L'iniziativa per la sanaziun vegn dil directur dalla viafier **Visp-Zermatt**, August Marquerat. Ei vegn formau in sindicat, dil qual pliras vischnauncas, cantuns e corporaziuns fan part. Ins rabetscha ensemen la summa da 1,75 milliuns francs. La Confederaziun segida. En in messadi dils 17 da fevrer 1925 damonda il Cussegl federal dall'assemblea federala in credit da 3,5 milliuns per mantener nosa viafier ellas alps. Cun in capital da biabein 5 milliuns e cun la segironza davart la confederaziun da conceder tscheins favoreivels e surprender eventuels deficits, astga ins patertgar alla realisaziun da reconstrucziun e sanaziun.

Participaziun dalla vischnaunca da Tujetsch

Ils habitonts dalla vischnaunca da **Tujetsch** demuossan fetg grond interess per la reavertura dalla viafier e sustegnan tuttas stentas e mesiras en quella direcziun. Quei demuossa la suandonta brev, scretta ils 26 da november 1924 da president Vigeli Berther.

Ils 17 d'avrel 1925 seconstituescha a **Berna** ina nova societad cul num «Viafier-**Furca-Oberalp**» cun in capital d'accias da 3,3 milliuns. Il cussegl d'administraziun dumbra 11 commembers, 2 representants dalla viafier **Visp-Zermatt**, mintgamai 1 representant dallas viafiers **Val Scalina** e Retica, 2 commembers dalia Confederaziun e 3 commembers dils cantuns **Valleis**, **Uri** e **Grischun**. President da quella societad ei il directur d'ina banca a **Losanna**, Ch. E. Masson. Alla testa dall'interpresa nomineschan

ins sco directur August Marguerat e sco cauinschignier Erminio Bernasconi cun ulteriurs inschigniers dalla viafier retica ed auters (M. Conrad, Schneller, Gottefrey e Durisch) che vegnan incaricai cun las lavurs da reconstrucziun. Cun slonsch, entusiassem e perschuasiun semettan quels umens alla planisaziun ed organisaziun. En in temps extraordinari cuört ein las lavurs da reconstrucziun finidas.

Ord ina brev dalla direcziun dalla viafier retica dils 6 da fenadur 1925 drizzada a president Vigeli Berther san ins constatar che la viafier cursava provisoricamein gia il meins da fenadur 1925 denter **Sedrun e Muster**.

Cuntegn dalla brev (translatu libramein)

Cuera, ils 6 da fenadur 1925

Signur president communal

Vigeli Berther

Tujetsch

Nies cauinschignier Bernasconi ha surdau a nus Vossa brev dils 5-7-1925 cun la damonda da saver transportar ils pelegrins da sogn Placi, ils 11 da fenadur, cul tren e tgei quei viadi cuosti. Cun quei ch'igl ei buca lubiu a nus da transportar persunas e raubas encunter pagament avon la collaudaziun uffiziala entras il departament da viafier federala, offerin nus a Vus in tren cun 80 plazs da seser e quei gratuitamein. La suprastanza communal da **Tujetsch** ha da procurar che buca pli che 80 persunas fetschien diever da quei transport e ch'ils passagiers observien las ordinaziuns dil personal dil tren. Signur cauinschignier Bernasconi sco capo da construcziun dalla viafier **Furca-Alpsu** ei vegnius incaricau cun l'execuziun e survigilanza da quei tren.

Cun perfetga stema Viafier retica

Il directur G. Bener

L'avertura uffiziala dil toc **Sedrun-Mustér** ei succedida ils 15 da settember 1925. La direcziun dalla viafier retica envida ina partida hosps ad in gentar el hotel Cruna a **Sedrun**. Cun quella caschun scriva directur Bener a president Vigeli Berther ina brev cun suandont cuntegn:

«Jeu envidel Vus sco president communal a quei gentar ella Cruna. Ei vegness en scadin cass beneventau, sche Vus savesses schar cantar ina gruppa da scolars ina canzun da beinvegni tier l'arrivada dil tren a **Sedrun**».

La lingia denter **Andermatt e Mustér** ei vegnida surdada al traffic ils 19 da zercladur 1926 ed ils 3 da fenadur han ins saviu inaugurar l'entira lingia denter **Brig e Mustér**. Alla festividad ad **Andermatt** ha cusseglier federal dr. Haab numnau quei eveniment sco in di da legria, d'engraziament e da speranza. El punctuescha specialmein la comunicaziun directa denter **Rein e Rodan** ed il ligiom denter Romontschs ed Alemans e Franzos. Las perlas da nossas valladas muntagnardas seigien ligiadas.

Ils Tuatschins han era buca schau per breigia da beneventar e salidar ils hosps dalla festividad sin lur intschess. Quei resulta ord ina brev dil president dil cussegl d'administraziun dalla Furca Alpsu, Masson, scretta al president communal da **Tujetsch**.

Quel scriva denter auter:

«Nus lessen buca targlinar pli ditg d'engraziar a Vus pigl amicabel beinvegni ch'ei vegnius purschius a nus a caschun dalla festividad d'avertura dalla viafier. Nies cussegl d'administraziun sco era ils hosps ein stai incantai. Igl ei stau per tuts in grond plascher da tedlar Vos chors che han schau resunar cun tala expressiun las bialas canzuns tuatschinas.»

El supplichescha d'empalar vinavon quei engraziament a tut tgi che ha collaborau a quella fiasta d'avertura.

Temps burasclus e decisivs

Cun l'entschatta dalla Secunda uiara mundiala (1-9-1939) semida la situaziun e consequentamein era il menaschi e la historia dalla viafier **Furca-Alpsu**. Ins vegn

attents dall'impurtonza strategica dalla communicaziun sul **Cuolm d'Ursera**. Ladinamein entscheivan ins cun l'electricaziun per vegnir independents dalla cotgla e digl exteriur (finiu 1942). Ins fa tut sforzs per tener aviert la lingia sul **Cuolm** duront igl entir unviern. Per quei motiv vegn ei erigiu en prescha gallarias, lavineras e tunnels sill'**Alpsu** e per part al pei dil **Calmut**, dadens l'aua da **Val Val**. Igl unviern 1944/45 vegn il traffic regular cul tren sul **Cuolm d'Ursera** aviarts, denton cun grondas difficultads e cun prighels. Ils immens cuosts per dismetter la neiv surpren l'armada. Cun la fin dall'uiara e la demobilisaziun vegn il contract concernent il tener aviert il toc **Realp-Andermatt Mustér** buca renovaus pli. Il traffic sur l'**Alpsu** vegn restrinschiu e per part sistius. Sulettamein pil toc **Sedrun-Muster** mantegn ins in urari regular.

Naven da 1945/46 curseschan, aschilunsch sco pusseivel, dua pera trens duront igl unviern naven dad **Andermatt** a **Mustér**. Ils cantuns **Grischun**, **Uri** e **Valleis** dattan ina contribuziun annuala da 15 000. - francs per quei manteniment.

Suenter la concessiun dallas auas all'Ovra electrica Reinanteriur igl onn 1955, san ils organs dalla viafier **Furca-Alpsu** puspei trer flad empau pli lev. Ins survegn agid dalla confederaziun e sa aschia cumprar ina partida carrs ed igl inventari necessari per surprender ils transports da material e cement per ils gronds stabiliments sil territori dalla vischnaunca da **Tujetsch** (vias, centrala sutterrana, mirs da fermada ed aschia). Cun l'erecziun da lavineras a **Rusas** e **Scharinas** segirescha la vischnaunca da **Tujetsch** il traffic siviars l'**Alpsu**. La viafier da sia vart prolunghescha il tunnel alla spunda dil **Calmut**.

Sco en auters loghens ei igl unviern 1951 staus per la viafier **Furca-Alpsu** in onn da catastofas. Las nevadas dil schaner e fevrer caschunan donnuns e disturbis maisecattai. Sin liungs tschancuns vegnan ils conducts electrici scarpai naven, il trasse donnegiaus considerablamein e la punt da **Val Clavau-sura** (sur **Selva**) devastada totalmein. Il traffic sin la lingia denter **Nätschen** e **Sedrun** resta serraus naven dils 19 da schaner entochen ils 15 da zercladur 1951. Ils donns muntan a 450 000. - francs che ein vegni curclai cun la contribuziun da 325 000. - francs entras la confederaziun.

Agid e sustegn dil stadi

- 1961 - La viafier **Furca-Alpsu** fusiunescha cun la viafier dalla **Val Scalina**. La direcziun ed administraziun schai els mauns da directur Stefan Zehnder. L'interpresa sto vegnir modernisada ed ins tschenta alla confederaziun la damonda da contribuziuns e credits per la megliuraziun tecnica e pil manteniment dalla **Furca-Alpsu**, quei sin fundament dils artechels 56-61 dalla lescha da viafier. Ils mulins da **Berna** molan plaun ed ei drova bia instanzas avon ch'ins detti suatientscha al clom d'agid.

Ils 29 da mars 1967 tarmetta il departament federal da traffic ed energia alla viafier **Furca-Alpsu** ed als cantuns **Grischun**, **Valleis** ed **Uri** finalmein ina cunvegientscha.

Igl ei previu da reparter ils cuosts pil program urgent sco suonda:

La Confederaziun surpren 75% 18,00 milliuns

Il rest vegn repartius tenor ina clav sils 3 cantuns:

Cantun Uri	15 %	0,90 milliuns
Cantun Grischun	24,5%	1,47 milliuns
Cantun Valleis	60,5%	3,63 milliuns
Total	100,0% frs.	24,00 milliuns

Ultra da quei ston la confederaziun ed ils cantuns surprender il deficit dalla viafier. Per garantir in bien funcziunament dalla viafier basegna ei ereger novs stabiliments ed indrezs. Plinavon eisi previu da cumprar 20 carrs da personas e 16 carrs da transportar autos. Igl onn 1976 vegn ei concediu per quei intent ina emprema quota da credits egl importo da 19,8 milliuns, dils quals il cantun **Grischun** surpren 727 650. - francs. Dus onns pli tard, 1978, concedan ins danovamein credits e subvenziuns egl importo da 37,5 milliuns per baghegiar ora staziuns, cumprar locomotivas, carrs, midar binaris, installar indrezs da segironza ecetera. Al cantun tucca ei da pagar 1,244 milliuns.

Nossa viafier **Furca-Alpsu** ademplescha impurtontas funcziuns. Quellas sa ella ademplir mo lu, sch'ils stabiliments ed indrezs vegnan adina puspei adattai al temps. Cunquei che la viafier vegn strusch a far gudogn e ch'ei dat cuntinuadamein renovaziuns e cuosts da manteniment, sto ella vinavon quintar cun agid davart dalla confederaziun e dils cantuns cumpigliai. Gest en nies cantun muntagnard cun las numerusas valladas allontanadas ein bunas communicaziuns da muntada essenziala. Senza quellas aveinas da veta eisi buca pusseivel da mantener nossa populaziun ed exlaus da promover e fructificar feconomia. Leutier contribuescha il tunnel da basa **Oberwald-Realp** segiramein era sia buna part, quei malgrad tuttas surpresas e malemperneivladads.

Influenza dil tunnel dalla Furca sil svilup e traffic dalla FA (Furka-Alpsu)

Ils 25 da zercladur 1982 han ins inauguru il tunnel da basa **Oberwald-Realp**. Sco novaziun d'impurtonza per nossa regiun eis ei da menziunar il transport d'autos naven da **Sedrun** ella **Val d'Ursera**. Quei survetsch davart dalla viafier vegn beneventaus, era sche la capaciad en cumparegliaziun culs transports atras il tunnel dalla **Furca** ei fetg restenschida. La lunghezia dalla lingia, la differenza d'altezia ed ils binaris cun rodas dentadas, lubeschan mo in pign diember da carrs cargai. Ch'il transport d'autos sur l'**Alpsu** ei da gronda impurtonza per ils passagiers e per la viafier illustreschan entginas cefras:

	tocs	entradas
1983 transport d'autos sur l' Alpsu	2 125	126 123. - frs.
1984 transport d'autos sur l' Alpsu	2 625	157 726. - frs.
1985 transport d'autos sur l' Alpsu	3 073	184 404. - frs.

Dapi l'avertura dil tunnel da basa **Furca** registreschan ins in summa in considerabel carschament da frequenzas da persunas e da traffic e da raubas. Da zun gronda muntada ei il «Glacier Express» che cursescha naven dall'**Engiadina** entochen a **Zermatt**.

Quei tren special ha transportau:
 igl onn 1984 = 120 000 persunas
 igl onn 1985 = 180 000 persunas
 igl onn 1986 = 200 000 persunas

L'avertura dil tunnel dalla **Furca** ha era effectuu considerablas midadas dalla structura da clientella. Quei demuossa suandonta cumparegliaziun dallas entradas d'avon e suenter l'avertura:

	1982	1983	1984	Midadas 82-84
Traffic da persunas singulas (senza abonnements)				
1. classa	667 112	926 762	1 172 034	+ 75,7%
2. classa	6267866	6695611	7 501 622	+ 19,7%
Viadis da gruppas				
1. classa	137 396	272 658	455 762	+231,7%
2. classa	1 441 588	1 832 392	2274465	+ 57,8%
Viadis cun abonnements				
1. classa	290	208	204	
2. classa	1052643	1 215 588	1 193 686	+ 13,4%

Punts e viaducts dalla viafier **Furca-Alpsu** sil territori da **Tujetsch**

viaduct da Val Val	construcziun da mir	lunghezia	44,6 m
viaduct Val Runtget	construcziun da mir	lunghezia	42,3 m
punt da Val Clavau-sura	construcziun da fier	lunghezia	23,8 m
viaduct Val Giuv	construcziun da mir	lunghezia	61,4 m
punt Val Mila	construcziun da fier	lunghezia	16,7 m
viaduct Val Strem	construcziun da mir	lunghezia	42,0 m
viaduct Val Run	construcziun da mir	lunghezia	34,5 m
viaduct Val Bugnei	construcziun da mir	lunghezia	117,5 m

Lunghezia dils tunnels e dallas gallarias **FA Furca-Alpsu** sil territori da **Tujetsch**

gallaria Alpsu	731 m
tunnel sill' Alpsu	214 m
gallaria Alpsu	71 m
tunnel II Calmut	960 m
gallaria I Calmut	357 m
tunnel I Calmut	328 m
gallaria II Calmut	410 m

Lunghezia dallas rodas dentadas naven dall'**Alpsu** entochen **Sontga Brida** 6118 m
Pendenza 112‰

Fontaunas

Archiv dalla vischnaunca da Tujetsch. Scatla nr. 129

Botschaften des Kleinen Rates an den Grossen Rat, H. 1, 1967, S. 56-60; H. 1, 1978, S.154-162

Furka-Oberalp. Von der Rhone bis zum Rhein. Hrsg. von Hans Schweers. Aachen 198 1. (Bahnen der Berge; 1)

Ritter, Beat. 50 Jahre Furka-Oberalp-Bahn. En: La Tuatschina, nr. 1, 1977

Seidel, Kurt. Das grosse Buch der Furka-Oberalp-Bahn. Wissenswertes und Technisches, Ernstes und Heiteres aus der ereignisreichen Geschichte einer einzigartigen, zukunftsorientierten Schmalspurbahn der Schweizer Alpen. Mainz 1982. (Dokumente zur Eisenbahngeschichte; Bd. 25)

II La val e sias parts

Dadens igl uaul

Ils logs dalla val, aschidadir denter il **Cuolm d'Ursera** e las **Nislas**, ein singulars e la glied dils habitadis ha mintgina sia atgnadad.

La stretga da **Sumsassi** sparta enzatgei da num, numnadamein ils habitadis da **Selva**, **Sutcrestas** e **Tschamut** dils uclauns e dallas uclivas siper las costas da **Giuv** e dil vegl signeradi da Pultengia. E la cresta ei surcarschida da pegns e denteren enzatgei larischs, in uaul spess sternius sin la tuva che vegn dil funs dalla val e tonscha entochen la largia da **Scangleras**. A per cul stradun semaglia la viafier atras las plauncas e va ensi encunter il cuolm. Els plats da **Carmihut** sefa in'aura emperneivla e sontga Brida pren partida per las mummas che spetgan ed ha quitau dils aviuls. Las numerusas flurs piertg e lur cazzolas fan clar ed in fein manedel da scuatels semadira. Entadem **Carmihut** sesmula il terren darschalaun dallas vals e va afuns ellas buolas dil **Rein**. Cun dir ch'ins segli per cass sur la greppa giu en la buolatscha fan ins pressiun sin enzatgi. - Mo scochemai dian ils praus da **Tschavitg** da prender si lev. Giudapeis agl uaul da **Rusas** stat il vitg da **Selva** siper la spunda e las casas miran agraden als garvers da **Nual** e **Muot** che sestendan enviars ils sumfils dil **Pez dal Maler**. Las tendas e tendas striaunas envidan speranzas e las sferas alvas digl unviern dattan meinsvart da panzar.

Nossadunna da **Sutcrestas** ei buca ida naven; ella ei ella baselgia da **Selva** e fa adatg. Suenten la lavina dalla **Val Ruinatsch** dils anno 1808 han ils avdonts da **Selva** priu il refugi a **Sutcrestas**. Buca per ditg ein els seschai sil niev uclaun; ei fuvi memia malcumadeivel ed il schar encrescher ha ugliau els a casa. Da **Sutcrestas** anora munta ina rodonda migeivla viers il vitg da **Tschamut** ch'ei secavigliaus giu da vart dretga e da vart seniastra dalla via. Davos la rodonda atras igl iral dalla val percuora l'aua scarta dil **Rein** che seligia ella plattera profunda cun la stella aua giu da **Curnera**. Sidavon la val stat l'alpetta da **Cavradi**; omisduas alps han fatg atras ina enteifer ils tschentaners. Ils screts ein denter ils pupials egl archiv da **Tujetsch**. Cunquei ch'ils vischins dalla val han giu da daditg enneu alps da stiarner, han els negligiu ual omisduas. **Cavradi** han ils vischins d'anoragiu acquistau, ferton che la **Curnera** sezza ei ida els mauns dalla puraglia da **Faido**.

Ed ils pigurers ein vegni orasi dalla **Val Cadlimo** e sur la stgeina dil **Passo Vecchio** neu ed han paschentau lur muntaneras da sum tocca dem la val. Il contact cun la fumeiglia da sutensi e culs vischins neu da l'autra vart dils cuolms ha ora ed ora rabbitschau in tec variaziun alla glied da dadens igl uaul. Epi il menaschi sur il **Cuolm d'Ursera** vi? L'influenza digl element aleman ei buca stada pintga. Il pass ha fatg pli lartg e las schanzas ein carschidas. E la finala han ils vischins da **Tschamut** e giu in'atgna alp, l'alp **Tschamut**. Ton che la part sura da **Tujetsch** ei ina particla zun impurtonta. Ils mussaments ella nudauna a **Sedrun** dian.

Surtut - cura ch'ins tschontscha dil **Calmut**. La siala dil **Calmut** ei in tgiembel d'empermischun, sco il **Tabor** ed il **Garizim** en **Tiarasontga**. Cun quella cruscha messa sidretg che fa smarvigliar. Ils bustabs sin las costas da granit dian: «E montibus salus», plaids che secloman ella versiun dil liug: Dils cuolms vegn il salit. - Enten dir e star sissu ha enzatgi da sias uras fatg in survetsch alla populaziun muntagnarda. Sch'ins ha fatg valer la fermezia dalla glied dils cuolms e dallas vals. Ed ei tuchi da levgiar sia sort, la sort dil muntagnard, sinaquei ch'el sappi subsister sin in tschespet trentel ed enamiez ils prighels dalla muntogna.

Georg Baumberger stat ei scret sin la fatscha dil granit. E forsa ch'enzatgi sedamonda. Georg Baumberger (1855-1931) ei staus in politicher da num. El Cussegl naziunal eis el seprius en pil pievel ellas muntognas ed ha fatg ina moziun da sustener el cun plaid e fatg. El ch'ei staus oriunds da **Zug** ed ha fatg sia politica raschuneivla dil cantun **Turitg** anora.

En renconuschientscha da ses merets han ils habitonts dallas alps priu ina decisiun. Pil monument sez han ins tratg en consideraziun il **Mundaun** ed il **Calmut**. Cunquei ch'il **Calmut** ei sils confins digl **Uri** e dil **Tessin**, han ins anflau il **Calmut** per pli adattaus. - Cun caschun dalla inauguraziun dils 10 da fenadur 1932 ha sur Giachen Antoni Fetz,

plevon da **Sedrun**, detg in per bials plaids e schotg onns sissu, ils 26 da zercladur 1950, ha sur Stiafen Schuler, caplon a **Selva**, turnau a repeter e demussau engrazieivladad. Igl ei buca bi da dir als vischins da dadens igl uaul ch'els seigien mo da leu e «Tarleps». Il plaid «Tarlep» promovava e sustegn negin, anzi il plaid ha in tef e stgavo. La gliעד dil claus dadens la siara da **Sumsassi** ha runtga avunda. Il tschespet pretendeva d'abitar ed ils sbuaus e las lavinas dattan da lignar. Ton ch'il cumbat cuntinuau ei staus da muntada. Ed ils avdents da dadens igl uaul ein d'ina posa penetranta e rebattan, per eass ch'els vegnan pigliai en. Dils Alemans han els empriu da sevolver e da riscar la pial e neuasi dil miezdi ha zatgi rabitschau in tschallat sentiment. Ton ch'ins savess dir ch'els seigien gnurs e dirs enina, schebi ch'ina certa demananza carina ei buca da surveser.

E van per nitschuns

Era tschels onns ha ei magari maina vuliu vegnir terren. Ed il fein ei ius a fin ed ils purs han fatg calenders. Entochen viaden el meins da mars han ins stendiu cun empau strom. Epi ha ei tuccau dad ir per nitschuns.

Quei san ins maneivel s'imaginar.

Quels umens cun stravagls e ghetts che van giudavon ed en corda e dattan encunter **Darval** ed il stavel da **Buolettas**. Muni cun in blah ed ina faultsch battida cun in schalun da biabein trenta centimeters lunghezia. Schebi ch'il sulegl mo streha sur ils garvers da **Muot** vi, ha el tuttina sgarglientau il glatsch siper la grugna. Ils umens sesgreflan per la greppa entuorn, brauncan las cumas dils puschels verds e taglian datier dil tschespet. Ei ruchegia plaunet ed il di ei stuffis. E ... sch'ils calzers van suto, van ils umens sutsu. Sco il Gion Antoni ch'ei daus sur la greppa giu e cul tgau encunter la crappa e vegnius ordasenn.

Uras ed uras han els luvrau sco biestga e tuornan tard sur la surfisa dall'aua da **Tschamut** enviars il vischinadi. Mintgin cun in pentel nitschuns ch'els stendan e stendan cul fein giu dil pel.

Il fraud da schiembra

El fageva tema ad enzatgi, quei um d'ina carschientscha mediocra che metteva ora sias combas cruschas e mirava stgir. Pigl auter vess el dau ora l'olma e tut per scumpentar ils ses. Cun tgigerlems san ins buca trer vi endisch buobs ed ina buoba. Il bostger ei dalunsch e la finala san ins solidar el per suenter il tagl. - Senza pli bia pren el in per da ses giuvenasters e va alla grada en las vals da **Muot**, visavi ils aults da **Cavradi**. Il bab va ordavon sur la scala crap vi e l'entira cudria dat dils cugns si. La schiembra tschamaunca penda oremhora ed ils resgiaders secrein da memia. La plipart dalla lenna pinada scarsola ella profunditad amiez ils vadretgs. Zatgeininas dallas plantas sefetan tschuncanadas sils bauns dalla greppa. Ils fegls rescen e dattan afuns, ueglian las tschemas e la resgia gronda fa pintga canera sin la neiv stagnada. Enten pinar il tuorn mira il bab pliras gadas suto. Il trutg da **Miradas** ei miez nevius en ed il bostger vegn a ver auter da far che da spiunar ora ils fraudaders da lenna. Encadenai tuornan ils bests in suenter l'auter si dils tgamins ed ils luvrers mettan la lenna a bov. La rasena ei struschamein dil tut, ch'igl official da dador igl uaul dat neutier. Ils stravacs ella neiv muossan ora, nua ch'ils resgiunzs ein dai a dies.

«Riscau veis Vus tut, cumpogns che Vus essas!»

Il bostger ha detg bein schit.

Igl um dalla carschientscha mediocra stat uiersch e ses egls ein buca vegni pli sereins. Ed ei schabegia nuot. Entochen che la davosa buora ei a per cun las outras ed il bostger pren igl instrument e mesira.

Sedisch meters cubics, pinada senza lubientscha; igl um d'anora fixescha il prezi, diesch francs il cubic e da pagar cuninaga.

Allura eis el ius per siu fatg, il bostger, senza mirar anavos, schebein l'auter dall'egliada stgira stetti aunc uiersch. - Il transport cun sliusas scultas entochen a plaun **Miradas** ei ina pintga historia. Epi cun la suga sur la val vi amiez il plat da **Darval**. E cun stilar la schiembra a casa san las mugias emprender da trer. - Al bostger veva el dau da crer ina, numnadamein ch'el drovi la lenna per agen diever, da tablegiar la stiva ed il stebli ed in

per combras ed aschia. Enstagl eis el ius ina piazza da notg cul cavagl atras la val e rabitschau la schiembra entochen a **Tavanasa**. Per gie sorprender negin, veva el fatg en cun scrottas ils peis dil cavagl, mintgamai dad ir atras ils vitgs. Ed il quen fuva nuota vegnius ora schi da piertg; varga duamelli francs brut.

Igl ei stau critic

Lezs onns, ils anno trenta epi ual avon la secunda uiara. E conta glied ei stada o sils trentin, avon ch'ins prendi las armas ed entscheivi a far star in l'auter. Igl ei varghentau, schebi che bein enqualin ha tertgau da buca far ora las jamnas. Sco per semeglia la Maria, la dunna digl um ch'ei ius ellas vals a pinar schiembra u autroa a far uors. Ella cun ses endisch buobs ed ina buoba che saveva buca danua prender. La Maria, ina nata Deflorin giu da **Tschamut**, ch'ei sedustada cun peis e mauns, igl emprem da trer si la casada e silsunter dalla vergugna dils reps.

Ils banchers setenevan vid la schuba, quella schuba liunga ed onz stgira che curclava dil tuttatfatg ils calzers aults reviuils davonsi. Cura ch'ella mava cun ried siper gassa sisu il vitg da **Selva** ed encunter il stradun. Sut bratsch in sitget cun in techet strom lien per cavigliar suten. Sil plaz va la Maria afuns sil plumatsch per schanegiar ils caluns. Dus da ses buobs dattan neutier cun in benal plein crappa sco pugns ed era pli gronds, crappa ch'els han rut ord il grep silla spunda. Cul marti da dus tgaus manezza la Maria ch'ei dat o fiug. Ed ils ses segidan e tinglan ils bollers rasai ademplat sin la rasada da gera. Els van dapart e vegnan pigns sco ovs, ina crapparia malneidia da spir cantuns. Ella fa la manizzura e l'aura fa tgei ch'ella vul. Uras ed uras amiez in'untgida e l'ossa dils caluns fa mal. Ils buobs han ried e meinan neutier pli bia crappa che quei ch'ella damogna, ella ed ils auters manizzaders.

Vi da suentermiezdi vegn il vier Sep Antoni Venzin da **Clavaniev** e pren la mesira. In benal fil a streha ei in quart cubic e munta sin quater francs. In benal a di ei lavur stendida e quater francs ei ina summa. Zera vegn il vier a dar part il resultat agl inschignier. Avon che prender il tgiern dil telefon enta maun, vegn el a prender giu la capiala- pervia dalla reverenzia.

Ei tucca da seproverder

Ei tucca da seproverder avon la vegnida digl unviern. El ei liungs e malmaneivels, quei unviern el claus dadens **Sumsassi**. Il mument ch'ins siara la via dil **Cuolm d'Ursera** vegn ei tut quiet dadens igl uaul; allora s'ei silmeins da ver enzatgei da ruir. Il bab e ses mats ein vils tschenghels e fan draussa. Igl um dalla carschientscha mediocra e dallas combas uiarschas pretenda che la draussa seigi la megliera lenna da brisch. Ella seigi cuninaga secca ed hagi ina gronda calira. Aschia duront in di ora han els pinau in'entira largia ordamiez la costa, draussuna ch'els runan e caveglian e fan vaultas. En cadenadas cun terscheuls seleischnan ellas sco nuot sur la val vi e seplacchan els plats da **Tschamut**. Il bab ha schau sura.

El ei daus bein marvegl dils cugns si encunter la grugna da **Cavradi**. Sch'els ein sils ensolvers, fallescha el darar in, in buc ni in schetg denterora, ord il marighel dils camutschs. Ed amiez la vaulta sesegirescha la preda encunter enzatgi. La vaulta cul camutsch ei lu mintgamai quella che arriva entuorn las tschun sur la val vi. Quei san quels ch'ei al current d'enzatgei. La tatta Seppa sa dapli ed ha quitau. Entochen ch'il schiender vegn vid notg e lez ei generus cun ella.

Secapescha da sesez; la finala fa il survegilader da catscha siu fatg e vegn magari onz datier. Buca mo el persuls, persuls vess el fatg ellas caultschas, en cumpignia dil schandarm. Duront ch'els secaveglian giu e dattan vid las scatlas da sardinas, dat ei in siet, igl um dall'egliada stgira. Ina secunda enzenna ei danvonz; els ein omisdus scochemai sefatgs ord ils peis.

Il mussader ha survegniu la torta

La casa da scola da dadens igl uaul sesanfla a **Sutcrestas**; **Sutcrestas** ei enamiez ils vitgs da **Selva** e **Tschamut**, ils onns dalla crisa gronda ina detga scola cun datier da trenta scolars ed otg classas e buca schi strusch. Cumpatg ch'els vevan buca teniu

endamen ils plaids dil mussader, digl um giuven che steva davontier e che veva detg da selavar mintgamai la damaun. Ina damaun ch'ils quater feghers fuvan puspei tut miarda, ha el detg ad els dad ir giu begl, il begl dils pervesiders da **Sutcrestas**. Ed el veva giu en il nas en lur fatgs persunals. - Ils quater buobs ein buca pli turnai, igl entir di buc e la sera enten far da brin e far notg e buc, ferton ch'il scolast ei ius cul tgau suten ed ha entschiet a far calenders. Las mummas han fatg blut nuaus e vessen il pli bugen catschau quei giuvenaster che steva davontier en in tgiern caura.

Ils babs han detg pli pauc. La Sabina ha mess a cauld la spisa ch'el ha buca tuccau. Sia filistra fuva buca dil liug ed ha priu malpuccau. Ch'ins ha dau agli la torta, damai ch'el veva giu detg. Ed il mussader ei staus mal tutta notg. - L'alva dil di ei buca ida surora; ella ei vegnida senza targlin giu da **Scharinas** e giu pigl uaul da **Rusas**. Il scolast veva giu entschiet las medemas uras e ses scolars han tuts mirau suto. Entochen ch'in ha vonzeivi stuii schar dar suto. «Cheuvi, els vegnan!»

Enina ei il derschalet staus naven.

Tuts quater en corda da plaun **Miradas** ora; els vevan maniu ordaviert e dau al mussader ina lecziun, ils quater buobs da **Selva** che quintavan saver sezs detgavunda, cura ch'ei fussi da selavar u buc.

Culs purschals si dies

Ils cantuns sisum ed ils cantuns giudem dil sac da pulenta ein ligiai ensemen stagn cun ina corda. Il tgau ei sefultschius denteren e la teila da fibra noda malamein il frunt. Sch'ils cavels vegnan denteren, allura dat ei ina brava spelada. - Priu semplamein sacadiloc ed ils dels van aspramein siper la lingia dalla viafier encunter l'**Alpsu**. Ina glina sc'in mellen d'iev surstau mira sur il **Pez dal Maler** neu e davos ils crests lai la neiv dar. La gratta maltarschina las pendas ch'ellas lain suenter e van dalla stgeina si e la neiv da crusta dat davos las curegias dils calzers giu e peis bletschs sesgurtegian.

Ordavon en corda van ils treis marcadonts da **Rueras**: il Paul Duri, il Placi dils Monns ed il Gion Giachen, tut umens ch'ei stai inaga sil meglier e che van giudavon. Epi suondan ils sis dels che pon purtar, quater persunas carschidas e dus affons da scola. Il mattatsch persuls ei da **Selva**, ils auters tuts da **Tschamut**. - Las tschun eis ei aunc buca odentras e la colonna camina aspramein viers il **Cuolm d'Ursera**. Ozendamaun han els ad uras tachinau giuaden ina scadiala pulenta barsada ed uss sa ei pera. Las purtadiras ein differentas. Ils umens da hanletg ed ils dus auters per propi portan mintgin quater purschals, ina peisa da curonta kilos forsa, ferton che la Tonia e la Margheta pintga han il peterpir cun treis alla ga ed il mattatsch e la mattatscha sedrovan cun dus per in. Dus dils stagns mintgamai; ei clar. Negin che dat is, ils purschals e buc; silpli ch'ils ezs lain dar el sac e las stellas dattan dil dies giu.

La muntada ei stuffia e las uras spetgan buc. A **Sutcrestas** entscheiva la Tina ad uras la scola. Tschella ga ha ella e mirau atras la detta, cura ch'els dus ein arrivai onz sil tard. Perencunter ha ella detg als dus scolars da secavigliar davostier. Ella ha priu ora il fazalet da nas senza arver dapart la bucca. Mo els dus ed ils auters e tuts han scochemai saviu la raschun. Per enten dar al bab ils raps da purtadi ein els dus puspei vegni leds, quels dus dad in franc ch'els han gudignau la damaun marvegl avon ch'ir a scola.

Il Dutg grond

Schi gronds eis el e buc, gnanc da malaura, quei dutg che metta tiarms en **Tujetsch** denter ils avdonts d'anen e denter ils avdonts d'anora. D'anen e d'anora sedat impurtonza. L'aua che va sur plattamorta che setila sin mellen e sin tgietschen vi vegn giu dallas palas teissas da **Londadusa**, passa atras **Sumpraus** e tschancuna lassiamain ils plauns denter **Zarcuns** e **Rueras**. Da bialaura fa il dutg buca canera e sco da num nuot e separa nuotatonmeins ils vischinadis en **Tujetsch**. Ils habitonts alla ravera dil **Strem**, quels da **Zarcuns** vischinan cun **Camischolas** e s'audan anora. E quei tut senza che quell'auetta grischa e stada e staunca aulzi inaga il det. Da terren ein las palas osum ils stavels da **Caschlè** crettas e mettan a negin enzatgei els peis. Perencunter durent igl unviern ein ellas meinsvart nuota maneivlas, sco per exempel, cura ch'ellas

mislan lavinias da cauld e da freid atras las canals e catschan cugns. Schi da rudien ch'ei tucca meinsvart enzatgi.

Ina buna part digl intsches da **Tujetsch** stat dadens il **Dutg Grond**. El vonn sper l'aua da **Mila** stat il vitg da **Rueras** a garnugl, vegls e savieivels e cun ina historia da num. Encunter sera metta l'aua ord la **Val Mila** ina stagia e las casas dalla riva han enqualga da pitir, sche l'aua furiosa vegn gronda e buglia. Schebi ch'igl uor da crappa schanegia e laghegia da star buns. Pli brutala ei la **Pulanera**. Gliez fa la carpuna da **Malamusa** ver. Igl intsches che cumpeglia la **Pulanera** ei vasts e vegnan las nevas dad omisduas varts enina, lu dat ei ina catastrofa. Ils mussaments stattan siper la detta, sco per semeglia quels dil fevrer digl onn 1749 ed ils ezs dil meins da mars dils anno 1817. E tuttina.

Tschuncass ins il tschancun naven dil **Dutg Grond** entochen enta **Sumsassi**, fuss **Tujetsch** pauc detgavunda. **Tschuppina** e **Liez** e las **Crunas** sut **Milez** fan amogna ina curtesia nundetga, bunamein ina cuntinuada declaronza d'amur. Tondanavon sulegl ch'ins sto tut ir ord via. Pongir ina tiarza dils 66 vischinadis e dalla casamenta da tschels onns ei da catar sin las costas da **Caschlè** e **Culmatsch** e dil **Cuolm**. Era sche las vals encunter il mesanotg dattan savens ed ils suffels ruhs speilan las cumas, dattan las tumas ed ils fops in bien fretg. Igl uaul da **Liez** vegn ad esser in di in bischu e l'acila da **Giuv** cun **Mulinatsch** in revier. Ils rovens che spartan la caplutta da sogn Bistgaun dils crests sut **Planatsch** rabetschan in tschuat veta viaden en la scena. Pli baul fageva l'aua vusch e deva d'entellir ch'ella vivi. Oz eis ella encadenada sut tiara e fa ir entuorn las rodas.

Dieni ei buca nuot; **Dieni** ei mai stau nuot, aschia schi datier da **Putnengia**. Ils davos onns ha **Dieni** fatg ina carriera maisudida. Naven da **Sudada** tocca sisumsum il **Cuolm** ei zatgi iu cun la splauna, lu per cass lu buca mo cun quella da grop. La costa fatg agrad sesaulza levamein e va ad ault ed ad ault, varga 700 meters altezia, tut senza vegnir maltschecca e spuretga e greppusa. Ed ina pendenza favoreivla da tanienta urdadira ei in amogna maiscattau al skiunz. Igl ei iu ditg e liung avon ch'ins vegni pertscharts da quei fatg. Da l'aua vart ha la vischnaunca da **Tujetsch** da daditg enneu magliau pauc auter che pupira.

Ils vischins da Rueras

Anoviars sefan ins en da nuot; els fan semplamein il gatti dils ulteriurs avdents dalla val. Ina cumparsa permiezvi, da buna sanadad e d'ina pial sereina senza lentagens. Da casa anora ei la gronda part cun vestas cotschnas e cavels brins ed il crap tuatschin va a prau el mosaic sursilvan, schebi che la fuorma dil tgau e las missialas seigien onz pli apartias. - E sch'ins mira stagn van ils egls afuns, ual sco enzatgi che pren la veta da datschiert.

Il turissem ha rabbitschau il smugl è a **Rueras**, ins schess mintgaton silmeins in schi grond sco dadora il **Dutg Grond**. Tonaton san ins buca metter surura d'ina vart il mun d'ierta. Pli baul fuva il vitg da **Rueras** sulets e la glied ualti bandunada. Il contact encunter **Ursera** atgnamein fetg pigns ed anora mavan ins la dumengia a messa. Tondanavon che la cuminonza era tuttina per sesezza. Quella retratgadad ha fatg tener ils tgaus ensemen e mess auncallura ina tezla particulara entuorn culiez. Aschia che ordeifer il clis ein ins plitost spanegiaus, tila il plaid en consideraziun e resda pauc. Forsa era per buca ir dalla roma oragiu. Ina precauziun surfatga debrastga, magari. Schebi che tuttaviala glied giuvna da nos dis vegness a snegar agradgiu da ver sentiments d'inferiuradad; il temps present ch'ins fa plat pertut. - Denton - la glied veglia da **Rueras** ha schau anavos enzatgei ed en tuttacass in relasch ch'ei da valetar positivamein. Buca il davos quella ferma cardientscha e la gronda fidonza en Diu. Sch'ei dess palsfier, ils vischins da **Rueras** piardan buca la fidonza. Forsa ch'il bandun e la confraternitad da sogn Giachen han mess ad els il tgau denter las ureglias, ni forsala savieivladad che surpren pli bugen quel che stat da siu persei.

Alluscha gliez bein, ils buobs d'anora han calau da trer crappa sils buobs d'anen ed ins ha fatg inaga fin dad apostrofar las mattatschas da **Rueras** sco «bueras». Ils mats sezs van per lur bialas dadora il **Dutg Grond** e rescann lidinuot.

Giudapeis al Cuolm da Vi

Da vart dretga e da vart seniastra dil **Drun**, enamiez ina spunda da pintga pintga pendenza e tschinclada da bellezza bials praus grass che fan bufatg stat igl amureivel vitg da **Sedrun**, mess ora aposta per tgi che vul mirar. Las casas sezzas sedattan buca dapli che quei ch'ellas ein e cunterfan a nuot ed a negin. Quels paucs casaments macorts che stattan per cletg onz sigl ur ston seturpeggiar d'enzatgi. - Las plauncas da **Niregl** ed ils dus vallutgs ellas costas da **Cungieri** mettan ualvess enzatgi en prighel. Perencunter reiva igl uaul giuven da **Niregl** dallas muotas si enviars ils stavels da **Cungieri** e tegn tschelau las plagas aviartas che muossan incuntin vi cul det. Ellas sesarvan, las plagas e cutrognan ils bauns ed ils plats plinengiu. Atgnamein tut senza ch'enzatgi sappi semetter encunter pli da rudien. **Sedrun** e **Gonda** han semplamein la pustetia dil **Drun** ed il vitg emperneivel da **Camischolas** ha tratg la bustgetta liunga, lezza ga ch'il dargun ha fatg la sturnella ed ei ius definitivamein dalla vart anora - encunter **Sedrun**. Actualmeins han ins mess siaras el vau ed in detg buccari, aschia ch'el periclitescha ni las avdonzas, ni la bellezza punt surenvi e maina pli il santeri in toc plinengiu.

Pressapauc cun l'entschatta da nies tschentaner ei l'industria dad jasters vegnida en la val, plaun plaunet en crotscha en dad Anzeinza e neu dad **Ursera**. Pér lu pli tard cun la viafier. Las casas d'albiert ein secavigliadas tut schenadas giu sper via ed enteifer ils onns ein ulteriuras semessas a per. Ina partida ei sefatga e negozis e fatschentas da tuttas uisas. Talmeins che **Sedrun** ha ozildi era in tschuat mistergners che provedan enzatgi cun enzatgei. Las lavurs restan eifer las quater scheinas ed ils mistergners rabetschan lunsch. Dapertutanavon baghegian ins ora ed engrondescha ils baghetgs e completescha ils urs cun casas novas, biaras che sefan bialas che envidan en. Ins sto buca mirar pitgiv; ils onns ein grass e **Sedrun** va cun la plema.

La baselgia parochiala ei da vegl enneu stada a **Sedrun** ed ils morts han ins era deponiu leu. Tocca gnanc ton daditg ei la messa gronda stada a sogn Vigeli e la plipart dils sogns sacraments han ins semegliantamein spendiu a **Sedrun**.

Pigl auter han buca ils vischins da **Sedrun** cumandau las quaterfiastas en **Tujetsch**, silmeins pli baul buc. Il vischinadi sez veva forsa in per umens da hanletg e zatgeinins assistents. La gronda part era plitost betleraglia che veva struschamein da clamar in gat orasut pegna.

Ils umens per propi, ils ezs fuvan a **Camischolas** ed a **Rueras** e vevan las toppas d'uors sur l'escha: mistrals e derschaders e parsuras, lu stedi. E tgi che leva vegnir sin la buora, lez stueva ver genetschas en nuegl e raps ella buorsa. E quels che vevan las buorsas pleinas eran sillas rivas dil **Strem** e sper l'aua dalla **Val Mila**, finfatg buca sin la ravera dil **Drun**. Ed aunc meins ils puranchels blaus da **Bugnei** e **Bigliel**.

Maunsut

Tujetsch ha ina entira mahoia reins e dutgs. Sidavon stat il **Rein** per propi che nescha sin **Tuma** e tschancuna e taglia bi permiez la val. Il sulegl ei onz da casa da vart seniastra; la vart dretga encuntercomi ei il maun umbrivaun che tila tschadila in tec da lien.

Cunquei ch'ils avdents dils habitadis da tschella vart, da **Surrein** e **Cavorgia**, han da haheias enneu giu da far amogna pauc auter che uauls giud vart ed in terren lumetsch cun cuppas da paliu han ins pera schau listrir els; ins ei onns ed onns senuspius da far enzatgei endretg per ils Maunsuters. Sco per semeglia da baghegiar ina via sco la gliued atras las raveras e far duas punts sur las auas vi. Per entuorn ils anno 1920 han ins la finala buca saviu far cunmeins e calau da sfurzar ils dels dil **Plaun** e quels da **Vallatscha** sur la cresta malghenglia da **Surrein** ed atras las **Traviarsas** tocca a **Sedrun**. Gliez quei leu ei stau in martuir, a pei e cun sliusa u benal e traso crappa e squatschs da neiv en via. - Il di dad oz muossa ora in meglier punct da vesta.

Oragjudem ils plauns da **Sedrun** han ins fatg ina punt tocca sin la cresta da **Claus**, bunameins avon igl esch-casa dallas avdonzas da **Sontg Antoni**. Sin in plum ein ual duas lètgs giuvnas secasadas a **Surrein** ed il vischinadi ei ametsch. La secunda frida vegn buc, numnadameins in'ulteriura punt sur l'aua da **Nalps** vi a **Cavorgia**. Enstagl baghegia ins ora il secund tschancun atras las raveras e staupa ad interim la bucca als vischins da

Cavorgia che han semplamein dau per catta. Sis dels dils quals mo ual dus ein sut ils sissonta onns.

Mo **Maunsut** (ed ins manegia specificamein **Cavorgia**) ei dapli che sis dels che han dau per catta ed in per casas vitas e baghetgs da purs ch'eiin suttaposts alla ruina. E per esser tscheu e leu onz bletsch, san ins tuttavia buca better tut ils praus el medem fitguir.

Ch'ins demuossi curascha e detti l'emprova: Nua en **Tujetsch** secattan pomai pli bials praus che ual a **Claus, Rein** ed els **Plauns da sogn Leci**, sillas **Sorts** ed els **Clavaus**? Era sch'ils englars ein dapersei e la trebla smanatscha neu dils rovans.

Priu pia che la sort seigi fiersa ed ei vali insumma buca pli la peina. - Exact sco avon biars onns, cura ch'ils Mugglis ed ils Hendrys ein setratgs giul **Schuob** ed ell'**America** e forsa sco nossa generaziun. Da tut las quater famiglias dil **Plaun**, bein capiu cun pressapauc trenta affons, ei buc in vegnantsuenter staus anavos. Treis casas ein serradas cun la clav e soliamein la quarta ei aunc habitada. E quei per cass buca d'in vischin da **Cavorgia**. - Sche vonzan tonaton aunc las crestas ed ils pardatschs ed ils reins e surtut ils bellezza bials uauls da pegns. Nua sefan ils ezs meglier che da Maunsut? Ils pegns che vegnan gronds e grads e dattan tut quei ch'els possedan. E retegnan las lavinas e las boas ed ils bufs fitgai dil favugn. E la finala la decoraziun dalla val; munta lezza nuot? Senza lezs uauls perdess la **Val Tujetsch** la pesentincla.

Ina caussa ei pli che mo remarcabla; dadens la Val Vallatsch s'augmenta la valeta da **Maunsut** ualti enina. Ils vischins da **Rueras** laudan si toccasum lur **Plaunmiez** e per ils avdents da **Selva** ei la pastira visavi il vitg, naven da **Surrein** entochen **Surpalits**, in veritabel dorado.

Fontaunas (per igl entir territori da Tujetsch)

Baumbauer, Hans Ulrich. Die Gesteine des Tavetsch. Sedrun 1978

Beer, Tumaisch, bostger, Rueras, intervesta, ils 20-2-1986 a Rueras

Berther, Baseli. Selva avon tschien onns. Noticias cultur-historicas ord la Val Tujetsch. Muster 1909

Berther, Norbert. Hanletg sur il Cuolm d'Ursera. Zcontas noticias sur il negozi da purschals da marcadonts tuatschins. Camischolas 1972. Sep. ord: Gasetta Romontscha dils 15 da december 1972.

Berther, Toni. Das Tavetschertal. En: Bündner Wald, Nr. 5, 1961, S. 119-126

Berther, Toni. 100 onns mistral Vigeli Berther-Flury, Camischolas/Tujetsch. Cuera 1978

Büchli, Arnold. Mythologische Landeskunde von Graubünden. 2. Teil: Das Gebiet des Rheins vom Badus bis zum Calanda. 2. Aufl. Aarau 1970

Caduff, Leonard. Essai sur la phonetique du parler de la Vallée de Tavetsch. Tavanasa 1952. (Diss. Fribourg)

Decurtins, Silvio. Landschaftsveränderungen als Folge von Lawinenniedergängen, dargestellt am Beispiel der Gemeinde Tujetsch. Trun 1980. (Diplomarbeit am Geogr. Inst. der Universität Zürich)

Derichsweiler, Walter. Das Tavetsch. En: Die Alpen, Nr. 5, 1929, S. 361-373

Gadola, Guglielm. P. Baseli Berther. Sia veta e sias ovas. Mustér 1943. (Nies Tschespet; 23)

Hägler, Karl. Anthropologische Studie über die Bewohner des Tavetsch, eines alpinen Hochtals im Kanton Graubünden (Schweiz). Zürich 1941. (SA. aus: Archiv der Julius Klaus-Stiftung, Bd. 16, H. 1/2)

Hägler, Karl. Über den Gebisszustand der Tavetscher. Zürich 1949. (SA. aus: Archiv der Julius Klaus-Stiftung. Bd. 24)

Hager, Karl. Streifzüge zwischen den Arven und Bergföhren am Lukmanier. En: Jahrbuch S.A.C., 44. Jg., 1909

Hager, Karl. Das Tavetschertal an den Rheinquellen. Sedrun-Tschamutt. Zürich 1910

Hefti, Reto. Der Bundesbeschluss über Beiträge an ausserordentlichen Massnahmen gegen Waldschäden und seine Anwendung in Graubünden. En: Bündner Wald, Nr. 5, 1985, S. 1fr25 (Cumpareglia era las ulteriuras lavurs pert. il medem tema en la numera numnada)

Hendry, Toni. Il vischinadi da Cavorgia. Sedrun 1979

Hitz, Gion Antoni. Per crappa massel jeu bugen. Lavur edida, introducida e commentada dad Alfons Maissen. Cuera 1971. (Studia raetoromanica; 7-9) (Sep.: Igl Ischi, 1967-68)

Huonder, Baseli. Einiges über den Tavetscher Wald. En: Bündner Wald, Nr. 5, 1961, S. 139-145

Leemann, Walter. Zur Landschaftskunde des Tavetsch. (Natur, Wirtschaft, Siedlung.) Zürich 1929. (SA. aus: Mitteilungen der Geographisch-Ethnographischen Gesellschaft in Zürich, Bd. 29) (Diss. Zürich)

Muoth, Giachen Caspar. Die Thalgemeinde Tavetsch. Ein Stück Wirtschaftsgeschichte aus Bünden. En: Bündner Monatsblatt, Nr. 1-4, 1899

Rageth, Balz. Die Verbauungen und Aufforstungen bei Selva-St. Brida. En: Bündner Wald, Nr. 5, 1961, S. 145-158

Schuler, Stephan. Selva, das Dorf mit dem harten Schicksal. En: Bündner Wald, Nr. 5, 1961, S. 133-138

Sialm, Alexi. Das Lawinenverbauungs- & Aufforstungsprojekt Scharinas-Tschamut. En: La Tuatschina, nr. 9, 1975

Venzin, Gion Antoni. Las alps da Tujetsch. En: Glogn 1940, p. 48-56

Widmer, Ambros. Die Tavetscher Orts- und Flurnamen. En: La Tuatschina, nr. 4, 1977 (Nachwort: Nr. 6, 1977)

Nums da funs e da pastg

Nums e nums ein sefatgs ella **Val Tujetsch**; mintga toc prau ha siu num, accurat sco pastg e pastiras. E per cass buca mo nums da ualaschia, sch'ins patratga per semeglia dil **Busch** e dalla **Braha**, da **Canadal** e **Carpettel**, dils **Diaulis** e da **Dieni**, da **Martinauns** e **Mulinets**, da **Riva** e **Rusas**, dil **Satur** e dalla **Schira**. Quels nums da tien e da gronda harmonia secaveglian a per culs pli manedels, cun bauns e plauncas, plauns e plats e palius, cugns e crests e plats e canals, cun fontaunas e gondas, cun sorts e stavel e vals.

Ils vischins dad ier e da stiarsas mettan ensemen ina survesta da logs che fa tut smarvigliar. Ils giuvens perencunter, ils ezs scursaneschan e van alla cuorta ed en ton sco nuot crodan ils bellezza bials nums da praus e pastiras en emblidanza.

Poda ch'igl ei indicau da francar silmeins ils loghens da duas vals, da duas vals tipicas, ina encunter miezdi e l'otra enviars mesanotg. E **Val Nalps** e **Val Giuv** stattan davontier; ellas omisduas han ina historia da num. Schebi ch'ils nums dallas ulteriuras vals ein gnanc stel menders, anzi - ei vales daveras la peina da rentar cun fivialas tut ils nums da praus e pastiras dall'entira **Val Tujetsch**. Quei fuss in fatg maisudiu e forsa tuttina ch'enzatgi pren amauns, avon che tut mondi a piarder. Ch'ins setegni pia vid las vals indicadas ed entscheivi cun

Val Nalps

Igl ei convegnent dad entscheiver oragjudem la val da **Nalps**, leu nua che quei techet aua ch'ei vanzada sbucca el **Rein** - per silsunter ir anentasi e dalla val en tocca sils sumfils cun indiar mintgamai ils nums silla ravera e dallas plauncas si encunter ils aults, ton dalla vart da **Cavorgia** (maun dretg) sco dalla vart da **Surrein** e dil **Tgom** ed aschia.

vart seniastra (**Surrein** e **Tgom**)

- Gravas
- Reinsut
- Rein
- Prau Mulins
- Ravera
- Rovens
- Claus
- Plaun da Claus
- Clis
- Uaul da Clis
- Geppia
- Giu Clavaniev
- Vi Clavaniev
- Visum
- Ils Franzos
- Val Martina
- Fontauna Pintga
- Tgaper
- Nacla
- Ischi
- Val Stgira
- Las Aclas Dadens
- Las Aclas Dadora
- Gionda
- Grep Sursé
- Sax
- Sutseivs (suren)
- La Platta

vart dretga (davart da **Cavorgia**)

- Gravas
- Casatschas
- Dutg
- Foppas
- Clavaudem
- Busch
- Preits Crap
- Val Plaun dil Fecler
- Uaul dallas Cavorgias
- Plaun dallas Cavorgias
- Plaun da Pors
- Stavelura
- Neidis
- Grep da Caltschina
- Furn da Caltschina
- Storscha
- Furn Miez
- Uaul dalla Riada (suren)
- Uaul dalla Crappa
- Val Caltgera
- Carpels (surentasi)
- Crap Nair (sut Plaunca Aulta)
 - Plaun Pardatsch
- Cugns
- Tschier (suren)
- Plaun Verd (surentasi)
- Plaunca da Cavals
- Val da Tortas

- Burganez
- Plidettas
- Sur Plidettas
- Foppas da Schlaz
- Fontauna da Plidettas
- Barschaus
- Val dils Triembels
- Ruinas
- Uaul Pign
- Uaul Siaras
- Crap Falluns
- Pardatsch da Stiarls
- Palius
- Grep Ault
- Fistatgs (Baghetg dil Gion Rest)
- Palits
- Canals
- Plaun da Vaccas
- Plaun da Bus
- Rusna da Palits
- Draus
- Val Blaua Gronda
- Val Blaua Pintga
- Rusna da Stavels Secs
- Tgavrius
- Stavels Secs
- Val dil Drun
- Rusnetta
- Stavel Crap
- Alp da Grass
- Plaunca da Vadials
- Alpetta (surenasi)
- Tuma (Puzza Gronda, Suren)
- Carpettel
- Serengia
- Tegia digl Uffiern
- La Cungieria (giu sper l'aua)
- Pegn dal Bot (e Tgapi)
- Uaul Pign
- Platta Naira
- Plaun grond
- Crap dal Taur
- Grep dal Tschess
- Diaulis (surentasi)
- Plaun Schlaus
- Tschalers
- Plaun la Vigelgia
- Plaun dil Crap Git
- Puzza Gronda (anorasi)
- Puzza Pintga (anorasi)
- Cuolm Nalps
- Foppettas
- Plaunca dils Camutschs
- Cotschens (suren)
- Umens Crap (sil fil)
- Stavel da Nuorsas
- Stavel da Nalps
- Stavel da Grass
- Stavel da Magher (visavi)

Pongir - che soliamein la **Val Nalps** hagi buca meins che 117 numms silla ravera e siper las plauncas encunter ils sumfils. Aschia pressapauc vesa ei era ora dad autras varts ed ellas ulteriuras vals.

Indicaziuns:

Leci Hendry, 1922, Surrein

Tumaisch Curschellas, 1925, Surrein

Milsanavon: Robert von Planta, Rätisches Namenbuch. Von R. von Planta und Andrea Schorta, Zürich [etc.] 1939-1986. 3 Bde.

Emil Wettstein, zur Anthropologie und Ethnographie des Kreises Disentis (Graubünden), Zürich 1902 (Diss.)

Val Giuv

Cun la **Val Giuv** tucca ei da repeter la maniera e puspei entscheiver giudem la val, leu nua che l'aua sbucca el **Rein** sil funs dalla val. La **Val Giuv** ei adina stada in liug che ha incantau enzatgi - e buca mo ils cavacrappa. Ozildi ei igl implont electric in mussament scosauda pil spert progressiv dils vischins da **Tujetsch**.

da vart seniastra (**Putnengia, Planatsch**)

- Satur - Casti
- Putnengia

dil maun dretg (**Dieni e Giuv**)

- Enagiu las Rueras
- Catanschuns Dieni

- Sudada
- Clavadi
- Crests
- Crunas
- Mulinatsch
- Crest d'Alp
- Briauls
- Plaun Briauls
- Run da Plaunca Biala
- Plaunca Biala (surenviarsi)
- Fistatg da Plaunca Biala (ensiviars)
- Sut il Draus
- Run da Plaunca Liunga
- Plaunca Liunga
- Sut il Bann la Tgauma
- Forsch
- Plaunca Cuflegl
- Plaunca da Mesiras
- Plaunca dil Leci
- Stavel da Nuorsas
- Schliusaduirs

- Plaun Sutè
- Crusch da Giuv
- Giuv
- Craps
- Tschalers
- Tegia da Fibiala
- Stavel (viers Crest da Liez)
- Rivas
- Plaun la Riva
- Plaunca Secca (surentasi)
- Sut il Baun Tschinglatsch
- Val Mala (suren)
- Platta Naira
- Plaunca Aulta
- Fontaunas da Vaccas

Intervesta:

Duri Battesta Venzin, 1919, Rueras

III Igl origin dalla Val Tujetsch

Igl uoppen da Tujetsch

Ils vegls han marcau e suttascrit scartiras e documents cul sigil. Quei ei stau il temps che nossa vischnaunca ha apparteniu alla abbazia da **Muster** ed il cumin dalla **Cadi** ha menau las fatschentas da gronda muntada. El 19avel tschentaner perencunter metteva igl «oberkeit» il bul da sogn Vigeli che tegn la baselgia da **Sedrun** sin bratsch sut ils documents vi (Sigillum Comunitatis Aethuatiensis).

La damonda d'in uoppen ei sefatga per ils onns 1940. Il cantun **Grischun** ha pretendiu da mintga vischnaunca in uoppen. Era **Tujetsch** ha giu da prender ina decisiun. E la decisiun para dad esser stada leva, damai che gia igl onn 1939, a caschun dalla exposiziun svizra, ei nossa vischnaunca stada representada cugl uoppen dalla famiglia de Pultengia. Igl onn 1947 ei la vischnaunca da **Tujetsch** sedecidida definitivamein per l'arma dalla famiglia ministeriala dils nobels de Pultengia.

Igl uoppen ei concepìus tenor la scartira da fiasta «500 onns Ligia Grischa» dils anno 1924. Soliamein la punt denter las duas tuors ei empau pli liunga ch'igl original - tenor il sigil anteriur dalla famiglia.

Igl uoppen da **Tujetsch** ei da num. La famiglia ministeriala de Pultengia ha giu en **Tujetsch** ed ella Ligia Grischa in grond plaid el capetel. Ch'ins patratgi oravontut da Pieder de Pultengia, digl avat e politicher che ha renovau la ligia igl onn 1424 ed ei daventaus sissu siu empren cau.

Derivonza dil num

Il num **Tujetsch** vala per l'entira val dil **Pass Alpsu** entochen **Bugnei**, in vitg cun num **Tujetsch** ha ei mai dau. Pli probabel vegn il num neu dil latin «tubus» = torum (tudestg Röhre) e sesviluppescha lu al num dad oz **Tujetsch**. Mira Rätisches Namenbuch Da **Mustér** anora vegnevan ils emprems habitonts era numnai quels dallas vals, damai che **Tujetsch** posseda bia vals lateralas.

Per l'emprema ga vegn il num numnaus igl onn 1237. In «Willhelmus» da **Tujetsch** ei perdetga tier ina vendita da beins dalla claustra da **Mustér**. Culs onns anflein nus tscheu e leu en documents vegls il num **Tujetsch** sco suonda:

- 1259 **Thiuesch**
- 1285 **Tivez**
- 1300 **Thivetz**
- 1390 **Thifetz**
- 1505 **Tifosch**
- 1538 **Thyfetsch**
- 1539 **Tyfetsch**
- 1557 **Tifetsch, Diefetsch**
- 1559 **Dtiffetsch**
- 1563 **Dauetsch**
- 1600 **Tauetsch**
- 1651 **Tuytsch**

Dapi igl uost 1976 vala il num romontsch **Tujetsch** sco num uffical. Avon era quei **Tavetsch**, il num tudestg.

Ils emprems colonists arrivan

Mo cura ein propi ils emprems avdonts secasai en nossa val e danunder ein els arrivai? Nossa cuntrada fuva cuvretga da tendas uaul naven dil **Cuolm d'Ursera** tochen a **Mustér**. Duront l'erecziun dalla lingia da viafier igl onn 1912 sill'**Alpsu** ein restonzas da pégnis vegnidas neunavon.

Pader Placi a Spescha rapporta d'in uaul sper **Tschamut** e quei aunc 1804. Oz regordan

mo aunc pli numns locals da quell'as tendas d'uaul. Aschia: **Bugnei** = betulla = badugn, **Selva** = uaul e **Scharinas** = discharina.

Dil temps dils Romans, Augustus fuvà imperatur, formavan la **Rezia** ed il **Valleis** ina provinza sut il medem procuratur. Negins documents cumprovan l'existenza d'ina senda sul **Cuolm d'Ursera** che ligiava **Cuera** cul **Valleis**. Schebein truppas romanas ein marschadas da gliez temps tras nosa val sa negin. In tschancun dalla via veglia viers il pass sper **Bugnei** vegneva aunc denton avon entgins decennis numnaus la «via romana», mattai plitost pervia dalla construcziun dalla via che pervia dils Romans. L'emprema veta en quella cuntrada selvadia porta la fundaziun dalla claustra da **Mustér**. La historia da nosa vischnaunca stat en stretg connex cun la casa da Diu. Per quei oravontut in curt sguard sin la historia dalla claustra.

Entuorn igl onn 614 eregia il pader franc Sigisbert sia cella a **Mustér**. Il missiunari arriva da **Luxeuil (Frontscha)** sur **Sogn Gagl** a **Cuera** e dalla **Surselva** siado. Anflond sisum la vallada ina aschi biala cuntrada, pauc ni gnanc populada, eis el sedecidius da secasar leu.

Tochen lu existevan naven dalla **Val Russein** ensi, pia en la part da **Sursassiala**, negins vitgs habitai. **Sumvitg** fuvà il vitg il pli sisum sco il num di aunc oz.

La **Val Russein** valeva lu aunc per biars per nunpassabla. Sulettamein catschadurs, pasturs e tgi che stueva, lez ughegiava da percuorer quels uauls e quell'as cavorgias selvadias.

La fundaziun dalla claustra ha carmalau neutier ils emprems habitonts. Igl'emprem a **Mustér** e contuorn, pli tard era tochen en **Tujetsch**.

Ils emprems avdonts han colonisau nosa val el decuors dil 9 e 10avel tschentaner. Gia da bial'entschatta enneu s'udeva **Tujetsch** sco era **Ursera** alla claustra. Quei territori struschamein populau e pauc cultivau s'udeva tenor dretg roman al stadi, ei denton ius vi alla claustra sco dotaziun pil malfatg commess enviers il confundatur Placi.

Ils emprems colons da sutsi fuvan Retoromontschs. Els runcan e baghegian casas e fundeschans beins e vitgs. Plaz fuvà ei da gliez temps avunda ed il clima fuvà pli migeivels che oz. Tala caussa cumporta il cunfin digl'uaul da lu sin varga 2000 meters sur mar.

Da quei temps mauncan las indicaziuns, negins documents ni scartiras dattan perdetga dils emprems colonists ed urbarisaders da nosa val.

Ils Vallesans

En ina secunda fasa separticipescha era glieud da lieunga tudestga dall'urbarisaziun da nosa val e quei principalmeyn dils loghens els aults. Ils Vallesans arrivan el decuors dil 12 e 13avel tschentaner sul **Cuolm d'Ursera** e prendan possess d'ina part da **Tujetsch**. Ils colons romontschs fuvan all'entschatta dil 13avel tschentaner numerus. Ils Vallesans ein per quei buca vegni suren als Romontschs e tudestgau els sco quei ch'igl'ei daventau en auters loghens sco per exempel a **Sursaissa**. Sulettamein ina roscha numns locals, remarcai en documents dil temps miez tardiv, dattan aunc perdetga da lur existenza, sco per exempel:

Müren	Bül	im Holz	ze Mutt
Mülimat	Platte	Müller	Bolliematte

Era schlatteinas tipicas tudestgas anflein nus en quels documents:

Jenny Snider Zurggen
Burger Burkhart

Segiramein ha la claustra giu grond interess da quels colonists neu dil **Valleis**, per quei ch'els han urbarisau e priu possess da territoris meins buns e selvadis.

Principalmeyn la part sisum da nosa vallada ei vegnida colonisada entras quella glieud che veva muort munconza da plaz stuiu bandunar lur patria.

Selva s'udeva, sco il num tradescha, all'entschatta als Romontschs indigens. Denton gia pli tard el temps miez tardiv anflein nus per quei liug il num tudestg **Selvaningen** e lu era aunc **Im Holz**.

Medemamein era **Tschamut**. Il num digl emprem vitg sper il **Rein** deriva probabel da «cyma», tschema = **Tschamut, Z'Mut** sco el **Valleis**.

Carteivel derivan era ils nobels de Putnengia dil **Valleis**. Pontaningen ei ina tipica schlatteina tudestga. Quella famiglia construescha entuorn 1200 siu casti a **Dieni**, sper **Rueras**. Igl onn 1252 vegn quella schlatteina numnada per l'emprema ga en in document. La famiglia ei duront il 13avel tschentaner e vinavon stada el survetsch dalla claustra e fuva en possess digl uffeci ministerial en **Tujetsch**. Igl onn 1285 secloman ils dus frars Hugo e Wilhelm de Pultengia «de **Tivez** ministerialis».

Igl ei da supponer ch'ils signurs de Pultengia hagien susteniu l'immigraziun dils Vallesans, damai ch'els sezs fuvan derivonts da leu.

Ord il temps medieval

*Traffic sul **Cuolm d'Ursera***

Da gliez temps regeva gia in pulit traffic denter **Ursera** e **Tujetsch**. Documents dil temps miez dattan perdetga dil traffic da fiera cun bos, asens, méls e purtaders denter **Sion** e **Cuera**.

Da 1253 dat ei a **Sion** ina scartira che numna sco perdetgas in Warnerus ed in Martinus da **Cuera**, omisdus berniers da leu.

Il grond traffic denter **Valleis** e **Cuera** muossa era il suandont fatg: Uestg Frideric I da **Cuera** siara in patg da schurmetg cun igl uestg da **Sion** e quei 1282.

Era avat Simon da **Mustér** fa in patg semegliant cun tschun Vallesans igl onn 1288. In contract che pretendia agid davart quels tschun umens per «defender ils dretgs e tener a mistregn igl inimitg».

In miez tschentaner pli tard ha il **Cuolm d'Ursera** sia emprema impurtonza strategica. Quei 1333, a caschun dils embrugls culs signurs da **Vaz**. Sil pass ha ei dau ina battaglia denter la truppa digl avat da **Mustér** e la giuvna Confederaziun. La claustra sto seretretr, mo cuort sissu regia puspei la pasch.

*Emprema baselgia da **Tujetsch***

Ina perdetga da quei temps han nos antenats schau anavos a nus. Igl ei quei aunc oz la pli imposanta construcziun en nossa val: il clutger-baselgia da sogn Vigeli. El ei vegnius erigius alla fin dil 12avel, entschatta dil 13avel ensemen cun la baselgia ch'ei vegnida consecrada carteivlamein quels onns, anflein nus gie egl anniversari da 1456 sut il datum dils 26 da zercladur 1205: «Dedicatio Ecclesie s. Vigili».

Quella carteivel emprema baselgia da **Sedrun** schischeva pli encunter il **Drun**, aschia ch'il clutger sesalzava alla fin dalla baselgia encunter damaun. Para ch'il **Drun** fuva lezs onns aunc in migeivel e mudest dutg che sparteva **Sedrun** e **Gonda** e che furneva l'aua da diever.

La libertad entscheiva e seregheglia

Gia 1325 sepresentan ils vischins dalla val sco: «vicini de **Tuvez**». Quels vischins fuvan aunc suttamess alla claustra, ton ils Romontschs ord il contuorn da **Mustér** sco ils Vallesans. Auters eran subdits dalla claustra da **Wettingen** ella **Argovia**.

Quei fatg documentescha la pergameina dils 26 da zercladur 1300. La claustra da **Mustér** venda la subdita Berchta, feglia dil stimau Aegidius de **Thivetz**, alla claustra da **Wettingen**.

La dieschma stuevan ins pagar alla casa da Diu en fuorma da «Kälberzins» ni en graun ni «Käserzehntel» e «Lämmerzehntel».

La libertad, la veglia dad esser libers ed independents dalla claustra, quei spért regeva tuttaviva tiels antenats. Segiramein havevan els era udiu dalla fundaziun dalla Confederaziun, dall'alleanza dils treis cantuns vischinonts.

Gia el 14avel tschentaner sepresenta la **Cadi** independenta cun in agen sigil, sper la claustra. Al tgamun da quella unitad steva gia in mistral, denton cun consentiment dalla

abbazia.

Igl onn 1368 udin nus per l'emprema ga d'in mistral dalla **Cadi**. Igl onn 1371 stat in Tuatschin alla testa dalla **Cadi**, numnadamein Dominus Petrus de Cavorgia. El ei in dil pievel, buca in ord las retschas d'enconuschentas famiglias, sco de Pultengia e de Rueras.

Ils ministerials svaneschan

Ils signurs en uffeci sco ministerials vul dir: administraturs e survegladers installai entras l'abbazia, svaneschan.

Ils de Pultengia ed ils de Rueras (de Ryfaeren) ein stai ils sulets signurs dil temps feudal ella **Val Tujetsch**. Egl anniversari da 1456 vegnan els titulai sco «Junkers». Ils nobels de Rueras han buca giu quella impurtonza ed influenza sco ils signurs dil casti da **Pultengia**. Aschla anflein nus sulettamein in mistral Martin de Ryfaeren igl onn 1399. Sco gia menziunau pli baul anflein nus l'emprema ga igl onn 1252 ina notizia davart ils de Pultengia. El decuors dil 13 e 14avel tschentaner han quels nobels giu ina gronda influenza en **Tujetsch** ed en l'entira **Cadi**. Damai che **Ursera** s'udeva era alla claustra, fuvan els ils mediatur denter quellas duas valladas. Dapi il 14avel tschentaner possedeavan els schizun beins ad **Ursera**. Igl onn 1363 fuva Duri de Pultengia mistral d'**Ursera**. La pli impurtonta persuna da quella schlatteina ei Pieder de Pultengia staus, avat da **Mustér** dils 1402-1438. Igl onn 1395 ei la Ligia Grischa vegnida fundada ed avat Pieder ha renovau ed extendiu quella ils 16 da mars 1424.

Alla fin dil 14avel tschentaner ha la veglia splendur dalla famiglia entschiet a sblihir. Clau, il bab digl avat Pieder, ha vendiu 1377 ils beins da **Schlans** e Cilla, la sora digl avat, ha vendiu 1402 il bein Wurzenstein (de Ragisch) sut **Mumpé-Medel**. El 16avel tschentaner ei la schlatteina de Pultengia morta ora.

Fuorma da viver - temps miez tardiv (14avel tschentaner)

Tratga da nuorsas

Igl onn 1390 venda la claustra da **Mustér** la dieschma sin nuorsas per ina unica summa da «103 churwelsche Mark». La tratga da nuorsas stueva esser da gronda impurtonza. Il territori da **Tujetsch** fuva naturalmein era ideals per tala tratga, patratg'ins mo dallas biaras e bialas pastiras els aults da nos cuolms. Cheu da casa fuva la schinumnada nuorsa tuatschina ni era nuorsa da **Nalps**. Carteivel ina descendenta dalla nuorsa «Torfschaf». Ella pesava 25-30 kilos e fageva treis tochen quater tschuts ad onn. Quella nuorsa ha denton stuiu untgir el decuors dils tschentaners. Gia el 13avel tschentaner obtegn ella concorrenza entras la nuorsa bia pli gronda, la nuorsa bergamasca. Dil tuttatfatg svanida eis ella denton pér ils onns 1940.

Societad cooperativa

Davart la fuorma da viver dil 14avel tschentaner dattan las duas pergameinas da 1380 e 1391 perdetga. Il document da 1380 muossa era co 25 colonists da **Rueras** e dil contuorn fundeschan ina societad cooperativa per il manteniment dils dretgs ch'els possedeavan concernent l'alp **Val Giuv**.

Igl onn 1391 relain ils medems ina retscha da prescripziuns sur da lur alps ch'els possedeavan, aschia sur dall'alp **Tgom**, dalla **Val Giuv** e da **Val Mila**.

En quels loghens astgavan mo commembers da quella cooperativa esser possessurs dils beins, dils mises e dallas alps. Nuot astgava vegnir vendiu ad autras personas. Vuleva enzatgi tuttina vender ils dretgs e negin da quella cooperativa fuva interessaus, astgava el vender mo ad in migiur dalla claustra en **Tujetsch** (Gotteshausmann). Tals che fagevan encunter a quellas prescripziuns, perdevan lur dretgs e quels che habitavan buca pli en la val medemamein. Tier la mort d'in associau astgavan ils artavels sulettamein pretender casa e mises.

Daco quellas prescripziuns aschi rigurusas? Autoprotecziun? Ni mesiras da schurmetg? Ils possessurs da quella cooperativa fuvan gie tuts subdits dalla claustra da **Mustér** culs medems dretgs e las medemas obligaziuns.

Denter quels commembers (socis) sesanflavan era pressapauc siat cun nums dil

tuttafatg tudestgs, pia descendents dils immigrai neu sul **Pass Alpsu** (Vallesans). Els han buca saviu far valer dretgs specials ed ein equals als emprems colonists romontschs. Da quei temps era l'immigraziun en nossa vallada aunc buca a fin. Da tuttas varts arrivavan aunc adina glied, pertgei tiara da colonisar fuva aunc avon maun. Encunter quels novs colons sedrizzavan quellas prescripziuns. La glied dil liug stueva sedefender enzaco. En quei senn ei lu sura numnada cooperativa da capir.

Il fatg ch'ils immigrai, ils Tudestgs ed ils Romontschs ein s'uni ad ina cooperativa ei medemamein interessants. Els secapevan bein, malgrad in lungatg different ed in'otra cultura.

Unitad dat forza ed aschia han els saviu schurmegiar lur interess e dretgs. Da l'otra vart ei igl element tudestg vegnius suten e plaun plaunet ein els sco minoritad s'integrai al viver e defar dils Romontschs. Igl onn 1538 ei quei document vegnius confirmaus e renovaus entras la dertgira a **Mustér**.

Ils nums ella pergameina dattan perdetga dils descendents vallesans che vivevan en quellas uclivas el contuorn dalla **Val Giuv**. Quei fatg muossa era ch'els eran secasai en quels loghens si per las spundas da **Rueras** e buca mo a **Tschamut** e **Selva**. Els han carteivlamein schau svanir las grondas tendas d'uaul, dretg e seniester dalla **Val Giuv** ed a **Scharinas, Planatsch, Milez, Mulinatsch, Giuv** e **Mila**.

Aschia anflein nus:

Willi Snider

Marti Zurggen

Jenni ab **Jufs**

Wilhelm von der Mur

Jenny Jacobs von **Müllinären (Mulinatsch)**

Peter von **Ortschöw (Nurschai)**

Jäckli von **Müllair (Milar)**

Els medems uclauns vivevan era Romontschs, principalmein denton a **Rueras** ed els impurtonts uclauns vischinonts **Cadentschuns** e **Cascharolas**.

*Situaziun speciala da **Tschamut***

En ina zun speciala situaziun sesanflavan ils habitonts da **Tschamut** e contuorn alla fin dil 14avel tschentaner. Quei vischinadi possedeve ina atgna alp, ei deva leu subdits e libers. Quels fatgs documentescha ina pergameina feudala da 1398.

*"Dytz sindt die Rechtung der lüten uff **Schamuot**, die das sesshaft sinndt.*

*Die honndt hüss und hoff, aker und wyssen und al ir Nachkomenden, dz die söndt unss und unssrenn gotzhusz und unssrenn nachkommen jarlichen gebenn von der alpe wegen, die stost an einen thail zuo an die alp, die **Maigels** genamt ist, und die halb stosset an dz wasser, dz da rünenn ist vonn der alpe im **Maigelss** jnn die gueter **Muelimat**, und andrent zuo stost an dem Wasser, dz da rindt zuwischen der thallütenn almaine und derselben alpenn. Undt sondt unss die genannten vonn **Schamuotenn** alle jar jarlichen von der alpen daselb richtenn werenn vier schilling an werdt kessen jnn unssrenn gotzhuss ze tissendis, des uff sannt Martisstag oldt aber darnach in den nochstenn acht tagenn, an gefferdt jnn unsseren hoff - thetenn sy dz nit, dafür gott sy, sosondt wir, alss unsser nachkamen, alss unssren boten an unssren statt von unser wegen den bluomen angriffenn, wa es unss alerfüglichst ist, der uff den vorenannten lütenn von **Schamuoten** undallen iren Erben undnachkomen gueter je gewachsen ist. Und sondt wir die schetzen nach des Landt Recht ze tyssendywsfür zwyfalti phender; lössendt sy die nüt nach des Landtzrecht, so sondt unss di egeschriebnen pfender, alss si ie geschetzt sind, gäntzlich gefallen sinfür unsser Eigen.*

*Wöli aber under den egenanntenn von **schmüt** ir Erben und nachkomenn unss angriffenn würdent vom dess vorenannten Zinss wegen, es sig einer oder mer, sölenn jnn die andrenn, alss vorbeschaidenn ist, die - schamuoten, ir erbenn und nachkomenn sy schadenn gäntzlich wyssen um ir thail.*

*Es solenn ouch zü der alpenn vorenannt niemandt Rechtung habenn, noch sy messen, als vorgeschibenn ist, den die lüt, die ie oft' **Schamuoten** hüss und hofj hondt und*

güter, die sesshafft sindt.

*Die eygenn von **Schamuoten** und ir Erbenn und nachkomenn sondt ouch mit irem vech nimmer waidten noch keinenn schaden thün jnn unsserenn maierhoff ze **Sengess** jn den oberzehendtenn, wan ie ze sant Platzisstag ze merkt old da vonn farenn.*

Und zuo glicher wyss alss disser brieff stat, also habenn ouch die herenn von tissendiss jnn irenn Rodlenn Ein abgeschryfft der obgeschribnen Rechtung.

*Wir Johaness von Gotess gnadtenn Apt unnd unssrenn Koffendt des Gotzhus **tissindis** für unss und unsserenn nachkommen mit den von **Schmut** und all ir erbenn und nachkomenn durch unsseres Gotzhuss nütz wegen lieblich und früntlich übrein komen; und dessen zuo vester sicherhait und warer Urkunt ist dysser brief gebenn mit der Apty und ouch des Covendtz ze **tissindis** ann hangtenn Insigel.*

Ditz beschach unnd ward der Brieff gebenn do man zalt von Kristy unsseress lieben herenn geburt dritzehen hündert acht und nüntzig jaren an den noechsten Dinnstag nach dem seligenn Ostertag.

*Item der ernüwert ist durch verblichenn handt im jar 1543 mit günst, rat, wyssen und wyllen...abt dess würdigen...und Junker Jacob von Sagx, der zit Landt Aman zu **Tissindiss**, und von mir Hansz Florin von **Schamuot**, Geschworener Landtschriber zuo **Tissindis**."*

Tenor il sura document tschentaus ora igl onn 1398 il mardis suenter Pastgas e lu renovaus igl onn 1543, retscheivan ils vischins da **Tschamut** dalla claustra da **Mustér** ina atgna alp. Dall'alp san els far diever per in tscheins annual da «4 Schillings» en caschiel.

Ils cunfins da quell'alp ein pli e meins identics cun l'alp **Tschamut** dad oz. Sisum confinava quella cun la **Val Maighels** ed enviars sera cul **Rein da Tuma**; giudem encunter il dutg dall'**Alpsu** e siviars damaun ils praus e las pastiras dils vischins da **Tujetsch**.

Tschamut, in pign vischinadi sisum nossa val, per gronda part populaus dils Vallesans, ha pia retschiert entras quest document ina atgna alp cun tuts dretgs. Quella alp ed era ulteriuras libertads ha il vischinadi saviu salvar tochen viaden el 19avel tschentaner. En cumparegliaziun culs ulteriurs vischins dalla val stevan la glied da **Tschamut** en ina posiziun apartia. Aunc el 17avel tschentaner stuevan els cumprar ils dretgs sco vischins dalla val. Aschia cumpran igl onn 1610 Jan Liem da **Tschamut** per 18 flurins e 1613 Jan Martin Schnider da **Tschamut** per 46 flurins ils dretgs dils vischins da **Tujetsch**.

Menziunau vegn en quei document era il num local «**Mülimat**». In mussament ch'ils Vallesans fuvan segiramein secasai a **Tschamut**. Quei num ei sesviluppau al num romontsch **Prau Mulins**. Il num tradescha medemamein ch'ei stueva dar leu in mulin; pia vegneva il graun che carscheva en contuorn da **Tschamut** molaus leu, giudapeis alla **Val Val**.

Colonists neu dil miezdi

El decuors dil temps miez tardiv succeda la tiarza fasa dalla colonisaziun da nossa vallada. Principalmein arriva la glied neu dalla **Val Medel**. Quei fatg muossan las differentas schlatteinas tipicas medelinas. Aschia anflein nus els documents e scartiras da quei temps e pli tard ils nums:

de Medell

de Mutschnengia

de Curaglia

de Perde

de sogn Gall

de Soliva (Oliva)

Pally

Pli probabel ei il contuorn da **Cavorgia**, **Surrein**, **Nislas** e **Bugnei** vegnius colonisau entras glied neu dil miezdi. Quella immigraziun neu da **Medel** ei bunamein da capir da sesez. Els han extendiu lur agen territori sur la tschema da **Stagias** ed enviars la **Val Giern**. Aschia han els contonschiu novs territoris da secasar pli u meins indirectamein.

Da lezs onns secasava ins buca en gronds vitgs sco igl ei oz usit. La fuorma da baghegiar e secasar era tut outra. Il sistem da viver fuvà quel dil bein singul, ni silpli duas entochen treis famiglias el medem liug. Ina tipica fuorma da viver dil temps miez. Buca ils Vallesans han purtau quella fuorma da secasar, mobein ils Romontschs ein stai en quei grau ils pioniers. Ils Vallesans ein sulettamein s'adattai a quella fuorma, già secumprovada e praticada dapertut.

*Sogn Vigeli a **Sedrun***

Davart la baselgia ei da remarcar il suandont: Già dall'entschatta enneu, pia dapi ch'ils emprems colonists han urbarisau nossa vallada ed era carteivel baghegiu ton pli spert ina caplutta ni baselgia, s'udeva la collatura, il dretg da metter plevon, alla claustra da **Mustér**. Igl onn 1490 confirmescha Papa Innocenz VIII quei fatg e suttametta la baselgia da sogn Vigeli alla claustra.

Igl anniversari da 1456

Quei cudisch da cuviarta da lenn e fegls da pergameina ei in dils pli vegls documents che sesanfla egl archiv dalla pleiv. In document fetg prezios. En fuorma da calender ein cheu rimnai donaziuns, messas perpetnas, eveniments, schabetgs, disgrazias e fatgs principalmein ord la **Val Tujetsch**, mo era digl entir cantun, entochen viaden el 18avel tschentaner. Quei anniversari vegn introducius entras il plevon Gieri de Passyer, igl emprem enconuschent plevon da **Tujetsch** ella baselgia da sogn Vigeli. El scriva lu era lien la suandonta notizia: «*Tier quella disposiziun dad olmas vegnel speranza buca a stuer starmemia ditg en quei desiart*».

Entgins schabetgs remarcai e nudai egl anniversari:

Pag. 2a Entuorn 1456 venda Junker Hans von Ruferis (Rieven, Rüffen) ses beins.

Pag. 3a 1618 ils 25 d'uost, destrucziun da **Plurs** (en **Valtelina**), 2120 personas mortas.

Pag. 7a 1566 fetg bia neiv, 16 calzers ault.

Pag. 8a 1591 Viadi da 8 paders dalla abbazia da **Mustér** en **Tiarasontga**.

Pag. 15b Eruptio montis anno 1610. Forsa in tiaratriembel, ni il **Drun** ch'ei vegnius ualti da nusch, notizia da plevon Sebastian de Castelberg.

Pag. 22b 1456 miserabla raccolta

Pag. 34b 1744 Barschament digl uaul a **Surrein** entras il cametg.

In dils pli vegls documents dalla litteratura populara romontscha anflein nus era en quei anniversari, numnadamein ils enconuschents «Versets da striegn da **Tujetsch**». Els dateschan carteivel dalla fin dil 17avel tschentaner. Nus anflein els sin pagina 37, denton ei miez da quella tagliada naven. Forsa cunteneva quella medemamein versets. Tals ein forsà vegni tagliai ora e duvrai sco amulet encunter tuttas malsognas e striegn.

Diaus ha dau adinna uau duss, che iaitten prender Nauenda et la chara bona Sta.Sibilla et la chara bona Sta cilgia, ils chiars buns sos treis Regs. La chara bona Sta trinitad, nies char Sgr Jesus christus prendig nauenda quei mal in num della bona Ssta trinitad, sfa poder sifiet spirt turnar la sanadat.

Il secund verset da striegn secloma:

Maua ina donnaetta per in plaun ora, topaua nossa donna, nossa donna Scheua, nuua uol ira ti donnaetta. R Jau ui ira per medaschinas incorir, mia uaua ei usci mal toccaia. E. nossa donna tuorna a casa ti donnetta, tia ua ei uscia bein migliorada, quei seig entil nom del pader, fili et song spirt et ella uscia bein migliorada, enten nom da Jesus dueis fend et et schlop ar ora:

Il «Zinnsrodel» da 1555

Il cudisch da pergameina porta il tetel:

«DIS IST DEREN VON **TAWETSCH** ZINNS RODEL 1555»

El cumpeglia 26 paginas ed ei screts sin pergameina ed en tudestg, sco ei era lu il cass normal. Quei «Rodel» dat a nus in stupent sclariment davart l'administraziun dallas finanzas en vischnaunca. Probablamein vegn quei buca ad esser stau igl emprem «Rodel», cuntegn el gie indicaziuns pli veglias ch'ei vegnidas pridas neu d'in anteriur «Rodel».

All'entschatta secatta in conclus che vala medemamein sco lescha. Igl ei quei gl'emprem protocol dils vischins da **Tujetsch**.

Quel suonda cheu el text original tudestg:

*Wier, Gemein Nachpurenn gemeincklich und unverscheidennlich des thalss unnd nachpurschafft zuo **Thafetsch**, thuonnt kunt mencklichem, so disn gesehrifften annsehend und lässend oder hörendt. - Als wier einhelicklich übereinkumen unnd unns durch nütz unnd wollstanndt des thalss obgenannt bedacht habendt, disenn unnsere Zinns rodell ze setzenn, allss hernach von punnckten zu punnckten gesetz unnd gestellt würdt; an zuo gesehenn, das von wägen absterben der lütten unnsere Zünss oder güllt unnd andere ordnung, so wier in unnsere obgemelt tall habend, zergon und zü abgang kumen möchten. Die wyll und wier also überein kumen sindt unnd sölich gettann, so söllendt wöllendt wier, das alles, so in dem Rodell geschryben unnd geordnett württ, dass sol danenhinn krafft unnd macht haben und gelten zuo glycher wyss, allss ob ess brieff unnd sigell darum gesetzt unnd gemacht were, unnd keiner nimer mer dar wider thuonn noch handeln in keiner nimer mer dar wider thuonn noch handeln in kein wyss noch weg, dar mit unnd wier sölichenn Rodell zuo offenthalt unnsere Zinnsen und vor jedem Rechten gebrucht möge werden, unnd sol ouch diser unnsere Zinss Rodel an einem gemeinen ort, da ein gemene nachpurschafft gemellte tallss verordnet, behalten werden.*

Item es ist ouch berett, wass man vor zuo herynn schrybenn will, dass sol allwegen für ein nachpurschafft, allss vor statt gebracht unnd für gehalten werden; unnd wass dan für die Gemeindt und nachpurschafft gemacht württ, des sol sich ein jeder benuegen lassenn.

Item zuo glycher wyss ob es dar zuo kein, dass einer oder mer Zinss ablösen - es sy, das der Zinss ablösig wer, oder das es mit wilenn einer nachpurschafft geschehe - so sol er den ouch ein nachpurschafft lütt darzuo verortnen, dem selbigen sin geschriff an dem Zinss zuo cassiere und dannenhin diesem Rodel ann anderen Dingen keinn schadenn bringen.

*Und sol ein jeder Zins abgelöst werden für ein Guldi - zwanzig guoter Werung **Tissentiser** und den Zins darmit.*

Tenor quei conclus possedeva la vischnaunca (ni ils vischins) da **Tujetsch** gia daditg ina cassa communal. Dasperas existeva da vegl enneu ina cassa da pervenda, digl ugau pervenda, la cassa dils paupers che vegneva administrada digl ugau spenda. La cassa da vischnaunca survigilavan il statalter ed ils cussegliers e las entradas derivavan da castitgs, da naturalisaziuns, da certas taxas e cunzun da tscheins ord beins, mises e pastiras schai vi a vischins. Lu existevan aunc neginas taglias el senn dad oz.

Quels daners vegnevan lu empristai a vischins encunter in pègn funsil e tschun per tschien tscheins. La cassa da vischnaunca veva lu la funcziun che la banca ha oz. Quei medem sistem da daners (banca) funcziunava medemamein culs daners dalla cassa da pervenda e dalla spenda.

Exempel d'in tal emprest ord il «Rodel»:

*Item Jan Wüll soll den nachburen von **Davetsch** jerlichen zwen Rinisch gl. Zins off S. Martins tag; Und dz versichert uff Huss und Hoff zü **Sadrin** gelegen. Erst ein stückh guot in Aren, stost morgen halb an Durig Platzi güt, abenthalb an Yan Tschansen guot, mer aber ein stuckh guot, stost morgenhalb an Ursula Jon Thoni guot, abenthalb an Jan*

*Tschansen güt, me ein stuckh guot an dem **Wäyellen** weg, stost morgen halb an Ursula Thoni guot, abenthalb an Gallis da Paneyen guot, me ein stuckh guot in **Bloun Sadrun**, stost morgen halb an Melcher von Dönyfrow guot, abenthalb an Gallis da Paneyen guot, mer ein stückh guot in **Bloun Sadrun**, stost morgenhalb an Jon Tschans guot, abenthalb an Penadikt Durtschey guot. Und yst sölicher Zins gemacht im Jor 1550.*

Plinavon vegnevan plirs mises schai vi a singuls vischins. En special vegnevan mises ella vischinonza da **Cavorgia** schai vi per tscheins. Il tscheins fuva bass e muntava per exempel:

6 «Kreuzer»

4-6-12 «Batzen»

Enqualga era dapli, entochen 2 flurins (1 flurin = 1.70 francs). Autras ga stueva il petent era prestar ina lavur enstagl pagar en daner.

Quei muossa il proxim exempel:

*Item hand die Nachpuren dem Andriu de Sax gen ein stück Almeindt innerhalb **Balkunetz** gf. f meynung dass er oder sine erben, so den genannten stück in hand, die strass erhalten; zum ersten die strass obern den gemelten guot, me die strass under sines vatters guot - zuo ewigen Zitten, so sy dz guot in handen handt. Ist beschechen 1563.*

Plinavon:

*Jon Busch soll 20 Batzen ab einem Maiensäss zu **Cavorgia**. Er soll ouch den weg erhalten und Bruck neben den egenanntten guot, dass ross und wagen mögen faren.*

Pil pli restavan quels mises proprietad dalla vischnaunca. Els savevan era vegnir cumprai ora e daventavan aschia proprietad privata.

Il proxim exempel ord il «Rodel» muossa, co in toc pastira communal vegn vendius per far diever sco mises.

*Item ist für gemaine nachpuren komen der brscheyden Salter Jon Tieni und gebeten, man sol im lassen geben ein meiensess. So ist man eins worden zuo geben mit dem geding, dass er unserhalb den Kilchspel weder verkaufen weder versetzen soll. Und ist diser waldt zuo oberst im Waldt de **Bünei** stost gegen **Disentiser** Grenzen. Ist geschehen in Jar nach Christ gebürt 1616. h.D. dis ist usgericht und bezalt, namlich 15 guldi.*

Novs burgheis

Sin las davosas paginas dil Zinnsrodel ein nudadas pliras naturalisaziuns. Pia immigronts ch'ein vegni pri si sco burgheis, vischins da **Tujetsch**. Persuenter stuevan els pagar ina mudesta taxa.

*Andrias von Alta ist angenommen von der Gemeindt **Lugnitz** in unsere nochpurschaft **Tafetsch** in dem Jor 1585, hat der nochpurschafi geben 8 g (ulden) für ein worer nochpur.*

*Mher ist angenommen der Arbogast Jon Theni uss der **Grub** für unser nochpur in **Tafetsch** in dem Jor 1601, hat geben 18 g (ulden).*

*Item Jan Marttin Schnider uff **Schamutt** is in genumen für ein nochpur von **Daffetsch** injar 1613, hatt geben zu erschatz und ware sicherheit achzig guldi, hatt den gmeinen nochpur geben 46.*

*Mer ist in genumen Jan Jacum von **Lugnetz** für ein nochpur in **Daffeesch**, hatt geben 9 guldi in erschatz in 1613.*

1590 Item ist in genumen Theni Josef von **Flims** für ein nochpur in **Daffesch** er und sin son Lienhardt, hatt auch geben 20 guldi.

Mer ist in genumen Tieni Wyrdt uss **Falss** ist in genumen für ein nochpur in **Daffesch**, hatt geben 21 guldi, 1609.

Item Crist Scherer vo **Cur** ist in genumen in der nochpurschaft **Daffesch**, hatt auch geben einer nochparschaft 15 g (ulden) und ein halb il 1610.

Item Jacum Vykto von **Luknytz** ist auch in genumen für ein nochpur in **Daffesch** wie die von altershar ist in genumen, hatt auch geben 17 gulden denen nachpuren von **Dafesch**.

Item Jan Lienar(t) uf **Schamutt** ist in genumen für ein nachpur in **Dagge(tsch)**, hatt auch geben sechszen guldi denen nachpuren in **Daffesch**.

Item ist in genumen Cryst Galles Pyttaysch von **Pyttaysch** in den nachpurschaft **Daffesch** für ein nochpur, hatt auch gebenn den nachpuren in **Daffesch** 18 gulden zu erschatz.

Item ist ingenumen Petter Magulin von den Tall **S. Jacum** für ein nachpur in **Dyfes**, hatt auch geben der nachpurschaft **Daffesch** 10 gulden zu erschatz.

Item Mathias Gasparin aus **Lugnetz** ist hir zuo **Thauehs** von der nahtpurschaft für ein nahtpur angenommen worden, hadt der nahtpurshaft geben 10 guldin.

Beins, uclauns e vitgs

Sin fundament dils sura presentai documents digl anniversari da 1456 ed il «Zinsrodel» da 1555, eisi pusseivel d'eruir ils vitgs, uclauns e beins en **Tujetsch** dil 15/16 e 17avel tschentaner. Ina lavur gia fatga da Giachen Hasper Muoth digl onn 1898. El ha anflau en tut 66 beins e vitgs.

Quels secloman:

1. **Acla** (pli tard **Nacla** e **Naclas**; ord in acla) (declaronzas da G.C. Muoth)
2. **Balcunatsch**
3. **Bigliel** (egl anniversari **Blüel**)
4. **Bugnei** (**Pinetum** = uaul ni els pégn)
5. **Cadanal** (**Canadal**)
6. **Cajeri** (Casa dil Gieri, **Cungieri**)
7. **Camnil** (**Cunnil**, **Cannil**, **Cunnel**)
8. **Camischolas** (**Gampscholas** = prada pintga)
9. **Capeder** (casa dil Peter, sur **Camischolas**)
10. **Carenay**
11. **Carumieg** (casa Remigi)
12. **Cascharolas** (**Cascharolas**, da caschar, Tier las tegias; impurtont bein sur Rueras)
13. **Caschners** (tiels caschners)
14. **Catenschuns** (Kattenschons; in grond bein denter **Dieni** e **Rueras**)
15. **Caveratscha** (Kaverätschen; **Casatscha**)
16. **Cavigili** (casa dil Vigeli)
17. **Cavorgiasura** e **Cavorgiasut**

18. **Claus** (Clus, Clys = fermada, seiv)
19. **Clavadi** (clavau pign = visavi **Giuv**)
20. **Clavau sura** (**Selva**)
21. **Cresta** (crestas; sur **Rueras**)
22. **Crispalts** (**Caspausa**)
23. **Curtins** (**Curtin**, claus, era **Im Hof**)
24. **Denter auas** (carteivel denter **Strem** e **Drun**)
25. **Dieni** (Bein dil Tieni)
26. **Durtschey** (pli baul **Urschen** e **Urtschey**, num da famiglia Durschei, enagiusut **Malamusa**)
27. **Florin** (**Flurin Sura e Sut**, num da famiglia Deflorin)
28. **Foppas** (**Surrein**)
29. **Ganda, Gonda** (spunda da crappa)
30. **Giuv** (**Juf** e **Juff**)
31. **Isla** (pli tard **Nislas**)
32. **Lausser**
33. **Malemosa** (**Malamusa**)
34. **Milar** (egl anniversarl Mueller e Moler)
35. **Mulinatsch** (pauper mulin, en decadenza)
36. **Mungut** (Menigotti da Dominicus)
37. **Müren** (pli baul era **Mürenberg**, sur **Tschamut**)
38. **Muschnatscha** (magliac crappa, sur **Dieni** encunter **Giuv**)
39. **Nasslur**
40. **Oliva** (era sco schlatteina fetg derasada ei 17/18avel tschentaner)
41. **Palutt** (**Palits, Balitts**, sur **Tschamut**)
42. **Pardatsch** (pastira selvadia)
43. **Piedmunt** (**Pitgmun**; al pei dil cuolm)
44. **Platta** (pli tard **Platz** si **Tschamut**)
45. **Plonatsch** (**Planatsch**)
46. **Plonca** (plaunca; sur **Camischolas Sura**; document nr.45)
47. **Pulleuma** (era **Bolliematta**)
48. **Pultengia** (casti cul medem num)
49. **Puntnova**
50. **Ragisch**
51. **Rueras** (**Ryferis, Ryfares**)
52. **Salins**
53. **Sarcuns** (pli baul **Cazarcuns** ni **Gazarguns**; 1545 **Fatzanguntz**, 1555 **Sarkuns**, 1630 **Sarcuns**)
54. **Sax** (grop, num da famiglia Desax)
55. **Sedrun** (1483 **Surdragun**, 1555 **Sadrin, Sudrun**, 1557 **Sudragun**)
56. **Selva** (egl anniversari cattein nus aunc ils suandonts nums per **Selva, im Holz, Salvanix, Sulvanix, Selvaningen**)

57. **Stamouns** (intus pontem, sper **Rueras**)
 58. **Surrein**
 59. **Tschamut** (**Schamuot, s'Mutt, Zemutt**)
 60. **Zum Trok** (tiel begl)
 61. **Tgynay**
 62. **Ugneu e Z'utzney**
 63. **Vallcons**
 64. **Vallmertsch** (**Falmertsch, Mertsch** sco bein)
 65. **Vallschella** (sur **Rueras** si, dator **Cascharola** ni **Valtgeva**)
 66. **Vigilia** (**Wayella, Wallilla, Walella, Willüli, Fölöli e Wül**, in bein che vegn numnaus fetg savens)

Da quels 66 beins ein 45 buca mo singuls beins, mobein pli grondas gruppas da casas cun entgins baghetgs e casas. Quellas casas vegnevan habitadas da pliras famiglias, carteivel parentella ni da gliend derivonta dil medem liug. Mintga bein ni uclaun possedeve per part era atgnas pastiras, schizun atgnas alps (**Tschamut**), ed agens mises e pastiras da casa. Tut quels uclauns ensemen formavan gia lu ina communitad, ina vischnaunca, la vischnaunca da **Tujetsch**.

Ils biars beins ed uclauns d'antruras ein oz svani, restai ein sulettamein lur nums. Quels ordlunder ein per part daventai mises ni aclas. Quella retratga dils beins ed era la midada da viver en vitgs pli gronds, en pli grondas cuminonzas, ei sesplegada enteifer il 17 e 18avel tschentaner. Quals ein bein stai ils motivs leutier? Pertgei ein els seretratgs dils beins els aults sil funs dalla vallada? Els ein secasai per liung dalla via che traversa nossa val da damaun viers sera e sper las bialas e biaras capluttas e baselgias ch'ei vegnidas construidas e refatgas enteifer il 17 e 18avel tschentaner.

Ella entira **Europa** dat ei enteifer ils tschentaners grondas midadas dil clima, il clima migeivel dils tschentaners el temps miez semida. Igl uaul els aults sto ceder (**Alpsu, Plidutscha**). Era ils habitonts els cuolms sentan la midada. Lavinias, ferdaglias e cuflas smanatschan. Els sesentan buca bein en quella izolaziun. Medemamein vegnan il pavel e fein pli scarts entras quellas midadas. Il graun po buca madirar. Sfurzadamein midan els fuorma da viver, bandunan lur dacasa (che daventa mises) e secasan sil funs dalla val. En ina cuminonza pli gronda sesentan els pli segirs. Buca schi dapersei anflan els agid e sustegn tiels vischins en cass da miseria e disgrazia.

Ils uclauns bandunai il davos ein stai:

Giuv, Nacla, Canadal, Cavorgia-sura e Nislas. En quels vivevan tenor ina dumbraziun dil pievel da 1768 aunc entginas famiglias.

Giuv	5 famiglias	21 habitonts
Nacla/Canadal	4 famiglias	18 habitonts
Cavorgia-sura	3 famiglias	12 habitonts
Nislas	2 famiglias	8 personas

Quella midada dalla structura da viver ha cuzzau per part aunc tochen viaden el 20avel tschentaner. Enteifer 200-300 onns sereducescha la cefra dils beins da 66 el 15avel tschentaner giu sin 11 pigns e gronds vitgs.

Tschamut	Selva	Dieni
Rueras	Zarcuns	Camischolas
Gonda	Sedrun	Bugnei
Surrein	Cavorgia	

Il gissiatavel tschentaner

Gronda activitad religiusa

Il 17avel tschentaner ei caracterisaua entras in immens moviment religios en nossa entira vallada. Enteifer quei tschentaner vegnan buca meins che tschun capluttas construidas sin terren tuatschin e la baselgia da sogn Vigeli vegn reconstruida ed engrondida.

1609 caplutta a **Cavorgia**

1622 caplutta a **Zarcuns**

1630 caplutta a **Selva**

1650 circa la caplutta da **Giuv**

1679 caplutta a **Surrein/Foppas**

1691 reconstrucziun ed engrondaziun a sogn Vigeli

Il motiv da quella voluntad ed energia da baghegiar capluttas en quasi mintga uclaun e vitg ei carteivel d'anflar ella reformaziun che regeva egl entir cantun. Pia ina reacziun, ina demonstraziun religiusa ni era ina ustonza enviars la reformaziun.

Tgei immensa prestaziun per ina vallada cun circa 700 habitonts! Tgel lavur per nos antenats! Cons daners e con suadetsch ha ina tala lavur custau allas generaziuns dil 17avel tschentaner. Franc in mussament da lur ferma perschasiun religiusa.

In ulteriur mussament da quei moviment religios, dall'impurtonza ed influenza da quel, ei la fundaziun dallas differentas confraternitads.

1609 la confraternitad da sogn Giachen

1691 la confraternitad dil sogn rusari

1703 la confraternitad dil sogn scapulier

Dalla confraternitad da sogn Giachen exista la gliesta dils commembers. Zun interessants ein ils nums ch'ei d'anflar en tala. Cheu mo entgins:

Commessari Martin de Florin

Cavalier Martin Mon

Cavalier Martin Jon

Statthalter Gilli Genin

Gilli Jon de Giuff

lonet Jon de Medell

Clau paull

Jacum Durtschey

Jacum de **Camischolas-Sura**

Hans calgier

Juli Riedi **Cimut**

Statthalter Durig Berchter

Sur Giachen Antoni de Gonda ha reformau 1769 las statutas da quella confraternitad. Ella ei svanida all'entschatta dil 19avel tschentaner.

Igl onn 1664 vegnan ils cudischs da batten, mortoris e lètgs introduci en nossa pleiv entras plevon Andriu Decurtins (1656-1672). Quei onn anflein nus gia 36 naschientschas, 8 mortoris e 4 lètgs. Igl onn sissu 1665: 37 naschientschas, 11 mortoris e 6 lètgs. Las cefras lain sminar in svilup positiv dalla populaziun ella val.

El **Grischun** regia uiara. Ils embrugls gischuns durant l'uiara da trenta onns, 1618-1648 han era tuccau nossa regiun. Il plevon da lu, Bartolomeus Derungs a **Sedrun**, descriva quei temps nausch egl anniversari. La descripziun vala pils onns 1618-1622.

All'entschatta dalla descripziun metta el la cuolpa da tuttas disgrazias e miserias sin in comet cumpariu igl onn 1618.

Da man zalt noch Christi unsers Herren geburt 1618 in Christmonat ist ein Cometstern etliche nächte noch ein anderen im Himmel under die anderen natürlichen stern gesehen worden schier die ganze Welt welcher cometstern vil Unclück Krieg, ufrur, sterben und

theuerung verursacht und gedeutet hat etliche Jar noch ein andern.

*1621 sin vil scharmützen geschehen zwischen den catholicischen und lutirischen zu **Zizers**, zu **Chur**, zu **Thusis** zu **Waladas** umb daselbst umen vil blut vergossen, gar vil Volk umkommen, vilfürenen Herren geistlich und weltlich gar schändlich hin und wider ermörd worden von den luterischen.*

in denselben früeöing in merzen sin wir Catholischen in oberen Landeren von den Understen luterischen punds - leüten gechlich Überlaufen worden, us unseren landen und grenzen jung und alt, Wib und Kind verjagt und vertrieben, sie haben aber alles unser gut verschleiz, verderbt un ufgefressen, wir sind aber bald wider in unseren Land komen, gros, ech tige schaden erliten.

El finescha cun dar ina egliada sils daners e valeta da quels:

Dass gält war vil und in höchsten werd. Ein Jeder armer man hate sin seckel vollen gelt. Die richen haben auch mögen ein sikinen uslichen ein Jar lang um ein gl. Zins. Dass ganz land ward dadurch verdorben und arm und rich hoch versündigt, ein ieder den anderen betrogen.

Ein Krenen Kupfer und alt fuls Kupfer war so werd und thür, dass die Wiber die kessel ind pfanen ab den feür gesez genommen und verkauft haben, und uss den Kupfer ist geld daruss geschlagen. Jedermann kauf Kupfer uff und liess geld darus machen.

Fatgs alpesters

Il 17avel tschentaner ei scarts da documents. Ils sulets documents avon maun tractan tuts da fatgs dallas numerusas alps tuatschinas.

Ils onns 1609/1625/1629 venda la cuminonza communalas las alps **Cuolm Cavorgia**, **Ploun Pardatsch**, **Pardatsch**, **Cavradi**, **Maighels** e **Surpalits** ad indigens u a cooperativas e puspei ils onns 1663/1664 cumpran ils vischins anavos las alps vendidas. En auters documents va ei pervia da dispetas che pertuccan las alps tuatschinas, en possess dalla vischnaunca, dalla claustra u privats.

Il schotgavel tschentaner

*Pader Placi a Spescha e **Tujetsch***

Pader Placi a Spescha, in dils pli enconuschents paders dalla claustra da Mustér, descriva la **Val Tujetsch** igl onn 1805. Quella descripiun dat perdetga dil viver el 18avel tschentaner en nossa vallada. El sez enconuscheva segiramein bein las relaziuns en **Tujetsch**, ha el gie pastorau plirs onns a **Selva** e **Sedrun**. El ei era staus in dils emprems alpinists e turists cheu tier nus. Plinavon ha el rimnau ed anflau biala e preziosa crappa e minerals. Igl onn 1785 ascenda el il **Pez Badus**, 1792 il **Pez Ault**, 1793 e 1812 il **Pez Tgietschen** ensemen cul plevon sur Giusep Hitz ed il cavrer, 1804 il **Pez Giuv** ed aunc auters cuolms da nossa vallada el decuors da sia pastoraziun ella val. En sia considerabla lavur da varga 900 paginas descriva el l'economia, la politica, l'agricultura e cultura ed auter bia. Denter tut quei descriva el era il raz tuatschin e metta veramein accents singulars:

*«Quei ch'il diamant ei denter las cristallas ed igl aur denter ils metals, quei ei il carstgaun denter las creatiras viventas. Partenent la schlatteina humana sai jeu dir dals Tujetschins e quei senza far il leischen, ch'els seigien il pli bi raz de tuts ils habitonts dellas alps. - Da natira ein els veramein biala glied, ed han, surtut en lur giuvens onns, ina colur sco latg e vin. Tiels carschi svanescha beinduras quella bellezza naturala, essend ch'ins dat memia pauc adatg silla schubradad dils affons, ins siara en els memia ditg ellas faschas, arva mai si las finiastras e fa mo de rar, ni insumma mai bogn cun els. Ils umens ein mediochers da statura; mo paucs mesiran sis peis e dapli. Els ein ferms, bein proporzionai e bials da statura. Sch'ils umens de **Tujetsch** purtassen vestgadira empau meglier fatga e colurada e sch'els scultressen in tec ils cavels e schessen tagliar la barba,*

lu fussen ei stupentas comparsas. Las femnas ein generalmein bein carschidas e gradas sc'in coniv, lur fatschas ein amureivlas ed ellas han ina colur sco latg e vin, ellas han liungs e bials cavels mellens.

Lur cuntut ei spèrts e grazius; lur tschontscha lingiera e viva. Las bialas e frestgas mattauns setilan bugen el dumiest ed in proverbii di: Ins sa mai nua las mattauns ed ils cavals laian lur ossa. Ei sedi ch'enteifer 70 onns seigien bia mattauns maridadas ord vischnaunca e purtau ord la val in capital de varga 100 000 flurins (circa 175 000. - frs.)»

Pader Placi enconuscheva memia bein ils prighels che smanatschavan giu dils aults. Quei ha menau el tier in plan straordinari. El enquera in liug centralisau e segir da tuts prighels en tuts graus. Quel anfla el a **Salins**, el liug nua che la staziun dalla viafier sesanfla oz. Cheu deva ei plaz per l'entira populaziun da **Zarcuns** e **Camischolas**, **Salins**, **Gonda** e **Sedrun**. El di era:

*«Wenn ich Befthlshaber von **Tawätsch** wäre, müsste hier ein allgemeines, regelmässiges und wohlgebautes Dorf gleich einer Stadt gebauet werden».*

Siu vitg, plitost marcau, skizzescha el en fuorma da rombus. Sulettamein la baselgia e la casa pervenda dueien restar el liug vegl. Il medem project haveva el pil vitg da **Selva** ch'el leva era reconstruir da niev.

Ils Tuatschins vegnan ad haver ris dallas ideas revoluzionarias dil pader, da lezzas uras fuvan els ualti conservativs.

Dumbraziun dalla populaziun

El 18avel tschentaner vegn la populaziun dumbrada per l'emprema gada. Quella lavur ei vegnida fatga dil plevon da **Sedrun** Giachen Antoni de Gonda ils 19 d'october 1768. Ils cudischs civils dil stadi ein vegni introduci pér 1860. Il pievel vegn dumbraus en mintga uclaun e vitg. Ins ha numnau ils fiugs, las famiglias e lur affons.

Per exempel Tschamut:

- | | |
|--|----------------------|
| 1. Gion de Platz = Margaretta Hütz: | 3 feigls + 2 feglias |
| 2. Maria Catharina Riedi vieua Clau Sievi: | 2 feigls + 1 feglia |

Ils habitonts tenor ils vitgs habitai 1768:

Liug	umens femnas		total
Tschamut	33	34	64
Selva	48	47	95
Giuv	13	9	21
Rueras	104	110	214
Zarcuns	9	14	23
Camischolas	38	39	77
Salins	7	20	27
Gonda	38	26	64
Sedrun	69	67	136
Bugnei	18	28	46
Nacla/Canadal	8	10	18
Foppas	8	11	19
Surrein	18	17	35
Cavorgia	11	6	17
Il Plaun	4	4	8
Cavorgia-sura/Nislas	9	11	20

Total **435** **449** **884**

Las femnas domineschan cun in diember da 449. Lu dat medemamein en egl la gronda populaziun a **Rueras** cun 214 habitonts. **Gonda**, **Sedrun** e **Salins** ensemen dumbran 227 habitonts. Smarvegliar far era la gronda populaziun dadens gl'uaul cun total 159 persunas en 33 fiugs.

Ella dumbraziun secattan pliras schlatteinas ch'ein oz svanidas en vischnaunca.

Aschia:

Sievi	Würth	Diog	de Pelli
durschei	castelberg	Oliva	Mucli
Vagliaglia	Emma	de Dieni	de Gonda
genin	Zenset	gries	Caschalk
de Cazarauls	Balzart	Zanetti	de Salins
Maller	pauldet	Waldis	Maculin
Biart	Wölleb	Casparin	

Da quei tschentaner naven eisi pusseivel da far in maletg dil svilup dalla populaziun tuatschina.

La populaziun crescha cuntinuadamein entochen miez il 19avel tschentaner. Ina sminuaziun dat ei ils onns 1870 dil 18avel tschentaner, all'entschatta dil 19avel e suenter la mesadad da quel entras l'emigraziun ell'**America** e **Tiaratudestga**.

Il schotgavel tschentaner va alla fin cun in grond moviment revoluziunar ella entira Europa. La revoluziun franzosa che sespleiga lunsch naven da **Tujetsch** lai tuttitina anavos grevas plagas ella val. Ils Franzos arrivan en **Svizra** e percuoran schizun nossa vallada.

Ils Franzos ella Val Tujetsch 1799

Duront il temps dalla revoluziun franzosa ein las tiaras cunfinontas era vegnidas involucadas en uiaras che han schau anavos dapertut trestas reminiscenzas. Aschia ha la republica dallas Treis Ligias dalla Rezia stui sedefender vehementamein encunter las partidas jastras.

Gia ils 18 d'october ha in schischuri regiu ella **Cadi**, pertgei che la tschontscha fageva la currella: Ils Franzos vegnan sul **Cuolm d'Ursera**. - La vigelgia ei in um da **Tschamut** turnaus dad **Ursera** culla nova ch'ils Franzos seigien arrivai leu per rumper en ella **Surselva** ed hagien postau lur avonpostas ellas hettas sill'**Alpsu**. La sera ei quella nova arrivada tochen ella capitala dalla **Cadi**, a **Mustér**.

Ils Austriacs havevan gla daditg fatg amogna agid encunter ils Franzos. L'invasiun dallas «truppas dil Kaiser» ei suenter quella nova daventada realitad. Gia ils 20 d'october ei ina cumpignia schuldada austriaca dil regiment Brenchaiville s'avanzada entochen ella **Val Tujetsch**. Ussa stevan las truppas hostilas dil «Kaiser» e dalla «Tricolora» sill'**Alpsu** ina siper l'autra. Il prighei d'ina uiara fuva aschia acuts. Da leu anora ha quella gruppa examinau las vias ed ils trutgs da **Tujetsch** e **Medel**. Plinavon ei ina cumpignia da catschadurs che secumponeva da burgheis dalla **Cadi** vegnida tarmessa sill'**Alpsu** e sil **Crispalt** (sils urs dils passadis) per sustener la schuldada austriaca.

Vesend la republica franzosa las alianzas e preparativas d'uiara da part dall'**Austria**, ha ella vului prevegnir alla attacca. Igl inimitg s'avonza ella **Val Medel** e rumpa era en ella **Val Tujetsch**. Cun 1500 umens ei general Loison vegnius ils 6 da mars 1799 enten catschar dis sur l'**Alpsu** ed ei daus encunter l'emprema resistenza a **Sumsassi**, endadens **Rueras**. Gadola raschuna detagliadamein dil schabetg en nossa val.

Ils emprems Grischuns che hagien engartau ils Franzos seigien dunnas da **Tschamut**

stadas, ellas che seigien fugidas aschi spert sco pusseivel encunter **Rueras** e **Sutcrestas**. Onna Catrina Riedi, ina dunna ch'era s'enterdada, hagi observau ils Franzos, mirond atras las sgremas d'in clavau. Da siu lagugn anora hagi ella schizun dumbrau il diember dalla truppa, biabein 1000 umens. (Decurtins plaيدا da 800, Condrau da 1500 schuldada.) Duront il cumbat hagian els perfin sittau e tucchau il zenn dalla caplutta da **Selva**. In gluven da 18 onns che era blessaus en ina comba, ei vegnius sittaus giu. El ha giu num Giachen Martin Berther e fuva da **Camischolas**. Austriacs e Tuatschins han battiu sco liuns, mo suenter il valerus cumbat han els stuiu ceder alla surforza dils Franzos. Dapertut nua ch'els anflavan ina buna posiziun han els encuretga da retener ils Franzos. La **Val Tuietsch** ei stada aschia en possess dils Franzos che ein stai ni crets ni maneivels. Els han rut en en las baselgias ed era ella parochiala a **Sedrun**, scarpau si leu il tabernachel, engulau il cibori e fiers las hostias giun plaun. Silsuenter han els fatg ina viseta al plevon Vigeli Venzin e cattau leu in Degonda ed il caplon da **Rueras**, sblundergiu l'entira casa, ed han sfurzau ils umens avon il clavau da **Mira**, nua ch'els ein vegni mess vi. Aunc oz dat ina cruscha da lenn perdetga dil mazzament (Casa Emil Schmid-Beer). Era a **Bugnei** han treis purs stuiu schar la veta. Quei fuvan Hans Gieri Monn, Placi Monn e Gion Battista Sialm da **Segnas**. Cura ch'ils emprems posts franzos ein arrivai a **Mumpé-Tujetsch**, ei l'entira **Cadi** vegnida alarmada. Suenter quell'ord la **Val Tujetsch** ei il cussegl d'uiara serimnaus, ils umens ein sepinai. Suenter la discussiun cun in officier franzos han ins luvrau ora il project da defensiun ed il liug, numnadamein **Mustér**. La battaglia a **Cons** ei stada ina mazzacrada terribla che ha custau la veta a biars, da mintga vart. Enderschend Loison dalla terrada, eis el seretratgs cun sias truppas encunter **Tschamut**. Ils purs furius han persequitau ils Franzos tochen sil **Cuolm d'Ursera**, tgi dil maun da **Tschamut**, auters dalla vart da **Tiarms**. Sper il lag ha ei dau ina nova mazzacrada, leu nua che plirs Franzos ed entgins dils allial ein curdai. Sinaquel ei il rest dalla armada franzosa seretratga ad **Ursera**. Suenter quell'ord lutgas han ils Franzos buca dau triev, cun general Demont ei denton ina nova truppa rutta en ella **Cadi** per far vendetga per lur camerats. Entras contribuziuns ha la vischnaunca da **Mustér** stuiu far bien per ils donns caschunai. Cunquei ch'ils da **Mustér** ein selamentai dil sblundergem, ei la glied da **Tujetsch** segidada sin basa finanziaria, sco era cun maglias per la schuldada ed ils cavals. Per la furniziun dil paun han 20-30 purs tuatschins transportau mintgadi frina sul **Cuolm d'Ursera**, quei fatg vegn è menziunau da Berchter. Els vischins da **Medel** hagian giu ruaus en quei grau, selamenta Berchter.

Ils 25 d'avrel, cura che bun'aura ei rutta en, savevan ins buca retrer frina pli digl **Uri**. La conseguenza ei stada quella che Hardeville ha mess maun vid la semenza dalla claustra. Aschia stueva la populaziun trer vi la schuldada che aveva priu quartier en nossa tiara. En in plan han ils contemporans planisau la vendetga sigl'emprem da matg 1799. Igl'emprem da matg, suentermezdi, han als Tuatschins attaccau las postas dils Franzos. Igl'officier ha buca ughegiu da far resistenza ed ei sesurdaus ensemblamein cun sia schuldada. Suenter quella nova ord la **Val Tujetsch** ha l'attacca priu sia entschatta a **Mustér**. La sera dil medem di ein ton **Mustér** sco era **Tujetsch** stal liberai. Ils perschuniers franzos ein vegni teni a ferm, gl'emprem ella Casa cumin e silsuenter ein tuts vegni sturni. La puraglia fuva segira dalla victoria, nunspitgadamein ein ils Franzos turnai ed han fatg ina vendetga sgarscheivla. Igl'eventiment il pli snueivel ei bein staus il barschament dil vitg da **Mustér** e dalla claustra cun tut ses scazis. Suenter quei act da vendetga ei la posiziun d'uiara seviulta malamein. Els Franzos ein seretratgs per schar entrar ils Austriacs.

Igl'ost dil medem onn ei ina armada russa sut la direziun da Suworow marschada tras nossa val.

Aunc oz va la fama dils Franzos en **Tujetsch**, buca tut quei ch'ins pretenda ei ver, sco per semeglia:

- Il clavau dils Franzos sil «**Plaun dil Saltè**» dadens **Rueras** ei enconuschents a tut ils Tuatschins. Che quei schuldau designaus sil pilaster ei buca in Franzos, gliez san buca tuts. Igl'onn 1864 ha in Hitz schau ereger quei baghetg. Dil trup da luvriers ha in giuven talian fatg part. El vegneva numnaus «bueb da mauta». Quel vevi habilitads specialas da

malegiar ed ina ambiziun tut speciala per Garibaldi. Cura ch'il clavau seigi staus baghegius a fin, hagi el dumandau il possessur, schebein el astgi dessignar in Garibaldian sil pilaster che miri encunter sid. Ella tradiziun ei quei Garibaldian sefitgaus sco schuldau franzos.

En mintga cass ein las regurdientschas dil temps dils Franzos idas d'ina generaziun a l'autra, l'influenza dalla revoluziun franzosa ei secatschada tocca el davos encarden.

Ils Franzos ella Val Tujetsch 1799 ei ina resumaziun dalla lavur da patentia el seminari da scolasts 1986 a Cuera da Miriam Manetsch-Berther, Sedrun/Trun.

Fontaunas

<i>Berther</i> , Francestg	In schuldau garibaldian. En: Gasetta Romontscha, nr. 2; 9.1.1987
<i>Berther</i> , Johann Ludwig Fidel	Das Berchter'sche Tagebuch. Ein Beitrag zur Geschichte der französischen Invasion in Graubünden im Jahre 1799. Hrsg. von Caspar Decurtins. Luzern 1882.
<i>Condrau</i> , Placidus	Der Krieg des Oberlandes gegen die Franzosen. En: Bündner Zeitung, Nr. 52-71, 1852.
<i>Decurtins</i> , Caspar	L'ujarra della Surselva encunter ils Franzos. Transl. da Pieder Vincenz. En: Igl Ischi 1899, p. 97-146.
<i>Gadola</i> , Guglielm	Dus novs documents davart l'istoria dell'uiara dils Franzos. En: Igl Ischi 1955, p. 162-167.
<i>Gadola</i> , Guglielm	Novs e nundnconuschents documents davart l'invasiun franzosa de 1799 sisum la Cadi. En: Il Glogn 1949, p. 4-6.

Il schenivavel tschentaner

Il pievel serevegn plaunet dil nausch temps dall'occupaziun entras ils Franzos ed Austriacs. Ei vegn pli ruasseivel sil camp politic - silmeins tier nus en nossa vallada plitost isolada digl ulteriur **Grischun**.

Emprem uorden da Tujetsch

Cun l'entschatta da quei tschentaner anflein nus ils emprems uordens da vischnaunca. Quel digl onn 1811, igl emprem, rugalescha il menaschi d'alp e dils animals igl entir onn ora.

Cavals deva ei en tuttacass era plirs en vischnaunca, pertgei igl artechel 6 pertucca quels:

«Tuccont ils Cavals essei Concludiu, che mintgin deigi esser obligaus de metter cun sees tiers; resalvon sch enzatgi leès dovrar quels per bos a Casa, sche deigien quels tals esser obligei de vischinar a casa, dues ei aber esser Cavals, che vessen pulein, sche deigien ei esser obligai de metter en Nuelg, tocen chei droven de treè.»

Lu igl artechel 7 che pertucca il luvrar las dumengias:

«Tuccont tier firaus e Dumenigas eissei Cunclodiu, che Nagin deigl puder portar ora lenna, ni portar buordis resalvond ina broka ne brenta si maun, a quei ei era entelgiu las Sondas ton la permavera sco la stad, dues ei esser da quels, che sur fagiessen, ed enzatgi vassess, sche deigi mintgin esser obligaus de portar tgissa, nua chei auda; gl'ei era entelgiu, che Nagin deigi pudeer jra Cun Cavals ne bos Cargai sin quels gis.»

Auters artechels paran a nus empau pli fasierlis. Denton, certs surpassaments han era obligau da scaffir els. In exempel:

«9. Eissei era Concludiu, che Naginas femnas deigen puder manée ellas alps, ner Maiessees, ton la premavera, sco la stad, quei sentelli femnas ch'en sin 13-14 onns et lau densi.»

Ils onns 1814 e 1818 suondan ulteriurs uordens da vischnaunca e dil medem gener. Pér igl onn 1838 vegnan las radunonzas dils vischins protocolladas. Igl uorden per propi, ni constituziun, suonda lu igl onn 1866.

Ils anno 1803 daventa il **Grischun** in cantun dalla **Svizra**. Gia 1814 vegn l'emprema lescha cantunala acceptada. Denton garanteva quella memia pauc ils dretgs confessiunals dalla minoritad catolica. Da l'autra vart temeiva ins per l'autonomia da vischnaunca. Aschia restan varga in miez tschentaner aunc las veglias isonzas politicas tradiziunalas dils tschentaners vargai en vigur.

La lescha federala va en vigur igl onn 1848. La vischnaunca da **Tujetsch** betta ella. Il motiv principal ei segiramein staus memia pauc garanzia per la libertad religiosa.

*Relaziun cun la claustra da **Mustér***

Igl onn 1814 festivescha la claustra da **Mustér** il giubileum da 1200 onns existenza dalla abbazia. En tgei relaziuns steva **Tujetsch** lu aunc cun il patrun feudal da pli baul? La dismessa dallas grevezias feudalas veva gia entschiet el 14 e 15avel tschentaner cun la fundaziun da cooperativas.

Duront il 15 e 16avel tschentaner piarda la claustra plaunet sia forza politica.

Ils 1622, sut avat Sebastian de Castelberg, ei la dieschma pils beins «**denter auas**» (probabel denter **Strem e Drun**) vegnida pagada giu. Avat Adalbert II ha schau vi 1658 tuts fuorns da metal sin territori da **Tujetsch** per in tscheins annual ad in cert bandieriel Duri Soliva.

Suenter liungs cumbats ell'entira **Cadi** vegnan las vischnauncas tec a tec deliberadas dalla dieschma. Per **Tujetsch** ei quel succediu ils onns 1745/1755.

Anno 1782 ei la claustra en miserias finanzialas. Ella sto vender ils beins ch'ella possedeiva aunc a **Camischolas**.

Tenor ils documents claustrals da 1801 possedeiva la claustra buca pli beins per propi en **Tujetsch**. A **Selva** possedeiva Gretta dil Hasper enzatgei beins entras in deivet tscheinsius per 20 flurins (34. frs.).

Lu fuvan las alps **Val Val** e **Val Giuv** vinavon aunc obligadas da pagar arvè e quei 600 crenas caschiel grass ad onn.

Il vischinadi da **Tschamut** fuva obligaus da pagar per lur atgna alp 142 crenas caschiel grass ni en daner 18 rizers per crena.

Ils tscheins fier muntavan lu per l'entira val per onn circa 71 flurin e 2 rizers.

Igl onn 1805 vegn il contract pertuccont las alps **Val** e **Giuv** renovaus. Sut punct dus ein ins secunvegni che las duas alps sappien vegnir gudidas e vendidas mo als Tuatschins.

Ils vischins ein denton vegni unfis da pagar arvers che derivavan aunc dil temps miez.

Pér igl onn 1866 ei l'entira caussa vegnida rugalada suenter liung temps da contractivas.

La cumpra dallas alps e l'erecziun dalla via stradala tras la vallada ha purtau problems finansials als vischins.

La scartira aschuntada muossa ora:

«**Tujetsch** ils 26 de October 1862

Sut il sura datum ei vegniu redonau ina Comissiun predeliberonta per seconsultar sin tgei pei prender per pagar giu igl arvè della Wen. Claustra de **Mustér**, sco era co pagar il deivet del'Expropriaziun della via nova, clasena suenter quella, sco era de concluder sin tgel moda e maniera in vegli Augmentar las Pervendas dellas Caplanias de **Sedrun** e **Rueras**.

Total taglia sin facultad pro 1862	586.62 fr.
pli taglia sin fiugs 190 a -.50	95.00 fr.
sin olmas 1000 a -.20	200.00 fr.
sin tiers:	
Vaccas 500	100.00 fr.

Stiarls e stiarlas 580	75.00 fr.
Vadials 500	30.00 fr.
cauras e nuorsas 3600	72.00 fr.
tiers casa 300	12.00 fr.
anseuls 400	4.00 fr.
cavals 25	10.00 fr.
puleins 12	1.56 fr.
Total taglia pro 1862	1 186.58 fr.

*La vischnaunca cumpra l'alp **Tschamut***

Sco gia udiu pli baul possedeua il vischinadi da **Tschamut** ina atgna alp surdada dalla claustra a tscheins igl onn 1398, ni forsa schizun gia avon. Quei document ei vegnius renovaus 1543. Da l'entschatta dil 19avel tschentaner dat ei traso dispetas pervia dalla gudida (1808, 1843) che cuozan in miez tschentaner.

Igl onn 1865 entscheivan novas dispetas. Quella gada denter vischinadi e vischnaunca. En general mava ei pervia dalla pastira da casa. Ei suonda mediaziuns e process senza fin.

Per saver cumprar libers dil tscheins fier dalla claustra ston ils vischins prender si dalla banca 2000. - francs e metter sut l'alp **Tschamut** sco pègn (1861).

La brev da vendita dalla claustra plaيدا sco suonda:

«... Il vischinadi de **Tschamut** che pagava in annual de fr. 80.47 enstagl dil caschiel grass che stat sco grevezia annuala sin lur alp **Tschamut** ala Ven. Claustra liquidescha e paga giu questa gravezia per adina encunter la universal summa: de fr. 2000. -

.....

Mustér , 1861 ils 15 d'avrel P. Martin Andreoli administratur

Paucs onns suenter ha ei danovamein dau grondas dispetas denter vischnaunca e vischinadi. En consequenza da dispetas unfiseivlas e process venda il vischinadi 1866 l'alp alla vischnaunca.

Brev de conventiun denter la ludeivla Vischn. de Tujetsch et il ludeivel Vischinadi da Tschamut.

*Cunquei ch'il vischinadi de **Tschamut** veva ina aitgna alp et era pistira de casa exceptuai della Visch., et quella veva de l'autra vard sias alps et pistiras per ella, ha quei de temps en temps dau chischun tier questius, dispetas et custeivels process et quei nominativamein el novissim temps, sch'en omisduas partidas vignidas tier il patertgiament d'entrar en ina amicabla conventiun e far fin a tuttas dispetas et questius ch'en ussa avon maun, sco era de prevegnir a ulteriuras questius de quellas vards. Per vignir tier quest da misduas varts, convenabel et desiderau intent, eisei denter la ludl. Vischn. et il Vischinadi de **Tschamut** vigniu serrau giu la sequenta conventiun, la qualla hagi de valer et cuzad per adina et per tut temps. Las stipulatuiuns de questa conventiun en las sequentas*

1) Surdat il Vischinadi de **Tschamut** ... la presenta per ils presents Vischins sco lur avignient suenter tut quel ch'il Vischinadi sco tal posseda per el; seigi alp ni pistira alla lud. Vischca. ussa et per adina, aschia ch'els san de quei far nigina pretensiun pli ni per bia ni per pauc auter che sco Vischin de Vischca. essend che quei tut deigi esser proprietad de Vischca. sco auters beins comunals.

2) Leuencunter han ils Vischins de **Tschamut** art et part de tuts bein comunals della Vischca. seigi de tgei materia che quels en, han aschia il dretg de guder quel, adual auters Vischins suenter uorden che la Vischca. ha, ne stabilescha enzacuras. Mademamein ei il Vischinadi de **Tschamut** obligaus de prender part de tuts deivets de Vischca. darivien de questa conventiun ner ord outra rischuns, quei ei sco els han art et

part de tuts emoluments activs, ston els era prender part de tut passiv de Vischca. aschia ch'els en tut en adual als auters Vischins de Vischca.

3) Al Vischinadi de **Tschamut** sco tal veng ei dau ils dretgs de chitschar lur S. v. Cauras sco tichen de cheu seigi sin alp stada de **Tschamut** ner en auters loghens, las nuorsas han il madem dretg tochen che la Vischca carga quellas, lau ston ellas vignidas messas cun quellas della Vischca. Risquard auters S.V. thiers han els de star vid ilg uorden de Vischca et hans ils madems dretgs sco auters Vischins, Risquard la pistira de casa vegnien eis en tuts rischguards teni ni nieglier ni mender che auters Vischinadis.

4) Per ina recompensa chil. Vischinadi de **Tschamut** ha mess en massa ses emoluments surpren la Vischca ils sequents deivets dil Vischinadi:

Tomaisch Berther	500.00
Assisten Tomaisch Schmit	400.00
Str. Gion Paul Riedi	547.28
Fargliuns Helenas	400.00
Gion Giusep Riedi	600.00
Assisten Giachen Ant. Schmit	2608.50
Pervenda de Selva	300.00
Alla Capella S.Nicolaus annual 1.36	27.20
Per benedir l'alp Capital	81.60
La Sparcassa Cantunalla	1912.44
Total	7379.02

Finalmein bonifichescha la Vischca aung als vischins de **Tschamut** per 12 1/2 fiugs per ina recompensa ch'il actuals Vischins ston gidar et purtar il deivet total de Vischca sco auters Vischins, la suma de fr 400 digiel Francs quater tschien per fiug, ils quals en atgna proprietad particulara.

Cun quei deidien tuttas questiuens denter las numnadas parts esser et ristar finida, et nigina part ha de far reclamatiuns ulteriuras ... buca stipuladas en questa conventiun, pli.

Aschia daventau a **Tujetsch**, per confirmatiun sutascrivan
ils 4 de mars 1866

per la Vischca

Lucas Caveng

Giachen Antoni Schmit

Per il Vischinadi de Tschamut

Vieua Lisabeth Loretz cun sia noda casa

Gion Paul Peder

Stiaffen Schmit

Martin Genin

Rosa Riedi sia noda casa

Barclamlu Berther sia noda casa

Per St. Gion Clau Sievi fa sia feglia

Maria Catrina sia noda casa

Giachen Antoni Deflorin

Carsenzia Verth sia noda casa

Sep Antoni Schnoz

Augusta Riedi

Gion Joseph Riedi

Gion Paul Riedi

- Fontaunas*
Archiv dalla vischnaunca da Tujetsch Principalmein scatlás 1 e 2
- Berther, Baseli* A Camischollas. Notizias cultur-historicas ord la Vall Tujetsch. Mustér 1917
- Berther, Baseli* Selva avon tschien onns. Notizias cultur-historicas ord la Val Tujetsch. Mustér 1909
- Berther, Baseli* Sin Cadruvi. Reminiscenzas ord la Vall Tujetsch. Mustér 1904
- Bundi, Martin* Zur Besiedlungs- und Wirtschaftsgeschichte Graubündens im Mittelalter. Chur 1982
- Decurtins, Guido* Wirtschaft und Bevölkerung des Bündner Bergtals Tavetsch um die Mitte des 19. Jahrhunderts. Viehzüchter, Dorfpolitiker und Emigranten. Zürich 1986. (Lizentiatsarbeit am Historischen Seminar der Universität Zürich)
- Gadola, Guglielm* Enzatgei ord la historia dellas alps tujetschinas. En: Il Glogn 1940, p.30-34
- Müller, Iso* Geschichte der Abtei Disentis. Von den Anfängen bis zur Gegenwart. Zürich 1971
- Müller, Iso* Pater Placidus a Spescha 1752-1833. Ein Forscherleben im Rahmen der Zeitgeschichte. Disentis 1974
- Muoth, Giachen Caspar* Die Thalgemeinde Tavetsch. Ein Stück Wirtschaftsgeschichte aus Bünden. En: Bündner Monatsblatt, Nr. 1 - 4, 1899
- a Spescha, Placi* Beschreibung des Tavetschertales im Bündner Oberland. En: Pater Placidus a Spescha. Sein Leben und seine Schriften. Hrsg. von Friedrich Pieth & Karl Hager. Bümpliz-Bern 1913, pag. 199 - 256

Il moviment demografic dil 19 e 20avel tschentaner

Entruidau e mess per scret per amur dalla survesta

Guido Decurtins da **Lumneins/Trun** e Gieri Venzin da **Sedrun** ein s'entupai ed han priu enzatgei ensemen, numnadamein il moviment dils habitonts en **Tujetsch** e quei ual duront ils davos duatschien onns, quei ch'ins numna sil plum demografia.

Ei setracta da duas lavurs da licenziat; Guido Decurtins neu dalla universitad da **Turitg** (prof. dr. R.v. Albertini) e Gieri Venzin ha scret la sia alla uni da **Berna** (prof. dr. B. Mesmer). - Cunquei che il studi da Guido Decurtins ei cumpariu pressapauc in onn avon (1986), ha Gieri Venzin saviu trer a nez las indicaziuns dil 19avel tschentaner, sebasar sil fundament e risguardar ulteriurs muments e la finala finir da baghegiar ora il moviment dil 20avel tschentaner.

Omisduas lavurs ein da num ed enriheschan buca pauc la historia dalla **Val Tujetsch**. Insumma - igl andament dalla populaziun tuatschina en tut siu far e demandar ha ora ed ora interessau enzatgi, glied d'autora era, quei che las lavurs numerusas muossan ora claramain.

Guido Decurtins stat davontier e muossa vi cul det sin la utilisaziun dallas zonas e sin la politica dil vitg cun tut sia democrazia e las enzennas da paupradad. Ins pren buca la bucca memia plena da far valer ch'il filogog Decurtins metti tiarms da gronda purtada, in fatg che Gieri Venzin fa resortir veseivlamein. Ferton ch'el sez va vinavon e sesprova da metter ulteriurs accents. Sco per semeglia, cura ch'el dat la cumprova dallas naschienschas, dils affons e dalla lètg insumma e dil cuoz dalla veta. Las relaziuns putretschas completescha Gieri Venzin cun las indicaziuns custeivlas da Guido Decurtins e Josef Steiner. La miseria ed ils munclaments ein stai gronds ed ils crediturs ein stai ni crets ni maneivels, quels ella val tuttavia buc.

Da far curvien gnanc stel, sche singuls ed entiras famiglias han tratg tut da leu vi ed ein emigrai - ni silmeins i egl jester. Schebi che la emigraziun dat ina survesta empau pli variada che eritochen da cheu, ei l'explicaziun onz stretga e tuttavia buca completa. Dil reminent ein las allegaziuns ton da Guido Decurtins sco da Gieri Venzin tscheu e leu empau da malsegiras - sco dapertut, nua ch'ins sa buca ual metter la detta ella plaga.

La redacziun

Utilisaziun dallas zonas

Possess privat

Igl onn 1865 pagavan 17 dils 168 tenercasas (fiugs) tuatschins negina taglia; els possedevan ton sco nuot. 151 fiugs - biabein 9 da 10 - vevan pia schischom. Mo buc tuts tuttina bia, 75% dils pagataglias vevan mo 27% dil possess, ils 11 gronds (6%) denton 37%.

Pader Baseli Berther ha giu schazegiau igl intragliauter dalla grondezia dils menaschis all'entschatta dil 20avel tschentaner a 3,5 ha. Ils gronds mesiravien 5,9 ha, ils pigns mo in per meters quadrat.

La cumbinaziun dall'agricultura (per survivor) e dalla tratga da biestga (per far daners) pretendeva terren da differentas qualitats. Mintga pur veva pliras parcelas en differentes loghens. Las reglas da partiziun dividevan quellas da generaziun a generaziun. Dalla stagliada cuntinuada seresultavan menaschis da 5-120 parcelas - meglier detg mo scrottas.

Con gronds ch'in menaschi stueva esser per segirar ina famiglia ei grev dad eruir; gliez duvrava buc mo bia, mobein bien terren. Propi digl agen savevan segiramein mo ils pli paucs viver. L'utilisaziun comunabla dil terren privat e da vischnaunca era perquei per ton sco tuts la basa - mo era il squetsch d'existenza.

Aschi gronda l'impurtonza, aschi rigurusa l'organisaziun. A **Tujetsch** era il pur buc fetg libers ed il puranchel aunc meins.

Las decisiuns detschartas deva la vischnaunca, sco per exempel quella dalla lavur cumina; il vischinadi decideva dallas pastiras da casa, la corporaziun dallas alps, la baselgia dils firaus e secapescha che l'aura ha meinsvart striaun atras enzatgei. In grond spazi per decisiuns individualas e suveranas era pia strusch avon maun. S'entelli ch'ins ha fatg emprovas da sefar libers da quei streng uorden d'utilisaziun.

La pasculaziun cumina

Igl october dils 1863 han ils Tuatschins votau, schebein ins dueigi dismetter la pasculaziun cumina. 121 ein stai encunter e mo dus persuenter e quei malgrad ch'ils

disavantatgs dil pastg cumin eran considerabels. La primavera per exempel schavan ins per ordinari pascular memia ditg; ils ers semnai mavan empaglia. Dil seinm d'atun che fuss en sesez staus adattaus ella **Val Tujetsch** han ins buca saviu far diever. La pasculaziun retardava la raccolta da fein per duas tochen treis jamnas; il tersiel, suenter il risdiv, pudeva perquei buca crescer.

Igl argument principal per scassar la pasculaziun cumina era la pusseivladad da cultivar libramein ils funs, da clauder, semnar e raccoltar tenor ils basegns da mintga menaschi. Surtut ils purs gronds e rehs vegnan a ver puntuau ch'ils «auters» schanegien lur fatg. Ils uordens da vischnaunca da quels onns repetan e tuornan a repeter ch'ei seigi da prender risguard e tener ils muvels sepudend sin digl agen.

Encunter quels disavantatgs ed avantatgs che vegnevan dil reminent susteni da plirs moviments fisiocratics ell'entira **Svizra** - a **Tujetsch** oravontut da pader Placi a Spescha - plidavan las circumstanzias. Memia pigns era il possess privat - è quel dils gronds. Envernar 9-10 meins ad onn vess duvrau ladretschs fein che fussen è buc stai d'emplenir cun clauder ils funs. Plinavon vess quella midada sfurzau ils purs da reducir il muvel per in temps nundeterminau; ina resca che buc mo ils purs pli pigns temeivan, mobein è ils gronds che levan vender sin fiera ton sco pusseivel. Ed ils puranchels, ils blaus, e quels da cauras? Per lezs che possedeivan ton sco nuot, era il pastg cumin d'impurtonza existenziala. Grazia a quel savevan els tener ina caura ed ina nuorsa, ni forse duas, e cun quellas tunscheva ei - malamein.

Pastiras da casa

Tenor ina tesa da pader Placi a Spescha ei la **Val Tujetsch** vegnida organisada fetg baul en plirs «vitgs», risguardond il diember da populaziun e las pastiras da casa. Ils uclauns seigien s'uni ad aschinumnadas cuminsonzas d'utilisaziun: **Surrein** cun **Nacla**, **Canadal** cun **Foppas**, **Camischolas** cun **Zarcuns**, **Sedrun** cun **Gonda** e **Salins**, **Rueras** cun **Giuf**. Il diember dalla populaziun variescha e pastiras da casa ha ei mai dau daries en **Tujetsch**. S'entelli ch'ei era buc sempel da cuntentar; trer ils confins ei stau ina damonda che ha caschunau hurschas e perfin process duront igl entir 19avel tschentaner. En in protocol d'ina cumissiun da vischnaunca stat ei scret: «Pastiras della vischnaunca da **Tujetsch** stigiadas ora e terminadas ina gada per adina la primavera digl onn 1892».

Il dretg da guder las pastiras da casa - sco era las alps ni la lenna - vevan mo burgheis, domiciliai e cun schischom. Tgi che adempleva buc quellas pretensiuns, stueva dumandar onn per onn la radunonza da vischnaunca per lubientscha. Ils paupers savevan per ordinari quintar cun la beinvulientscha dils vischins che lubevan da schar pascular lur caura per l'amur da Diu.

Uorden stuev'ei esser, e tgi che leva guder las pastiras, stueva sesuttametter. Sper la lavur cumina ordinava il cauvitg era il fatg dallas pastiras; el fixava ils loghens e tgeinins e cons dils animals astgien pascular, sco per semeglia duront la stad mo ina ni duas vaccas per pur. Perfin ils cavals ed ils bos stuevan star si d'alp, sch'ei deva buc lavur per els. Per survigilar quei uorden, elegeva il cauvitg in pindrer, oz forse meglier detg in polizist. Denton buc mo quel, mobein mintga vischin controllava pasters e convischins. La vischnaunca susteneva quels «survetschs da spiu» cun la mesadad dil castitg per ils tiers pindrai.

Per ch'ils muvels che gudevan las pastiras seigien buc memia gronds, vegneva la cumpra da tiers ordeifer vischnaunca contingentada onn per onn. Tenor las relaziuns ed aspectativas da fein vegneva ei concediu igl atun ina cefra da cumpra che saveva vegnir augmentada la primavera. Per mintga tier cumpraus ordeifer incassava la vischnaunca ina taglia - igl arvè. La cefra da cumpra caschunava onn per onn discussiuns e carplinas; ils criteris per fixar quella eran «malsegirs» (sco l'aura) ed ils interess differents. Ils purs gronds - oravontut quels che marcadaven sez - eran encunter tuts impediments d'in grond muvel, ferton ch'ils pigns temeivan quels muveluns enguords che magliavan il pastg aschi scars ella val.

Da principi decideva il ladretsch la grondezia dil muvel. Cumprar fein era scumandau ni vegneva engrevegiu cun ina tagliuna - il dubel dil prezi dil fein cumprau. Envernar

ordeifer era e buc lubiu. Suentar ditg sedispitar eisi reussiu als purs gronds da silmeins sbassar la taglia per la cumpra da fein. Ils pigns stuevan esser leds da puder mantener la pasculaziun cumina ed igl arvè.

Ils mises

Ils mises - pli baul per gronda part habitai sur onn - eran gia el 16 e 17avel tschentaner en possess privat. Mo si mises eran quels paucs privilegiai (possessurs) propri suverans e libers da restricziuns. Tuttas emprovas dad engrondir ils mises (situai denter las pastiras da casa e dad alp) ein vegnidas supprimidas dallas corporaziuns d'alp e dalla scartezia da pastiras da casa.

Ils avantatgs dils possessurs da mises eran considerabels. Buca mo il fein ch'els fagevan leu era d'impurtonza, mobein e quel ch'els spargnavan suenter la pasculaziun cumina ed avon la cargada. En quei temps savevan els gia entscheiver a caschar.

Ins gudeva il dretg da cargar e certas pastiras d'alp ina tochen duas jamnas avon il termin uffcial da vischnaunca e sch'ils indrezs eran avon maun, era da caschar. Per quels purs senza mises deva ei denton bia dapli lavur e fastedis.

Las alps

Alps han ils Tuatschins adina giu detgavunda; 63% dil terren productiv ein pastiras dad alp - la cefra corrispundenta per il **Grischun** munta a 40%. E tonta abundanza lai eleger. Ils Tuatschins ein sedecidi per las alps suleglivas cun in bien access. Las autras, quellas dalla vart dretga, han ei vendiu ni schau a tscheins. Mo è las alps salvadas ein savens stadas memia grondas (per in schi pign terren cultivau). Perquei era il pavel savens scarts duront il liung unviern e la primavera biestga tgerlentada.

Con stretga che la relaziun denter il terren ella val e quel si d'alp ei stada, muossa la prescripziun ch'il diember dils tiers cargai stoppi esser identics cun quel che vegni envernaus. Suentar liungas dispetas (semegliontas a quellas pervia dil contingent) han las partidas anflau 1840 in cumpromiss; dalurenneu eisi stau lubiu da cumprar ni schar a tscheins in ni dus tiers duront la stad sut la cundiziun da puspei turnar ni vender quels igl atun.

Tenor «la moda primitiva da guder las alps» cargava in pur probablamein ensemen cun in per vischins igl entir muvel sin in'alp. Duront la stad saveva el midar l'alp, sch'el leva - aunc veva ei plaz da stiarner. Ils 1832 denton prescriba igl uorden da vischnaunca (per l'emprema ga), nua cargar e tgei tiers e cons. Cun quella «moda moderna da guder las alps» - oz schessen ins forsa moda raziunalisada - han ins entschiet ad ulivar las alps. Quei pretendeva dumbraziuns ed inventarisaziuns, pia in tschuat lavur administrativa. A quellas differentas modas da guder las alps corrispundan differentas fuormas d'organisaziun. Da l'alp **Tschamut**, nua che tut vegn ad esser iu empau pli plaun, ha Josef Steiner (il scolast da **Selva**) scret viers la fin dil 19avel tschentaner: «Mintga famiglia vev'en quel'alp duas tegias essent che duas midadas, ina giu bass ed in'otra pli si ad ault. Cheu savevan lura ils da **Tschamut** schon baul la primavera ir'el'alp cun tut lur tiers pigns e gronds. La sera mavan ei en e mulschevan mintgin sias vaccas e tgauros. La damaun suenter mulscher chischavan ei e mintgin vegneva lu a casa cugl alv e la schuffa caulda da solver. Il penn vegneva lu schaus ... per gentar e tut vegneva lu cheu tratg bein a nez. Duront la stad prendevan ei lu si bia tiers jasters e targievan lu in grond pagament. Da parter quella rendita deva ei aber savens dispetas e scandelems. Tgi leva parter suenter olmas tgi suenter familias ed auters suenter rauba aschia ch'ils rehs survegnevan il bia».

La fuorma «moderna» organisava 14-16 purs, pursanavels, tier ina corporaziun d'utilisaziun, ina caschada. Mintga caschada veva il dretg da guder 10 onns l'alp sco quei ch'ella leva. Suentar vegnevan las alps repartidas ed organisadas danovamein. Alla testa d'ina caschada steva il cautegia, eligius dils pursanavels.

Caschar caschava mintga pursanavel in tochen dus dis e quei cun tut il latg. Silsuenter prendeva el ses products e turnava a val. Per reparter la rauba deva ei dus systems. Il dugar, che Giachen Casper Muoth ha descret en la poesia «A mesiras» e las stialas da latg («Sin **Cadruvi**», da pader Baseli Berther). La dugada ei pli veglia e meins exacta.

Ina tochen duas jamnas suenter la cargada serimnavan ils pursanavels si d'alp e mulschevan las vaccas. Tgi che mulscheva tgei vaccas, gliez decideva la sort. Tenor la prestaziun da latg da quei di vegneva la clav da reparter la rauba calculada. Tier il secund sistem vegneva il latg pesaus mintga di. Il pur ch'era en roda da caschar, nudava la prestaziun da sias vaccas e da quellas da tut ils pursanavels ensemen silla stiala da latg. Cu tuts vevan caschau inaga, vegneva ei fatg quen.

Malgrad las differenzas da guder e d'organisar las alps, ha il pur caschau sez mal ni bein tenor gust ed inschign duront gl'entir 19avel tschentaner. Pader Placi a Spescha era buc fetg incantaus dils products tuatschins e surtut dallas baitas da tegias «mender che taunas d'uors». Mo di! Per quels per dis ch'ils purs eran si d'alp - ed ils pasters savevan gie durmir igl'entir di sut la crappa. Tonaton, igl onn 1805 ein 750 kilos magnuc grass vegni exportai ella **Lombardia**, e quei per la summa da frs. 510. -. El decuors dils onns denton ein il viadi e la concorrenza vegni memia gronds. Ils Tuatschins ein sespecialisai sin la tratga; pli grass il vadi, pli maghers il magnuc!

1906 ha la radunonza da vischnaunca approbau in niev uorden dad alp che ha midau il guder las alps da rudien. Dalurenneu han buca pli ils purs caschau, mobein in signun. Tec a tec han ins renovau las tegias e baghegiu tschalers da magnuc.

Ozildi ha denton e il signun stuiu ceder. Risguardond las cundiziuns economicas - cun lur squetsch da raziunalisaziun - han ins decidu da buca pli caschar si d'alp. Ina pipelina (conduct da latg) meina oz il latg dall'alp **Cuolm Val** a **Val Giuv** e naven da leu vegn el transportaus en in vehichel a **Sedrun**. S'entelli che quei ha midau la veta dad alp ed il gust dil magnuc ch'era adina singulars tenor alp e signun.

Ils uauls

«En **Tujetsch** dat ei dapli da 1000 casas e baghetgs da lenn che vegnan manteni (e scaldai) cun lenna; il surdiever da lenna ei senza risguard ... Onn per onn vegn ei fatg fiug els uauls e schlamegiu lenna mo per cuort'uriala, per far fing e fem. Onn per onn vegnan las cauras catschadas els uauls; surtut la primavera mordan quellas giu las fadetgnas e fan empaglia las plontinas ... Mintga burgheis peina tgei ch'el drova e nua ch'igl ei ... » Aschia ha pader Placi a Spescha descret entuorn igl onn 1800 il surdiever digl uaul da vischnaunca; uauls privats ni da corporaziuns ha ei mai dau biars en **Tujetsch**. Da Josef Steiner ei la suandonta tesa - zun remarcabla: «*Aunc oz vegn ei cavau ora cuscha e ragischs ord il tratsch entochen sisum il cuolm, mo schinavon sco ei vegn er'ora toccanaglia miez barschada sche vegn ei pretendiu dils vegls ch'ei hagien von temps voluntariamein dau fiug e barschau in toc uaul e quei per motiv da spuentar ora e ragischar ora ils tiers salvadis e scarponts. Ils lufs ed uors vevien cheu lur fueinas e savevien setener si cheu nundisturbai. Quei era schliats e periculus vischins pils tiers dumiastis da casa. Pia ina gada barschavan ei gl'uaul ed ussa han ei buca lenna. Paupers Tschamutters e paupers Tarleps.*»

Ver eisi che mo las schetgas encunter lavinas e boas eran suttamessas a prescripziuns; da temps en temps era ei lubiu da rimnar lenna secca - mo quei era lu tut. Tschels uauls eran, sco quei che Placi a Spescha ha descret, senza schurmetg.

El decuors dil 19avel tschentaner ei quei semidau da rudien. 1830 ei in niev uorden che reglava l'utilisaziun da tut ils uauls vegnius approbaus: Mintga fiug stueva pagar ina taxa (d'utilisaziun) e survegneva persunter la sort lenna da brisch e da baghegiar. Venditas da lenna pli grondas, sco per exempel suenter pli grondas derschidas (malauras), vegnevan fatgas sco tiel fein a pastg cun trer la sort ed en aucziun. 20 onns pli tard han ils Tuatschins acceptau in uorden aunc pli sever, igl emprem da quei gener ei Grischun, ed han fatg in impurtont pass per salvar gl'uaul. Ussa era il pinar lenna restrenschiu rigurusamein, en differents loghens schizun scumandaus per onns. La lenna era bia pli cara. E - tgei politica progressiva! Las casas da crap vegnevan sustenidas dalla vischnaunca cun premias.

Sper il manteniment han ins schizun entschiet ils 1860 a plantar uaul cun agid dalla confederaziun e dil cantun - varga 300 000 plontinas entochen 1932. Nov onns avon vevan ils umens da **Tujetsch** concediu in credit da frs. 150 000. - per igl uaul da vart

sura. Ina decisiun prudenta. Ils onns 1920 e surtut naven dils anno 1930 ei la vendita da lenna stada l'entrada principala dalla vischnaunca e quei tochen il temps dallas auas.

Dalla vart economica

Ils deivets

1839 veva mintga tenercasa intragliauter treis brevs da hipoteca a dies; tut ensemen varga 170 000 frs. Quels deivets tier la baselgia e tiels privats eran per part fetg vegls - ils pli vegls datavan dils anno 1760 dil 18avel tschentaner. Ils proxims vegn onns (1840-1860) han varga la mesadad dils tenercasas fatg novs deivets per ina summa da frs. 270 000.-. Oravontut purs pigns eran sfurzai da far empristar mintga 3-4 onns. Ils pli beinstonts denton intragliauter mo mintga 10 onns - lu denton pli grondas summas. Daco tons deivets?

In decret dalla dertgira circuitala dils 1836 numna treis raschuns: schliatas fieras, miserabels prezis da biestga e la pupira. Ina quarta era segiramein schliats onns da raccolta che sfurzavan da cumprar car fein ed ils paupers schizun vivonda.

Daners (bluts) eran scarts el 19avel tschentaner. Sulettamein cun vender biestga vegnevan summas pli grondas ella val. Ina tiarza dils purs vevan denton mo 2-3 armauls en nuegl (1864); secapescha che quels vevan scartezia.

Pli pigns il pur, pli pintgas sias segirtads. Per survegnir daners, stuevan ils biars vender ni metter sut in frust. Tgei letga hanada, surtut per in menaschi pignet ch'era suenter aunc pli pigns. Deivets dad ir a frusta! Perquei predevan ils Tuatschins buc a tscheins daners da levsenn, mobein mo en temps burasclus.

El 19avel tschentaner ei la relaziun denter schliatas raccoltas ni fieras e deivets fetg stretga. In bien exempel ei igl onn 1891. 1890 era la raccolta stada schliata. In liung e criu unviern, danovamein pauc fretg igl onn sissu - e la zoppina ella regiun vevan sfurzau da far deivets sco fors'aunc mai. 2/3 dils varga 80 credits (ufficials) eran aschinumnai credits da consum sut frs. 200.-. Varga 30 messas perpetnas, che custavan lu buca nuot e che pretendevan secapescha segirtads, laian s'imaginar con desperai che quels dis eran.

Ils emprems 30 onns da nies tschentaner ei quella relaziun buca pli da constatar. Ils Tuatschins sedelibereschon dalla dependenza totala dall'aura! Novas pusseivladads da lavur entras il turissem, - la viafier - ed entras igl agid public (subvenziuns federalas e cantunalas per vias e viafier, per plontaziuns ed aquaducts, per ils purs ...), migliuran la situaziun dils Tuatschins e - sco nus vesein pli tard - surtut dallas Tuatschinas. Il svilup dalla **Val Tujetsch** ha pia buca per entschiet cun las auas! Numerus aschinumnai credits d'investiziun - e fetg paucs da consum indicheschon buns onns; ins astga forsa schizun tschintschar d'in cert beinstar.

Secapescha che las bunas fieras - surtut quellas d'avon l'emprescha uia mundiala - han è gidau e la val ei tuttina aunc ditg restada purila. Malgrad las investiziuns turisticas els onns trenta, caschunan miserabels prezis da biestga puspei deivets da consum. Contas famiglias vevan gnanc pli da pagar il paun! Era duront l'uiara resta la situaziun hanada.

Ils crediturs

«Ad in che ha ils daners tilan ins la capiala, ed a quel che ha buc, meinan ins la cua.»

Cun quei proverbi ha pader Placi a Spescha giu admoniu siu nevs da tener a quen ses daners e da buc empristar a mintgin. Sco representant dalla baselgia catolica a Selva veva Placi a Spescha fatg sias experientschas. Tenor ina veglia tradiziun schavan ins era custar enzatgei pil salit dall'olma: messas perpetnas per las paupras olmas, priedis e pastoraziun ed autras unfrendas ed almosnas.

1839 veva 1/3 dils Tuatschins (cun deivets) mo la baselgia sco creditura; oravontut mattas veglias pagavan onn per onn tscheins per capitals investai en raubas pias. Per ordinari vegnevan quels deivets dai vinavon (suenter la mort) cul frust mess sut. La baselgia empristava denton era daners bluts: 1839 muntava siu capital empristau a 17% dalla summa da deivets totala, 1860 denton mo pli 4%. Naven dils 1890 svanescha la baselgia ord ils cudischs da hipotecas.

Ils crediturs principals eran personas privatas e zuar d'ordeifer. Dils 1800-1860 vevan

quellas empristau 51% dil capital sco per exempel: mistral Simon Depuoz (26 800 frs.), mistral Giachen Antoni Lombris (24 925 frs.), «Bundesstatthalter» Marchion (16 088 frs.), cauderschader Peter Anton de Latour (13 720 frs.) ... Tut personalitads da famiglias beinstontas cun tetels politics e militars.

Tenor Gadola empristavan ils Vielis ed ils Depuoz gia el 18avel tschentaner.

Quellas fatschentas da generaziun a generaziun unevan ils Tuatschins cun ils exponentes dalla politica sursilvana e secapescha ch'ellas obligavan è. «Bannerherr» Cajacob da **Sumvitg** steva 8 dis ella casa dil scarvon Lucas Cavegn per trer en ses tscheins. Era ils Vielis ed ils Lombris vegnevan aunc all'entschatta dil 19avel tschentaner onn per onn en **Tujetsch** - pli tard elegevan els en vischnaunca persunas da confidanza sco representants da lur interess. Alla fin dils onns 50 ei la cassa da spargn cantunala (pli tard banca cantunala) vegnida fundada a Cuera e s'avanzada en paucs onns tier il creditur principal. Sto esser ch'ils Tuatschins fidavan dapli da quella instituziun statala. Sper la baselgia ed ils crediturs d'ordeifer empristavan era indigens, denton mo credits pigns: propi rehs ha ei mai dau en **Tujetsch**, plitost mo da quels pli rehs, pigns gronds, che vevan ina stria pussonza en vischnaunca.

Dapli che 20 000 frs. possess vevan mo 11 fiugs ella val - il bia muntava a 42 500 frs. Sch'ins cumpareglia quels possess cun la summa che mistral Depuoz veva empristau mo en **Tujetsch**, semuossa ei, tgei lieurettas ch'ils Tuatschins eran.

Per ordinari purtavon ils crediturs indigens tetels politics - il pli savens quel da genau. 1880-1930 serepetan sco crediturs ils suandonts nums el cudisch da hipotecas: Christian Muggli, Giachen Martin Berther, Vigeli Berther (da **Camischolas**), ils dus Schmets (Jacob e Giachen Martin). Ei sedi ch'ils crediturs erien buca maufers; cura ch'ei eri scart pretendevien els tscheinsuns, catschavien ils paupers ellas stretgas e mavien savens cun preit e paglia. Il cudisch da hipotecas conferma buca quei meini; ils tscheins dils indigens eran cun 4%-5% usitai e per ordinari vegnevan ils debiturs da tener lur funs. Denton, quell'indicaziun risguardan mo ils credits ufficials; tgei tscheins e tgei cundiziuns ch'ils crediturs pretendevan en lur fatschentas «privatas» stat scret enzanu'auter. Segiramein ha ei adina dau crediturs cun pazienza ed auters era. Gliez semussava lu da sogn Martin, cu ei era da pagar tscheins ni da sperar misericordia.

La politica dil vitg e far cavals

En Tujetsch deva ei duas categorias d'uffeci: L'emprema era ina plitost economica cun uffecis da cauvitg e cautegia. L'autra - plitost politica - cun geraus che administravan e che representavan la vischnaunca era savens ella dertgira dalla **Cadi**. Il premgerau che presidiava la suprastanza era la persuna principala en vischnaunca. Treis cussegliers sustenevan la lavur dils geraus; in da quels - igl assistent dil mistral - funcziunava sco persuna da contact tier las autoritads superiuras.

Geraus e cussegliers vevan da far in tschuat. Radunonzas da vischnaunca e da dertgira, viadis a **Cuera**, lavur ellas cumissiuns impedevan lur lavur el menaschi e paga deva ei mo occasiunalmein. Sco pader Placi a Spescha scheva, era l'honor la paga principala per ils «honoreivels politichers» ch'astgavan secapescha purtar lur tetel per veta duronta. *«Il pievel muntagnard ha la libertad dad eleger sias autoritads. Ein quell'adunten eligidas, ha el buca pli il dretg da prescriber enzatgei, ni en caussas dalla moral, ni dalla politica ni dall'economia»*. Cun auters plaids - che cun quels da Placi a Spescha - en **Tujetsch** ed ella **Cadi** deva ei negina separaziun dalla pussonza. In genau fageva politica, giudicava, tgisava e condemnava.

Tonta pussonza fa queida. Tenor tgei criteris vegneva ei eligiu? Principalmein vess la radunonza da vischnaunca saviu eleger mintga burgheis ch'era silmeins 40 onns vegls. Habilidads che vessen pretendiu scolaziuns pli grondas duvravan las autoritads communalas numnadamein buc. La politica «gronda», silmeins sin cumin, fagevan ils de Latour, ils de Castelberg, ils Condraus ... che vevan la scolaziun necessaria (neu dallas universitads tudestgas), mo surtut las finanzas e la pussonza da contrahar cun retgs. Dils students tuatschins deva ei il bia «mu preirs». Nuotatonmeins, e en Tujetsch cumandavan quels che possedevan:

Ella perioda da 1838-1867 tenevan las 6 famiglias Monn, Beer, Berther, Schmed, Venzin

e Peder - pia biabein la mesadad dils fiugs - varga 3/4 dils uffecis; 10 autras cun intragliauter 3 fiugs il rest. 12 schlatteinas denton eran praticamein senza uffecis e quei malgrad che pliras da quellas habitavan gia dapi generaziuns ella val.
Tgi che leva far politica pli gronda - silmeins genau - stueva denton buc mo ver num, mobein è daners.

Repartiziun dils uffecis 1838-1863 (senza ils onns 1849 e 1850):

		uffecis	1838-64			en %	
possess	fiugs	gerau	cusseglier		total	possess	fiugs
0- 1 000	40	-	6	6	(13%)	15%	5%
0- 2 500	33	-	3	3	(7%)	9%	2%
0- 5 000	26	4	6	10	(22%)	38%	8%
0-10000	15	3	9	12	(25%)	80%	9%
0-20000	5	2	2	4	(9%)	80%	3%
dapli	11	4	7	11	(24%)	100%	8%
	130	13	33	46	(100%)		36%

5000 frs. possess era la summa buca scretta per in uffeci - silmeins per quel da cusseglier. Per vegnir genau duvrava ei empau dapli - pressapauc 13'000. - frs. ni silmeins il treidubel dalla media tuatschina.

Exequir drova controlla, e polizists el senn dad oz deva ei buc: Fundament dil sistem giuridic era perquei igl interess communabel cun sia controlla vicendeivla. Sin quei fundament ei in'isonza da dertgira arbitraria carschida, «il far cavals» ch'era secapescha buca legals. 1835 ha la «löbliche Oberkeit» perquei decidiu da controllar certas praticas dalla cumpignia da mats. Far cavals era per semeglia runar pil vitg entuorn quel u tschel che veva falliu, fierer el begl, sfraccar en casas, scarpas giu tetgs e baghetgs ed aschia vinavon, tut tenor gust. Dismetter quellas praticas barbaricas levan ils regents nuota propi - silmeins buca dil tut. Perquei, malgrad ch'il far cavals seigi buca legals, hagi quel giu meglier effect che tuttas emprovas digl «Oberkeit».

Naven dils 1835 stuevan las cumpignias da mats dumandar per lubientscha, sch'els levan far cavals - silmeins in genau!

Ils paupers

Igl onn 1851 ha in pur pussent runau la suletta vacca ord nuegl d'in pauper puranchel che saveva buca turnar 50 guldas (flurins) empristadas. Ad in auter veva el vendiu in frust per 20 guldas, malgrad ch'el valeva mo 5 guldas. Ils dus donnegiai han sinaquei purtau plogn tier la dertgira a **Mustér**. Lezza ha denton dau raschun en omisdus cass al pur pussent.

In pèr onns avon veva ina paupra vieua engulau in toc magnuc ed empau graun ord in tschaler; in ton dil graun veva ella lu vendiu. Il castitg dalla dertgira dils reh: La paupra veva stuiu star en schanuglias avon ils derschaders e litgar il plantschiu (designar culla lieunga ina crusch); la dumengia proxima ha ella stuiu sepresentar avon la porta dalla baselgia cun in placat entuorn culiez: «*Sco lev e meritau castitg per mei, sco spieghel ed exempel per ils auters*»; e duront messa star en schanuglias sper igl altar per ch'ella audi gie bein il priedi ch'igl augsegner veva pinau specialmein per quei di extraordinari. Engulau vegneva ei il pli savens la dumengia duront messa e da dunnas veglias: naturalias, sco graun, caschiel, latg, ni vestgadira, darar daners ni custeivladads. Pli scart ch'ei era, pli pigns igl effect dil scandal!

La sentenza dalla paupra vieua lai s'imaginar, tgei tenuta ch'ils pussents vevan enviars ils paupers. «*Un homme n'est pas pauvre parce qu'il n'a rien, mais parce qu'il ne travaille pas*» (Montesquieu). Buc la pupira vegneva cumbattida, mobein ils paupers. Ei sedi che paupers erien quels che la baselgia ni la vischnaunca stuevien sustener.

Paupras eran segiramein e tuttas quellas famiglias che vevan duront onns normals che tunscheva e che stuevan denton far deivets ils onns da crisa. Digl onn dalla fom (1817) ha Gelli Cadisch scret:

«Quel lev strunglar, che lu vendev'/
 Migliems miez memia char;/
 Raubas per pauc lu en prendev'/
 Da quell, che sto disfar./
 Strunglar lev'quell, che lu furnev'/
 Il peun ailg sventirau:/
 Per suenter lu tier sez targiev'/
 Dailg pauper enqual prau.»

Possess dils paupers 1864/65

Possess en francs		fiugs diember. %	possess francs	en % dils fiugs
negin	17	25	-	9
0- 200	6	8	118.-	3
- 500	7	10	301.-	4
-1000	39	57	780.-	21
	69	100%		37

Con possess ch'ina famiglia stueva ver per esser pli u meins segira, ei grev dad eruir. Priu il cass che tut ils fiugs cun meins che 1000. - frs. vevien buc daners dalla vart, erien pia sfurzai da far deivets scochemai ch'ei era empau pli scart, lu fussen dapli ch'ina tiarza stai pauperets. Ils 12% che possedeavan meins che 200.- frs. eran denton segiramein fetg paupers - quella cefra corrispunda dil reminent a quella (20-24 fiugs els onns 1860) che la vischnaunca susteneva quels onns.

Duront l'emprema mesadad dil 19avel tschentaner era la pupira pli probablamein aunc pli gronda. Duront quels onns stuevan 2/3 dils tenercasas pagar il tscheins fier - cun il qual la baselgia susteneva ils pli paupers entochen che las vischnauncas han surpriu il pauperesser ils onns 1850. Il tscheins fier vegneva pagaus per ordinari en graun: 2 tochen 3 kilos ad onn e cu ei era scartezia - tochen 10. Ils basignus survegnevan intragliauter 10-12 kilos ad onn che vegnevan reparti la dumengia suenter messa marvegla. Quei fatg e quel che ina tiarza dils fiugs stuevan buca pagar, lain supponer ch'ei deva da quei da 50 famiglias fetg paupras.

Malgrad quella spenda da graun e las almosnas che vegnevan mintgaton repartidas suenter ina sepultura d'in vischin beinstont, tunscheva ei buc. Ils biars vevan buc outras letgas che dad ir a spluntar dad esch tier esch e rugar per almosnas. (Ins mava a custacs.)

1839 veva ina cumissiun dil pauperesser cantunala cussegliu allas vischnauncas da scumandar da «betlgeriar». Quellas levan denton nuota schar cumandar e temevan per lur autonomia. Cun excepziun da **Trun** han perquei tuttas vischnauncas schau pli u meins sco quei ch'ei era - en **Tujetsch** astgava vegnir rugau per almosnas dus dis ad jamna (sonda e dumengia). Mo quei lu nuota mo ord misericordia e carezia proximala. Sch'ins vess scumandau da «betlgeriar», vess ins matei stuiu pagar dapli tscheins fier. Lu pli bugen beneventar ils rugadurs e dar enzatgei pauc per l'amur da Diu.

Sco detg, ils onns 1850 ha la vischnaunca stuiu surprender il pauperesser. E co ella temeava! Per limitar ils cuosts han ins perquei decidiu da reparter sper la spenda a mintga famiglia basignusa in toc prau (teren da vischnaunca) per dar la pusseivladad da plantar in tec graun ed in per truffels. Quei era lu nuota tuttina als puranchels che temevan per lur basa d'existenza. Tonpli che adina dapli jasters (ch'eran per ordinari e

pauperets) vegnevan quels onns ella val.

Ils jasters en **Tujetsch** 1835-1880:

onn	attenents	jasters	total buc burgheis	en % dalla populaziun
1835	6	14	20	2,1%
1850	18	4	22	2,3%
1860	27	9	36	4,2%
1870	40	19	59	7,0%
1880	60	18	78	9,9%

Cumparegliau cun **Mustér** che veva gia ils 1850 8,6% jasters, era la **Val Tujetsch** buca fetg attractiva. Per ils onns 1870 - suenter ch'ils biars impediments da dimora eran vegni dismiss - ei il diember dils habitonts s'augmentaus. Viver en **Tujetsch** sco jester era buca sempel. Ils dretgs e privilegis ch'ils burgheis vevan (per exempel pastg cumin) custavan. Igl onn 1810 veva Vigieli Josef Valier pagau per il dretg da burgheis 340. - frs; 50 onns pli tard custava quel gia varga 2000. - frs.

Dils jasters che vivevan 1861 en **Tujetsch** possedeava buc in dapli che 1000 frs, pia bia memia pauc per secumprar en e per far il pur. Il da viver gudignavan els principalmein sco spazzatgamin, canistrer, calger ni sco fumeagl e fumitgasa e schurnalier. Per ch'ei tonschi, stuevan ils jasters tener ina ni duas cauras e nuorsas che gudevan secapescha e las pastiras da casa. Malgrad ch'els pagavan in tschuat dapli per il pastg cumin, eran els tuttina malvegni.

Il svilup dalla populaziun

Ils davos 100 onns ei la populaziun da **Tujetsch** carschida per 73%, da 768 habitonts (1880) sin 1329 (dumbraziun federala 1980). Quei augment corrispunda pressapauc a quel dalla populaziun da muntogna dall'entira Svizra (88% da 1850-1970).

Cumparegliau cun singulas vischnauncas dalla Cadi ei il svilup tuatschin detg considerabels.

Da principi san ins dir che las vischnauncas turisticas nutreschan oz dapli glied ch'aunc avon 30 onns e quellas ch'ei restadas purilas dameins. Las «auas» han caschunau ils onns 1960 cefras (da populaziun) maximalas. - Denton sco igl exempel da **Medel** demuossa - mo a cuorta vesta. Il svilup dalla populaziun dependa dils quater schabetgs: naschientschas, maridaglias, mortoris ed emigraziun.

Il svilup da quels schabetgs dependa da numerus facturs. La mort segiramein dil provediment medicinal, las naschientschas dalla mentalidad e dalla cardientscha, las maridaglias (e secapescha e la mort è las naschientschas) dall'economia.

Entochen 1935 ei la cefra da mortalidad da **Tujetsch** pli gronda che quella dalla **Svizra**. Nozzas festivavan ins en **Tujetsch** tochen 1925 dameins, naven da 1960 denton dapli ch'en **Svizra**. Fetg gronda ei la differenza tier la curva dallas naschientschas - per naven dils onns 70 s'avischinan ellas tec a tec. Daco quellas differenzas? Ina analisa dils singuls schabetgs empau pli da rudien emprova da rispunder a quella damonda:

La mort

El 19avel tschentaner duvrava in nievnaschiu cletg per survivor ils emprems dis. Sch'ei deva cumplicaziuns, era negin medi per peis e buc ina spindrera scolada. Tenor il meini da pader Placi a Spescha «*miravan ins memia pauc tier ils affons. Tschuff eri ei e paucs che devien breigia da schubergiar*». Ils Tuatschins dil 19avel tschentaner eran ualti tschufs. Alla fin dil 19avel tschentaner ha Josef Steiner (scolast a **Selva**) scret ch'ei stevi «*avon in triep onns fetg mal culla propertat e schubradat*». Steiner va vinavon: «*In um ei ius en ina casa per fitschentas. Cheu ha quei um jester observau ch'enta letg sut ils pons er'ei enzatgei che seregudava. Meinsannual ei lu vegniu orasut il tepet in purschi. La mamma da casa ha detg a quei um: nus havein stuiu prender si da nuegl ils purschals e*

metter enta letg, giu nuegl stevan ei schelar. Cheu er'ei aschia . . . ils purschals stuevan buca schelar e per quels che mavan en quei letg la sera er'il letg scaldaus e vevan cheu lu cauld e bien». Era sch'ei vegn ad esser stau in toc meglia culla schubradad alla fin dil tschentaner, certas disas eran buc aunc ragischadas ora dil tut. Per exempel quella «che ual sper igl esch casa cur ch'ins arveva igl esch sch'era leu il begl dils salvanoris. Quels vegnevan perversi cheu per bucca far fadigia da portar en nuegl la maglia da quels. Lu stevan savens si pigl esch casa purtgiuns sco uors e spetgavan silla maglia da maniera ch'ei fageva sterment d'ira vitier».

«Tgei miserabel uorden ch'ei era cun vestgir ils affons aunc els onns 60 e 70 ch'jeu savens hai viu. Ei vegneva tschupels buobanaglia en Surpaliz a partgiran thiers dis de ferdaglia plievgia e suffel senza sin tgau, senza chiltscheuls e senza calzers e gl'auter resti rut e scarpau; mo perquei devan ei nuota is dil freid e pauc stem per esser aura ruha. Denton sai jeu era dir affons tuttavia bucca maltschecs u sfarfatgs».

Quei schliet tractament survivevan biars buc.

Mortalitad d'affons 1837-1956: -

perioda	vegliadetgna	diember	% dallas naschientschas	% dils mortoris
1837-1870*	0 - 1 onn	119	13,3	20,4
	0 - 5 onns	243	27,2	41,6
	0 -15 onns	278	31,1	47,7
1880-1900**	0 - 3 meins	60	11,5	15,7
	0 - 1 onn	87	16,6	22,7
	0 - 5 onns	120	23	31,4
	0 -15 onns	142	27	37
1900-1925	0 - 3 meins	47	7,3	13,1
	0 - 1 onn	84	13,0	23,4
	0 - 5 onns	100	15,5	27,9
	0-15 onns	111	17,2	31,2
1925-1956	0- 3 meins	34	2,8	8,4
	0 - 1 onn	51	4,2	12,6
	0 - 5 onns	57	4,7	14,1
	0 -15 onns	74	6,1	18,4

* inclusiv naschi morts, fontauna: cudischs da baselgia

** exclusiv naschi morts, fontauna: cudischs civils (pli exacts!)

Ella perioda 1837-1870 mureva 1/4 dils affons avon che haver ademplier lur 5avel onn, mo dus da treis contonschevan la vegliadetgna da maridar. Mintg'otra sepultura era ina sepultura d'in affon!

El decuors dil 20avel tschentaner semegliura la situaziun pils affons - e secapescha e pils carschi - tec a tec. Per cumbatter la mortalitad dils affons pigns veva la regenza grischuna gia decidiu differentas mesiras. Ils onns 1885 ei G.C. Muoth vegnius incumbensaus da translatar in cudisch per la scolaziun da spindreras en romontsch. El medem temps publichescha era la Gasetta Romontscha artechels che tractan la mortalitad dils affons.

Igl onn 1903 han ils Tuatschins decidiu da separticipar dils cuosts per «pladir in miedi stabel» a **Mustér**. Il telefon ch'ei vegnius installaus duront l'emprema uiera mundiala ha

segiramein promoviu la promptadad da consultar quei miedi.

1921 ei gl'emprem Tuatschin naschius el spital da dunnas Fontana a **Cuera**. Suenter l'avertura dalla viafier da **Mustér** ad **Andermatt** (1926) e cun igl automobil (els onns 1930) han pli e pli bia dunnas parturiu el spital. Ils aspects per mumma ed affon ein semegliurai considerablamein.

Per ina val isolada sco **Tujetsch**, nua ch'ils avdents producevan aunc sez lur da viver, eran schliats onns da raccolta ina catastrofa. Per survivor igl onn dalla fom (1817) stueva il carstgaun midar sia natira:

«Natira da charstgieun,/
Cun fuorma da thier sevistgir,/
Sco quells tschercar il peun»
(G. Cadisch).

Da schnechs e ragischs ha ei tuc da senutrir la davosa ga ils 1817. Mo la fom ha pliras varts.

Onns da scartezia spossavan, e per in fleivel era mintga infecziun prigulusa. Ils fleivels eran ils paupers, las mummas e dunnas che stuevan luvrar sco biestga ed ils affons che vegnevan alla cuorta. Denton buca mo duront onns trentels, mobein onn per onn vegn la mort a ver eligiu sias unfrendas ellas stivas dils fleivels - che savevan sco consolaziun - che quel che mieri dalla fom vegni directamein enta parvis.

Ellas periodas 1770-1820 ed el 19avel tschentaner serepartevan bunamein la mesadad dils mortoris sin ils meins da schaner entochen igl avrel. Cu la broda vegneva pli e pli rara e la neiv teneva petg, smaccava il lenn dil plantschii su, e quel e tschel vegnan a ver patertgau da lur destin.

*«Ussa lessel jeu era scriver enzitgei sur il viver e sur dallas spisas ded ussa ne von 50 onns. Pli che duas gadas a di vegnev'ei buca cuschanau e quei er'il bia ina broda dira cun frina groppa avon miezdi, suenter miezdi ina padella flutgets u fermentins cun della medema frina groppa de dumiec ch'era ina spisa semiglionta alla smiza dallas tissunzas. Aschia gl'unviern. La stad vevan ei latgiras e sedevan giu il bia cun gliez. Jamnas e meins ora vevan ei negin paun. Igl ei vegniu raquintau che duas femnas vegnevan mintga sera en stiva de filar. Ellas tenevan lu cussegl de far ina sera in bien puschegn. Suenter ditg secussegljar tgei ellas duessien far han ellas concludiu della suandonta dumengia vegnir a **Sedrun** a messa e lu cumprar leu in peun (s'entelli peun segal) e lu magliar ina sera peun detgavunda ... Semegliontas raquintaziuns han ins udiu pliras de dadens gl'uaul. Et ussa? ... Tochen en **Tschamut** e tochen von casa vegn ei manau cargas sacs frina biala, frina terc, chistas macaruns, brocs pieun jester, zucherhuots, zitgets caffee e sch'ei crescha buc avunda segal de far paun, sche vegn ei migliau peun zart et aschia va ei ussa», manegia Josef Steiner en sia cronica.*

A quellas spisas corrispundan duas differentas modas d'economia: l'economia da subsistenza - nua che tut vegneva produciu sez - e la tratga da biestga specialisada. Cun la specialisaziun silla tratga da biestga ei la **Val Tujetsch** s'integrada el sistem da fiera - il daner ha entschiet a dominar. Secapescha che quei ei buc iu dad in di sin l'auter. Impurtont en quei connex ei la via dall'**Alpsu** ch'era vegnida realisada ils onns 1860. Grazia a quella eran ils prezis sesbassai per tochen 30%. Cun quei che la tscherca da biestga e consequentamein e ils prezis - surtut alla fiera da **Ligiaun** - eran buns quels onns, sedecidevan adina dapli purs da trer dapli vadials e da cumprar il necessari ordeifer. Ils conflicts che seresultavan da quella pratica vein nus gia empriu d'enconuscher. Empau independenza ha quella specialisaziun secapescha custau. Alla deliberaziun dalla dependenza totala da l'aura suonda la dependenza dalla fiera! El decuors dil 19avel tschentaner ein pli e pli biars Tuatschins vegni pli e pli vegls. Il meglier provediment medicinal, las stivas e la vestgadira pli schubras ed ina cuschina pli varionta declaran quei progress. Denton, sch'ins sfeglia empau pli da rudien els cudischs

da mortoris, dat ei spert en egl che buca tuts vevan las medemas schanzas. Gnanc en fatscha dalla mort eran tuts tuttina! Mendras aspectativas da vegnir vegls vevan buc mo ils paupers - cun lur broda che vegn adina ad esser stada empau pli rara - ed ils affons, mobein las dunnas en general ed en special las mummas.

Sco quei ch'il nievnaschiu duvrava cletg per survivor ils emprems dis, duvrava sia mumma cletg per survivor la pigliola. Memia savens mureva ella d'ina infecziun. Ch'ei fussi bien, sche las Tuatschinas vessien dapli e megliers Orts, scrivevan «scolasts» beinmanegionts. Ei dessi verduras e salata che cuntegnien las vitaminas necessarias. Las tratgas tuatschinas seigien bein stuffias e grassas, mo pauc sanadeivlas. Orts deva ei veramein buc biars e quei aunc all'entschatta da nies tschentaner. Per l'ina han quels dallas muntognas adina preferiu carn e per l'autra dattan Orts in tschuat lavur. Gest il secund motiv consideravan quels buns «scolasts» buc: Pretendend adina dapli lavur eran els, umens d'ina cuminonza patriarcala, buca habels da capir che lur pretensiuns - beinmanegiadas - caschunavan per part il malesser ch'els cumbattevan.

Ina dunna maridada veva duront ils onns 1880-1900 in'aspectativa da veta da 57-58 onns. Lur umens vegnevan intragliauter varga 5 onns pli vegls. La mort dalla pigliola declara quella differenza. Las femnas che stevan persulas - e che parturevan per ordinari buc - vegnevan intragliauter biabein 60 onns, pia e buc aschi veglias sco ils umens maridai. La declaraziun la pli probabla per quella differenza ei la repartiziun da lavur; ina repartiziun malgesta che puppergnava ils umens e spossava las dunnas.

«Las femnas pon vertir tut dano bien», di il proverbio ch'astgass esser staus enconuschents als Tuatschins. Da principi era la dunna responsabla per il tenercasa, per ils tiers manedels, las gaglinas, il curtin da flurs, e cun excepziun dallas lavurs las pli strentgas per l'entira agricultura (ver quitaun dalla semenza, semnar, zerclar, raccoltar, l'entira cultura da semglin ed aunc bia vitier). Il zerclar ils ers, quella lavur da piertg che vegneva prestada en schanuglias 2-3 ga ad onn da tut aura ed enzatgi ha giu scret che las Tuatschinas seigien enconuschentas pervia da lur premura e cunscienziusadad ch'ellas hagien da far quella lavur - fuva semplamein malsauna. Igl unviern, cu ils umens sesevan sin baun pegna, filavan e tessevan ellas da cuminonza - per spargnar la seiv! - tochen suenter mesanotg. La sera da ruccas - sco in exempel per pliras lavurs comunablas - era lu nuota aschi romantica sco quei ch'ei sedi. Ils umens han en tuttacass mal giu grondas marveglias dalla lavur sco tala. Poda ch'ina ni l'autra selamentava mintgaton - forsa suenter far fein. Per ils umens che savevan ch'ei «detti buca femnas e cavals senza mals» era quei buc enzatgei alarmont.

Encunter la fin dil 19avel tschentaner e surtut all'entschatta dil 20avel tschentaner ei la repartiziun da lavur semegliurada plaun a plaun. Bunas fieras e las pusseivladads da fadigia supplementara han purtau daners. Enstagl da far tut sez, han las dunnas saviu entscheiver a cumprar e quei ha scargau. Naven dils 1925 ein las aspectativas da veta vegnidas pli e pli bunas (1925-1956 circa 63 onns intragliauter veglias) e cun las «auas» schizun meglieras che quellas dils umens.

La lètga

Il proverbio di: «Via da bara, via da nozzas». Oz ch'ei vegn discurreu ton da carezia en connex cun la lètga, fan tals plaids surstar. Denton, tgi che leva maridar el 19avel tschentaner duvrava terren per far il pur. Da temps nua che mintga runtga vegneva fatga, nuot aschi sempel. Principalmein saveva ina lètga per sefar, cura ch'ina altra veva calau d'exister. Ella perioda da 1840-1870 veva strusch 1/4 dallas famiglias partiu lur fatg, avon ch'il bab - ni igl ugau - fuva morts. Per dus che levan maridar, tuccava ei - tonpli che la gliעד vegneva pli e pli veglia - da ver pazienza e spitgar - ils umens intragliauter tochen circa 31 onns, las femnas tochen pressapauc 27 onns.

Suenter periodas da gronda mortalitad, vess ei stuiu dar tenor quellas ponderaziuns bia nozzas. 1887-1891 ein stai onns scarts cun bia mortoris e mo treis nozzas; ils treis suandonts denton han ils Tuatschins saviu festivar 27 nozzas. Secapescha ch'ins astga buc survaletar quella relaziun, pertgei ch'en temps da crisa maridavan ins generalmein

pli pauc. Duront l'emprema uiera mundiala mo 12 pera, ils 1920/21 denton 17. Meglieras aspectativas economicas fagevan curascha. Ni, «dariat nitschollas, dariat nozzas».

La cefra da maridaglias munta pigl entir 19avel tschentaner a 5 per melli; mintg'onni deva ei intragliauter 5-6 nozzas. Quella constanza indichescha in cunfin da partiziun (e populaziun) - ina certa grondezia minimala stueva in menaschi gie ver. Els onns 1920 da nies tschentaner s'augmenta quella cefra a 7 per melli. Grazia allas pusseivladads da fadigia supplementara era il terren buc pli ina cundiziun absoluta. La viafier ed il turissem per exempel possibilitavan a singuls da fundar in'existenza schizun senza terren. Quel ni tschella vegnan a ver ughegiau ina lètg cun «memia» pauc funs, mo cun la speranza dad anflar ina fadigia sper il puresser. In indezi per quei ei igl augment dils menaschis pigns e quei naven dils onns 1920.

Maridar era pia buca sempel epi tgi? La statistica di che varga 80% dallas lètgs erien propi tuatschinas - e quei pli u meins tochen els onns 50 dil 20avel tschentaner. Quella endogamia era necessaria. Per la cumbinaziun dad omisduas iertas possibilitavan ina nova existenza. «Maridar per bellezza ei nuot en cazzetta.» Ina buna partida dependeva meins dallas qualitads persunalas dils partenaris che da lur frusts. Il pli ideal per in um era ina vischina beinstonta. Perquei che «quel tge vo gliunsch a mattauns, stu i gliunsch a parvai». Mo tgi veva ton cletg?

Per ordinari stuevan ils menaschis vegnir arrundai, u cun brattar ni cun vender e cumprar. Sche la dunna veva buc bia dapli ch'igl um, vegneva la part da quella vendita a sia famiglia - quei era motivaziun per ils frars da sustener ina lètg. Arrundaziuns han adina custau. Parcelas da pauca valeta vegnevan remplazzadas da bunas e caras. Ina lètg entscheveva perquei savens cun in tschuat deivets. Maridar era pia buca mo buc sempel, mobein e ina resca. Per quels ch'eran danvonz e che stuevan bandunar la val, era quei forsa ina consolaziun.

Cun las «auas» e cun il turissem semidan las cundiziuns da maridar scosauda. Mo biabein 15% dils Tuatschins (actives) fan oz aunc il pur. Terren pli baul senza valeta ei oz entras il turissem - fetg productiv. La neiv ei buca pli mo ina mulesta, mobein dad aur. La cefra da maridaglias ch'indichescha oz basa ed aspectativas economicas, s'augmenta a circa 10 per melli. Bia pli giuvens ein e oz la pèra, la spusa (23-24 onns ils davos 15 onns) ed il spus (26-27). Sco la val ei aviarta - ei era la fiera da maridar aviarta. Ils davos 30 onns han 38% dils Tuatschins eligiù ina jastra sco dunna - savens ina ch'era vegnida per far ina stagiun, ella gastronomia. Las consequenzas ein evidentas. Dallas 365 lètgs che vivevan ils 1986 en **Tujetsch**, eran mo aunc circa 47% indigenas. La cuminonza tuatschina ei oz pli mischedada. Atgnadads ed expressiuns da quella val isolada duront tschentaners van tec a tec, mo segir a piarder.

Affons e famiglia

Ils protocols dalla dertgira dils onns 1830-1860 muossan ora: 23 affons illegitims - da quels 6 plogns da paternitad e treis dunnas violadas. Quei ein 2,5% dils affons ch'ei naschi en quella perioda. Denton, l'illegitimitad era cun segirtad pli gronda. Pliras dunnas en speranza temevan la vergugna e bandunavan la val. Sco castitg dalla ludeivla dertgira a **Mustér** eran quellas fugitivas bandischadas e senza dretgs pli en lur patria. Mo è ils 2,5% fan gia surstar, sch'ins sa cun tgei engaschi ils buns vischins e la cumpignia da mats controllavan - encuraschai dalla baselgia - per gie evitar in «surpassament carnal».

Dils affons illegitims san ins ton sco nuot. Quei affon ch'era naschius morts ils 1833 - la mumma desperada empruava da tezzar, ferton ch'il bab leva buc acceptar el sco il siu, quei affon veva il caluster satrau - sper santeri!

In maletg dalla veta sexuala avon maridar dattan era las concepziuns prenupzialas - il diember dils pops fatgs avon maridar. Tenor ils protocols criminals era plira pèra maridada vegnida castigada, perquei ch'ella veva schau enzinnar en memia tard. Da 1929-1956, cura ch'ei deva buc pli castitgs, eran 6% dils affons vegni schendrai avon maridar - oz forsa detg meglier, vevan 6% stuiu maridar. L'illegitimitad en quels onns era cun 0,5% (senza las bandischadas) fetg pintga. Daco quei? Igl ei tgunsch pusseivel

che la pressiuin morala da maridar, cu in affon era sin via, ei carschida culla migliur economica da quels onns. Quei era lu nuota adina stau aschia. El cass dalla giuvna ch'era vegnida violada (1850), veva la dertgira decidiu da castigiar il malfatschent, perquei ch'el hagi detg manzegnias e buca dau tier, la giuvna denton perquei ch'ella hagi giu ina relaziun sexuala avon las nozzas.

Els onns 1950-1960 da nies tschentaner entscheiva la revoluziun sexuala ella **Val Tujetsch**. Meglieras aspectativas economicas lubeschan da far l'amur pli libramein. Las concepziuns prenupzialas s'augmentan sur 25% - l'illegitimitad a 2,5%.

«Ina letg senza affons ei sco ina casa senza tetg». Tut ils maridai che spitgavan buc aunc, savevan tgei ch'els vevan da far. Mo in ni dus affons tunscheva lu nuota. Ei para ch'in cert diember vegneva pretendius. Perquei che pli tard ch'ina dunna maridava, pli fetg festginava ella da survegnir affons. Ella perioda da 1929-1955 tuccava ei sin 1000 dunnas da 30-35 onns intragliauter 142 naschientschas ad onn, sch'ellas eran maridadas denter 20-24 onns. 493 naschientschas e denter 25-29 onns - e tier quellas ch'eran maridadas denter 30-34 onns schizun 529 naschientschas ad onn. Mintg'auter onn parturevan las pli biaras dunnas e quei malgrad ch'ellas eran cun ver 35 onns buca pli giuvnas.

La fritgeivladad dallas Tuatschinas ei adina stada fetg gronda. Tochen avon trent'onns naschevan intragliauter 6 affons en ina lètg - en quella vegliadetgna da maridar da 26-27 onns ina detga massa! Con grondas eran denton las famiglias?

Grondezia dallas famiglias e dils tenercasas:

	diember intragliauter d'affons per famiglia	diember intragliauter da personas per fiug
1768	3,0	4,1
1791	3,2	4,1
1850	3,9	4,3
1900	ca. 4,0	4,2
1941	5,1	5,25
1950	5,0	4,8
1970	3,4	4,3 *
1980	ca. 2,2	3,6*

Duront il 18avel tschentaner dumbravan las famiglias intragliauter treis, el 19avel 4 ed ella emprema mesadad dil 20avel tschentaner varga 5 affons. El medem decuors ei la grondezia dils tenercasas s'augmentada mo da 4 a 5 personas. La cumposiziun da quels sto pia esser semidada: 1768 dumbravan 27% dils tenercasas 1-3 personas (1850: 35%) 62% (1850: 47%) 4-6 personas. La tendenza ei clara. Grazia a las meglieras aspectativas da veta, vegnevan adina dapli glied pli veglia. Vegls ni buca maridai (cunfin da 5 per melli) habitavan en pigns tenercasas; da l'autra vart vegnevan las famiglias pli e pli numerusas. Igl onn 1931 vivevan 40% en tenercasas pigns, 32% en mesauns e 28% en gronds da 6-12 personas e dapli. Quellas famiglias grondas ha ei dau per naven dalla fin dil 19ave1 tschentaner - avon mo excepziunalmein. Propi stretg eisi pia per vegniu el 20avel tschentaner - surtut duront la secunda uiara mundiala. Encunter il scamond e tut ils priedis dalla baselgia han ils Tuatschins entschiet a planisar lur famiglias. La suandonta tabella muossa co e con spert quei ei succediu:

maridaglias	diember intra- glauter	diember da famiglias	vegliadetgna da maridar	vegliadetgna davosa	vegliadetgna naschientscha
	d'affons		onns	diember onns	diember
1929-1934	6,17	24	27,6	23	38,9
1935-1939	6,13	22	25,7	21	37,7
1940-1945	6,03	27	26,7	21	38,9
1946-1950	5,45	22	27,3	32	38,3
1951-1955	5,78	19	24,15	19	36,6
1956-1960	4,6	31	26,7	30	36
1961-1965 ¹	3,6	24	26,5	23	35
1966-1970 ²	2,55	18	26	18	30,6
1971-1975 ³	2	16	22,75	16	27

¹ dunna ha cumplenu 45avel anniversari

² dunna ha cumplenu 40avel anniversari

³ dunna ha dapi 10 onns buc pli parturiu

En mo 20 onns ei il diember d'affons diminuius da 5-6 sut la cefra da schendrientscha da 2 ed 1 affon per letg. Ei fuss memia sempel da declarar quei cun la pella; dil reminent sedi ei gie che lezza seigi spert emblidada. D'impurtonza ei il motiv. In historiograf franzos ha interpretau la planisaziun da famiglia sco ina midada ella tenuta viers ils affons. Tier il tip da famiglia fritgeivel vegni igl affon negligius; quei che quenti seigi la lavur e l'ierta dall'entira famiglia. Tier il tip che planiseschi, stetti igl affon cun siu avegnir el center digl interess. Igl ei buca casualitad ch'ils Tuatschins han entschiet a planisar lur famiglias els onns 1950. L'explotaziun dallas auas ed il turissem han purtau ils daners ella val, ils daners ch'ei necessariis per scolar e possibilitar igl avegnir. Che era las prestaziuns socialas sunter la secunda uiara han promoviu quella midada da patertgar - secapescha da sesez.

Emigrar ed ir naven

L'emigraziun ei in dils temas preferi dalla historiografia da **Tujetsch**. Surtut als «Schuobacheclers» ed als «Americaners» ein numerusas lavurs vegnidas dedicadas. Tenor quellas era l'emigraziun adina sfurzada; in'emigraziun professiunala (normala) sco quella dall'Engiadina (patissiers per semeglia) pareva inexistenta. Guido Decurtins ha denton mussau ora che «mo» in quart dils circa 550 emigrants ella perioda da 1835-1880 ein emigrai ell'**America**. Treis quarts denton restavan el **Grischun** ed en **Svizra** ni mavan en **Tiaratudestga** per in per onns - tochen ch'ei era plaz a casa. Cons che han bandunau la val voluntariamein (buca per forza), ei grev dad eruir. En tuttacass muossa surtut igl exempel dils Americaners che motivs fetg persunals e la constituziun psichica giugavan ina rolla impurtonta, cura chei tuccava da sedecider.

Il plaid «emigrar» vegn duvraus per tut quels che han bandunau val e patria, «ir naven» per quels ch'han bandunau «mo» la val e quei savens cun l'intenziun da turnar.

Secapescha ch'igl ei buc adina lev da distinguer. Da principi san ins denton dir ch'ils Tuatschins (oravontuts ils «Americaners») ein emigrai el 19avel tschentaner, el 20avel denton (surtut naven dils onns 1950) semplamein i naven.

Survetsch sut crunas

Ils anno 1835 survevan 4 mercenaris tuatschins ella **Hollanda**, 6 a **Ruma** e 9 a **Neapel** e quei - malgrad che la giustificaziun morala dil survetsch sut crunas vegneva discutada e dubitada pli e pli en l'entira **Svizra**. 13 onns pli tard - in onn avon ch'il survetsch sut crunas vegni scumandaus - stevan aunc adina 12 Tuatschins - sut general de Latour - en survetsch papal a **Bologna**. Igl onn 1849 ein ils biars puspei turnai e sedecidi da far il pur, enstagl l'uiara.

Ei seidi ch'il schuldau spiardi mintga uiara! Da pli grondas historias han ins en tuttacass mai udiu dils mercenaris tuatschins ch'ei buca s'avanzai ella hierarchia militar. Ils

exponents dalla aristocrazia sursilvana - famiglias che nus vein gia empriu d'enconuscher sco crediturs - ein turnai beinstonts e honoreivels, ils biars dils Tuatschins denton sco ruinas. En quei connex eisi interessant da saver ch'in sempel mercenari fadigiava varga 150 ga pli pauc che per exempel in colonel.

Luvrers da stagiun

Da 1830-1850 luvravan 10%-15% dils Tuatschins ordeifer. Las dunnas per gronda part ella **Surselva**, ils umens en **Tiaratudestga**.

Loghens da lavur dils Tuatschins (senza students, pres e mercenaris):

	1835 diember	%	1848 diember	%	1850 diember %
Umens					
Grischun e Svizra	15	19	18	20	- -
Tiaratudestga	58	71	57	65	77 -
auters	8	10	13	15	25 -
	89	100%	88	100%	(103) -
Dunnas					
Grischun e Svizra	17	57	21	55	- -
Tiaratudestga	9	30	10	21	17 -
auters	4	13	7	18	11 -
	30	100%	38	100%	(28) -
en % dalla populaziun		10%		12%	(13%)

1848 eran 19 dallas 21 femnas absentas pladidas sco fumitgasas en famiglias sursilvanas beinstontas, ni sco «madregna» en famiglias pauperettas. Sco detg, la Surselva era il liug da lavur preferiu. Leu vegneva tschintschau romontsch e patertgau catolic. La tema ch'igl jester savessi lavagar las giuvnas tuatschinas era numnadamein gronda e las novitads da scandels fagevan aunc tremblar pli fetg. Mo la pupira relativescha. Cu la tscherca da fumitgasas era pintga en **Surselva**, tuccava ei dad ir pli lunsch - morala vi, morala neu. 1850 survevan gia 28 Tuatschinas ordeifer la Surselva, 17 da quellas - forsa pervia dalla tradiziun dils Schuobacheclers - en **Tiaratudestga**. Per ils umens era la **Germania** gia el 18avel tschentaner il liug da lavur preferiu. U a **Baden Württemberg** ni ella **Baviera** luvravan igl onn 1835 70% dils Tuatschins absents. Ils pli biars luvravan sco fumegl ni signun e l'in ni l'auter han schizun giu in grond success. G.C. Muoth ha giu scret da famiglias tuatschinas che seigien s'avanzadas buca mal. Dil pastur deva ei in fumegl, d'in bien fumegl in signun e d'in capavel signun mintgaton in possessur d'ina cascharia.

Nua ch'ei plai, stattan ins per ordinari. Per ils stagiunaris eran segiramein l'existenza materiala, il success ella clamada ni forsa schizun dunna e famiglia ils arguments principals, cu ei tuccava da prender ina decisiun. 1850 levon mo 12 dils 132 absents buca turnar: 3 a **Württemberg**, 5 ella **Baviera**, 1 a **Vienna**, 2 a **Milaun** ed 1 a **Paris**. Tut quels - e quei fa surstar - eran varga 10 onns egl jester, singuls schizun varga 30 onns. Relaziuns persunalas, la cuntrada ni in'ierta - forsa cumpletada dad in respargn - levgiavan il retuorn e possibilitavan ina nova existenza.

Ils Americaners

Tenor Gadola ein 240 Tuatschins emigrai da 1850-1910 «ella Merica» - 1/5 da quels 1854, igl onn dils biars. Ell'**America** emigravan oravontut famiglias, en **Tiaratudestga** per ordinari singuls. La resca era gronda, ir ella **Merica** er'ina decisiun definitiva ed ils emprems ch'ei i savevan da nuot.

Las brevs da quels pioniers eran fetg optimisticas. Para ch'ei plascheva - era sch'ins sto considerar che quellas vegnevan screttas cugl intent da perschader in ni l'auter da medemamein emigrar el niev mund.

Gion Benedetg Deragisch veva giu cletg: El - dil reminent il davos «Säckelmeister» da **Tujetsch**, era curdaus ella miseria ils onns 1850 e vegneva sustenius dalla cassa dils paupers. Gia 1853 leva el ir. Denton per 5 onns pli tard ha el saviu sedecider, ha vendiu siu possess agl assistent Schmed - cun il dretg da far ir en nuot il contract, sche l'emigraziun vess buca giu da reussir. Il fevrer igl onn 1860 ha el bandunau **Tujetsch** cun frs. 300. - e culla dunna e 5 affons; 20 onns pli tard ha el aunc visitau inaga ses convischins sco um beinstont.

Il Gion Benedetg veva sco tut ils «Americaners» stuiu vender. Liungs era il viadi e cars. Tiara dalla cucagna era l'**America** per ordinari mo per quels che possedeavan. Ils emigrants dils 1850-1870 s'udevan cun in possess da 2500-10 000. - frs. alla classa sociala mesauna. Suentar ver pagau ils deivets - da lezs vevan surtut ils maridai daries sin clavella - vanzavan aunc intragliauter 1600-2000 frs.

La Nova Gasetta Romontscha vev'aunc scret 1840 - cugl intent da tementar - ch'ei drovi lu per cass 15 000 frs. per emigrar ell'**America**. Buca tuts eran numnadamein incantai dalla febra da quels onns. La baselgia temeava per lur olmas ed empruava da retener cun la stgisa ch'ei hagi memia paucs prers ell'**America**. S'entelli che las empremas famiglias ein emigradas ad **Ohio**, tier Pader Salesius - in Romontsch.

Gia naven da 1840 sustenevan pliras vischnauncas famiglias che levan emigrar. Denton buc en **Tujetsch**. Cura che Gion Paul Riedi ha giu dumandau 1880 500. - frs. da viadi per sias duas feglias, ha la vischnaunca rispundiu che sias feglias seigien memia giuvnas e la summa memia gronda e che quei savessi dil reminent provocar auters da dumandar il medem. Per 10 onns pli tard ha la vischnaunca concediu 100. - frs. da viadi per G.J. Jagmet, ad el cun sias tschun feglias. L'argumentaziun per quella summa era sco dapertut; quei agid unic scarghi la cassa dil pauperesser a liunga vesta.

Igl exempel dils «Americaners» muossa ch'igl ei memia sempel da reducir ils motivs d'ina emigraziun pervia dalla pupira. Aspectativas favoreivlas ed attractivas - aur, bunas pagas e terren fritgeivel - stimulavan - e dasperas motivs fetg persunals. Per quellas duas Tuatschinas en speranza ch'ei idas ell'**America** ei l'emigraziun segiramein e stada ina fugia dad oppressiuns moralas. Ina disgrazia, auas grondas, diskletg cun l'amur, barschaments ni lavinias savevan promover la decisiun dad ir.

Denton, sco tut il bien vegneva e gl'auter da surengiu e «mintga tetg ha sia crusch». Buca ch'ils Tuatschins fussien buc seriscudi. Mo tgi che mo propona e che lai disponer (Dieus) ei in muntatuttina. Cu la lavina mava cun casa e clavau han biars puspei baghegiu exact el medem liug, sin il carezau terren artaus dil bab.

Secapescha ch'ei era e scart ed el decuors dil 19avel tschentaner pli e pli scart. Adina dapli artavels vegnevan pli e pli vegls ed adina dapli affons eran danvonz. Igl ei clar ch'ei ha adina giu glied en **Tujetsch** che ha duvrau dapli plaz che outra. Gest sco tier ils muvels, ils gronds magliavan si ils pigns.

Ir naven

Cun las «auas» e cun il turissem ein daners e lavur vegni ella val. Anno 1920 luvravan 395 persunas en **Tujetsch**; 1986 varga 660. Tuttina ein onn per onn intragliauter 16-17 persunas (pressapauc) idas naven ils davos 30 onns - pia pli u meins tuttina biaras sco els menders onns dil 19avel tschentaner.

Tgi che damonda quels ch'ei oz a **Cuera**, a **Turitg**, a **Basilea**, ella **Svizra franzosa**, daco ch'els seigien i, survegn savens per risposta ch'ei detti buc avunda bunas plazzas si tier nus. Igl ei ver che la purschida da lavur ei oz fetg stretga ella val; varga 40% dils

plazs da lavur porscha numnadamein l'industria da baghegiar e la gastronomia. Ina tiarza dallas plazzas ein perquei occupadas da luvriers jasters (per gronda part stagiunaris).

El 20avel tschentaner eisi pia aunc meins la scartezia da lavur che sforza da bandunar la val, l'impurtonza dils motivs persunals denton onz pli gronda. El capetel «affons e famiglia» vein nus constatau ch'il svilup dils davos 30 onns ha possibilitau da scolar ils affons. Per giuvens e giuvnas d'ina regiun agl ur munta quei ir naven. Igl ei pia - aschia paradox sco quei para - per in bien ton il progress economic che ha «svidau» la val. Secapescha ch'il svilup economic e social ell'entira Svizra, ils novs mieds da communicaziun e d'informaziun ein e en quei connex d'impurtonza.

Fontaunas

Decurtins, Guido. Viehzüchter, Dorfpolitiker und Emigranten. Wirtschaft und Bevölkerung des Bündner Bergtals Tavetsch um die Mitte des 19. Jahrhunderts. Zürich 1986 (Lizentiatsarbeit am Historischen Seminar der Universität Zürich)

Venzin, Gieri. Das Tujetsch von 1880-1980. Zahlen zu Wirtschaft und Bevölkerung eines Bündner Bergtals. Sedrun 1987 (Lizentiatsarbeit am Historischen Institut der Universität Bern)

IV Religiun e cardientscha

La **Val Tujetsch** che ei stada possess dalla claustra da **Mustér** ei vegnida cristianisada e pastorada da **Mustér** anora e quei sut la giurisdicziun digl uestg da **Cuera**. Las differentas statuas dils patruns dalla claustra, sogn Placi, sogn Sigisbert, sogn Benedetg e sogn Martin en nossas baselgias e capluttas muossan ora l'influenza da **Mustér**. Ch'in per patratgs surlunder tonschien:

1. Igl onn ecclesiastic
2. Usits religios
3. En survetsch dalla baselgia
4. La tuor-baselgia da **Rueras**
5. In sguard el futur

Igl onn ecclesiastic

Igl onn ecclesiastic, ni igl onn da Cristus, entscheiva igl Advent e finescha culla dumengia da Cristus Retg.

Ei setracta buca da scriver enzatgei dalla significaziun ed impurtonza digl onn ecclesiastic. Jeu less mo far attents d'in per usits da nossa val ch'ei ligai cun igl onn dalla baselgia.

All'entschatta digl advent festivein nus Sontgaclau. D'ina vart setracta ei d'ina activitad dalla giuventetgna, da l'autra vart eis ei in eveniment per ils affons. Igl ei buca adina lev d'anflar in bien cumpromiss denter quellas duas componentas.

Dall'atgna experientscha dil temps d'affonza less jeu supplicar ils fumegls dil Sontgaclau da buca far temer ils affons. Il sogn uestg da **Mira** ell'**Asia** minora ei staus buns e sia buntadeivladad ei aunc oz en buna memoria, tuttavia pils affons. Nus differenziain bein il Sontgaclau dalla sera ed il Sontgaclau dalla notg. Per la sera ei la giuventetgna responsabla, per la notg ils geniturs. Da nies temps fageva il Sontgaclau las «paziudas» ella caplutta da Sontgaclau a **Tschamut**.

Il temps da Nadal, la fiasta dil bambin, ei era en **Tujetsch** il temps dalla pasch per las famiglias e per quels che vegnan digl jester. En stiva sclarescha il pigniel cun candeilas e ruclas. Mintga famiglia mira d'haver ina stalla che fa endamen il misteri da Nadal. La messa da mesanotg fa adina puspei impressiun. Quella notg han ils zenns in tut special tun e la baselgia bein ornada dat in'atgna atmosfera suenter il violet dallas dumengias d'Advent. Sin in altar lateral sepresenta ina gronda stalla e quei ton a **Sedrun** sco a **Rueras**. Suenter la fiasta da Nadal maunca il sogn Gion evangelist buca, el cun il vin, il vin da sogn Gion. Avon onns survegneva ins in daguot vin ord in calisch. Ozildi stattan butteglias cun vins differents sigl altar lateral per schar benedir.

Il sogn Silvester che finescha igl onn civil ei daventaus il simbol da quels che ein ils davos enten levar. Deplorablamein ei quei di daventaus in di da barlot che influenzescha era l'entschatta digl onn niev. Da Daniev eis ei fetg significativ ch'ils affons van casa per casa per augurar a tuts in bien niev onn. Els van a cattar biemaun e survegnan in per raps. Ils carschi fan Daniev suenter miezdi ni la sera, surtut tier ils parents. Cheutier s'auda in glasin vinars, petta da pera, la barbalada ni leventada e secapescha schambun e spinal.

Muort il sport da skis svanescha igl usit da Daniev pli e pli, schebi che naparts van la sera tier ils parents e mantegnan l'isonza. Da l'autra vart maglian ins ozildi petta sur onn.

Cun il bi usit dils Treis sogns Retgs che van da Buania a cantond da casa per casa, va il temps da Nadal alla fin.

Il giug da troccas ei probablamein il divertiment principal duront il tscheiver. Silsuenter suonda la gigina duront il temps da Cureisma. Sco affon sai jeu seregurdar dils «marlucs».

Las staziuns dalla via dalla crusch han mussau vi cul det silla passiun. La dascha dil viez e las frastgas dil salisch embelleschan aunc adina la Dumengia da palmas. In tec palma metta la mumma silla crusch en stiva e sigl er, ni manezza e mischeida cul sal benediu

da Pastgas per il muvel. Ils davos onns ha l'unfrenda da cureisma dils catolics svizzers era anflau in cor aviert tiels Tuatschins che han dapli raps ch'antruras e segidan generusamein.

La Jamna sontga ha culla nova liturgia survegniu bia buns impuls. La canera dallas sgaras da mudinas ei svanida. La frequenza dallas uras d'adoraziun muossa era ch'il pievel da **Tujetsch** ura aunc adina. La benedicziun dil sal e dils ovs fa part dalla solemna fiasta da Pastgas che s'auda tier las quaterfiastas ensemen cun Nadal, Tschuncheismas e Nossadunna d'uost.

La Dumengia alva ei la fiasta dils premcommunicants. Entochen igl onn 1966 fuva quella fiasta mo a **Sedrun** per ils affons dall'entira pleiv. Dapi lu han ils affons da **Rueras** lur Dumengia alva a **Rueras**. La Dumengia alva a **Sedrun** veva si'atgna tempra cun il grond diember da premcommunicants. Jeu mez sai aunc bein seregurdar, co nus essan da messa gronda vegni parti en suenter la grondezia e quei dus a dus. Jeu hai mal emblidau, tgi che ei stau miu cumpogn da Dumengia alva. In tut special di era ei per duas buobettas dall'emprema classa d'astgar purtar il bambin e per dus buobs dall'otgavla classa da purtar las "Fanas bialas". La giustia era salvada entras trer la sort! Per quei di suna la musica instrumentala e quei a **Sedrun** ed a **Rueras**. In eveniment special era naturalmein per ils affons in bi vestgiu, las buobas cun rassa alva e tschupi ed ils buobs, ils biars cun caultschas liungas, matg alv sil tschiep e silla capiala. Forsa han aunc enqualin la candeila da Dumengia alva, ni la memoria (maletg ni crusch) dil plevon.

Tocca buca ton daditg ha l'entira pleiv da **Tujetsch** fatg las processions dallas rogaziuns avon la fiasta d'Anceinza a **Sutcrestas**, a **Rueras** e **Sedrun**. La fiasta d'Anceinza vegnan ils funs benedi.

Las devoziuns dalla sera duront ils meins da matg e zercladur ein semantenidas. In scazi tut special ein las canzuns da Nossadunna e dil sogn Cor da Jesus.

Enzatgei singular per **Tujetsch** era la procession dalla sonda, naven da sogn Placi entochen la fin da settember che mava mintgamai naven da **Sedrun** e naven da **Rueras** tocca a **Zarcuns**, nua che las duas processions vegnevan ensemen per la sontga messa. Accumpignada d'ina pintga orgla en caplutta da Nossadunna ei adina la medema messa vegnida cantada: «la messa da **Zarcuns**», «O Segner cun fidonza». Ils cantadurs da Sedrun vevan il privilegi d'astgar star el chor sper igl altar. Quella procession ei vegnida supprimida all'entschatta digl onn 1960 pervia dil grond traffic sin via cun caschun dall'erecziun dil rempar dil lag artificial da **Curnera**. Il transit sin via ei suenter buca vegnius pli pigns e la procession ei stada naven. Igl intent da quella procession era l'oraziun per ina buna raccolta. E per quei vegnan ils paucs purs en **Tujetsch** a far oraziun vinavon.

Suenter Tschuncheismas suondan las fiastas da parada: Sontgilcrest - Cor da Jesus - Sogn Vigeli (la fiasta dil scapulier ei ida en) - Cor da Maria e la fiasta dil rusari.

Sepudend han era ils buobs da mises priu part dallas fiastas da parada (magari cun trer la sort!).

Ina fiasta d'atgna tempra ei tuttavia la dumengia da perdanonza e quei surtut per ils vischins dils uclauns. Il bien gentar da perdanonza ni la fiasta s'auda essenzialmein tier ina fiasta religiosa tenor buna tradiziun benedictina. La parada dils mats, ina fuorma speciala els cantuns dil **Grischun** e dil **Valleis**, ei bein enzatgei exteriur, mo tuttina in fatg ch'embellescha il di festiv per l'honor da Diu e fa grond plascher alla cuminonza da fiasta.

A Propos! «Fiasta» audan ins savens ussa ch'ei detti buca avunda dumengias per vegnir sut tetg cun tuttas!

La Rogaziun federala el meins da settember ha era en **Tujetsch** la tempra d'in di patriotic cun ruaus ed oraziun. Il Tuatschin ei in **Grischun** perschuardiu e sco tal in bien Svizzer. En sesez ei il vischin da **Tujetsch** religios; el di aunc rusari, tuttavia il meins d'october, il meins dil rusari e dallas missiuns.

Igl onn ecclesiastic va encunter la fin cun ils Dis dallas olmas. Il santeri communal ei a Sedrun per tut ils Tuatschins. En santeri s'uliveschan las atgnadads dils differents vitgs

ed uclauns. Leu serimnan ils Tuatschins - era biars ch'ei schiglioc egl jester - per render honor e pietad als defuncts. Igl onn ecclesiastic finescha cun la fiasta da Cristus Retg.

Usits religios

La veta religiosa semuossa era en segns externs e cun quels sesviluppeschans usits ed isonzas. Sper igl onn ecclesiastic ei quels usits ella baselgia catolica surtut uni cun ils sogns sacraments, sacramentals, pelegrinadis e las confraternitads.

Il sacrament dil batten ei in datum impurtont per il nievnaschiu, per sia famiglia e per la cuminonza dalla pleiv insumma. Pli baul, en in temps che biars affons murevan da pign, vegneva igl affon battegius aschi spert sco pusseivel, il pli savens gia il di dalla naschientscha. Ozildi neschan ils biars affons el spital e vegnan buca pli battegiats leu, mobein pli tard ella pleiv. Igl ei il giavisch dalla baselgia ch'ils affons vegnien battegiats en lur pleiv per exprimer ch'igl affon vegni prius si en quella cuminonza. Quei daventa sin moda pli u meins publica, suenter il survetsch divin uffical, ni sche quei ei pusseivel, il meglier enteifer il survetsch divin dalla dumengia.

Entochen 1938 vegnevan tuts ils pigns tuatschins battegiats ella baselgia parochiala e quei entras il plevon ni excepziunalmein entras il caplon. Dapi quei onn ha era la baselgia da Rueras in crap da batten.

Tier il batten han padrins e madretscha ina speciala rolla. Per igl empren affon eis ei usitau ch'ils meinaspusa fan quei survetsch. Pli baul, cura ch'il bab saveva strusch tgi dumandar per padrins, gidava il plevon sez. Quei vegneva denton avon aschi savens ch'igl uestg haveva da dar la lubientscha. Ils padrins e las madretschas dattan aunc oz entuorn Daniev in biemaun a figliol ni figliola e quei entochen ch'els ein ord scola. Els han era l'obligaziun da gidar ils geniturs ella educaziun. Jeu sun aunc oz engrazievels a miu padrins da batten che ha fatg attents mei, cura che jeu erel student, da far meglier igl enclin en baselgia.

Cura ch'igl affon pign era fleivels, vegneva el gia battegius en casa, il bia entras la spindrera ni il miedi.

Cun il batten, quella uniun cun Diu e la cuminonza, survegn igl affon siu prenum. In studi dils prenums el decuors dils onns fuss fetg interessants. Il patrins baselgia da **Sedrun**, sogn Vigeli, ha giu gronda influenza, aschia che Vigeli ei in num tipic per Tujetsch. In cert temps era ei moda da dar il num Giachen Antoni, Gion Antoni e Sep Antoni, aschia che surnums eran necessaris per vegnir ordlunder. Ils bials nums biblics dil Vegl e Niev Testament duvrai ozildi eviteschan la necessitad da dar surnums. Il calender dils sogns e dallas sontgas sa inspirar bials nums, mo era ils nums dils antenats e dalla parentella ein adina puspei in segn da pietad enviars ils perdavons.

La baselgia ei surtut en survetsch dils malsauns, moribunds e defuncts. Avon onns ei igl augsegner ius cun horem e stola cun il Sontg Ieli ni cun il sogn viatic tier il moribund. El vegneva accumpignaus d'in ministrant cun ina latiarna, ed era singulas personas mavan cun el en casa dil moribund. Ozildi vesein nus il Sontg Ieli sco sacrament dils malsauns, buca mo per ina buna mort, mobein era per la sanadad dil tgierp e dall'olma. Biars Tuatschins mieran el spital, seigi a **Glion** ni a **Cuera**. Il zenn grond annunzia la mort d'in convischin (pli baul quater quarts per in um e treis quarts ura per ina femna). Quei fa impressiun, pertgei quei va tier a mintgin, era sch'ins tucca oz mo in quart ura. Dapi igl onn 1979 ha la baselgia da **Sedrun** ina caplutta dils morts per metter en bara il defunct ils dis avon la sepultura. Pli baul vegneva la stiva dil defunct midada en stiva da bara. La bara era sin baun sisum la stiva, cuvretga d'ina cozza alva. Ins rimnava las sutgas dils vischins per dar plaz a quels che vegnevan a dir paternos.

Entochen igl onn 1964 han ils parents dil defunct dau la sera tard, suenter ils rusaris gronds, in schinumnu pushegn cun cafe, paun, magnuc, pischada e mel. Ord differentas raschuns ha la vischnaunca anflau per bien da metter d'ina vart quels pushegns ch'eran per part ina grevezia. Cun mintga defunct svanescha in pign mund per sesez, ina personalitad unica. Las tablas da morts laian buca emblidar aschispert nos antenats e la fossa bein rugalada sin santeri dat perdetga da nosa pietad enviars ils morts.

Pli baul havevan las differentas familias lur agens logs. Dapi l'engrondaziun dil santeri

digl onn 1959 vegnan nos morts satrai in suenter l'auter, en retscha. Aschia ei in uorden da santeri pusseivels. Ussa stattan las cruschs fier sidavon; ellas sefan bein e van a prau cun la cuntrada.

In eveniment special per tut la val ein mintgamai las messas nuvialas. Surtut la giuventetgna s'engascha per preparar ina tala fiasta.

Las mattauns vegnan ensemen seras ora per far tschupials, per aschia ornar la baselgia, la casa dil primiziant ed ils artgs ei vitg. Ils mats segidan tuttavia leu nua ch'ei drova possa e curascha. Ina tscheina per ils mats ed ina marena per las mattauns era - da nies temps - mintgamai ina pintga renconuschientscha dil primiziant. En tiara romontscha, pia era en **Tujetsch**, ei igl usit, ch'il primiziant ha per sia fiasta ina parentella spirituala cun bab, mumma, spusa, frar e sora, padrin e madretscha e naturalmein in predicatur festiv. La fiasta da messa nuviala ei secapescha ina fiasta da parada cun in plaid dil capitani.

In di impurtont ei medemamein il di da nozzas. Suenter la cerimonia avon il civil, vegnan las nozzas ecclesiasticas celebradas en baselgia. Pli baul era la messa da nozzas adina ella baselgia parochiala, tuttavia cura che omisdus spusai eran da **Tujetsch**; pli tard era en loghens da pelegrinadi sco a **Mustér, Trun e Nossadunnaun**. Oz gauda la baselgia da **Selva** la preferenza. Avon onns ein ils murters cun lur canera stai enzatgei da num per annunziar la sera avon ch'ei detti nozzas. In grev accident ha giu per consequenza ch'igl ei vegniu scumandau da duvrar murters. Tier las nozzas s'auda in bien gentar ni ina buna tscheina, dapi ch'igl ei lubiu da far messa suenter miezdi. Quei ei oz ualti adina en in da nos buns hotels en **Tujetsch**, pli baul perencunter a casia. La cuschiniera da nozzas era ina persuna impurtonta. Gia dapi las nozzas da Canna sesprovan ils nozzadurs da saver preparar legria als envidai. **Tujetsch** ha biars buns oraturs; perquei vegn ei fatg stedi plaids da nozzas entras ils carschi, ferton ch'ils atfons envidai han da recitar ina biala poesia.

Per la historia eis ei impurtont ch'il batten, la creisma, il sacrament dalla letg ed ils mortoris vegnan registrai en differents cudischs officials dalla pleiv.

Suenter quels usits uni cun ils sacraments tucca ei da menziunar in per usits uni cun differentas benedicziuns. Avon onns era nossa val ina val da purs cun in per mistergners.

Gest il pur senta adina puspei en sias lavurs la dependenza dalla benedicziun da Diu.

Perquei ei per ei surtut la benedicziun dils tiers e dils funs da gronda muntada. La benedicziun dallas alps ei aunc adina ina vera obligaziun dils dus augsegners dalla val.

Il parlet d'aua benedida en stiva regorda dalla benedicziun en casa. Bia geniturs dattan la benedicziun cun aua benedida, surtut als affons che van egl jester.

Jeu mez hai, mintga gada che jeu mavel egl jester, retschiert la benedicziun da mes geniturs. Suenter esser daventaus augsegner, han els era spitgau mia benedicziun.

La benedicziun dallas jarvas da Nossadunna d'uost, dil paun da sontga Gada, la benedicziun dils paternos, da medaglias, d'enzennas han da far nuot cun magia, mobein muossan ora - forse enqualgadas cun fuormas malsegideivlas - la fidonza enten Diu e ses sogns. Buca d'emblidar ei la gronda valeta dall'oraziun da meisa.

Il senn per confraternitads - jeu patratgel dalla confraternitad dil sogn Scapulier, dil Cor da Jesus e da Maria, ni pli baul da sogn Giachen (a **Sedrun!**) - ei ius anavos.

Dat ei era loghens da pelegrinadi en **Tujetsch**? Segiramein, sche nus patertgein dallas processziuns da **Zarcuns**. Mo era pelegrins, plitost privats, van tier sogn Giusep a **Bugnei**, sogn Leci a **Cavorgia** e sontg Antoni a **Surrein**. Mo veramein il liug da pelegrinadi savein nus numnar en sesez mo **Selva**. Il bi sanctuari da **Selva**, construius suenter il barschament digl onn 1949, dat in dign suttetg alla statua da Nossadunna digl agid che era vivon a **Sutcrestas; Selva**, in liug da pelegrinadi, buca mo per ils Tuatschins, mobein era per pelegrins ord autras regiuns romontschas. Naven dil matg entochen igl october ei ina gada per meins ina devoziun da pelegrinadi per numerus pelegrins, da lunsch e da manivel.

En survetsch dalla baselgia

Tujetsch ha ora ed ora giu in grond diember da clamadas religiosas. Dils spirituals, dils fraters laics e dallas muniessas havein nus differents studis historics. Aschia vonza ei da

far entginas reflexiuns generalas e da menziunar in per detagls. Sebasond sil studi historic da pader Baseli Berther OSB, ein dapi il 15avel tschentaner stai a **Sedrun** 44 plevons, dapi il 18avel tschentaner 38 caplons. Dapi il 17avel tschentaner eis ei stau 49 caplons a **Rueras** e 40 caplons a **Selva**. Momentan ha la retscha dils caplons da **Sedrun** e **Selva** calau ed il caplon da **Rueras** ei daventaus cun 1971 plevon rector. La separaziun denter vischnaunca e pleiv ei vegnida fatga 1972.

En contrast cun nos scolasts ein spirituals indigens plitost in'exceptiun sco plevons ni caplons en **Tujetsch**. Aschia ein dils 44 plevons mo 6 stai da **Tujetsch**, dils caplons a **Sedrun** 10, da **Rueras** 15 e da **Selva** 7. Denton - sche nus mirein, tgeinins seigien stai il pli ditg ella val, lu savein nus constatar ch'ei setracta surtut dils indigens. Aschia ei sur Giachen Antoni Degonda staus caplon a **Rueras** da 1741-1749 (onn dalla lavina), lu plevon a **Sedrun** da 1749-1788 e caplon a **Sedrun** 1788-1802 e morts 1804 sco resignat a **Sedrun**. Sur Gion Giusep Deplaz seigi ord commiseraziun visavi ses convischins adina staus a **Selva** (1818-1859). El ha stimulau ils vischins da **Selva** da baghegiar in vitg d'unviern a **Sutcrestas**. Leu ha el schau construir ina baselgia cun habitaziun per il caplon e cun in local da scola. Sur Gion Antoni Venzin da **Selva** ei staus sco fetg preziau augsegner sia entira veta caplon a **Rueras** (1886-1935).

Sche nus essan tier ils indigens, stuein nus era numnar dus augsegners cun ina mort zun tragica. Sur Giachen Biart da **Sedrun** ei staus caplon a **Rueras** 1731-1733, caplon a **Selva** 1733-1736 e plevon a **Sedrun** 1736-1749. El ei morts mo cun 46 onns ils 27 da fevrer 1749 ella lavina cun aunc 5 personas dadens **Zarcuns**, cura ch'el leva purtar agid allas unfrendas dalla lavina a **Rueras**. Sur Giachen Antoni Condrau da **Selva**, caplon a **Rueras** (1791-1799), ei vegnius mazzaus dils Franzos cun 47 onns, a **Mira**, dadens **Sedrun**, ils 6 da mars 1799.

La buna relaziun dils vischins da **Tujetsch** culla claustra da **Mustér** semuossa cheutras che 17 Tuatschins ein dapi il 15avel tschentaner entrai en claustra. Da quels ein 4 daventai avats:

Avat Pieder de Pultengia (1402-1438)

(cfr. Roman historic da Vic Hendry, 1964)

Avat Pieder ei staus ina gronda personalitad che ha giu merets considerabels per la fuorma interna dalla claustra. El aveva bunas relaziuns cun igl uestg da **Cuera**, cun papas ed imperaturs. El ha suenter in barschament puspei baghegiu las baselgias da Nossadunna e da sogn Pieder. Milsanavon ha el engrondu la caplutta da sontga Gada ch'ei la patruna encunter il fiug. Avat Pieder ei ius ella historia da nossa patria sco confundatur dalla Ligia Grischa a **Trun** sut igl ischi (1424).

Las ruinas da **Pultengia** sper **Rueras** ein aunc oz perdetga da quella famiglia.

Avat Adalbert II. de Medell (da Sedrun)

El ei staus avat 1655-1696, dil temps da Clau Maissen. El ha entschiet a baghegiar la claustra hodierna tenor ils plans dil frater da Nossadunnaun Caspar Moosbrugger. Ses merets ein surtut en fatgs da scola e da stampa.

Avat Gallus Deflorin (da Camischolas) (1716-1724)

Dad el stat ei scret ch'el hagi surtut pagau ils deivets da ses antecessurs. Ultra d'in bien um da finanzas eis el denton era staus in pietus avat.

Avat Anselm II. Quinter (da Bugnei) (1846-1858)

Avat Anselm ha stuiu far atras in temps tragic, numnadamein in niev barschament dalla claustra. Da 1850-1856 era la scola cantunala catolica a **Mustér**. Suenter sia mort ei la claustra stada treis onns senza avat.

Interessant eis ei era da menziunar spirituals tuatschins che han operau en tiaras jastras. (Sur Felici Maissen, **Cumbel**, ha publicau ina lavur «Spirituals sursilvans en tiaras jastras». Calender Romontsch 1980/81).

P. Christian Hetz SJ da **Selva** (1718-1780) ei entaus egl uorden dils gesuits ed ha operau sco missiunari en **Tiaratudestga** ed ella **Austria**. Ella caplutta da pelegrinadi a **Rankweil (Austria)** vesan ins aunc oz siu maletg.

P. Giachen Antoni Condrau SJ da **Rueras** (1779-1837), nevs dil caplon Condrau da **Rueras**, ei entaus egl uorden dils gesuits en **Russia**. El dominava 11 lungatgs ed era in bien matematicher che ha publicau cudischs surlunder.

P. Lucas Cavegn SJ da **Rueras** (1805-1862) ha operau en **Canada** e **Buffalo** e baghegiu leu pliras baselgias. El ei morts a **Buffalo** en fama da sontgadat.

P. Sigisbert Beer OSSR da **Camischolas** (1821-1879) ei staus tier igl uorden dils redemptorists sco missiunari ell'**Alsazia** ed a **Belfort (Frontscha)**.

P. Aluis Caduff SJ da **Rueras** (1843-1899) ei staus procuratur dalla provinzia tudestga dils gesuits ed ha aschia giu d'administrar lur finanzas. A caschun da sia mort han ins scret, «sia patria retica teneva el adina en buna memoria ... ».

La **Val Tujetsch** ha giu 88 spirituals cun bab e mumma da **Tujetsch** en survetsch dalla diocesa da **Cuera**. Da quels han 8 surviu sco canonis, 3 residenzials e 5 extraresidenzials:

de Castelberg Giusep Antoni, 1773-1817, **Rueras**

de Castelberg Gion Rest, Scholasticus, 1778-1856, **Rueras**

Geriet Giachen Francestg, 1780-1866, **Rueras**

Beer Tumaisch Giusep, 1851-1897, **Gonda/Sedrun**

Beer Giachen Giusep, 1872-1958, **Sedrun**

Brugger Giusep Aluis, 1871-1953, **Rueras**

Venzin Gion Benedetg, decan, 1892-1955, **Selva**

Monn Christian, decan, 1923 -, **Rueras**

Berther Tumaisch, 1927 -, **Rueras**

La tuor-baselgia da Rueras

Las baselgias e capluttas da nossa val ein renovadas e fan stupenta parada.

In edifices sacral less jeu specialmein menziunar: la tuor-baselgia da **Rueras**. Ei setracta d'ina resumaziun dalla cronica da Leci Antoni Brugger-Monn (1868-1946) che sesanfla egl archiv dalla baselgia a **Rueras**.

La baselgia da **Rueras** veva pli baul in clutger cun in'ura-baselgia sil tetg dalla baselgia ed in pign teschamber da vart dretga, nua che la tuor da crap da granit sesanfla oz.

La historia dalla tuor ha entschiet aschia: Igl onn 1926 ha il zenn pign da sogn Giachen survegniu ina fessa e tunava mal. Mo cunquei che surtut quels in tec naven dalla baselgia havevan insumma miseria dad udir ils zenns, era ei in basegns necessari da far enzatgei. A caschun d'ina radunonza per tractar quei problem, han ins eligiu ina cumissiun che ha enteifer ils onns prestau buna lavur. Animaturs e gidonters ein surtut stai ils augsegners sur Gion Antoni Venzin, caplon a **Rueras**, sur Giachen Antoni Fetz, plevon a **Sedrun**, Theophil Locher, grond amitg dalla vallada da **Tujetsch**, e sco architect Augustin Hardegger da sogn Gagl, sesents a **Mustér**.

Igl emprem han ins translocau il teschamber vi da vart seniastra e baghegiu el cun treis alzadas. L'alzada sisum ha da maun sura ina porta per puder siaden culla stalla da Nadal, schenghegiada d'ina signura tudestga. Igl onn 1928 ei la biala tuor da crappa da granit sesalzada 32 meters viers il horizont. La firma Zazzi ha giu surpriu la lavur da miradur, il capavel meister Vigeli Beer da **Sedrun** la construcziun da lenn dil clutger ed ils frars Huonder da **Mustér** il tetg d'iom.

Il modus da pagar ei vegnius discussiunaus en ina radunonza. Ins ha repartiut ils cuosts sin ils habitonts (243) da **Rueras**. Ina speciala aventura ei denton stau da vegnir tier novs zenns. Ina detga tuor drova era detgs zenns! Il pli lev eis ei stau d'anflar ils donaturs; pli grevas difficultads ha ei dau da cattar la firma da cular ils zenns e tgei tun ch'ils zenns dueigien haver. La davosa decisiun ei stau in bien cumpromiss cun monsignur uestg Georgius.

Ils 28 da matg 1929 eis ei stau aschilunsch che uestg Georgius ha saviu benedir ils zenns. Ina solida construcziun da lenn egl iert dil Duri Vigeli Cavegn purtava quater

zenns bein ornai (f, g, b, d). Sco usitau tier ina fiasta da trer si ils zenns, han ils affons dil vitg gidau a trer la liunga tretscha. Cun mes 5 e miez onns hai jeu era astgau gidar e survegniu ina gronda metga!

Tier ils quater zenns novs ei aunc il zenn vegl da 1490 vegnius installaus sin clutger, aschia che **Rueras** ha in tuchiez da tschun zenns. Aunc oz vegn mintgin a dir senza scuidonza che **Rueras** hagi in bi tuchiez!

Ina imposanta tuor cun bials zenns drova naturalmein era in'ura. Il clutger vegl haveva gie era ina ura. Era quella operaziun ei gartegiada, aschia che **Rueras** ha ina ura-baselgia e quei da tuttas quater varts dalla tuor! Per la benedicziun dils zenns ha pader Baseli Berther tarmess la sequenta poesia:

«Quitau, unfrendas, bia lavur
Quels onns sogn Giachen ha purtau
Magari aunc enquall'snavur
Denton tier nova veta leventau.
Teschamber, tuor, tut niev vesein
Ed oz d'in niev, sonor tuchiez
Da cor nus tuts er' selegrein!
Legria regi en vies miez,
Per tut al Segner engraziei!»

Cun caschun dalla ruchegiada dil mir dado baselgia dils anno 1927 han ins discuvretg las restonzas dalla veglia baselgia gotica. Enten far ils davos onns (1980) plaz per parcar ils autos, han quellas restonzas malamein pitiu donn!

In sguard el futur

Senza tradiziun dat ei buca progress!

Entochen ussa havein nus plidau da nossas tradiziuns religiusas che vivan, pli u meins. Ina buna tradiziun ei denton era aviarta per il futur. Sesentius propi da **Tujetsch** sun jeu ell'**Africa**, a **Ruaha** en **Tansania**, ina sera tard, il fenadur 1979, en raschieni cun sora Teodosina Berther da **Camischolas**. Nus risdavan da **Tujetsch** e vein tarmess cartas dall'**Africa** en **Tujetsch**, screttas dalla sora che era 50 onns ell'**Africa** en in bien lungatg romontsch. Quella sora era cun tgierp ed olma Tuatschina ed el medem temps Africana. Tuttavia quels egl jester vulan restar Tuatschins e vulan esser aviarts per il pensum dil liug.

Nus havein bia jasters che vegnan en vacanzas tier nus e quels vegnan savens en nos survetschs divins. Els dattan a nus in bien exempel; denton era nus havein da dar ad els dil pli custeivel che nus havein entras nossa cardientscha vivida ed artada da nos perdavons.

Nus lein esser engrazieivels a tut quels che cultiveschan il spert da cardientscha en nossa val: a nos augsegners, al cussegl pastoral, a gidonters e gidontras ed a tut tgi che ura e lavura persuerter.

Igl essenzial ei adina nunveseivels!

Fontaunas

Berther, Baseli. Baselgias, capluttas e spiritualesser de Tujetsch. Studi historic. Mustér 1924

Berther, Tumaisch. Spirituals, fraters laics e muniessas della vischnaunca de Tujetsch. Muster 1960 (Sep. ord: Il Pelegrin 1959-1960)

Hendry, Tarcisi. Baselgias e capluttas da Tujetsch. Fotografias: Erwin Cathomas. Mustér 1983

V L'agricultura

E Tujetsch sedivida

Ins sa dir che **Tujetsch** sedividi en quater parts principalas, numnadamein:

- alps
- mises
- uauls
- funs cun graun, glin e truffels

Las alps

Cun paucs plaids - 53,9 kilometers quadrat u 40,25 % digl intsches da Tujetsch cumpeglian las alps. La gronda part ei messa ora bi ademplant siper las rodundas, sco per semeglia **Cuolm Val**, **Caschlè**, **Tgom** e **Cuolm Cavorgia**. E quellas ch'ei allas rivas d'in'aua ein alzadas ora e zuppentan vi nuot (**Val Maighels** e **Val Val**). Mess ensemen ina e scadina, ha ei dau pli baul il diember da schotg, schotg alps ella **Val Tujetsch** che secloman:

Cuolm da Vi	genetschas (cauras)
Val Strem	stiarlas
Caschlè	stiarlas
Val Mila	stiarlas
Culmatsch	vaccas
Val Giuv	vaccas
Cuolm Val	vaccas
Val Val/Tiarms	vaccas
Puozas	nuorsas
Tschamut	vaccas (genetschas)
Val Maighels	stiarlas
Val Curnera	vaccas, schetgs e nuorsas
Cavradi	taurs e vadials e starlegliam
Nual e Muot	stiarlas e genetschas
Tgom	genetschas (vadials)
Val Nalps, grass	vaccas
Val Nalps, claustra	schetgs e nuorsas
Cuolm Cavorgia (Pardatsch)	vaccas (schetgs)

Sch'ins metta d'ina vart las duas alps da **Nalps**, **Curnera** e **Cavradi** vonza ei per **Tujetsch** aunc adina quitordisch, bein onz bia pils pursanavels dalla val. Zatgeininas dallas alps ein miez carschidas en, sco per exempel **Culmatsch** e **Caschlè** e **Cavradi**. Da daditg enneu han bostga e brutg priu il surmaun e naparts dils pursanavels han insumma piars empau las queidas.

Las tegias ed ils feclers ed ils tschalers da magnuc sballunan; lavazzas ed urtgiclas mortas recuseschan las perdetgas. E leu nua che la fumeiglia dad alp ed ils muvels tuornan, alpegian ins buca pli dus meins e miez e varga, mobein onz pli pauc, ed ils scolars bandunan l'alp avon la scargada. - Dabia semida; pader Placi a Spescha fagess tinghels cun ses convischins che han suau da manedel avon onns pervia dallas alps. Las alps per propi, sco per semeglia:

Val Val

Val Giuv

Alp Tschamut

Tgom

appartenevan alla claustra da **Mustér** ed ils pursanavels da **Tujetsch** pagavan mintgamai da sogn Martin per las treis alps da vaccas (senza il **Tgom**), pia culs vischins da **Tschamut** ensemen, pressapauc 555 kilos caschiel. Els mavan allura sez cul caschiel on claustra; las indicaziuns ella nudauna dian che la marena pils vischins giu da

Tujetsch fuvì ina gronda grevezia. Ils Tuatschins han tschensiu alla claustra entochen ils anno 1866. Allura ein els secumprai ora e stai leds, damai che las pastiras dad alp ch'els possedeavan vivon, las atgnas, sco per exempel: **Pardatsch, Nual, Caschlè e Cuolm da Vi**, quei leu fuvà buca grond striegn. Sch'il temps present ha raschun, gliez semuossa si pli tard.

En tuttacass ei la poesia dils tschenghels e dils pardatschs sco pigliada naven. Giachen Hasper Muoth fuss a mesa via cun ses idils. Per cletg ha el descret bufatgamein la **Val Tujetsch** ed ha mussau tscheu e leu vi cul det ed ils Tuatschins hart mess tut bein en salv. Ed ils capetels dallas alps en **Tujetsch** ein daveras numerus. Essend ch'ils contracts cuntegnan dapli che mo tschentaments, numnadamein nums da glieud e logs ed imports epi surtut il spert dil liug. Per dir la vera verdad fuvà la gudida sill'alp in strapaz. Ils purs che vevan da caschar en roda e tener adaquen il latg tenor las stialas e far las midadas mintgamai ed aschia.

E denter lezs dis ed ils nos dalla centrala da latg secatta in spazi.

Fontaunas

Berther, Baseli. Noticias cultur-historicas davart las alps tujetschinas. En: Il Glogn, 1940, p.35-46

Berther, Baseli. Sin Cadruvi. Reminiscenzas ord la Vall Tujetsch. Muster 1904

Berther, Francestg. Das Nalpser- oder Tavetscherschaf. En: Bündner Wald, Nr. 5, 1961, 5.163-166

Berther, Norbert. Hanletg sur il Cuolm d'Ursera. Zacontas noticias sur il negozi da purschals da marcadonts tuatschins. Camischolas 1972. (Sep. ord: Gasetta Romontscha dils 15 da december 1972)

Cavegn, Placi. Tavetscher Viehwirtschaft. En: Bündner Wald, Nr. 5, 1961, S. 127-132 Gadola, Guglielm.

Enzatgei ord l'istoria dellas alps tujetschinas. En: Il Glogn 1940, p.30-34

Venzin, Gion Antoni. Las alps de Tujetsch. En: Il Glogn 1940, p. 48-56

Ils mises

Ual giusut las alps secattan ils mises; las tegias e las pastiras van alla malura. Las alas-tetg ein cheu si e leu giu dadas ella fueina ed il tschaler da latg ei in sbuau.

Dapertutanavon il medem aspect, in aspect da ruina. - Mo paucas tegias han tratg ina megliera sort. Enzatgi d'ordeifer ei daus neutier ed ha cumprau la hetta che detti ensemen. Perquei ch'ella deva bunamein ensemen, han ins tratg ella el tgil. La finala - ins hagi acquistau ella pervia dallas vacanzas; il liug seigi bials ed ins vegni bein maneivel vitier.

Ei fuss surfatg da dir che **Tujetsch** hagi in sfrac mises; ils per propi san ins quintar cun la detta: **Scharinas, Milez, Mulinatsch e Pardatsch**. E tuttina vegn ins buca da buna veglia da semplamein metter d'ina vart las ulteriuras pradas, sco per exempel: **Liez, Malamusa, Milar, Tschuppina, Mises da Camischolas, Valtgeva, Cungieri**, la **Val** e la **Riada** vi da tschella vart dil **Rein**. Priu ch'ils logs seigien e buca veritabla tiara dils sgnaffers, biala eis ella tuttina.

Igl ei dapli ch'in tec nostalgia ch'ins metta senza fraud d'ina vart. In buob scosauda ha gidau a metter si ils scalins ed ei ius cul muvel a mises. Adina, mintg'onni - senza fallir! Suentar ils vegn da matg savevan quels argienvivs buca star eri pli; els devan davos ora, accurat sco ils schetgs che tenevan ils pervesiders pigl asen e levan maina vegnir neu dil buentaduir.

Aschia treis entochen quater jamnas pertgirar la biestga si mises e bunamein persuls cul bab en tegia e vin nuegl e tuttavia la sera sper la fueina - quei fuvà ina sentupada da vaglia. Pil solit veva il bab da raschunar in bien ton ed ils buobs vevan endamen cul bab. Dapli che mo dils tiers e dallas pastiras. Cura ch'el, il bab, veva a casa ton da far e munglava adina esser leu per tuts. En cuschina prendeva el las hottas enta maun, senza far grondas urdanas, mo latg e groma e schuffa e prima fermentins. Suentar ch'ins veva stuiu vegnir hotten culs vadials che magliavan ni miarda e mavan scols vadials cul nas agradora e pumfata en in murasch. - Ris e groma deva ei sapocu; per exempel, cura che la giuventetgna vegneva ina dumengia. Ed ei ha mai falliu; ils buobs vevan lu dad ir per frastgas da larisch e striaunas e fittar l'escha dallas tegias. Suentar ver priu enagiu la balla, devan ils bials il rin e la scua cun lur bialas. Ils ins miravan onz pli stagn ch'ils auters; enqual flammegiada aschia.

Schebi ch'ils mats e las mattauns vevan nuota envidau aposta la mumma, ella vegneva tuttina. Cun in toc barbalada en sac dalla schuba pil pastur ed avon che turnar a casa ha

ella adina priu ils caltscheuls che fuvan sco cocca cun ella.
Tenor igl aspect da nos dis eis ei da far tut in auter quen.

Ils uauls

Ins sa sefigurar che colons ein dai da **Desertina** anora encunter la stretga da Valzeinza ed han entschiet a runcar ellas vals. Ed ils runs enamiez las cavorgias ein stai ina resca e las hettas cun lenna rodonda han mo ual dau suost. Entochen il di ch'ils vellers ein stai empau pli ditg els vallas e vonzeivi insumma buca pli turnai neu da lur habitadis. Quei pudess esser il di da naschientscha da **Tuvez (Tujetsch)**. Ils uauls serrai da discharina han fatg impressiun; ils vellers han entschiet a pinar la lenna, bials pegns ulivs cun hazras tschemas. Ed il mument ch'ei ha dau ora schi bein, han ils umens luvrau il tgau giud il best. Las runcas ein sefatgas; igl emprem permiez ils plats e silsunter lunsch odentuorn. Ils colons vegnan a ver tagliau in uaul suenter l'auter.

Da lezzas uras han ils cunfins digl uaul tonsch in tschancun plinensi che ozildi; ei selai supponer pressapauc sin in'altezia d'in bien ton dapli che duamelli meters. Enten scavignar e far via han ins anflau cuscha schibein sil **Cuolm d'Ursera** sco ella Paliu **Dultscha** e siviars la siara da **Maighels**. Pervia da prau e pastira han ils avdonts dalla val tratg ton sco nuot en consideraziun; els han surgudiu la cuida digl uaul. Tschentanners e tschentanners han ils libers da **Tujetsch** ed ils colonists siper las runcaglias fatg surdiever digl uaul.

Ils cronists dalla val (sco per semeglia il convischin pader Placi a Spescha) han alzau la vusch; mo els han vuliu mussar adumbatten da viver als Tuatschins. Empei da semegliar han in per dils feghers schizun dau fiug igl uaul - ord spir levsenn; auters puspei han pinau entiras plunas lattas ed han fatg ordlunder scanatscha. Quei che certa gliedud hagi buca dumignau da far empaglia, seigien las cauras vegnidas en agid. Cun tunder ils cagls e scursar la pignola. Ed ils tiers selvadis possi ins buca tier. Ils purs sez capeschien ina miarda dalla selvicultura; ei basegni in um che vegni ordlunder, in che hagi e in tec reverenza pigl uaul. Pader Placi a Spescha ha fatg spitachels.

Ferton che zatgi ha manegiau ch'el batti ils quarts. Ed ils vischins malprecauts han survegniu la torta.

Inaga che las plauncas ein stadas bluttas dil tut, ha il terren darschalaun dil platter entschiet a luvrar. La cutgna ha entschiet a sefender e las fessas ein adina vegnidas pli e pli grondas. Squatschs e sbuaus ein scochemai daventai ina gronda mulesta. La catastrofa ei vegnida igl unviern. Il mument che las lavinias da freid e da cauld han entschiet a sederscher a val; ellas han da temps en temps veramein fatg tut sutsu. Atgnamein per culs vellers ein stai en tocca culiez, han els mess in bostger e finalmein entschiet a plantar schetgas ed uauls serrai, oravontut dadens igl uaul, naven da **Scharinas** entochen **Sontga Brida**. Il prighel denton ei era staus anoragiu, sco per semeglia giud la spunda teissa da vart seniastra dalla val. Ed igl ei stau neras uras d'emplantar danovamein ils uauls da **Liez, Malamusa, Flurin, Camischolas** e **Niregl** e baghegiar ils uors sil **Cuolm Cavorgia**.

Ils vischins da **Tujetsch** han adina saviu; las condottas da lenna ch'ins ha pli u meins dau ora mintg'onnn ein stadas ina buna resursa per la vischnaunca. Tgei vess ella schiglioc e pigliau a mauns, quels onns nauschs senza entradas. E tonaton - tgi che ha erigiu denter ils vischins ina casa u in baghetg ha adina survegniu dalla vischnaunca empau lenna concedida e per la sort da fiug han ins pagau pauc detgavunda, malgrad ch'igl ei stau trentel.

Ils bials uauls ein trasatras stai da maun sut en **Tujetsch**, a **Surrein** ed a **Cavorgia**, biabein duas tiarzas (67 per tschien) dallas plontas insumma. Il platter ha ina cutgna pulpida e grassa ed ils pegns creschan dabot ed ad ault. Era sch'il tschespet perversa dasperas abundontamein patlaunas caura, faletga ed arclina. Da maun sura perencunter ei la cutgna els uauls in'austra. Ina bostga spessa strocla ora il suc ed il suttapei dallas plauncas ei magari tscheu e leu senza ni mur ni savur. Ton che las plontinas ellas plontaziuns sefan vessamein.

Quei che crescha ad egl vesent ein ils pegns; il pli dallas plontas ein pegns, semplamein pegns. Els logs muoschs sil funs dalla val crescha l'ogna en gruppas e siper enqual

cresta solitaria mintgaton in ischi. Ils fraissens ein onz scarts; las miseroclas dalla salischina vegnan buca a ste da furnir avunda frina als aviuls e puma caura pudess ei semeglientamein vertir in tschuat dapli. **Tujetsch** ha paucs larischs; igl uaul sisum la Val blava dil **Cuolm Cavorgia** vegn pli e pli rars ed ils bests dallas plontas han ina barba macorta. Ual sco la schiembra spatitschada ella **Val Curnera** ed ils singuls viazs pigl uaul da **Cavorgia** entuorn fan daveras ina pintga parada.

Ins tschontscha oz da pressapauc otgonta parcelas d'uaul che s'audien da present aunc a persunas privatas. Las ulteriuras plontas appartegnan alla vischnaunca, aschia che quellas trentasis hectaras privatas muntan buca ual la massada.

Perencunter las passa duatschien tschunconta melli plontas (=ver 250 000 meters cubic) dalla vischnaunca da **Tujetsch** ein daveras in inventari endretg. - Dil reminent ha Tujetsch in bostger ed ina gruppa da luvriers dad uaul (otg en tut e sis lavuran permanentamein) che mettan maun vidlunder. Ins mira tier e tarschina e las plontaziuns ein ina gronda speranza. - Il tagl da lenna munta annualmeins sigl intschess da Tujetsch a duamelli meters cubic che sedividan sin lenna da condotta (circa 1450 m³) e sin las sorts da fiug (ina sort 3 m³ che cuostan pils vischins francs 135. -, fatgas si e messas a trer ellas deponias communablas dalla centrala ORA u a **Bugnei**).

Projects dallas uisas sefan en **Tujetsch** ed igl uaul vegn a siu quen. Sidavon stattan las emplontaziuns da **Londadusa** (surtut la **Stgalutta** odem ils mirs) e sisum igl uaul **Cavorgia**: la **Muota** e **Vallatscha**. La **Londadusa** persula cuosta varga dudisch milliuns dils quals la vischnaunca ha da surprender vegn per tschien, pia ina summa da francs dus milliuns e 400 000. - ed ils plans dil **Cuolm Cavorgia** eran aunc 2 1/2 milliun e 20% da questa summa fan e in miez milliun. Ed il schurmetg dils habitadis ha ora ed ora dau dabia ella **Val Tujetsch** ed el ha giu adina la prioritad. Ulteriuramein stat ei enta maun ch'ils uauls existents ein da mantener cun tut quita. Pervia digl uaul **Bugnei** ein ins en tema. Quei project ha oz la prioritad.

Bien e ditg ha il bau pegn mess en prighel ils uauls; ins ei vidluner da combatter el, ha denton aunc buca surventschiu. Pli grond success che las fallas han ins giu cun las «plontas d'estga», cun semplamein pinar radicalmeins tut las plontas odentuorn ils pegns taccai e giavinar aschia il bau pegn ella scorsa dil lenn dersch ch'ei il meglier refugi pil cuvi. E silsunter fan ils luvriers cul scursiel enta maun lavur entira, enaquella ch'els allontaneschan la scorsa dil best e dattan fiug ella sil plaz.

Per aschidadir - il bau pegn ei tutavia buca ina epidemia da nos dis; la Gasetta Romontscha dils tschun da matg dils anno 1901 di che a **Mustér** lavurien 600 umens da present els uauls per cumbatter il bau pegn.

Ils animals manedels fan è donn (sco per semeglia cauras e nuorsas durent la primavera ed igl atun), tutavia il mument ch'els muentan la crappa (egl uaul da **Bugnei**), forsa schizun onz pli fetg ch'els turnighels da vent che scarpan ora ils pegns cul cusch e tut e rumpan si la tiara (sco arada) ch'ella sefa per da detschiert. Dil reminent, il cusch muenta ina damonda. Tschels onns pinavan ils umens la lenna cun ina resgia gronda ed els han adina schau anavos in brav cusch. Oz perencunter cun quella resgia da cadeina peina ins il pegn tocca giudemdem il best e quei per grond disavantatg. Il cusch d'avon onns encuntercomi, lez ha giu ina forza attironta per las plontinas ch'ei sefatgas en bials marighels odentuorn il cusch.

Sa mintgin, en **Tujetsch** han ins da daditg enneu scret il turissem cun bustabs gronds. Denton - las pistas ein tondanavon bunas ch'ils skiunzs dattan pli pauc dallas varts e tschancunan ils selvadis odentuorn (in uaul senza selvadis ei sco in flum senza peschs). Auncallura capeta ei che certa glied fa diever dallas pials e munta si per las spundas cuvretgas cun uaul; ils cantuns gits dils skis fall donn alla pignola.

Buca tut quels ein el clar che manegian ch'ina aria schi pura e sereina sco ella Val **Tujetsch** detti ei insumma negliu e mintga creatira hagi da prosperar. Bien pia - mo il tartignament dall'aria dat afuns ella val e cua e cua, essend che ni l'aura sut ni l'aura sura ed era buca il favugn neu dil miezdi rabetschan naven il tschuffergnem che seplacca dapertut. Las ideas sco talas vegnan en plunas, tgei ch'ei fussi tut da far per schubergiar. - Pil sollt manegian ins ils auters ed ins sez fa pauc, fetg pauc.

Ina caussa ei clara sco il sulegl; ils uauls en **Tujetsch** ein la gronda empermischun; il

bostger e sia gruppa e cun ils ezs ils vischins sez; els decidan dalla sort. Ils uauls ein vegls e venerabels ed il bostger, ha da semetter a per. Era sche ses dis ein teni a quen, ha el dad agir ponderadamein, sco sch'el sez vivess tschentaners e siu successur ha silmeins dad esser sils calcogns e veser bein sco el.

Il funs da casa

Ton sco la mesadad (29,5 per tschien da 63,8%) dil terren productiv importan ils praus, praus grass amiez ils plauns e las pendas magras e seccas u magari da paliu siper las plauncas per part tgerlentadas. Pil sollt mettan ils purs buca grascha ils maghers; ils bials perencunter, ils ezs tegn ins si bein. Lu stediamein funs cun buc in crap che fa la tschera dad Orts. - Ussen dat il trax vid las muschnas e cava e fa uliv la tiara. Ed atras ils praus aschs van numerusas tureras e las cuppas e las cuas gat ein bunamein tuttas ragischadas ora. Empei sefa in fein manedel da scutel e tschetschamel e suenter mesastad crescha in fin risdiv e sch'ei vegn adaquella che l'aura fa propi bien - in tschec tersiel. S'entelli buca senza ch'ils purs laschien pigliar cun grascha artificiala-e quei cun da tuttas uisas.

Graun e glin e truffels

La plipart dils ers ein stai tschels onns da maun seniester dil Rein, amiez ils plats e siper las spundas suleglivas che han buca ual ina gronda pendenza ed ein ina cultura cunvegnenta da tarschinar. Il bien tratsch grul giud las costas dils cuolms encunter mesanotg ei sco fatgs per metter ora segal e dumiec e duront ils onns favoreivels ei schizun la salin vegnida madira, sco per semeglia en quellas stads benedidas dalla secunda uiara.

Avon onns ein ins stai onz pli marschei dall'aura ed ei ha tuccau da tener adaquen. - Cura ch'il temps da vegetaziun ei tondanavon cuorts, han ins tratg da nez bunamein mintga scalarada. Magari suenter miez mars han ils purs entschiet a metter tiara ils frusts ch'els vulevan arar. Quels tocs tschufs enamiez la samada, endi! Denton - sch'il sulegl ei segidaus han els gudignau silmeins diesch dis. E metter ora ad uras la semenza ei sco da survegnir in clom. Ed enstagl da tedlar il sulegl da zercladur ein las zerclunzas semessas ladinamein alla lavur ed han tratg ora il zerclen. Per ch'il graun cupidi bein, ein ellas idas si cun in enziard suenter l'auter. Tut senza ch'enzatgi empiari, schebein ellas rumpien si las schanuglias.

Segal e dumiec; il segal ha il surmaun pervia dil paun casa. In arcun plein frina fuva ina garanzia e dumiec dat per exempel suppa da giutta, ferton ch'il strom ei in bien suten per glied e tiers. Madirs dil tut, gliez ei il graun bunamein mai vegnius en Tujetsch. Da quei han ils chischners dau perdetga, quels chischners cun lur posts imposants e las lattas entraviers sut in tetg graschel da slondas ed ils areisens han onns ed onns pudiu star agrads senza che las tschetschnas dil puranchel vessien giu turpetg. Per posta dallas sgagias e dallas hazlas e dils paslers che han meinsvart ziplau giud las lattas ei la puraglia buca ida sutsu. Plitost han ils umens saviu sepusar encunter ils posts dils chischners, cura ch'ei ha tratg sutenasi. - Ins ei ius naven culs chischners, naven cuntut e quel che vonza sisum la val ei in rudiment da vergugna.

Dapi igl onn dalla fom, ins resda dils anno 1817, ei la trufla dapertut ella val. In per camons truffels alvs e cotschens, gross e manedels, stattan buns, per cass ch'ei va in di da mal en mender. Truffels barsai e truffels cun pelletscha ei zatgei e far cuer e smaccar truffels pils pors ei sia lavur, quella dalla casarina.

Ei fuss meglier da schar esser; ils tgaus mellens ein restai, il glin perencunter ei naven da **Tujetsch**, da daditg enneu. Enzatgi per propi ha risdau u schizun scret surlunder, dalla cultura dil glin. Ludau si quella atgna produenziun toccasum ed emblidau aposta che las femnas han fatg ina termenta braha. Ozildi furassen las restas memia zun ils mauns; enstagl van ins en schuenglis e fa catscha sils utensils isai. - Schebi ch'ils ers da glin han pudiu semantener pli ditg en **Tujetsch** che ordeifer.

In toc glin veva mintga casada, pli baul. Gnanc ton pil quet u pil gust; ins duvrava semplamein il glin pervia dallas teglias e pervia digl ieli semglin. Dasperas fuva la summa da luvrar ora ina gronda breigia. Il dies e las manvialas han dau is ed igl ieli

muntaniala ha buca gidau adina. - Il quitau pil glin ha entschiet cul schermegl. Fuva el castgs e falombers, ha la zerclunza mess il zerclat d'ina vart e zerclau a pezzi. Mintga schiermet dat ina teglia e mintga teglia vestgescha.

La lavuraziun per propi entscheiva sil baun da sburlar; ils umens han rasau ora otg blahs senza cantuns amiez il prau e tschentau il reffel enamiez. Il cundrez ei schi sempels e natirals, ina buccada aissa ed in petgen cun dents da fier amiez, muots per buca sefar mal. Ed ils dels ora sigl er semettan en acziun tenor las forzas. Davontier stattan las femnas sil meglier; ellas stattan giudavon, tschaffan in pugn plein teglias datier dalla ragisch e sdrappan ora, petgan il tratsch giun plaun, magari e encunter il pez dil calzer, e caveglian ils manugls en crusch per tiara entochen ch'in bratsch entir ei s'emplunaus ch'ellas portan mintgamai allura sper il reffel. Sil baun da sburlar spetgan las femnas onz pli passadas e las buobas sin las purtadiras e reflan e reflan. Sch'il tschiel ei cuvretgs restan las borlas muoschas e stagnas e seglian da tuttas varts, perfin amiez la fatscha. Ina borla sillas gaultas fa gnanc in sgreffel buc. Sefendan las teglias enten trer atras il petgen, sefa la schuengia avoncaduras e las personas sil baun ston trer da schluppar. Las pelletschas melnaunas e mutschignusas che stattan anavos ellas schunschivas dil reffel dattan color ils mauns ed il petsch freda mal.

Las tortas badugn ein semtgadas sigl ur, verdas e liungas che stattan encunter. Igl um pren ellas per las cumas e tila ina suenter l'autra atras la palma serrada dil maun seniester ch'ei dat o fiug. La feglia aunc tut verda sedistacca e dat giun plaun, ferton ch'ina scamada brinauna tacca denter il polisch ed il letgagroma. El sturteglia las tortas senza ch'ellas dettien is. Ils ligioms han semplamein da tener, era sche las auas marschas el puoz lain ora lur gliettas. - Zatgei gadas ei igl um daus neutier ed ha priu ils blahs pleins orasut il reffel, ligiau las borlas ensem e turnau a rasar ora novs.

La casarina ha fatg il quen ordavon; per cass ch'ella dubeta da ventscher en in di, eis ei meglier da catter enzatgi. Entochen ch'il sulegl va da rendiu, s'ei da vegnir a cantun. Las borlas rabetschan ils bos en clavau e las monas cun las teglias van scochemai ella puzzada. Duront las per jamnas da puzzar traflica la casarina cun las borlas. Metter ellas el sulegl, rasar ora ed ugliar, sinaquei ch'il sein detti ora, sescauldi e sechi. Il bien sulegl dil suentermiezdi fa miracas. Entochen il di che las borlas vitas van en la sadiala dil piertg ed il semglin en in sac da sal sin pegna scalegl; el secca e secca e schluppegia e mo fui vonzeivi atras la detta. Lu ei il di arrivaus, il di da far or ieli. E lezza sera rabetscha empau variaziun en la cuminonza; ils menders ed ils umens torclan e stroclan e las bialas brassan il semglin en grondas cazzettas e miran suto. Per silsuenter far allura in rudi spels zeivers da vegn e litgar ieli.

Las teglias encuntercomi ein onz pli fitgadas; ellas spossan las giugadiras e dattan vid la pial e caschunan schluppadiras. Daferton che la femna da casa stemna ordaviert e sto esser sissu che negin scumbegli il glin. Perinaga metta ella sinquei ils bratschs sillas puntsnuegl; ella dat agli in'autra ga la caschun da vegnir secs sc'in cries. Fullar ei in strapaz ed ils egls vegnan cotschens, ual sco duront ch'ella spatla e tila il glin atras il tschariesch e sparta la schuengia dalla stuppa e metta la resta d'in maun pils batlinis suren. - Tocca ch'ella speila la sera il filap ord il zugl e lez va senza interromper atras la detta e vi sil spiel. Ferton ch'il letgagroma vegn ruhs e las rubaglias dalla pial sidengiu van afuns. Vess ella da far in buc il di ch'ella urdescha - lu ei il muster el zeiver da piertg ed ella maungla sescaldar cuntinuadamein enten teisser e la tschefla secavestra els fils ed ella repeta las fallettas.

Quei fuva per cass fatg en e fatg ora, pli baul; il di da nozzas deva la mumma ad in e scadin da ses affons tschun letgs entirs ed entratgs e reschnovs.

La luschezia dalla mumma.

Fontaunas

Hager, Karl. Flachs und Hanf und ihre Verarbeitung im Bündner Oberland. Kulturwissenschaftliche Skizzen. Bern 1919.

Schmid, Theophil. Enzacontas notizias cultur-historicas dalla Val Tujetsch dils anno 30. En: La Tuatschina, nr. 25-26, 1985 e nr. 1-2, 1986

Il stan puril

Far il pur ha giu num luvrar ed en **Tujetsch** han ils vellers fatg il pur; da daditg enneu, forsa bunamein dapi adina. Pongir - mo il stan puril ei staus enzatgei da num e quei aunc in liung temps suenter la Secunda uiara mundiala entochen ch'ins ha baghegiu ora las auas. A per ha il turissem dau in plum e quellas ulteriuras pusseivladads da far il da viver han dau decisiuns. Ils raps cun la pala ed il zappun enta maun ein tuttavia buca vegni agradneu, mo els ein vegni pli stedi.

Perinaga han ils purs en **Tujetsch** pera schau listrir; els han piars temps. Vonzeivi ein els semess encunter e la meglieraziun dil funs ei stada sidavon.

Quels 7 da november dils anno 1970 ei staus in di memorabel. Ils possessurs da terren han decidiu da realisar ina meglieraziun entira. Buca cun tschaffen, damai che dils possessurs presents han mo 125 votau pro e 282 han detg da na. La decisiun han la finala ils 180 possessurs absents dau; ils ezs han ins quintau tenor la lescha sco gies. E la fin dallas finalas ha **Tujetsch** dau la decisiun per la meglieraziun cun 305 gies encunter 282 nas.

Duront il meins da december 1985 ha la corporaziun da meglieraziun clamau ina radunonza, quasi quella da ventschidas. Enteifer quels quendisch onns ha zatgi fatg ina lavur maisudida; la suprastonza ha mess ora las hartas ademplat sin meisa:

La vischnaunca da **Tujetsch** cumpeglia in intschess da 13 391 hectara; il perimeter dalla corporaziun ensiara 929 hectaras.

E quellas 929 ha serepartan sco suonda:

- zona da baghegiar	81 ha = 9%
- terren agricol	685 ha = 74%
- uaul	116 ha = 12%
- vias e trafic	47 ha = 5%
- en tut	929 ha = 100%

L'arrundaziun ha caschunau aunc autras midadas d'impurtonza, sco per exempel:

- reit da vias 37,56 km (entochen alla fin digl onn 1986 vegn quasi ina tiarza, pia 30 per tschien ad esser asfaltada)
- 5000 meters currents da drenadi
- 4 sutpassadis, numnadamein: **Gonda, Flurin, Dieni e Sudada** repassau e rugalau la reit da sendas
- indemnisaziun als possessurs da terren ella zona da skis e quei tenor mesira e qualitat dil prau (prau magher cun ina bonitaziun da 2 puncts 1.37 francs, prau grass cun in schazetg da 110 puncts ina tala da frs. 3.35). Ina decisiun senza paregl, in muossavia! Il diember da parcelas ei sminuius considerablamein; dallas 6000 parcelas vonzan oz 850 tocs prau, aschidadir che la parcella ei carschida da 14,1 ara sin 97,7 aras. Ei enta maun, in snez semegliant cuosta raps e la meglieraziun en Tujetsch ha custau 12 380 000 francs che sedividan:

confederaziun
cantun 95%
vischnaunca

Ils possessurs sezs pagan pia lur 5 per tschien e quei fa la summa sil perimeter da francs 622 687,90 entochen ils 31-12-84; ina caussa ni l'otra pudess aunc vegnir vidlunder, il tagl grond denton ei daus e resta. Sulettamein igl import da francs 396 023,40 han ins buca subsidiau.

Tgi che maneza buca ils pass, ha matei da schuffa da satiuer; la revuelta ei stada tondanavon anetga. Il pur pign da tschels onns cun siu menaschi permiezvi ed ina veta fatga uliv, cun faners e baghetgs e nuegls da midada, lez dat anavos. Nuegls da vegn e varga, ina veritabla stalla, lezza ha tila e per cass ina che stat ual avon igl esch-casa.

La statistica muossa ora claramain; oz fan aunc famiglias u dels singuls il pur en **Tujetsch**; sche lein nus dir che cumparegliau cun la confederaziun ei la situaziun en **Tujetsch** aunc in'entelgientscha alla buna. Ed il plaid dils purs va a sepigliond per tut las scheinas: enaquella che nus stein vidlunder e fagein il pur, allura endretg ed entiramein e cun funs avunda ed ils indrezs leusunter. Cun las subvenziuns d'envernontas ed il susteniment dalla cultivaziun dil funs (sco per semeglia era cun tarschinar ils praus maghers odentuorn) san ils purs tener petg e subsister. - Certins denter els sefetan sin lur idea; els han midau meini e s'empatschan da cauras e nuorsas. Da cauras e nuorsas ein ils purs da **Tujetsch** adina s'occupai e lur tratga ei veglia e pli che veglia. Oz perencunter han ins tscheu e leu dismiss ils armauls e fa il pur da cauras u da nuorsas. Quei ei singular e vala la peina da setener vidlunder. Ils treis menaschis all'engronda stettien buns:

Il pur da biestga armentiva

Ed el ha facticamein in num e stat «**Dadains gl'uaut**». Gieri Giger, el ei els curonta ed ha maridau l'Ottilia, ina nata Hitz da **Gonda**, duei survir d'exempel. Ei vala la peina da retener entgins muments dil cuors da sia veta.

Dils anno 1951 seregordan ins nuidis - digl onn dallas lavinias; a Selva han ins giu fatg atras ina curontina e la lavina da **Rusas** ha rut il fil dalla veta al scolast Gion Giusep Giossi e la famiglia dil Gieri, il bab e la mumma e las tschun soras, han giu dad uardar tier. Ed igl ei vegniu adaquella ch'il bab Giusep e la mumma Ludivina han priu ina decisiun - duront quell'oras malguessas dalla neiv gronda. La primavera digl onn 1951 han els dau pietigot a Selva ed ein setratgs a **Bioggio el Tessin**, bein ina midada nundetga per la famiglia entira entratga. Ins ha buca teniu ora il suer digl ambient; dus onns sissu ein els turnai. La famiglia ha turnau a far il pur ed ils affons ein segidai culs geniturs.

Suenter la scola elementara ei Gieri Giger ius naven; el contuorn dil port d'aviaziun dalla Swissair ha el anflau ina piazza. La lavur fuva buca mal ed el ei sedustaus. L'Ottilia Hitz da **Gonda** luvrava era dasperas; ed els dus han empriu d'enconuscher in l'auter in tec meglier. Forsa schizun che l'Ottilia ha aviert il horizon da turnar a **Selva**. En mintga cass vegni ella a pèr, il mument ch'el tuorni a far il pur. In plaid aschia sefa da grond e per in giuven pur che vul semetter en ei igl aspect dil partenadi da gronda muntada. Cun l'entschatta d'avrel digl onn 1970, el veva trent'onns, ei Gieri Giger puspei secasaus a **Selva** ed ha fatg il pur e l'Ottilia cun el. Il Giusep e la Ludivina Giger-Venzin han viu en; els han dau liber maun ed en ton sco nuot ein els dus setratgs a **Sedrun**. Ins ha fatg cundiziuns favoreivlas ed ils siat armauls e las 4500 aras ein stai in suttapei. Schebi ch'il Gieri Giger veva buca fatg pli bia scola. Perencunter eis el semess en da detschiert ed ha fatg sez la buna scola.

Ei enta maun, **Selva** veva buca ual ina gronda calamita; plirs dils vischins han vendiu lur fatg ed ein tilai naven. Enstagl da lamentar siper enzatgi dil bandun, han els dus, il Gieri e l'Ottilia, cumprau ensemen in funs suenter l'auter; atgnamein per pauc, forsia per 70-80 raps il meter quadrat ed engrondiun lur fatg sin quitordisch ed ina mesa hectara. Per las relaziuns en **Tujetsch** ei quei daveras in tschuat; ton che la famiglia giuvna ei daventada tec a tec la pli gronda possessura da terren dalla val. Els han cumprovau ch'ins sappi e vegnir sidatgau ell'uccliva d'in maun.

Il davos termin ei puspei il meins da schaner 1986 ed ils mauns sfurmican da far igl inventari. Gieri ed Ottilia Giger-Hitz han rasau ora ed han detg senza far ora ina tschontscha.

<p>Muvel: 34 tgaus biestga</p> <p>5 vaccas 7 mugias 13 stiarlas 9 vadials</p>
<p>Terren d'agricultura: 9 frusts (parcellas)</p>
<p>Baghetgs:</p> <ul style="list-style-type: none"> - casa ed in nuegl ual dasperas, plitost - ina stalla da pressapauc 40 tocs, drizzaus en alla moderna - clavau cun in plaz per 100 tschuncheismas grondas fein (800 m³)
<p>Parc da maschinas:</p> <p>carr grond da transport bettagrascha maschina cumbinada (segar, enzerdar, far ensemen) rischlera cargotrac suflafein repartgider da ladretsch ventilatur maschina da tagliar pel carr da ghella tuorn da grascha maschina da mulscher</p>

In parc da maschinas semeglient cuosta in capital e Gieri Giger numna la summa da francs 122 540. - ed ei tuchi da tener adaquen e recaltgar. E per ina buna vadiala stoppi ins era quintar pressapauc melli francs e quei leu summi. Uonn hagi el vendiu 10 tgaus per 4700. - francs l'in, intragliauter e cun las subvenziuns (15 envernontas, las ulteriuras vegnien buca pagadas, la contribuziun da far prau mediocher e magher d'ina vart, onz meglier 2.40 francs l'ara, l'auter 3.50 francs l'ara) da francs 24 495.10 hagi el tuttina tratg en la biala summa da passa siatontamelli. Ed igl import net neu dil menaschi puril munti sin varga vegnmelli francs - per el e l'Ottilia ed ils dus buobs che segidien bein denteren.

Cugl agid d'in auto e d'in jeep seigi ins nuotatonmeins era movibels agl ur dalla val. Dapi la primavera 1985, naven dil meins da zercladur, ei Gieri Giger genau ed il forestalessen e la lavur cumina dattan dabia. Aschidadir ch'el mondi stedi oragiu **Tujetsch** (sco ils vegls dadens igl uaul schevan tschels onns). El fa sez il transport dils dus affons da scola che derivan dil vischinadi da **Selva (Tschamut** ha negin) e quei duas ga mintga di per igl import da francs 15. - alla ga.

Il gudogn dasperas da passa dieschmelli francs gidi tscheu e leu per in indrez empau pli cumadeivel en casa ed ora. E dil reminent seigi igl acquist endretg ed el gudignassi negliu meglier e la consorta Ottilia ha dau fermamein il tgau.

Pervia dalla cuntinuitad rumpi el e sia dunna tuttavia buca il tgau. Che lur dus buobs decidien sezs, in ha gissiat e l'auter ha quitordisch onns. In fatg aschia mondi en mintga cass buca a rugar.

Fontaunas

Berther, Vigeli. Corporaziun da meglieraziun Tujetsch. En: Gasetta Romontscha, nr. 103/31 da december 1985

Giger, Gieri. Intervista dils 20-12-1985 a Selva

Il pur da cauras

El exista e cuschenta buca enzatgi cun spema caura; el ha num Hubert Venzin, in mat da biabein trent'onns e stat ella casa sur baselgia a **Rueras**. In giuven che fa damondas ed ei semess en da cuort cun cauras. La plipart da sia cauramenta ei strala; pressapauc vegn per tschien ei da peil camutsch ed aschia.

Quei ei bi, cura ch'ellas vegnan neu dil **Plaun Miez**, quellas cauras neras, enramadas cun ina garnitura alva, stendidas e sveltas e sco fatgas per las greufas. In raz resistibel ch'ins ei cuntinuadamein vidlunder da meglierar. Il megliurament ei per nuot - per cass che l'attaschonza maunca. Aschia ina caura ei permalusa e semetta silla mala. Las cauras da Hubert Venzin vegnan suenter sco totos; ei enta maun, cura ch'ins pervesa sco el, cun fein manedel e risdiv detgavunda e suren entiras boffas cuort. Ton che mintga stargella po serefar e sepeina da far in pign, anseuls ch'ins pudess magliar en. Cauras sco latgeras che van buca giu cul latg per mintga sferdentada. - La primavera dalla caura ei ina stagiun malguessa. Buca immediat ora silla jarva cun ellas; gliez ei en mintga cass tissi e la caura ei lu buna dad ir a dend vidaneu.

Ed igl ei da star sill'idea che Hubert Venzin da **Rueras** hagi buca cuschentau cun spema caura. Senz'auter ha el rasau ora il quen bi ademplat, il quen da sias curontatschun cauras (35 da latg, 9 schetgs ed in buc). Allora ha el quintau ora ed ei staus sissu:

45 tocs x 0.3 envernontas l'in = 13.5 x 700. -	9'450.-
susteniment (Plantahof)	620.-
controllas da latg	640.-
Total	10'710.-

Vendita da latg (naven dils 20 da matg
- il davos da settember)

matg	571 liter	520.-
zercladur	1690 liter	1521.-
fenadur	2 044 liter	1840.-
uost	1655 liter	1490.-
	920 liter	810.-
		6181.-

Duront il meins d'october caschau sez (tocca ils 10-10-1985)

40 kilos caschiel à francs 14. -	640.-
Anseuls da maz 36 tocs	4728.35
Per la atgna tratga 5 tocs	
Mezca da casa 2 tocs	
Ton che tut las entradas sedattan:	
Susteniment	10'710.-
Vendita da latg	6 181.-
Caschiel caura	640.-
Anseuls da maz	4728.35
Incasso direct	22'259.35

Intervista cun Hubert Venzin ils 11 da november 1985 a **Rueras** che surdat indicaziuns precisas.

Il pur da nuorsas

La statistica muossa ora e **Tujetsch** ha puspei in tschuat nuorsas ch'ins sa schar ir cun nurser duront la stad, cun in nurser stabel; culs auters pasturs perencunter han ins stenta e fadigia. La veglia nuorsa tuatschina cun corns ed aschia ei naven, quella da Nalps - sco ins scheva; il raz dad ozildi ei cruschaus sco quel d'enzanu'auter.

Da nies temps han purs per propi e cauras e nuorsas; quei ei singular en **Tujetsch** ed il fatg ei da menziunar cun laud.

Tadeus Giossi da **Rueras** ei nies garant; el stat buns per enzatgei. El ha buca odentras trent'onns e fa da detschiert il pur da nuorsas. Denter perver e duront l'alpegiaziun va el schiglioc a luvrar e sedosta.

Sia biografia ei apartia; Tadeus Giossi ha fatg igl emprendissadi mercantil e veva survegniu ina stupenta piazza tier la Uniun da cura e traffic a **Sedrun**, sco caubiro schizun.- Bunamein enina ha Tadeus Giossi pendiu enzatgei sin clavella ed ei semess en cun sias nuorsas, a **Rueras**, entasi la **Rufna**, e la stad en **Cavradi**, sill'alp dalla ovra electrica Reinanteriur. El cun ses siatonta tocs; **Cavradi** ei bi ed il pastur lai far l'aura. Il tschaffen da Tadeus Giossi ei gronds e sias indicaziuns ein preziusas; el s'empatscha dil mistregn, sa dabia ed ei tuttavia carteivels, sch'el di che ver nuorsas seigi enzatgei da num ed el hagi gust. Insumma vessi el schau far peiver il mistregn, per cass ch'il bab vessi giu in grond menaschi puril. Mo aschia seigi el semess en per, cura ch'il bab hagi buca pudiu pli (a causa malsogna). Enteifer il temps eis el sededicaus alla nuorsa; el ha igl entir andament siper la detta. Sia attaschonza agl animal fa impressiun.

Cura che Tadeus Giossi raquenta, co ei tuchi da far beinschit cun nuorsas e tschuts, sinaquei ch'els daventien buca spuretgs. Cun in bien pavel (buca mo tschers e cuas gat) fetschi la nuorsa prova e sch'ei mondi propi endretg - schizun duas ga tschut ad onn, igl october ed il matg. Dus tschuts ad onn vul dir bia; la carn dil tschut ei tschercada; el cun ses pressapauc trentatschun kilos paga datier da 240. - francs. Ina nuorsa sil meglier denton era buca meins che 350. - francs. La launa sco tala perencunter, per lezza survegn ins buca la massada, per quei kilo circa ch'ina nuorsa dat. Suren vegnan en tuttacass las subvenziuns che muntan sin francs 720. - per envernonta (4 nuorsas = 1 envernonta). Per dapli che per quendis ch'envernontas dat ei buca subvenziuns; ton che quei fuss pia il maximum e Tadeus Giossi retscheiva per quendis ch'envernontas e stgavo.

Il mument che Tadeus Giossi resda dall'envernonda eis ei agli propi da detschiert. Per ver fein endretg ed avunda ha el priu si igl entir funs dil **Dulezi** a **Sedrun**, il prau dalla pervenda. Nuorsas pervesidas endretg fetschien e bials tschuts e la schubradad dalla zona seigi da gronda purtada. In suttapei muosch e tschuf sustegni la malsogna dils peis; la grefla smarscheschi ed igl animal vegni lu scochemai dil meins. El che vess per regla da viver quendis ch'onns. -

Tadeus Giossi lauda il bogn da **Valtgeva** (che ha liug mintgamai avon che cargar las nuorsas) e fa resortir insumma la buna tgira digl animal.

Ed il pur da tschels onns, endi!

Pilver, quei eis el staus, il pur da tschels onns, libers el luvrar e libers el patertgar. Ed el viveva dil profit che sia atgna scrotta prau purscheva. Saver grau, gliez leva el buc, era buca dil signuram. Oz ei la caussa empau midada. Grondas entradas arrivan si da **Berna**, e cun lezzas era las directivas ed ils camonds. Il stadi ei semischedaus denteren, e quei ch'ins vegli u vegli buc. Ed oz pli che zacu vala la devisa: Quel che paga, quel camonda. Ins ei buca pli patrun da sia atgna lavur.

Siu bein puril

Da vegl enneu formavan numerusas scrottas prau il bein puril d'in pur ella muntogna, in diember da tschunconta e varga. Probablamein deriva quei fatg entras maridaglias e partiziuns. Il pur stueva haver bien egl ed exacta enconuschientscha da ses praus e tiarms, cunzun il temps da fenar. Segar zatgei pauc nunvulent sur ils tiarms ora - era dapli ch'in sbagl. E risguard stueva il pur era prender dalla lavur dil convischin. Per buca zappitschar il fretg dils auters, vegneva ei fenau parcella per parcella, quei era per

munconza da vias da fretg. Il prau grass vegneva lu nuota slamegiaus cun vias, sco ozildi per semeglia. Quei ch'il pur basignava per viver e per sia truscha quotidiana, vegneva semnau e raccoltau da siu agen prau. Ultra dil pavel necessari da perver duront il liung unviern armauls e tiers manedels, vegneva ei aunc dapertut mess ora graun e trufla, sco era in toc glin. Il sein dil graun era buns; el era resistibels encunter malsognas da bulius e secumprovaus da vegl enneu per il pur muntagnard. Il strom dil segal, dil dumiec e dalla salin era stabels; buns onns, senza neivs la primavera e la stad, fuva la raccolta buna ed abundonta. Truffels hai adina dau bein en Tujetsch, cunzun onns schetgs.

Cunquei ch'ina tiarza e dapli dils praus grass vegnevan arai, stueva la munconza da pavel vegnir remplazzada per rovens e runtgas. La puraglia ha segau il davos verdin sils maghers; silsunter mavan els a far fein a pastg. Quellas scrottas dalunsch e sin las bleissas allontanadas da nos cuolms vegnevan vendidas per in onn dalla vischnaunca. Per quei terren dir e prigus han ils purs pagau summas da tschunconta tochen duatschien francs. Fuva il ladretsch aunc tuttina pigns e lucs, mavan ins perfin a segar nitschuns igl unviern - e quei tut, essend ch'ei fuva strusch pusseivel da cumprar pavel da sutsi. En num da Diu vegneva ei priu, quei ch'il terren tuatschin deva neu.

Clavau e nuegl

Ina certa remarcablada fuva era il possess da quella vart. Strusch in da quels edificis s'uodeva mo ad in pur. Nuegl e clavau eran fatgs en pliras parts e dretgs, magari tochen otg e dapli. Da cheu sedeva ei ch'en plirs clavaus era il ladretsch schi pigns, ch'ins plidava da streglias ch'eran magari aunc partgidas en l'altezia. Ils nuegls bass e stgirs eran dividi per 10, 12, 14 ni 16 armauls. Tscheu e leu plazzava il pur schizun ils salvanoris el nuegl da cauras, e quei aunc speras igl gaglinam. Allas nuorsas han ins per regla adina mo concediu ina zona. Duront igl unviern vegneva ei midau pliras gadas nuegl. Sepudend vegneva il fein ellas aclas magliaus ora leu, quei pervia dalla grascha. Per regla stevan ins cun las vaccas el vitg e mava sulettamein cun ils schetgs a magliar ora per las aclas entuorn. Cunquei che mintga famiglia veva pil solit plirs perveseders, savevan ins parter en aschia. Il fein, mess a guvern en faners e clavaus senza nuegl, ni la meidia fein a pastg zanza sils aults, targevan ils purs igl unviern a casa. Tgei torturas e prighels quei caschunava mintgaton per glied e bovs san ins strusch s'imaginar. Chischners, singulars avunda per la glied d'ozildi, gliez deva ei dapertut per ils vitgs entuorn. Per regola veva scadin vischin zanza ina part, aschia ch'el saveva caschinar siu graun per la davosa madiraziun duront pressapauc in meins.

Isegla e lavur da mintga di

Tschels onns ei la lavur dil funs vegnida fatga a maun, per silsunter han ins fatg diever dalla maschina. Lura mava la lavur pli plaun ordamaun ch'ozildi, ed aschia stuevan era dapli persunas metter maun vid la lavur. Famiglias cun siat e dapli dels sil funs era la regla dils ezs onns. Cavals per trer il carr ni il banagl vevan mo paucs en Tujetsch, mo ei mava era detg stupent cun in bov. Secapescha bia pli plaun, mo il fretg ei per ordinari vegnius sut tetg. E la lavur dils fenaders ei sefatga aschia: ina sega marveglia e las femnas han enzardau. Silsunter ha zatgi fatg ora ils migliacs ni ils muns fatgs la sera avon; pli tard magari aunc viult cul risti, sch'ei fageva basegns, allura fatg runas grondas cun ina fuortga e mess bratsch per bratsch el blah. Tschun tochen sis ponns vevan plaz sil carr da fein. En clavau vegneva il fein els blahs mess vi sil ladretsch e zaccudius da rudien. Pli stentus era il fenar ils maghers ed il far fein a pastg. Leu stuevan ils blahs vegnir purtai si dies dalla plaunca si. Bia ga in stentus e fadigius viadi da tschun e dapli minutas. Quei ha dulentau - e bein enqual vischin veva in dies gob e setratg. In fatg unic: Ils umens da **Cavorgia** purtavon lur fein grass cun cadregas (in cundrez da quater lenns ed in terschiel).

Igl unviern predeva il pur buca il mund si dies. Ultra dil perver ha el tratg la lenna da brisch, resgiau e fatg ora ella. Denteren targeva el neutier il fein dallas aclas, quel che vegneva buca magliaus ora leu, epi aunc il fein a pastg. Pli pacific ha il pur priu la primavera ed igl atun si mises. Cheu selubeva el da seser u star silmeins emprun. E la

lavor si cuolm ha mai muncau, sco per exempel: rugalar ils tiers, caschar, far tschagrün e pischada, clauder e denteren far la lavor cumina.

Menziun s'auda dalla mezga da casa, ina tradiziun ch'ins enconuscha buca pli oz. In tochen dus chischlets tiers manedels e dasperas il bia aunc in e dus salvanoris stuevan schar la veta per il beinstar corporal d'in onn dalla famiglia. Tochen duas jamnas steva la carn en salmira epi pendevan ins ella si surcombras per sechentar. Spinals e la tocca pli delicata vegneva aunc mess en in begl, matei per conservar pli bein. Las ligiongas dallas cauras e nuorsas ed era quellas dil piertg gartegiavan buca adina; la carnpiertg veva ordinaramein in detg gries culier da grass. La stad viaden sefagevan las gattas da camifo vidlunder, e la suppa da carn veva meinsvart en egl gross ed aschia ... Mo tgei levas far, ins magliava tuttina cun gust, pertgei auter che carn sechentada vevan ins buca la stad. E per l'otra savevan ins era buca conservar autruisa la carn. Forsa fagevan zatgeininas dallas casarinas diever dasperas dil conservar en glasa, mo gliez era buca la regla. Igl atun han las casarinas culau la pischada, ed en fuorma da pieun schuber han ellas conservau ella en ruogs da tiara cotga u en brocs. Ils tiers han ils purs vendiu per solit igl atun sin fiera. Per nus da **Tujetsch** era quella da **Sedrun** ed il di da sogn Martin a **Mustér** las fieras decisivas. Entradas da pli gronda muntada vevan nos purs buca tschels onns.

Pli baul fagevan ins fein a pastg

«Entochen 1955 ei l'agricultura stada la principala occupaziun dils Tuatschins; 80-90% dallas familias vivevan dil puresser.»¹ La necessitad da far diever da mintga runtga dalla quala ins saveva gudignar empauet fein, sfurzava il pur muntagnard dad ir a fenar el cuolm. Ils cuolms fuvan pil solit sur ils mises. Ei mavan a far fein a pastg naven dils 20 d'uost entochen suenter la naschientscha da Nossadunna (8 da settember). Avon ch'ir el cuolm, stuevan ils purs s'interessar e cumprar las sorts. Quellas vegnevan ingantadas.

Igl ingant

«Ei era avon maun in cudisch, il qual cunteneva tut las sorts cuolm terminadas e mintgina cun siu num e schazetg minimal.»¹ La suprastonza dalla vischnaunca da **Tujetsch** fixava ina radunonza, cura schar segar el cuolm ault. Silsuenter vegneva ei publicau sin tabla nera. Igl ingant haveva liug la secunda ni la tiarza dumengia d'uost a **Camischolas**. Ei vegneva vendiu leu sorts da cuolm ault. Quel che pagava il bia, survegneva la sort. Certas sorts fuvan tschercadas vietì, aschia ch'il prezi muntava entochen 100. - francs.

In secund ingant suandava la proxima dumengia ed il tierz e davos a **Rueras**.

Preparativas per ir el cuolm

Avon che semetter sin via el cuolm, stuevan ils purs e las puras semtgar tut igl uorden necessari. Uaffens duvravan ei pressapauc ils medems sco dad ir a far fein ni risdiv. Faultschs, ristials e blahs eran ils utensils ils pli impurtonts per ir el cuolm. Ils blahs eran in bien mied da transport. Mintgin prendeva treis blahs e zacons terscheuls. Tier ils utensils dad ir el cuolm s'udevan era las carpialas. El cuolm ault eran ellas magari nundispensablas. Perfin ina scala runavan els siado. Quella surveva da far las meidias. Sco utensils secundars prendevan ils fenaders uorden da cuschina ed ils sacados fultschius cun ina buna marena sco ins selubeva da lezs onns.

Baul la damaun semettevan ils umens sin viadi. Arrivai el cuolm, vegneva ei selubiu da far ina cuorta pausa. Lu revevan els dalla teissa flanca siado ed entschevevan a segar. Segar era la lavor d'in per dis. Il sitgur mussava sias habilitads.

Viers miezdi vegneva il segar sin plaunca teissa malemperneivels. Ils peis dulavan; il pastg era vegnius schetgs e dirs e la faultsch muota. Enzardar fageva buca basegns, essend ch'ils canvaus ruclavan dafertontier dalla plaunca teissa giu. Cun fomaz sesevan tuts entuorn la furnascha e schavan gustar il gentar. Suenter esser ruassaus, mava la lavor vinavon. Tut tenor la quantidad fein, era ei necessari da volver. Il suentermiezdi

vegneva ei segau, rischlau e rugalau il fein. Cul fein dallas sorts damaneivel vegnevan ils parders la sera a casa. Autruisa vegneva il fein purtaus en blahs vitier la meidia.

Far meidia

«Avon ch'entscheiver a far la'meidia, stuevan ils fenaders encurir in plaz adattau, il plat meidia. Il plat meidia vegneva cuvretgs cun crappa, dascha ni draussa, sinaquei ch'il fein resti buca sil tratsch, schiglioc stess el mal.»² Entochen che la meidia haveva la grondezia giavischada, pudeva ei cuzzar 1-2 jamnas, tut tenor l'aura, las sorts e lur quantiad fein.

In um steva silla meidia. Sia lavur era da far ratschs. «Il fein astgava buca esser memia secs, pertgei l'entira meidia stueva secuier ed aschia setschentar. Il cavigliar e smaccar il fein uliv era fetg impurtont.»³

La cuppa dalla meidia vegneva cuvretga cun in blah, sinaquei che l'aua tili giu meglier. Vid ils cantuns dil blah fermavan ils umens quater craps per ch'il blah sufli buca naven. Il far meidia era ina lavur che vuleva esser capida. Avon che bandunar la meidia, scultreva il pur ella cul risti.

Fatgs il risdiv, vegneva ei fatg ina viseta alla meidia, controllau il pez ed enfaschau la meidia entuorn ed entuorn cun blahs per buca schar far donn las cauras ed ils animals selvadis. Mo darar ch'ei cludevan ora las meidias cun pals.

Il transport dil fein a pastg igl unviern

«Il transport dil fein a pastg a val succedeva per ordinari il november ni december. Quella lavur vegneva fatga da cuminonza denter ils purs, senza quintar schurnadas ni uras.»³

Enqualgadas mavan dus umens in, dus dis avon a fullar via e spelar ora la meidia. Enconuschevan ils umens buca precis il liug dalla meidia, haveva ei num encurir ella e stgavo.

Ils umens entschevevan a smaccar ensemen e better naven la neiv. Il blah era schelau e seschava scarpav naven mo vessamein. Avon ch'entscheiver a tagliar il fein, vegneva ei mesirau e calculau, cons faschs che la meidia possi dar. Il tagliar quader e construir ils faschs era ina causa che pretendeva inschign e capientscha. Il blah cul fein vegneva ligiaus en crusch e serraus ensemen. Ultra da quei vegneva il fasch ligiaus cun dus terscheuls, in per liung ed in per lad, e davontier fatg in latsch ch'ins sappi trer el ni per ligiar in davos l'auter. Cura che tut ils faschs eran ligiai, sepreparavan ils umens per il transport. Cheu deva ei pliras pusseivladads, sco per semeglia runar ils faschs tier in liug adattau e schar ir a val en in fistatg. Sil viadi a val setenevan ils umens cun tut quita davos vid il fasch e tenevan afuns il buordi. En cass da basegns vegnevan ils faschs latschai, mess en moviment e spedi a val, senza che zatgi detti la direcziun. Quei era denton fetg malsegir. Cass ch'ei era fetg teiss, schavan ei vegnir giu il fein cun suga. Eran ils faschs arrivai a val, en ina u l'otra moda, vegneva la latschada disfatga. Ils faschs vegnevan cargai sin las sliusas da corns e menai a casa.

En clavau vegnevan ils faschs sfatgs ora e rasai sur il risdiv. Tut ils gidonters eran envidai ad ina buna tschavera.

Fontaunas

¹ Berther, Alfons. En: La Tuatschina, 30-5-1980, nr. 11, p. 15

Berther, Baseli. A Camischolas. Notizias culturhistoricas ord la Val Tujetsch. Mustér 1909

² Pally, Leo. Far fein a pastg - Relaziuns economicas e culturalas enta Medel. En: Calender Romontsch 1982, Mustér.

Valier, Jovita. Far fein a pastg. Lavur da patentia el Seminari da scolasts a Cuera, 1984.

³ Venzin, Maurus. Far fein a pastg. En: Calender Romontsch 1982, Mustér, annada 123, p. 328/329.

Possess da tiara e tiers

Il terren agricol cumpeglia 685 hectaras ed ils purs dalla val han buca da sbatter pervia da prender prau per tscheins, plitost ils ezs che han da schar vi lur funs, schebi ch'il terren ei en **Tujetsch** aunc adina da muntada.

Casamai ch'ins interquera da rudien, dat ei auncallura in maletg singular, quel dil funs, sch'ins cumpareglia cun quel d'avon onns. Ual ussa ha **Tujetsch** 47 (curontasiat) purs e 111 personas ein fatschentadas ell'agricultura, curontasiat purs che serepartan en mintga cass sils nov vischinadis (**Dieni** ei unius cun **Rueras**) ed han en possess:

	purs	vaccas	genetschas/ mugias	stiarlas	vadials	cauras	nuorsas
Tschamut	1	2	2	-	-	-	-
Selva	2	8	17	15	7	4	15
Rueras/Dieni	22	104	81	98	67	136	585
Zarcuns	3	12	11	13	13	7	44
Camischolas	3	19	18	23	25	-	62
Sedrun	8	46	21	21	20	68	172
Bugnei	1	4	5	6	5	-	13
Surrein	3	11	12	8	11	-	85
Cavorgia	4	10	5	13	8	43	54
en tut	47	216	172	197	156	258	1030

El total dallas nuorsas (1030 tocs) ein ils nov luvriers integrai che han aunc nuorsas dasperas.

Milsanavon possedan ils vellers da **Tujetsch**:

5 purs

233 gaglinas

15 andas

6 aucas

42 utschals tropics

63 schaumnas aviuls

46 cunegls

36 tgauns

137 gats

1 purschachel da mar

Aschidadir intragliauter fan quels 47 purs cun pressapauc 1086 hectaras lur da viver; da quellas 1080 hectaras ein 548,40 hectaras agen possess e 531,60 hectaras ein mintgamai pridas per tscheins.

Per cumpareglia eis ei surveseivel da metter a per ils 5 purs gronds ed ils tschun purs pigns ed indicar las hectaras che mintgin tarschina:

purs gronds

1. 2 900 hectaras

2. 2 000 hectaras

3. 1 750 hectaras

purs pigns

1. 164,40 hectaras

2. 297 hectaras

3. 560 hectaras

4. 1 725 hectaras	4. 600 hectaras
5. 1 724 hectaras	5. 623 hectaras

La cargada digl onn 1986

L'aura dalla secunda mesadad dil meins da zercladur ha fatg bien, schiglioc fussen las alps en **Tujetsch** mana vegnidas ord la neiv. Da sogn Gions ein ils cautevias semess ensemen ed han ulivau las alps. L'ulivaziun ha buca la muntada da tschels onns; ils purs secuntentan, lain cumbien e vulan aschispert che pusseivel cargar, sinaquei ch'ins sappi dabot far fein.

E negin che sescarpa da far cautevia; igl ei ina grevezia, buca pervia dalla biestga armentiva. Plitost la fumeiglia; lezza metta ina entira summa a quen. Dils scheniv pasters si per las alps da **Tujetsch** (cumpriu il nurser) ein mo ual tschun dalla val. Ils ulteriurs ein tuts bunamein tratgs neutier pils cavels, schebi ch'ils pursanavels pagan bein lur fumeiglia.

Ed ils cautevias ch'ei seradunai da sogn Gions han decidu da 722 tocs biestga armentiva, numnadamein da: vaccas, genetschas, stiarlas e vadials, animals che serepartan sco suonda:

vaccas	Cuolm Val	80 tgaus
	Val Giuv	78 tgaus
genetschas	Alp Tschamut	125 tgaus
	Val Val	128 tgaus
stiarlas	Maighels, Plaun	
	Miez e Carauns	158 tgaus
vadials	Tgom	153 tgaus

Las duas alps da vaccas (**Cuolm Val** e **Val Giuv**) damognan mintgina pressapauc otgonta tocs. Per far uliv las pastiras, ha ei tuccau da prender si 27 tgaus a **Val Giuv**. Las vaccas jastras pagan mintgina ina indemnisaziun da francs 95.-. L'alp da **Val Val** ha semegliantamein giu ina munconza da tiers. Siatonta genetschas han ils pursanavels priu da sutsi per far uliv e secapescha e per levgiar il pustretsch.

La damonda stat osum la bucca; e las ulteriuras alps en **Tujetsch**? Ils vischins lain a tscheins per la summa annuala da francs 5000. -:

Mila

Strem

Cuolm Cavorgia

Ed igl ei d'allegar che la vischnaunca incassescha ulteriuramein aunc francs 10. - per tgau dalla confederaziun, e quei per tut ils tiers jasters che vegnan cargai en **Tujetsch**. tiers jasters:

Mila e Strem	170 tocs (genetschas e stiarlas) neu dapertutanavon
Cuolm Cavorgia	110 tocs (genetschas e stiarlas) da Lucerna

Il quen stat siper la detta; 1002 tgaus biestga armentiva vegnan paschentai duront la stad 1986 ella **Val Tujetsch**, sin las pastiras indigenas. - Sco remarcablada fuss ei aunc da dir ch'ins hagi priu si 20 nuorsas d'ordeifer e mess ellas cun las nossas si **Cuolm da Vi** e silsuenter sillas **Puozas**. Tadeus Giossi perencunter ha schau ora sias nuorsas (ussa 115 tocs) enta **Cavradi**, sill'alp ch'el ha priu a tscheins dalla ORA.

VI Fauna e flora

Flurs e flurs

Tujetsch ha in bien ton dapli che tschuntschien specias da flurs e la reservaziun sillas costas sut **Scharinas** ei cunvegnetta e profiteivla. Gieri Schmid, 1954, da **Zarcuns**, enconuscha da num las flurs dalla val. Ed el ei trasora sin via cugl apparat e las fotografias ch'el fa ein ordvart bialas. - In amitg dalla botanica ha mussau agli dad ir lunsch ed el fa valer d'enconuscher 400 uisas da flurs en **Tujetsch** e las ulteriuras vul el emprender. El che ha fatg la scola forestala e lavura bugen ordaviert. Gieri Schmid ha sez mess ensemen las flurs las pli exprimidas dalla **Val Tujetsch**. Ed el manegia las suandontas:

- flur striauna
- flur d'ansauna
- genziana melna
- arnica
- carschun
- brutg
- flur tschugalata
- anemona
- caultschas quac
- soldanella
- pals sogn Giusep
- orchidea (flur Sontgilcrest)
- flur dil tun
- cuppa pieun
- potentilla
- flur tschagrün

Coclas, ils fretgs dallas caglias

La natira ei in iert da fretgs gustus, pleins aroma, sauns e da forza curativa. In iert accessibels a scadin. Nos antenats enconuschevan ils fretgs selvadis sco mo paucs da nus oz e duvravan els en cuschina e sco medischina. Turissem ed il senn modern per ambient e natira fan ils fretgs selvadis puspei pli e pli preziosi e tschercai. Nus descrivin cheu las coclas, ils fretgs da caglias e plontas.

Igl **izun** (*Vaccinium myrtillus*; Heidelbeere) accumpogna nos uauls e remplazza pli ad ault las flurs striaunas. El crescha sin las spundas da **Maighels** e **Curnera** tochen **Nalps** e **Cavorgia**, dil **Calmut** al **Bostg**, tocca 2200 m s.m. El ei il fretg il pli preziu, applicaus en biars basegns.

Trer a nez san ins igl izun empau per dil tut. El delectescha, nutrescha, schubregia il saung e fa tuchegiar. La feglia, encurida avon la fluriziun, fa bein als malsauns da zucher. Ins gauda igl izun frestgs cun zucher, groma, latg u cugliada; pli baul mettevan ins izuns ella broda e fageva schizun suppa d'izuns. Ins ughegiava ina cura d'izuns «encunter ils viarms», nua ch'ins astgava magliar treis dis nuot auter. Izuns vegnan fatgs en entirs, sterilisai u schelentai per suenterpast. L'applicaziun usuala digl izun ei il mel. Izuns turri ein ina buna medischina encunter la burga, per glied e tiers. La glied pren quels crius ni bugli si cun in tec aua; ils tiers lain ins lenscher ina mischeida da izuns cun miez frina e pulenta ed in pezzi sal. Prezios ei era il sirup d'izuns, per il qual ei dat differents recepts.

Encuretgi izuns propi da narr han ins ils onns 45 tochen 52. Ils prezis ein lu prest carschi da 50 ed 80 raps sin frs. 1.00 ed 1.30, excepziunalmein sin frs. 1.50. La sesiun d'izuns cuzzava dil fenadur tochen viaden el settember. Ins ei vegnius a casa cun buordis da 15 tochen 50 kg; ei deva famiglias che gudignavan per onn entuorn melli francs. La tscherca fuva (ed ei aunc oz) libra. Mo pigl Uaul Flurin duvravan ins muort la plontaziun ina lubientscha, dada all'entschatta a gruppas che purschevan il bia, suenter l'uiara per tschun francs per persuna. Tgei invasiun da glied gronda e pintga cun zeivers, brentas,

canasters e chistas! «Ils da **Cavorgia** vegnevan en roschas». Ils consums spedevan ils izuns en chistas da strusch 5 kg (4,5 kg netto), fatergiadas cun pupi da pergameina e ligiadas en colis da 15 kg. Fabricau las chistas e furniu talas - gl'emprem per 90 raps, pli tard per frs. 1.50 - tochen giu **Trun**, ha Placi Deragisch da **Gonda**, e quei tochen 4200 tocs igl onn. Ed oz? Ir per izuns ei puspei moda. Ins paga en general 5 e 6 frs. il kilo; hoteliers pagan bugen 7 frs. ed jasters schizun 8 e 10 frs. il kilo.

Izuns astgan ins buca sbagliar culs izuns piertg (Empetrum nigrum., schwarze Rauschbeere). Tals astgan ins buca magliar, e dar dat ei empau dapertut: sil **Tgom**, si **Caschlè** ed entochen alla **Plauncaulta** dil **Badus**, sin 2815 m s.m. Ils fretgs ein ners, las caglias semegliantas alla geneivra.

Igl **utschin**, mutschin (Vaccinium uliginosum; Rauschbeere, Moosbeere), malgrad parents cugl izun, gusta el buca propi, ei pauc dultschs e dat in mel fat e rar. Ins anfla igl utschin enta **Maighels**, **Curnera**, **Nalps** e **Strem**; el crescha denton plitost sils praus maghers ed humids da pauca caltschina sur **Rueras** ed encunter **Liez** e **Sudada**.

Il **garnedel** (Vaccinium vitis-idaea; Preiselbeere) crescha per liung e sisum ils uauls, savens sin terren greppus e cun pauc tratsch tochen 2300 m s.m. Tiel fortem da selvaschina astga il garnedel buca muncar; ins fa ordlunder denton oravontut mel, oz savens mischedaus cun pera e meila. Garnedels cotgs ora ensemen culla feglia fan passar l'aua ed impedeschan la crappa dils narunchels. Garnedels dat in prima te encunter ils rematissems: Ins preni sco raziun d'in di 30-50 gr dall'entira plonta (ragisch, fustitg, feglia e coclas), derschi in miez liter aua buglienta surengiu e laschi cuer tut ensemen duront 12-15 minutas.

Ils **farbuns** (Fragaria vesca; Walderdbeere) ein scarts e pigns; ins anfla els zuar aunc oz els uauls, per gondas e gravas entuorn, sin scarpas e rovens. Els bastan grad per dustar il gust.

L'**aschetta cotschna** (Ribes petraeum; Felsen-Johannisbeere) vala per il pli saun e pli schuber fretg e dat buontad mel. Aschettas, grossas e manedlas, creschan plitost per las cavorgias selvadias entuorn, spel **Rein** a **Tschamut** e principalmein ella **Rufna** da **Dieni**. L'aschetta selvadia crescha e flurescha oz domesticada en bia Orts en **Tujetsch**.

Las **frosclas**, ils fretgs cotschens dil ruser selvadi (Rosa rubrifolia; rotblättrige Hundrose), ein saunas, zun gustusas e rehas da vitamina e minerals: in'apoteca naturala! Il tè da frosclas ei medischina pils narunchels, buns pil passar dall'aua. Ins taglia las frosclas empermiez, lai en ils cocs (quei ei il principal!) e fa cuer ditg. Tiel mel da frosclas ston ins allontanar gia alla biala entschatta ils cocs (ina lavur unfiseivla) ni far passar tras ina blaha. Rusers dat ei en pliras variaziuns botanicas empau dapertut per las muschnas entuorn, daried aunc a **Bugnei**.

Cagliastretgs /tgagiastretgs, ils fretgs dalla spinatscha (Berberis vulgaris; Sauerdorn) deva ei gia dil temps dil pader Hager mo en paucs loghens: sur la lingia a **Sedrun**, a **Rueras** e **Putnengia**. Oz ein els quasi ragischai ora. Ussa han ins disfatg ton tut. Quei malgrad ch'il cagliastretg vala per gronda medischina encunter febra, tuos, catar e malcostas. El quietescha. Ins pren el cun bravamein zucher sco suc ni fa magari era sirup ordlunder. Pli baul fagevan ins era mel da cagliastretgs. La raccolta fuva pintga.

Puaunas cotschnas (Rubus idaeus/rubus caesius; Himbeere/ Kratzbeere) dat ei empau dapertut, da **Bugnei** entochen **Selva** e **Tschamut**. Per far mel u sirup buglian ins ora las puaunas e fa lu passar ellas sur notg atras ina blaha da glin «per che las gattas stettien gie anavos». Nus seregurdein: Pil gentar da Daniev mettevan las ondas sirup da puaunas sul pudding freid da ris.

Suitga cotschna, fretgs dil suitger selvadi (Sambucus racemosa; Traubenholunder) dat ei sillas plontas isoladas per vals e pitgognas da **Nacla** encunter **Nalps**, ella **Rufna**, a **Carmihut** e **Selva**. Suitga dat in buontad mèl, megliers aunc che quel da frosclas: ins sto schubergiar bein las troclas, sbuglientar ei ditg en ina vanaun e struclar ellas, schiglioc dat ei in mel spir cocs. Mischedadas cun latg cauld scaulda el il tgierp da camifo e

preserva da tuos e cunauras.

Puma caura numnein nus ils fretgs dil culeischen (Sorbus aucuparia; Eberesche, Vögelbeerbaum) che stat savens sco plonta persula sin terrassa sulegliva e schetga amiez la contrada. Tussegai ein ils fretgs buca, mo magliai crius san els far passar bravamein dil tgierp. Ils tgapers maglian bugen la puma caura. Il mèl da puma caura drova massa zucher e vala per aschs e peters. Nies augsegner vegl, il sur Venzin, mava igl atun cun canastras da far si fein vi **Casti**, targeva giu la puma cun in risti e fageva mèl ch'el deva lu cun paun als affons sin viseta. Quei fuva gnanc schi schliet. La puma caura ei buna per tals che han da far cul dir ni la malsogna dil zucher. Ella viventa era il fel. Oz vegn ella mischedada cun meila, magari era barschada; ins fa ordlunder vinars.

Il **lausser** (Prunus padus; Traubenkirschbaum) crescha tochen sin in'altezia da 1650 m s.m. a Carmihut e Selva. Las **laussas** vegnan magliadas plitost pil gust, denton mai cuschinadas. Igl ei mo in tec pial, gl'auter ei cocs. Ellas ein aschas, raspan da magliar, dattan carpagl silla lieunga e promovon inflamaziuns (begl tschiec).

La **tscherschetta**, tscherieschetta (Rubus saxalis; Steinbeere) preferescha loghens umbrivauns cun terren da greppa e crappa, cafuglias selvadias sco las **Cavorgias**, la **Rufna** a **Dieni** e **Sontga Brida**. Las troclettas portan mo paucs fretgs stgir cotschens e manedels. Strusch la valeta d'encurir, schegie ch'ei dess ordlunder in bien mel.

Il **geneiver** (Juniperus communis var. montana; gemeiner Wachholder) crescha sillas spundas suleglivas e schetgas da **Curnera** ed **Alp Nual**, sil **Tgom**, a **Pardatsch** e **Nalps**, si **Liez**, silla greppa dils carauns siviars il **Cuolm d'Ursera**. E tuttina: Ei dat buca pli sco ei deva! Geneivra fa passar las auas ed ei buna pils narunchels. Geneivra blaua, blaua duess ella esser, dat in te che scaulda. «Nus prendein geneivra alva e blaua ensemen culla discharina, schein buglir ella ditg (ina mesa tochen in'ura), culein, mettein en zucher e buein ella las seras d'unviern; quei fa cauld e bein dadensgiu». Geneivra en vinars trestar ni spert asch drovan ins per unscher en las schunschivas, encunter mal ils dents, ni mal il dies. Pli baul barschavan ins caglias da geneivra sin pegna per prevegnir alla grippa. Ins fimentava la discharina sin in cotgel, mettend vitier in toc zucher per far in bien fried e, en cass da bara, era desinfectar. Enten sechentar la carn mettevan ins in per geneivers ella salmira ni directamein silla carn; era fimentavan ins cun discharina da geneiver la carn-piertg sin tgamin per far vegnir ella pli spert madira. Ed oz? Oz manca la geneivra silmeins buca el crut asch.

Pli daried dat ei tochen **Bugnei**, sin 1400 m s.m. crescha la **nitschola** (Corylus avellana; Haselstrauch); ils cocs san ins sechentar e magliar. (Savess **Camischolas** buca derivar dalla caglia da nitscholas?). Selvadis e da siu persei entupein nus il **tscherscher** (Prunus avium; Kirschbaum) mo sporadicamein tocca a **Tschamut**. Svanius eil l fignicler (Sorbus aria; Mehlbeerbaum). Ei deva in per a **Carmihut**, dalla vart sulegliva, mo il cantun ha dismiss els. Ils fretgs, las **figneclas**, ein semegliants alla puma caura, denton pli farinus e schetgs; ils onns dalla fom han ins mischedau las figneclas cun frina e fatg paun ordlunder. Las coclas dallas caglias ein da gust; ch'ins enqueri ellas denton cun schanetg e respect!

Fontaunas

Text per la gronda part dad intervestas fatgas la primavera 1986

Berther, Toni. Ir per izuns duront e suenter l'uiara da Camischolas anora. En: La Tuatschina, nr. 8, 1977

Hager, Karl. Verbreitung der wildwachsenden Holzarten im Vorderrheintal. Bern 1916. (Erhebung über die Verbreitung der wildwachsenden Holzarten der Schweiz, Lfg. 3, Gebiet des Vorderrheintales von der Oberalp bis Ilanz-Schleuis)

Hegi, Gustav. Illustrierte Flora von Mitteleuropa. München 1908-1931

Thome's Flora von Deutschland, Österreich und der Schweiz. Köln 1889

Willkomm, Moritz. Bilder-Atlas des Pflanzenreichs. Neu hrsg. von E. Köhne. Esslingen 1909

Nus mein per cacs tgaper (bulius)

Lur origin

«Vivonda da bulius», aschia secloma in artechel cumparius ella Gasetta Romontscha, numer 38, digl onn 1917. Il correspondent fa attents d'ina ulteriura pusseivladad da senutrir, in patratg beinvegnius duront il temps d'uiara. Quels onns han era ils consums instradau la cumpra da bulius en nossa val. Quei ha plaschiu meglier alla glied. Per nossas mummas fuss il cuschinar cacs tgaper staus memia riscus, denton encurir e vender, bein in fatg ch'era senza dubi da beneventar. Sch'ils auters stuevan dispet ver magliau da quella rauba, eran els sezs la cuolpa, sch'ei survegnevan mal il venter! Cudischs historics e scartiras pli veglias da nossa val queschan ed ins sa sfegliar sco ins vul, ins anfla nuot en connex cun bulius. Gnanc in num local han ins giu danvonz pils bulius. Dasperas han nos antenants spluntau tier quasi mintga creatira, perfin enta parvis e giu gl'uffiern ein els serendi per anflar nums locals adattai. Per cletg havein nus aunc oz denter nus convischinas e convischins che han viviu e gudiu l'entschatta dad ir per cacs tgaper. Lein pia schar raquintar els.

La raccolta

Il buliu ei ina plonta che viva sut tiara. Il fretg che penetrescha la tiara en cuort temps derasa sporas. La vivonda dil buliu exista da materia morta. Tala materia dat ei tier nus en abundonza e quei principalmein alla fin dalla stad agl ur digl uaul ed egl uaul sez. Oz savein mo s'imaginar, con gronda che la derasaziun dils bulius era da quei temps ch'els vegnevan buca tschercai.

Igl uost, cul fein grass era sut tetg ed ins era vid ils maghers, lu era il temps da bulius s'avanzaus. Ils megliers dis eran quels, cura che l'aura era buca gest si per fenar. Cun canasters, zeivers, tastgas e sacs da sal mavan oravontut la buobanaglia per cacs tgaper. - Aschia numna il Tuatschin aunc oz ils bulius mellens. Quella nominaziun pil buliu mellen drova ins mo en **Tujetsch**. (Schiglioc vegn il plaid cac tgaper duvraus per descriver ils bovists).

La raccolta era benedida. Tut put! Il fastedi d'emplenir ils canasters ni ils sacs era per ordinari pigns. Cun in risti havess ins saviu rischlar ensemen ils cacs tgaper e metter els en in blah! Loghens specials deva ei atgnamein strusch, els carschevan semplamein empau dapertut. Preferi eran denton ils territoris da **Nual, Uaul dil Tgom, Pardatsch e Cavorgia, Val Gierm e Val Bugnei**. La raccolta serestrenscheva all'entschatta mo sin bulius mellens. Per pli tard han singuls lu era aunc rimnau il tgirun tschep (Steinpilz) e la cresta biala (Ziegenbart). Ils tgiruns tschep rimnavan ins magari en blahs senza cantuns. En mintga cass, ch'ei seigi canaster ni sac, la raccolta smaccava bravamein ed il viadi a casa daventava magari liungs e stentus pils tschercaders, pigns e gronds. Ei deva schizun buordis da varga 30 kg. Arrivai a casa, veva ei num semetter ton pli spert vid il schubergiar, pertgei bein enqualin haveva aunc il medem di in pullt viadi tochen el consum, patertgein nus mo da nos vischins dalla vart dretga dil Rein.

Vendita

En consum deva ei da quels dis la detga truscha. Per ordinari curdava aunc la raccolta d'izuns el medem temps. Tenor las retschercas vendeva ins pli baul tut al consum ni als Berthers dalla Cruna. Ils anno 20 e 30 muntava il prezi per kg a 50 tochen 60 raps. Igl onn 1940 retschevevan ins biabein il dubel. Aschia ei il prezi carschius tochen 2. - frs. il kg entuorn ils anno 1960. Famiglias che rimnavan en in di tochen 80 kg vevan aschia in bi gudogn accessori. Con beinvegni che quels raps eran per nossas famiglias duront quei temps da scartezia savein nus mo s'imaginar. La gronda part schava directamein scriver il recav sco dabien. Ei deva era affons che astgavan salvar las entradas. Cun quels raps savevan els allura cumprar igl uorden da scola. Auters puspei astgavan far diever dallas entradas dad in di.

En scadin cass han ins zacu vendiu per biars daners bulius en nossa val. Quei grazia als consums che havevan lur cooperativas giu ella **Bassa!**

Secapescha deva ei era enqual schabetg pli curios. Aschia empuava enqualin

d'augmentar la peisa cun lavar ils bulius. Nies bien Tumaisch dil consum (T. Schmed da **Cavorgia**) fageva bein attents da quei malsedepurtar, mo buns sco el era, smaccava el in egl e prendeva tut. Strusch ch'el veva cuntentau ils Tuatschins, arrivavan pil solit ils vischins da **Mumpe-Tujetsch** cun lur brentas pleinas ni cul carret. «Ussa vegnani puspè culla vacca veglia!» Il salid ch'il cauconsum veva per moda da dir.

Agen diever

Sco gia menziunau, fagevan ins all'entschatta, quei vul dir entuorn ils anno 1920 e 1930, negin ni mo minim agen diever. Per cul temps eisi lu matei vegniu ad ureglia a certas casarinas, co ins savessi cuschinar bulius. Spels cacs tgaper han ins tec a tec era aunc ughegiau da survir ina tratga da tgiruns tschep. Tut quei pli baul e magari aunc oz cun in schliet sentiment e per, sch'il da 2 ni da 5 frs. vegneva buca ners duront il cuer. «Auters bulius tg'els cacs tgaper magliass iu per negin prezi!» ha in Tuatschin confidau a mi. E las plunas tgiruns tschep? Ils consums prendevan mo mellens. Quels paucs che rimnavan «Steinpilz» cuschinavan ina pintga part, ils auters vegnevan sechentai. Quels empruavan ins da vender privat. In kg tgiruns tschep sechentai valevan ton sco in kg schambun.

Oz

Segiramein han quellas grondas raccoltas sminuiu anetgamein la derasaziun dils bulius. Mo la frida mortala - sch'ins astga numnar quei aschia - ei senza dubi l'invasiun dil miezdi stada. Ils Tuatschins han sentiu quei gia baul. La stad 1973 han ils responsabels dall'Uniun da cura e traffic fatg attenta la suprastonza communal dil turs da rapina, caschunai da nos vischins dil sid. La suprastonza communal ha agiu sveltamein e creau aunc quei onn in uorden d'encurir bulius per nossa val. Dapi lu ei igl intschess da vart seniastra dil **Rein** schurmegiaus. Ils dis sco era il quantum ein vegni limitai. Plinavon han ins era scumandau il commerci cun bulius. Sper quella lescha ha - in per onns pli tard - era il cantun creau ina lescha el medem senn.

Dapi entgins onns posseda **Tujetsch** ella persuna da dunna Gabriella Scherrer ina controlladra da bulius. Sin territori tuatschin creschan biaras sorts bulius gudibels e buns, tals ch'ein in bien ton meglier ch'il buliu mellen. Exempels: parisols, schampignuns, latgers, calimars, tgiruns, barbers, crestas e bovists. Pertgei buca prender in grond, in mesaun ed in pign d'ina sort ch'ins anfla e far ina viseta alla controlladra da bulius!

Bulius tussegai dat ei en sesez paucs. D'in tal ch'ils Tuatschins seprofitavan less jeu relatar mo dasperas. Ei setracta cheu dall'amanita mustgera (Fliegenpilz), quei bi buliu tgietschen cun tachels alvs. Ins prendeva in tal buliu, tagliava si en tocca, ni schava magari era entir, e metteva en in taglier cun empau latg. Las mustgas che buevan da quei latg stuevan carpar.

Bulius ein d'immensa impurtonta pigl equiliber da nossa natira. Lein schenghegiar la duida stema alla plontetta. Gia l'enconuschientscha dalla plonta, las differentas sorts e la funcziun ni il svilup sa fatschentar e delectar nus duront uras. La ponderaziun ei megliera ch'in per raps.

La cultura dil cardun blau (eryngium alpinum)

Igl ei stau pressapauc all'entschatta dils anno 1970. Il hortulan Walter Egli da Stäfa el cantun **Turigt** ei seschous en cun Antieni Cavegn da **Sedrun** pervia da metter ora e trer il cardun blau ella **Val Tujetsch**. E las plontas ein sefatgas bein, accurat sco la tratga dils carduns blaus a **Rona** ed a **Schlarigna**. L'aria da **Tujetsch** ha susteniu la flur e la color blava ei daventada recenta ed intensiva ed il fustitg gross e ferm e quei ton a **Salins** sco a **Planatsch**.

Ils purs han dau lur frusts per la tratga e la cultivaziun ei stada d'engrau. E mintga plaz da lavur ei enzatgei da num. Duront la raccolta che ha mintgamai liug ils emprems dil meins dad uost dattan ils carduns blaus in tschuat lavur. Aschidadir da tagliar e pachetar e spedir ils camiuns aunc quei di sur ils confins en **Tiaratudestga** e **Hollandia**. La gruppa da lavur ei a strada cun l'alva dil di; ella astga gie buca schar giudamaun quels

tgaus blaus spelai, sinaquei ch'ei vegnien buca pass e sefetschien bein enzanua sco ornament.

Suenter la mort prematura da Antieni Cavegn (1972) ha siu frar Vigeli Cavegn, bifettier dalla staziun, surpriu l'entira branscha dils carduns blaus, ina cultura ch'ei buca mo nizeivla, mobein che sedat era neu stupent ora sils praus.

Ils animals selvadis

Sias indicaziuns ein stadas custeivlas, quellas dil Placi Levy, survigilader da catscha. El ei vischin da **Caprau** ed ha maridau la Hermina Schmid da **Tujetsch**. Dapi diesch onns ha el quitau digl uorden da catscha en siu revier, senza exnum ir suenter ad enzatgei. Plitost sepanza Placi Levy pervia dils animals selvadis, el ch'ei versaus ed ha enconuschientschas. E duront las auras d'unviern tegn il Levy en egl enzatgei e procurescha per fein ellas starlieras, mellis e mellis kilos, sco per semeglia egl uaul da **Bugnei**. Nuotatonmeins rimna el duront igl entir onn las pelletschas da meila ch'el metta lu ora ensemblamein cul pavel d'utschals.

Ses catschadurs segidan cun el; ins vegn perina.

La catscha ha tila en **Tujetsch**; buca meins che trentotg catschadurs han priu 1986 la patenta ed han pagau persuenter 380. - francs. A catscha bassa perencunter va pressapauc ina tiarza e sin quella da laghetg e da fallas in tozzel e miez, forsa.

Inaga ch'el po viers munt, lu eis el ametsch, il Placi Levy. La basa da turas munta sin tschienevegn e sissu aunc diesch sco guardiapessa, enzatgeininas sco supplement, sco per exempel duront la catscha da capricorns. E quei ei in tierz pensum che pretenda e damonda dabia.

Sa mintgin - **Tujetsch** ei in eldorado per las selvaschinas, **Tujetsch** cun ses logs cun lagugns da tuttas varts. Ils uauls stgirs e la draussa spessa e d'in maun las canals d'arclina e perversa tegnan tschelau e siper ils garvers ei il zup nuota menders. Di, in intschess da quels e selvaschinas dat ei tut put.

Epi il revier denter las auas da **Mila** e dalla **Val Strem**, leu nua che la catscha ei stada scumandada entochen 1986 ed ils animals serimnan. - Cura ch'ins ha mess ora igl onn 1965 ils capricorns (10 bucs e 12 cauras) ei quei daveras stau in'enrihida cun historia. Aschia in capricorn ei la fermezia sezza, sch'el sgigina magari buca enzatgei duront treis jamnas da cufla, auter che litgar il tratsch e la greppa. Daferton ch'els tuornan neu digl **Uri** e passentan igl unviern en **Tujetsch**.

A per culs capricorns stattan ils camutschs, forsa onz meins resistibels, quels sistschien exemplars pressapauc che ein da casa eifer las stagias dalla val. Ellas vals encunter miezdi (**Val Gierm**, **Val Nalps** e **Curnera**) ein ils camutschs buca ton exponi sco sillas costas dil **Crispalt** e **Pez Ner** e **Cuolm da Vi**. E pervia dalla buchera sepertgiran ils camutschs da magliar neiv.

Siper las plauncas stattan las muntanialas martuf e pertgiran ils ratuns, per cass ch'ils tschess ein vegni neu dallas **Ruinias da Medel**. Las muntanialas avdan dad omisduas varts dil **Rein**, ton enta **Maighels** sco ella **Val Strem** e seretilan el staup encunter la fin da settember; tocca aschia ils emprems da mars ein ellas sut tiara ed il puls ed il flad van plaun, treis entochen quater ga mintga minuta. E tgi che sa dapli manegia ch'en **Tujetsch** secattien forsa da quei da 700-800 tocs.

Schebi ch'ils cavreuls ein pli mals ch'ils camutschs, ei lur diember tuttavia buca surpridents; 150 en tut, in animal ch'ins tegn ault. Cura ch'el pastga cun atenziun els fistatgs dils uauls ed untgescha per mintga disturbi els caglioms. Cun agid dil fein ella starliera tegnan els stendiu ellas nevadas, ual sco la tscharva, mess il cass ch'ella ei buca ida naven. Damai che la plipart dalla specia setila dalla val giadora e varga schizun **Cuera**. Quellas tscharvas che van e vegnan ed ein selvaschinas da passadi sco ils renns dils Inuits. Pér suenter l'Emprema uiara mundiala ein las tscharvas s'acclimatisadas ellas vals sisum il **Rein**; dapi lu ein ellas vegnidadas ualti numerusas. Ils donns caschunai ein tuttavia buca relevonts, sch'ins ha pagau ora uonn per exempel tut ensem 50. - francs.

Aschia sin in plum pon ins dir che **Tujetsch** hagi da terren approximativamein in diember da ferm 200 tscharvas, en mintga cass, sche las vaccas fan vadi ella val ed

ughegian buca culs vadials sur il **Cuolm d'Ursera**. Duront ils meins da mars ed avrel ch'ils tauris fieran naven la corna che crescha silsuenter danovamein; en treis meins aschia eis ella puspei schubergiada e perfetga sco vivon.

Ina tauna d'uolp ei in liug singular; en scadin cass sch'ils uolpets sturnegian u stattan a suleagl, il mument ch'ils eglis ein aviarts ed els vesan. La cua liunga ed il fol clar tgietschen han cudez. In bi fol cuosta matei 80 francs e suren aunc la premia da 30, sch'il catschadur muossa il rauer pign da vart dretga. Taunas d'uolp ed uolps (buca 100 selvaschinas odentras) dat ei nuota schi stedi; las taunas las pli enconuschentas ein quellas da **Vallatscha e Londadusa**, da **Siat Fontaunas** ed ils **Uffiarns**.

E las fiergnas dil puppen mellen e dil puppen tgietschen; ellas ein aunc pli scartas che las uolps ed han lur zups els mirs dils faners ch'ei ord diever. La premia per la fiergna munta sin 20. - francs e la canzlia communal ha buca stregn da pagar ora.

Pervia dil tissi ch'ins stiarna dapertutanavon e dil cultem artificial ed aunc dil sal dalla via fan ins star gleiti tut las lieurs. Buca bia dapli che treis tozzels lieurs secattan ella val; quei ei ina sperdita. Pli e pli rars daventan semegliantamein ils tais; in lagugn aparti per ils ezs ei il vau dall'aua oragiu da **Strem** encunter **Salins**. Ils telpis ein sco morts ora en **Tujetsch** e las musteilas profiteschan dils nuegls e dils clavazeuls bandunai.

Denter ils utschals da rapina ein ils giruns ils pli numerus, 12 pera sil pli pauc, ferton ch'ils sprers ein pli rars, forsa mo 4 pera pli. E tschess eis ei mo dus pli, in pèr, che cua denton buca ora sigl intschess da **Tujetsch**, sco per semeglia ellas gnivs el **Grep dil Tschess** u en **Curnera**; il per ei setratgs naven, ellas **Ruinis da Medel** e tila si leu ils pigns. Perencunter fan els dus catscha ella **Val Tujetsch** e vertesch buca da lur specia dasperas.

Las hazlas e las sgagias sedostan e las gaglinas selvadias vegnan dil meins, schebi ch'il suleagl scaulda da detschiert els lartgs digl **Uaul Flurin**.

Suenter ch'ils avdents da **Maunsura**, pia quels sill'ala seniastra dalla val, denter **Bugnei** e **Tschamut**, han mess neu Orts e curtgins da caglias e plontas per propi, vegnan ils utschals cantadurs e neu dils uauls che schain sillas costas encunter miezdi. Las melodias dil tschetschapera e dils masets blaus, dil cuacotschna e digl utschi dil puppen tgietschen sefan ed ils paslers ston ir per lur fatg.

Fontaunas

Levy, Placi. Intervista dils 11 da november 1985, Sedrun

Schmid, Luis. Der Wild- und Vogelbestand im Tavetsch. En: Wanderungen in der Talschaft Sedrun Tavetsch. Sedrun 1971, S. 35-38

VII Il gudogn dil paun

Las rihezias naturalas

Ch'ins metti buca semplamein d'ina vart las rihezias naturalas ch'igl intschess da **Tujetsch** tegn tschelau en siu ravugl. Sidavon stat la crappa, sco per exempel il scalegl e las cristallas, caltschina e sal camutsch, in techet fier, zinc e plum e suren entgins garnetschs aur e plinavon la turba. Per far rauba denton drova ei dapli.

Il scalegl

Ina veina clar grischa da scalegl setila silla costa dretga dalla vallada dil Rein e mira ora odem la **Val Sumvitg** epi danovamein a **Mumpé-Medel** ed a **Nual**, tonscha sur l'aua vi sil **Calmut** e dat la davosa cuhegiada a **Hospental**.

En scadin cass ch'ils vischins da **Tujetsch** ein dai avon biars onns sil crap scalegl, schebi ch'ils emprems indrezs da scaldar ein stai empau pli sempels, sco per semeglia far cauld plattas da crap e far pegnas da mir. Dallas empremas pegnas da scalegl pudessen datar neu digl onn 1740, forsa; per pressapauc 100 onns pli tard ein las pegnas scalegl sefatgas per propi. - Ed igl ei pli che mo remarcabel che ual glied d'ordeifer ein s'empitschada dil scalegl ella val. Ins sedamonda, schebein ils Tuatschins vevien buca raps, ni forsa e buca regl d'interpreter enzatgei.

Ils anno 1867 mumentan in Colblezer dad **Amsteg** ed il Walker da **Schattdorf** la damonda d'explotar il scalegl ella **Val Tujetsch**. Ils Tuatschins fredan l'aura e setenessen plitost cun in'offerta da nossas varts. Ed els scrivon ora il crap ella Gasetta Romontscha. Collemberg e Bisquolm da **Mustér** s'annunzian e la vischnaunca lai vi la veina. Probablamein ei l'interpresa nuota sefatga dil meglier; igl interess ei tschessaus ed igl onn 1897 conceda **Tujetsch** gratuitamein scalegl alla claustra da **Mustér** per ils altars ella baselgia da Nossadunna. - Pauc sissu, igl onn 1901, sefa danovamein in contract denter **Tujetsch** e Gion Battesta Collemberg, pigner a **Mustér**, e quei per **Calmut** e **Nual**; ins ei vegnius perina per 5-6 onns cun explotar ina tiarza dalla crappa a Nual e las autras duas sil **Calmut**, in cun l'auter denton buca dapli che 1200 peis. Las indicaziuns ella scartira ein da muntada:

- ils prezis ein fixs e muntan per **Nual** 15 raps, per **Calmut** 12 raps il pei, quei che fuss matei pressapauc 30 cm³
- fender e buca sittar la crappa (lavagar la pastira)
- finir en in liug avon ch'entscheiver en in auter (serasar!)
- il scalegl ei da dar giu als Tuatschins per 60 raps il pei ella mina
- las cauras pil latg han il dretg da pascular gratuitamein
- il fein pil letg e la lenna morta ein semeglientamein da dar giu per nuot

All'entschatta ha la fatschenta cun dr. G. Brauchlin da **Mustér**, quella da calonda october 1916, fatg ina hazra pareta. En num dalla ovra da talcum a **Sumvitg/Surrein** fa el amogna pil scalegl en **Tujetsch** la summa da 1000. - francs mintg'onni e per in vagun da 10 tonnas treis francs l'in e sch'ei survarga ils 500 vaguns per onn, allura 4. - francs il vagun. Entochen che l'explotaziun entscheivi per propi, s'oblighesch'ins da pagar annualmein 300. - francs. Culs 15-6-1918 mida il tgamun num e secloma da lu enneu Montan- u. Rohstoff AG, **Mustér**. Alla testa stat dr. G. Brauchlin, il parsura dil cussegl d'administraziun. Culs 14-1-1919 seretila la fatschenta dil contract e fa valer ch'ins vevi fatg il quen cun la viafier dall'**Alpsu** che vegni ad interim buca baghegiada. La suprastonza da **Tujetsch** sevolva tier igl advocat dr. G. Willi da **Cuera** che cusseglia da secunvegnir; ei vali buca la peina.

Denteren lavura il cavacrappa Remigio Locatelli, sesents a **Sedrun**, ella cava sil **Calmut**, ferton ch'il pigner Johann Jacomet dad **Acletta** tschenta repetidamein damondas alla vischnaunca per prender si il **Calmut**, sco per semeglia ils onns 1912, 1913 epi ils 9-1-1927. La finala secunvegn la vischnaunca cun Gion Battesta Jacomet Flury d'**Acletta** per il prezi da francs 20. - il m³; el dueigi sez denton secunvegnir cun Remigio Locatelli pervia dalla cava sil **Calmut**. A **Nual** perencunter ei Gion Battesta Jacomet persuls e

paga francs 40. - per il m³. Denter **Calmut** e **Nual** ha ei dau da sestrer, tocca ch'ins ha spartiu las duas cavas. Naven dils anno 1933-1937 ha il cavacrappa Giusep Berther da **Gonda/Sedrun** giu la cava dil **Calmut**, Gion Battista Jacomet dad **Acletta** encuntercomi ei secuntentaus cun **Nual** e quei cun adina puspei renovar ils contracts entochen 1947. Explotaziun a **Nual** 1943: 4.55 m³ a 50. - francs = 227.50 sco indemnisaziun alla vischnaunca da **Tujetsch**.

Schebi ch'ils Tuatschins sezs han nuota propi vuliu morder en, ein els ora ed ora stai dall'idea ch'ei selaschi far daners cul scalegl. Nual ei damaneivel dalla «gliut da dadains gl'uaud» e 4 giuvens da **Selva**: Venzin Benedetg, Venzin Stiafen, Loretz Gaudenz e Deflorin Pieder fan in contract cun la vischnaunca arisguard l'explotaziun a **Nual**. La scartira datescha dils 10-11-1944, ina cunvegnientscha da dus onns cun indicaziuns sco las ulteriuras. Enzatgei onns avon fuvan era Giusep Zazzi e fegl s'interessai per Nual e per **Calmut**. Cun ina brev dils 27-7-1950 s'occupeschan Benedetg Valier e Baseli Schmed cun la cava a **Calmut**, ina damonda alla vischnaunca che manegia veramein serius. E la suprastonza communal respunda ch'ella seigi ad interim ligiada e sappi buca far cunmeins. Atgnamein naven digl onn 1942 ei Carli Baselgia da **Cumpadials** a **Langenthal** sespruaus da vegnir en contact pervia dalla cava sil **Calmut**. Finalmein vegn el a sté ed ils dus contracts dils 12-6-1945 e quel dils 22-7-1946 plaidan d'in spert serius d'interpresa. - Dalla biala entschatta enneu ein las difficultads vegnidas grondas; Carli Baselgia ei sestentaus scosauda ed ha dau lavur a passa in tozzel luvriers indigens. E per ses 35 m³ digl onn 1946 ha el tuttina pagau alla vischnaunca da **Tujetsch** 1575. - francs e suren aunc 12 vaguns material manedel a frs. 5. - il vagun.

Per in um persul fuva la fatschenta onz greva; a Sedrun sefuorma ina societad d'acziun «Ovra da pegnas da **Tujetsch**, SA **Langenthal**». La speranza ei carschida il mument che la firma nova ha baghegiu in baghetg silla ravera dil **Drun** a **Sedrun**. (Oz casa da colonias **Salins** da Irma Wirth-Monn.) La taxa dils 10 raps per 1m³ occupau ei tuttavia buca stada giud via.

Cun la cunvegnientscha dils 26-6-1946 ei Gion Giusep Jacomet da **Mustér** semess en a **Nual**; cun ina dunna da **Tujetsch** eis el scochemai staus da casa ella val ed il contract muossa buca ora puncts apartis. L'explotaziun ei sefatga e secloma:

- 1955 6,33 m³ = francs 316.50 (pia à frs. 50. -)
- 1956 3,74 m³
- 1957 2,68 m³
- 1958 3,98 m³
- 1959 6,55 m³

Lein dir ch'ina pegna ordinaria drovi approximativamein 0,3-1,5 m³ scalegl schubergiau. Ton che Gion Giusep Jacomet fageva al pli 15 pegnas mintg'onn. Ed el ei staus in bien contrahent ed ha adina puspei renovau il contract a **Nual** e quei entochen sia mort prematura dils 26-10-1974.

Pervia da pagaments ha la vischnaunca da **Tujetsch** visau il contract calonda matg 1954 e l'Ovra da pegnas a **Tujetsch** ha buca acceptau la visada. E la finala eis ei tuttina iu en nuot. La collaboraziun cun la Serpentina a **Hospental** dils 20-10-1965 ei era buca sefatga ed ei semegliontamein dada ell'aua. Cun l'interpresa dalla Serpentina SA ad **Erstfeld** eis ei buca iu bia meglier. La cunvegnientscha dils 5-10-1971 veva giu priu ina stupenta entschatta cun ina taxa annuala da francs 4000. - (in'explotaziun da 250 m³ = francs 4000. -) e per ulteriurs m³ francs 15. - l'in e per ils curdems (rauba manecla) accurat il medem prezi. Ed il resultat ei puspei staus poverets, plitost disgusts e visadas ufficalas per vegnir en culs raps.

Dapi igl onn 1976, naven dils 1 d'avrel, ei Barclamiu Berther, tschentapegnas a **Sedrun**, in explotader da num sil **Calmut**. El ei s'obligaus da pagar francs 120. - il m³ ni silmeins ina summa annuala da francs 800. -. Igl avrel 1981 ei Barclamiu Berther semess en cun la firma Murer SA **Tujetsch** e las pegnas d'ozildi sevendan bein, aschia en vesta dallas historias ch'ins ha cugli ieli. Ina survesta en nos dis muossa ora:

- pegas pintgettas (70 x 60 x 80) frs. 4-6000
- las ordinarias 100 x 100 x 30) frs. 7-8000
- quellas cun baun pegna ed aschia vinavon frs. 18 000
- ina execuziun da luxus frs. 30 000

L'explotaziun sil **Calmut** ei carschida da detschiert e la crappa vegn tagliada a **Schmerikon** ella grossezia da 10 cm, quellas plattas che tuornan allura a **Sedrun** el luvratori giul **Drun**. - Buca meins che treis luvrers stattan vidlunder ed han fatg per semeglia igl onn 1984 ventgaquater pegas. Ed igl onn 1985 ha la firma Murer SA **Tujetsch** explotau 41,574 m³ e paga alla vischnaunca pil m³ francs 120. -, pia ina summa da francs 4'988,90.

Il svilup enteifer ils davos 80 onns ei singulars:

1900 ha ina pegna custau	frs. 80- 100
1930	frs. 200- 250
1950	frs. 650- 800
1980	frs. 7000-8000

Fontaunas

Gadola, Guglielm. La Cadi, dal pugn da vesta economic ed industrial. En: Il Glogn, annada 22/1948, p. 80-122

Venzin, Gion Antoni. Extract dils protocols da vischnaunca 1838-1948. Privat. Giusep Alig-Venzin, Salins

Miniers e minieras da fier

Ella Synopsis (resumada da scartiras) stat ei scret che avat Adalbert II hagi ensemblamein cul cumin dalla **Cadi** schau vi per tscheins 1658 tut ils fuorns da metal sil territori da **Tujetsch** ad in cert bandierel Duri Soliva ... Ed en quei cass vess ei stuiu esser plirs fuorns ed aveinas da differentes metals.

Ils mussaments veseivels ein scarts; els ein denton evidents, sco per semeglia sin las palas dil **Tgom** dalla vart da **Nalps**, ual dado la **Val Blaua**. La mina ei franca e secava meters e meters, silmeins curonta, viaden ellas costas dil cuolm. Silla preit osum stat l'annada 1679 engravada. Con lunsch ch'ils miniers ein sefuritgai egl intern dalla tiara, gliez ei ina damonda. Igl ei denton da supponer ch'els hagian tschercau ils minerals da fier els platters dil **Tgom**. E ... l'expediziun viaden el dadens dil cuolm vegn ad esser stada plitost in mistregn da puorla e miarda che ha serrau il pez - ed il suadetsch dils umens - lez ei il sal dalla crappa.

Agradgiu sil plat dalla val, sper l'aua da **Nalps**, secatta il liug, il liug che senumna aunc oz ils **Falluns**. Sche lein nus metter il cass ch'ils miniers hagian lavau leu il fier.

A **Tgatlems** ei zatgi semegliontamein ius ad encurir minerals da plum; la tscherca ei dil reminent pli pauc enconuscenta, pli u meins sco las alas fier enta **Cavradi**.

La crappamorta sill'ala dretga dalla **Val Tujetsch** cuntegn insumma minerals, schizun aur. - Giudapeis al crest da **Cavorgia Sura**, da maun seniester dalla via da **Valzeinza**, ha Giachen Hendry-Monn possedi in'acla cun clavau e nuegl. Da rugalar la via vitier il nuegl ha el anflau crustas fier, in entir tschuat.

E dallas minas dalla **Val Medel** tschontschan ins dapi da daditg enneu, digl avat Giachen per exempel e dil plum en argien ed era dil pirit. L'ucliva da **Fuorns** dat perdetga ed il zinc ord la **Val Cadlimo** ei enconuschents.

L'interpresa da fier a **La Punt** ei sefatga all'entschatta dil schenivavel tschentaner. Ton la cava da **Rueun (Schmuer)** sco quella si **Sursaissa (Viver)** ein stadas sut la reschia dalla societad a **La Punt**. Ils minerals da plum e d'irom hart rendiu pauchet, ual sco la luentera dils anno 1826 a **Trun**, malgrad ch'ins veva tuttina investau 200 000 flurins.

Fontaunas

Berther, Baseli. A Camischollas. Notizias cultur-historicas ord la Vall Tujetsch. Mustér 1917

Salis, Friedrich von. Beiträge zur Geschichte des bündnerischen Bergbauwesens. II. Der Bergbau im Oberland. En: Jahresbericht der Naturforschenden Gesellschaft, Neue Folge, 1861/62, S. 173-189

Las palius da turba

Ils quendis da fenadur 1917 ha Giusep Brugger, posttenent a **Cuera**, fatg ina damonda alla vischnaunca da **Tujetsch** d'astgar cavar turba a **Plidutscha**. La **Paliu Dultscha** secatta denter **Tgatlens** e la siara da **Maighels** ed ei sco **Surpalits** e **Muschaneras** terren da turba.

Tschels onns ha principalmein la glied da dadens igl uaul, ils vischins da **Tschamut** e **Selva**, fatg diever dil scaldament a turba. - La turba sezza ei ina dallas davosas restonzas neu dil temps glacial; ella cuntegn datier da tschunconta per tschien cotgla ed ei la lenna dils paupers che han dad acceptar la muoschadad ch'ella derasa e suren aunc in tgamin da rascha.

La lavur dil cavaturba ei stentusa; amiez la paliu tila el la canal cun ina corda e taglia cul badel da tagliom plat il tschespet ch'el caveglia d'in maun per cuvierer silsuenter la cava, la cava che sefa in meter entochen in meter e miez afuns. Ils quadrels cotschens che setilan magari sin mellen e brin, quadrels da 20-25 centimeters cubics, ch'il cavaturba rasa ora dasperas la cava. Entochen il di ch'el caveglia ils cubs en fuorma da meidia u fa ordlunder in um crap. Ed el sesprova che la turba hagi pauc contact cun la tiara, sinaquei ch'els vegnien dabot secs e ners da tuttas varts. Tut mantuns che sefetgan ad ault sco l'enzenna stgira d'ina profezia.

E vonzei ein els vegni, ils dels da **Selva** e **Tschamut**, cun benagls e carrs ed aschia e la turba ha cuau bein e zatgi ha saviu sescaldar.

Fontaunas

Venzin, Gion Antoni. Extract dils protocols da vischnaunca 1838-1948. Privat. Giusep Alig-Venzin, Salins

Las caltgeras da Pardatsch

La greppa smuttada e melnauna denter las auas dalla **Val Gierm** e dalla **Val Nalps** muossan ora; greps da caltschina siper ils gliemets dallas plauncas. La **Val Gierm** ei dalunsch ed il grep da caltschina en **Pardatsch** ei staus relevonts. Ina caltgera onz pli veglia secatta giudapeis al grep, ferton ch'ina secunda ei in tgaubriechel sur la punt. Ei stat scret ella nudauna ed ils contracts ein enzatgei da num. Sco per semeglia quel dils 28 d'uost 1858 denter la vischnaunca e Giachen Antoni Schmet e Giachen Martin Giger e sco tierz il Barclamiu Gieronimi da **Ciavana (Clavenna?)** neu dil comune di **San Giacomo** che di cun expressiun, tgei ch'ils sorprendiders hagian da far, sco per exempel:

- ereger ina caltgera nova, cun la bucca encunter igl uaul da **Cavorgia**
- ella ha da cuntener silmeins sissonta salmes (matei entuorn 4800 liters)
- curonta francs indemnisaziun per baghegiar il fuorn niev
- cura ch'il diember necessari d'empustaziuns ei avon maun, tontas e tontas brels, silmeins trenta, forsa, fixescha la vischnaunca il temps da barschar (buca ual sil pir far fein)
- ch'ins detti ina mesira fil e streha e In buca crappa, tschendra u puorla
- ch'ils sorprendiders verteschien la controlla da vischnaunca
- Per l'erecziun dalla via o gl'uaul da **Cavorgia** ed il fuorn dat la vischnaunca 30 umens che lavuran dallas otg entochen allas quater, cun pussar in'ura denteren
- ils sorprendiders dattan ina segironza da sis onns alla vischnaunca

In secund contract datescha digl onn 1866 - denter la vischnaunca e Giusep Antoni Bisquolm da **Mustér**, per diesch onns quella ga. Il sorprendider furnescha alla vischnaunca la caltschina per treis francs e tschunconta raps il salme e paga la lenna da brisch cun tschun francs la tschuncheisma.

Igl ei la primavera baul dils anno 1910; Giachen Martin Hendry e Tumaisch Schmed da **Cavorgia** ein uonn ils sorprendiders. Eis stattan sidavon la caltgera sper la punt sur l'aua da **Nalps**. Il Tumaisch veva pluminau ed il Giachen Martin ha dau suenter - da semetter en e barschar la caltschina. Siu cusrin ledi cul regl d'interpreter ed el, il Giachen Martin Hendry, cun ses treis affons pigns - e la Barla Catrina spitgava il quart

ella casa sil crest a **Cavorgia**. Per gnanc trenta raps mintg'ura - e luvrar di e notg, quater dis silmeins.

Ella suoschna dasperas la caltgera semiran ils umens tier, semettan meinsvart per liung e spetgan la scumiada, essend ch'enzatgi ha traso dad esser en pei.

Il tagliament ei sparunaus da mintga vart ed igl arviul tegn sc'in fier la crappa manedla, forsa ella grondezia da biabein ina curtauna. La cuvrada da dascha e sissu la cozza d'arschella ha dau in tschuat lavur als sorprendiders.

Dil bural amiez l'arschella tschessa il fein e l'aria che dat afuns ueglia e muenta il fiug. Il Tumaisch Schmed manischescha ed empiala culs tils dallas varts e suten; ei secapescha cul fing e quei ei siu misteri. Cura ch'el tila tec a tec il fing per l'entira caltgera entuorn. Per cura che la flomma setila e spida in recent blau, siara ei ils tils suren e suten. Ed en pressapauc dus dis e miez ei la caltschina barschada. - Il mument ei singulars, il mument che las menadiras arrivavan en da **Nacla**, cun benals e sliusas scultas ed ils purs han spir damondas sin bucca.

Il Tumaisch Schmed ed il Giachen Martin Hendry stattan eri e miran ensi encunter il **Tscher**; els sminan omisdus che l'auter onn vegni la caltschina a vegnir da sutensi, en sacs ed aschia.

Fontaunas

Venzin, Gion Antoni. Caltschina viva. Studi historic-cultural. En: Igl Ischi 1949, p. 82-87
Dapli mira era: Il barschar caltschina

Cristals e cavacrappa

Per ei 18avel tschentaner han ils alpinists perscrutau las **Alps**, ascendiu per l'emprema gada nossas tschemas e svegliau il senn per la bellezza da nossas muntognas. Las muntognas che eran entochen lu in mund scarschentiu ed untgiu, il reginavel dallas strias e dil barlot, ein daventadas il simbol dil ruaus e dalla bellezza.

Il pli enconuscent exploratur da nossas muntognas ei pader Placidus a Spescha staus (1752-1833). El ha percurriu ina gronda part dallas valladas e pitgognas grischunas, oravontut denton las stgeinas e pezzas dalla **Val Tujetsch**. Sco imprend ha ei ascendiu il **Pez Ault**, il **Pez Giuv**, il **Pez Tgietschen**, il **Badus** e traversau nossas vals lateralas. Pader Placi a Spescha era buca mo in renconuschiu alpinist, bein era in versau mineralog ch'enconuscheva gia da siu temps buca meins che 50 minerals. El decuors dils onns veva el rabbitschau ensemen ina biala collecziun ch'ei deplorablamein vegnida confiscada dils Franzos. Senza dubi ha il conventual, ch'ei era staus caplon a Selva, insinuau nos vischins da vegnir cun ei ed ir per cristallas. Las cristallas eran per ei ina fontauna da gudogn, in agid beinvegniu per ils muntagnards.

Cun quei patratg propona ei da crear a **Glion** ni a **Trun** in deposit central da cristallas e da cumprar ina mola. Trumpaus dil nunsuccess pren ei sez enta maun la causa e diregia il commerci da cristallas buca meins che 40 onns.

Cristallas, quella maravigliusa crappa, han ins apprezziau da vegl enneu. Viandonts e pasturs ch'engartavan cristallas per schabetg han segiramein rabbitschau las pli bialas a casa. A partir dil 14avel tschentaner entochen viaden el 18avel ei la claustra stada fetg activa ell'explotaziun da sias minieras en **Surselva** e dirigiu cun bien inschign il commerci da cristals e minerals. Ins astga supponer ch'era enqual Tuatschin segidava en quei risguard. Scadin cass ei pader Placidus a Spescha gl'imprend ch'ei ius cheu tier nus sistematicamein per crappa ed era stimulau ils indigens da seprofitar da quels beins naturalis.

En ina vischnaunca spirontamein purila eran las resursas pintgas e mintgin stueva mirar co sedustar. Per cristallas ein ins i per gudignar empau raps, per nutrir la famiglia.

S'entelli, ideal e plascher drova ei era, pertgei ir per cristallas ei nuota bialaveta!

El 19avel tschentaner stueva igl ir per crappa vegnir praticaus ualti stedi, pertgei ils 30 da mars 1884 concluda la vischnaunca «da trer ora ina cumissiun per sedeliberar e s'entelgir, sch'ins savessi buca metter si ina certa taxa a quels che cavan mineralias sin nies territori».

El regulativ sur dallas greveziis e dalla gudida da tuts beins communalis dalla ludeivla vischnaunca da **Tujetsch**, anno 1885, stat ei lu scret: «Mineralogs che fan diever da

quei mistregn sin nies territori han da retrer tier la suprastonza ina patenta e pagar per quella en cassa communal frs. 50. -.»

Ina aschi suarada taxa han ils cavacrappa buca acceptau e sin camond dil cantun sto la vischnaunca dils 6 d'avrel 1885 sbassar la patenta per la mesadad, pia sin frs. 25. -.

Da lezzas uras eran in per da nos pli enconuschents cavacrappa sil meglier.

Luregn Giacumet, Camischolas	(1830-1900)
Carli Cavegn, Tschamut	(1858-1929)
Giachen Fidel Cavegn, Rueras	(1811-1972)
Gion Antoni Hitz, Rueras	(1873-1955)
Florentin Cavegn, Gonda	(1865-1936)
Adolf Cavegn, Sedrun	(1863-1946)
Vigeli Peder, Selva	(1846-1924)
Giachen Antoni Schmedt, Sedrun	(1878-1948)
Pieder Stoffel, il parler	(1852-1921)

Era en nies tschentaner savein nus enumerar entgins cavacrappa fetg activs e versai.

Ambrosi Cavegn, Sedrun	(1898-1977)
Anton Michel Loretz, Selva	(1883-1953)
Luis Curschellas, Surrein	(1894-1958)
Giger Gion Battesta, Selva	(1903-)

Cavacrappa d'ocasiun ha ei dau aunc bia auters. Biars eran plitost ils vischanders dils capomineralogs, auters ein mo i cuort temps suenter quels scazis.

Las duas uiaras mundialas han lavagau la fiera da cristallas e reduciu considerablamein il diember dils cavacrappa. La tscherca era fetg pintga ed ils cavacristallas stuevan esser leds da vender crappa da mular per 1-3 frs. il kg.

Era ils onns suenter la secunda uiara mundiala e duront l'erecziun dils implonts electric (1955-1966) fuva igl anim dir per crappa fetg pigns. Sper in per ch'eran sils onns era ei atgnamein mo pli dus, treis giuvens che mavan ualti stedi suenter crappa

Lucas Monn, Sedrun	(1918-1982)
Tumaisch Curschellas, Surrein	(1925-)
Vigeli Berther, Camischolas	(1922-)

Tochen viaden els anno 1960 eisi stau in temps miert, senza grond interess per cristals e minerals.

Silmeins ina gada ad onn vegnevan ils cumpraders, Häfliger da **Basilea**, Sicher da **Gurtnellen** e Nell Caspar da **Caschinutta**, ella val e cumpravan las anfladas.

La conjuntura aulta cun lavur e grond gudogn ha lu vivificau il commerci da cristallas ed era midau da rudien las relaziuns economicas. Culla jamna da lavur da 5 dis e las vacanzas prolungidas ha la glied giu pli bia temps liber a disposiziun. Quei temps han naparts impundiu per star en gamba, per satisfar al basegns da moviment ed ina occupaziun corporala. In'attractiva occupaziun accessoria che sa era purtar in cert gudogn ei igl ir per cristallas. Da quei ein pli e pli biars vegni pertscharts, e suenter ils anno 1970 ei igl interess per cristals e minerals carschius considerablamein; igl ir per crappa ei bunamein daventaus ina pissiun populara. Naturalmein ha era la gronda propaganda dallas differentas uniuns, las numerusas fieras (buorsas) e las bialas exposiziuns cudizzau biars dad ir suenter crappa. 1980 han 42 indigens e 51 jester priu la patenta annuala; la vischnaunca ha dau ora 194 patentas dil di.

1985 eisi stau 48 indigens e 44 jasters che han giu la lubientscha annuala ed 125 personas han priu patentas dil di. Indigens e jasters tegnan pia ualti bein ballontscha.

Negozi da cristallas e minerals

Ditg e liung ha pader Placidus a Spescha diregiu il commerci da cristallas. Suentel el ha siu amitg, il plevon Giusep Hitz da **Sedrun**, cuntinuau il commerci intermediar.

Vonzeivi han denton ils cavacrappa indigens surpriu la funcziun da precumpraders. Els vevan contact cul grond mund, tenevan ils fils enta maun e tras lur mauns anflavan las cristallas la via ora el mund. Enconuschents precumpraders fuvan:

Carli Cavegn, **Tschamut**

Luregn Giacumet, **Camischolas**

Adolf Cavegn, **Sedrun**

Ambrosi Cavegn, **Sedrun**

Gion Antoni Hitz, **Rueras**

Entochen lunsch viaden en nies tschentaner era il contact cul mund minimis, savevan ils biars strusch tudestg, era l'informaziun concernent cristalls e minerals pli che munglusa. Aschia eran ils cavacrappas, oravontut ils novizs, dependents dils precumpraders. Quels diregevan la fiera, fixavan ils prezis ed ils auters stuevan esser leds da saver vender lur anfladas, era sch'ella vegneva buca adina pagada tenor valeta. Avon e suenter la secunda uiara mundiala, cura che mo in per mavan per cristallas, vegnevan ils precumpraders d'ordeifer, dall'**Italia** (Magistretti), dall'**Engeltiara** (Ashcroft F.N.), dalla **Spagna** (Folch), dalla **Frontscha** (Frenkel), neu digl **Uri** (Nell Caspar e Sicher Valentin), si da **Basilea** (Häfliger) ed aschia vinavon.

Oz ein ils precumpraders ton sco svani. Mintgin va sez a fiera ni venda ad interessents che vegnan en casa. Il prezi sedrezza tenor l'offerta. Damai che la purschida ei oz fetg gronda, ei la fiera saziada ed ils prezis plitost bass.

Igl ei semidau da rudien. Ils cavacrappa ein organisai, fan part dallas uniuns localas, cantunalas e dall'uniun tetgala svizra. Quellas arranschan onn per onn fieras, schinumadas buorsas, nua che mintgin sa far venal sias preziosadads e dumandar informaziun. Milsanavon organiseschan las uniuns exposiziuns, referats e sentupadas d'instrucziun. Dil reminent dat ei plunas cudischs che descrivan igl inschign d'ir per cristallas e las enzenas caracteristicas.

Oz sa pia mintgin s'informar e sez disponer. Il temps da menar l'in ni l'auter davos la cazzola ei spiraus definitivamein.

L'Uniun cristal **Tujetsch** ei vegnida fundada igl onn 1978.

Patentas per ir per cristallas

L'emprema taxa ei fixada el regulativ dallas grevezias e dalla gudida da tuts beins communalas dalla ludeivla vischnaunca da **Tujetsch**, anno 1885, e munta a frs. 50.-. Il medem onn eis ella vegnida sbassada sin frs. 25.-. Sto esser ch'ins mava fetg stedi per cristallas. Il vegl Hitz raquintava schon che tut ils da **Selva** e **Tschamut** mavien per crappa e ch'ils Giacumets purtavian las cristallas en scharls o da **Strem**. Denton ei la rabia tschessada e la taxa ei sesminuida a frs. 5.

Survesta

	Burgheis	Grischuns	Svizzers	Exteriur	Supplements schluppentar	maschina
tochen	frs.	frs.	frs.	frs.	frs.	frs.
1961	5		20-50			
1961	5-20					
1969	25	50	100	200	20	50
1977	50	100	150	300	100	200
1985	65	150	200	400	130	260

Entradas

Entochen 1965 vegnevan las patentas da cristallas incassadas cul quen communal. Perquei eisi grev d'eruir igl exact import. Quel era denton minimis. Incasso per lubientschas dad ir per cristallas:

1965	940.10 frs.
1970	3370.50 frs.
1975	6258.20 frs.
1980	15745.00 frs.
1985	19388.00 frs.

Quei rapid carschament d'entradas muossa claramein ch'igl anim dad ir per cristallas ei carschius constantamein.

Collecziuns privatas e cabinet da cristallas communal

Nos vegls cavacrappa vendevan tut quei ch'els anflavan. Per els eran las cristallas ina part da lur existenza. Entschiet a collecziunar han ins per entuorn ils anno 1950. Enqual biala buccada metteva il cavacrappa en scaffa «da glas» ni zanua en in zuppau. Oz ch'ins ha buca aschi basegns da raps ha quasi mintga cavacrappa sia collecziun privata. Aschia restan ils pli bials cristals e minerals en nossa val, quei ch'ei da beneventar zun fetg. Igl onn 1978 ha la vischnaunca realisau siu cabinet da cristallas. Gnanc da far curvien, en suprastonza eran 3 cavacrappa: Vigeli Berther, Tumaisch Monn e Vigeli Giossi. Igl emprem era il cabinet plazzaus ella casa **Cadruvi**, oz ei quel el museum communal «La Truaisch» e fa buca mal parada. Ils daners che la vischnaunca incassescha per patentas impunda ella cumpleinamein per la cumpra da cristals e minerals e per la meglieraziun dil cabinet. In tal agir mereta renconuschiantscha.

L'exploitaziun

Ils emprems cavacrappa vevan bi far. Els anflavan segiramein bia fuorns aviarts e savevan mo encurir si ils scazis. Ditg e liung han els giu pastg entir, gattis bein veseivels e bunas cundiziuns. Cul temps ei tut vegniu pli rar; ins ha stuiu ir pli lunsch e far pli bia lavur.

Per arver fuorns pli stinai han ins lu entschiet a duvrar el 18avel tschentaner puorla nera. Furar a maun era hanau e schluppentar cun puorla nera fetg prigus. Pli sempel e segir eisi oz da siglientar cun patronas explosivas.

Igl onn 1965 han ils dus cavacrappa Lucas Monn e Tumaisch Curschellas cumprau l'emprema maschina da furar crappa. D'ina tala maschina purtabla, era sch'ella pesava entuorn 40 kg, semiava gia il bien Gion Antoni Hitz.

Oz han buca meins che 10 cavacrappa maschinas da furar che vegnan oravontut duvradas en **Cavradi**.

Cul furar e schluppentar ei la quietezia da tschels onns svanida.

Anfladas singularas

Igl onn 1934 ha Luis Curschellas-Berther da **Surrein** anflau el **Pez Blass** ina cristalla (clutger) che peisa 82 kg. Ella ha ina circumferenza dad in meter ed ei 65 cm aulta. Igl ei il pli grond cristal dil **Grischun**. Il clutger paradescha el museum da **Friburg**.

Cavradi ei il sulet liug sigl entir mund, nua ch'ei dat hematit cun si rutil (alas fier).

Il pli grond fuorn ch'ins ha anflau en **Tujetsch** ei il fuorn da fens sil **Culmatsch**. Ils cavacrappa vevan montau lien petgas da sustegn ed ei eri in pign caplut. Il Geromini ch'ins veva clamau per gidar ad explotar veva denton manegiau: «Na, na, ain co la'l Geronomi betga la pial!» Igl onn 1967 han ils frars Curschellas da **Surrein** e Lucas Monn da **Sedrun** fatg ina biala anflada. Ils petgens gronds e clars dad entadem la **Val Strem** (**Pezs Gits**, sut il **Pez Tgietschen**) ein mess en salv en «La Truaisch» (museum tuatschin).

Forsa ch'ei dat en **Tujetsch** bunamein 100 sorts da cristallas ed ellas ein quasi senza paregl, ton da vart dretga sco da vart seniastra dil **Rein**, sco per semeglia:

1. Claus, Pardatsch e Nalps

- cristalla da guilas
- monocit
- anatas
- xenotin
- fens (titanit) e prenit

2. Curnera

- hematit (alas fier)
- amatista

3. Val Val

- adular
- albit
- fluorit
- alas fier pintgas (rosetta)

4. Val Giuv

- cristalla nera, stgir-brina e brina
- milarit
- mulau
- tschelit

5. Val Mila

- cristalla nera
- desmin

6. Val Strem

- scolacit

7. Val Maighels

- epidot

Fontaunas

Hitz, Gion Antoni. Per crappa massel jeu bugen. Lavur edida, introducida e commentada dad Alfons Maissen. Cuera 1971. (Studia raetoromanica; 7-9) (Sep. ord: Igl Ischi, 1967-68)

Maissen, Flurin. Mineralklüfte und Strahler der Surselva. Fuorns e cavacristallas. Mustér 1955. (Diss. Fribourg)

Mistergners ed industria

Il Sep Antoni Hafner

Hafner nuot, plitost scadler ni figulant, ni semplamein in luvrer che fa vischala da tiaracotga. Ed el ha giu num Sep Antoni Deragisch, siu fegl era, ed il descendent dil secund Sep Antoni ei staus il Duri Vigeli Deragisch da **Bugnei**. - Dil fuorn el plaunterren che cunteneva tuttina melli tocs enina e dil luvratori sut la stiva cun la roda digl uler ed ils models differents - nuot, lidinuot pli.

El, il vegl Sep Antoni Deragisch che fuva vegnius si dil **Schuob** ils 29 da mars digl onn 1834 cun in prima attestat, suttascrets dil burgamester Weber, ed ei stat scret lien:

*«... dem 19 Jahre alten Joseph Ant. Deragis von **Tavetsch** Canton **Chur** beurkundet, dass er nach ordnungsgemäss erstandener Lehrzeit sich der durch die Gewerbe-Ordnung vorgeschriebenen Prüfung unterworfen und dass er dabei solche Kenntnisse in seiner Profession bewiesen hat, dass er zum Gesellen befördert ...»*

Ed a **Bugnei** ha el scochemai entschiet cun siu mistregn sper la lavur dil funs ed ils dis da malaura. Leu nua ch'el ha dau fuorma, bein ina zun mudesta e per la gliend semplia, a ses ruogs, allas caffetieras e broccas, a scadialas e miolas, a crucifix ed a parlets d'aua benedida, als brocs da flurs, a naschors e tentaschors. Epi - ha il Sep Antoni teniu ault las pegnas da tiaracotga (da quadrels). En sia stiva ha el fatg ina - aschia per mussar ora. Mo encunter la pegna scalegl ha el drizzau ora pauchet.

Cun la rata u cul carret eis el semess sin via, engiu ed ensi, da **Tschamut** tocca **Glion**, la fatschenta mava buca mal. E nuotatonmeins ha la gasetta «Igl amitg della Religiun e della Patria» susteniu la nova industria, sco per semeglia el numer dils 10 da schaner 1838, sut il tetel «**Tuietsch**».

«... Schon dis ed onns ha la Patria grischuna termess naven grevas summas daneers per vischalla ed autras faturas de tiarra-cotgia. Ussa aber havessen nus ina fabrica de semiglions artikels denter nus. Passa in onn ei tscheu in figulant (luvrer de tiarra-cotgia) che ha baghegiu si fuorn e laborator, e producescha da tutt sorts faturas da tiarra-cotgia sco vischallas, quadrells per pegnas etc. Ei fuss ludeivel, sche buns patriots e sez la Regenza encuressen de sustener quella e semiglions interpresas cun ina ner l'otra favur ... »

Ei tucca era cheu da sepagar da raschuns. L'arschella giu dalla **Val Fistatg** (sillas plauncas dil **Cuolm da Vi**) ei nuota stada pli ch'in ton, las colurs dalla glasira han entschiet a vegnir onz caras, sco la lenna da scaldar il fuorn era ed il Sep Antoni il secund vess munglau dar la vischala miez per nuot. Ton ch'el sez ed il fegl Duri Vigeli Deragisch han survegniu avunda; cun la tiarza generaziun ei l'industria da **Bugnei** ida en.

Fontaunas

Gadola, Guglielm: La fabrica de vischala de tiara cotga a Bugnei. Tenor P. Notker Curti. En: Il Glogn 1929, p. 34-37

Il taglialenna

Enstagl dad ir vidaneu han ils umens dulau la lenna rodonda sil plaz, sco per semeglia amiez igl uaul, mintgamai sin dus bucs da lenna robusts. Ils taglialenna han tschentau il lenn rodund per liung e cul dies ensi, sinaquei ch'el prendi si la frida. E suenter la viulta dat in um la crena e tuorna a volver ensi, fermond el davon e davos cun dus punachels. Cunquei che la lenna rodonda ei buca scursada, dattan ils taglialenna la stiala. La tenta da scarvun ed aua el truc da lenn da forsa ina grondezia da trenta sin vegn centimeters ei ni dira ni rara ed ha la colur vulida. La corda da diesch entochen quendisch meters lunghezia che vegn neu digl asp setila atras la titgira. Cun in zuic anetg dosta in dils umens la tenta danvonz che squetra giun plaun u magari e enviers in aspectatur da marveglias.

Ina corda bognada ulivamein dat ina lingia schubra. Buca senza quitau stendan ils

tagliallenna la corda sul lenn vi e lingieschan cun ina stendida anetga. Ina lingua nunsurveseivla ed uiarscha resca furschallas. - Ei capeta ch'in um pli passau sesa sil lenn e pren giu la plema dalla frida. Aschia per rir numna ins el il gavun marsch. Cun fridas ulivas allontaneschans ils tagliallenna la part groppa dil lenn e la sigir aulta fa buna lavur. La sigir lada perencunter dalla quala ins fa diever silsuenterschubregia e fa il tagl ulivs. Ei dat da duas uisas sigirs ladas, ina dretga ed ina seniastra. Per ordinari han ils tagliallenna dulau il lenn rodond da duas u treis varts. Ina lavur da stenta che ha adina puspei danovamein mussau ora la habilitad.

Fontaunas

Berther, Sep Fidel. Tenor scret dils 6 da november 1985, Rueras

Il talper

Talpas han adina dau ed il talper ei staus in mistregn da num, el che veva da ver il dun da veser e fantasia da quei che sepassa els vaus sutterrans. Il mun talpa sez ei per ordinari ina via tschocca ed igl ei da tender la falla el vial principal che secatta in tec naven e meina ella gniv. E - las talpas ein malas, van magari sperasora e sclaudan sezzas las fallas. Nua che la tiara ei stagna van ellas pauchet sut la cutgna u schizun surenvi e rescana da dar ellas greflas da tgapers e giruns.

Perencunter ei il talper ordaviert e spera ch'il freid tschessi ed ils calzers tachien buca memia zun. - La notizia fa endamen; ils dus d'avrel digl onn 1840 han ils vischins eligiu Gion Balzart sco talper dalla val, naven da **Nislas** entochen sisum **Tschamut**, sin praus e pastiras - ed el hagi scochemai da dar suatientscha, per cass ch'enzatgi clomi. Ins scheva semplamein agli il «Gion muser» che ha retschiert treis bazs (35 raps) per ina talpa. In onn sissu, ils dus da matg 1841, han ins fatg cun Gion Balzart in contract, in scosauda, numnadamein sissonta risculdis (102 francs) per onn.

Sto esser che las talpas han fatg pigns ed ellas han mulestau enzatgi; ils talpers vevan traso da siglir vi e neu e para ch'els ein vegni unfis, aschia da vegnir a currend naven d'oragjudem tocca enasisum la val. Ton ch'ils vischins da Tujetsch decidan ils 18 da matg 1873 da partgir en squadras igl intschess, damai che mo in pegliatalpas detti buca pli il damogn. E quellas ein determinadas:

- emprema squadra **Selva** e **Tschamut** entochen **Val Giuv**, 1 talper
- secunda squadra **Rueras** e **Zarcuns** tocca l'aua da **Strem**, 2 talpers (in dadens ed in dado il **Dutg Grond**)
- tiarza squadra, naven da **Strem** tocca il **Drun**, 1 talper
- quarta squadra, **Drun**, **Cungieri**, **Bugnei** entochen **Nislas**, 1 talper
- tschunavla squadra, **Surrein** e **Cavorgia**, 1 talper

Ils vischins dallas squadras elegien mintgamai ina persuna e visien ils geraus. Per las regiuns «dadains gl'uaud», **Sedrun** e **Bugnei** e **Cavorgia** e **Surrein** ei negin s'annunziau. Cumpatg ch'ins ei nuota sescarpaus per la piazza da talper. Ils 8 d'october digl onn 1875 han ils Tuatschins fatg in inserat ella Gasetta Romontscha; els tscherchien in talper.

Las squadras ein restadas; struschamein enzatgi seregorda en Tujetsch dils davos talpers. Zatgi ha detg ch'il Flurin Capeder da **Zarcuns** e Giohen Deflorin da **Suloms** a **Rueras** u schizun il Leci Hendry-Monn da **Maunsut** savessien esser stai dils pli davos umens en **Tujetsch** che hagian pigliau talpas per incumbensa dils vischins.

La maniera da pigliar las talpas ei diversa. Dalla trapla da fier cun sias duas astas e viultas osum engiu e la rintga ella cadeina da tschentar denteren ella falla aviarta fan ins aunc oz diever. - Onz pli hanada ei la pigliada cun festa; ed ella vegn en damonda per las talpas las pli rufinadas.

Il talper taglia ora in tschespet e fa in quadrat, scuviera il vau dad omisduas varts, implonta in lennet da stgein (pressapauc da ventgatschun centimeters lunghezia) osum il vau. In secund lenn atraviens (in per centimeters pli cuorts) vegn encrenaus el stgein vertical. - Ver otgonta centimeters naven dil quadrat, s'entelli a per cul vau, catscha il

talper in fest coller sturscheivel (coller ei meglier che rom che secca vi e seglia), in fest d'in bien meter lunghezia, giuaden el tratsch. Cun in cantun ha el rentau la corda ferma osum il fest, ferton che da l'autra vart dalla corda secatta la palutta, tagliada ora e strenschida cul cantun, ina palutta da sis centimeters lunghezia e forsa treis centimeters lada. Il talper stenda il fest e la palutta carga viaden ellas crenas dils dus lenns, dil lenn vertical e dil travers che stattan el quadrat. La secunda corda ch'ei medemamein fermada vid il coller, onz plinengiu, tegn ferm il fildirom (in en fuorma dad onza), in fildirom ch'il talper ha sfundrau cun agid dil fassuir giu ed atras il vau. La distanza denter il quadrat ed il fildirom munta ver otg entochen diesch centimeters. Cun adatg ha el mess il tschespet el vau ed enaquella che la talpa sfui e muenta il tratsch el passadi, seglia il travers ord la crena e la palutta ed il fildirom slontschan ad ault. E la talpa cul tgierp el fildirom ei amauns. Secapescha ch'igl entir cundrez culs lenns ei accurat il medem e da l'autra vart dil quadrat, ton che la talpa sa vegnir u da vart dretga u da vart seniastra; ella va da mintga vart encunter il clauder.

Fidel Hendry dils anno 1912, derivonts da **Cavorgia**, ha demonstra la pigliada cun festa en tut ils detags. Il Tumaisch Schmed (il Tumaisch dil consum, 1871-1952), sez vischin da **Cavorgia** pudess esser staus in dils pli davos che ha pigliau las talpas cun festa. Igl ei stau ual suenter l'emprema uiara mundiala, entuorn ils anno 1919 u 1920. Giachen Hendry-Monn, il bab da Fidel, ei vegnius tiel president communal Vigeli Venzin da **Rueras** cun 82 cuas da talpa, en in onn. El vevi scret il diember sin in pupi e schau il mussament ad interim en sac. Ed il president cuort sissu: «Ina pli gronda schula vesses buca saviu scriver.» Ed il Giachen Hendry buca maufers: «Ulteriurs vischins da Cavorgia han ina pli gronda partida.»

En verdad - els ein vegni cun dapli cuas. Cun ina indemnisaziun d'in franc l'ina ha quei dau ina summa, ina ch'els han saviu scriver sin tgamin. Suenter ch'ils vischins ein sestratgs ditg e liung han els decidu che las talpas da vart dretga dil **Rein**, tonca da Maunsut, che pertucca **Cavorgia** e **Surrein** e **Plaunmiez**, vegnien buca indemnisadas. Ch'ils cussadents sesalvien els sez. Ed ils ezs han fatg in nas liung, pigliau lur talpas vinavon ed han tagliau pustretsch tenor las tschuncheismas fein. Quella moda singulara ha cuzzau entochen ils 18 da schaner 1938; il di ch'ins ha fatg uliv e buca pli mess anavos la gliued ed il funs da tschella vart dil **Rein**. Forsa e in techet pervia da vischins pussents che vevan prau da **Maunsut**.

Fontaunas

Hendry, Fidel. Differentas intervistas, entschatta november 1985; demonstraaziun a Cavorgia dils 13-11-1985

Venzin, Gion Antoni. Extract da protocols da vischnaunca 1838-1948. Privat. Giusep Alig-Venzin, Salins

La davosa brischavinars a Tschamut

Ella ei ina femna ed ha num Antonia, la feglia da Gion Giusep e Margheta Riedi-Peder, naschida ils siat da mars 1910. Siu tat Augustin ei staus in brischavinars ed ella sezza ha barschau cun la mumma las ragischs d'ansauna aunc entgins onns suenter la mort dil bab Gion Giusep ils anno 1924.

Tschamut ei giudapeis allas plauncas dil **Cuolm d'Ursera** ed encunter miezdi sesarva la **Val Maighels** che tonscha tocca sils sumfils e da vart dretga encunter **Purtgera**. - La purtada en in blah senza cantuns entuorn il tgau e giu per la schuiala ed il dies orasi da Purtgera entochen a **Tschamut** ei adina stau in strapaz, in buordi aschia da curonta kilos e varga ragischs.

Cun in cunti da sac schubregian ins las ragischs e taglia naven ed il suer tacca vid la detta e las levzas. Da schar il migliac memia ditg d'ina vart, schigian ellas ora u van magari en mal. El truc da pors sefan las ragischs manizzadas ed ins ha ina buna survesta. Entochen il di ch'ins metta ellas a lomina en in nuegl ch'ins maglia ual ora il fein; la temperatura da nuegl ei la vera. L'aua tievgia surengiu tempra ed ils emprems flocs ein in'enzenna. Il raup dallas bullas che sesaulzan e schloppan alla surfatscha daventa pli e pli vigurus. La maischa secoi, vegn ad ault e mass cugl uvierchel e tut, per cass ch'el fuss buca sparunaus enviars la palaunca dil nuegl. Quater jamnas silpli ed il process da fermentaziun ei alla fin.

Dalla hetta pli veglia resda la crappa pressapauc tschunconta meters oragiusut la caplutta da Sontga Clau; l'aua per la destillaziun han ins priu neu dalla plaunca siviars **Scharinas**. Pli tard ei ina secunda hetta sefatga enasisum la **Val Rullatscha**, leu nua ch'il brischavinars han anflau ina fontauna ual sil plaz.

Las treis vanauns d'irom, la gronda forsa da 75 liters circa, la mesauna ed ina onz pli pintga e d'in maun las sedisch entochen gissiat buots cun la maischa, quei ei stau dabia. La procedura dalla destillaziun ei negin striegn. La turba giu da **Surpalits** ei stada in prima material da scaldar ed il bugl da fontauna ventgaquater uras ina suenter l'otra ei bien e ditg. La scumiada ei sefatga mintgamai suenter otg uras aschia e las notgs fuvan liungas. Buca schi unfiseivlas, sch'ils pervesiders da **Caspaua** devan dad esch en. Ed ina stiva cun pegna scaldada ei buca nuot.

L'emprema ga eran ils daguots gross neu dil vischi da lenn empau da schavets, schotg grads forsa. La destillaziun atras la vanaun pintga perencunter, lezza fuva in bien ton megliera e la valeta digl alcohol carschida considerablamein, datier da sissonta grads che sesbassavan denton anetgamein tocca ual sut tschunconta.

Aschia al bunfin dattan tschien kilos ragischs d'ansauna 6-7 liters vinars. Dils onns dalla brischavinars Antonia Riedi ha zatgi pagau pil vinars 4 francs per liter, oz encuntercomi passa curonta francs; ina tiarza dil vinars sco indemnizaziun per la lavur u e directamein cul daner blut.

Las treis vanauns d'irom e la concessiun suren ha la famiglia Riedi da **Tschamut** vendiu alla Confederaziun per quatertschien francs.

Fontaunas

Riedi, Antonia. Intervista dils 6 da november 1985

Etg dalla Stena

Quei scatletgel oval - da forsa otg centimeters lunghezia e quater sigl ault, sco fatgs d'ina cudetscha lada, ei semplamein buca da ragudar neunavon; el ei svanius. Igl etg ei duvraus e strihaus sin lumpas per ils snezs e las plagas aviartas, quella rascha stgir-brina, mischedada cun plantagen, zanduscal e mescal.

La Stena sezza ei morta ils 22 da mars 1931; ins scheva la Stena, schebi ch'ella veva num Margreta Cristgina Soliva, ina nata Schmedt, feglia dil Sten Alv da **Gonda**. A tut ils vegnentsuenter digl assistent Giachen Antoni Schmedt han ins detg ils Stens, damai ch'els ein stai originals e sur sesez.

La casa pintga (la truasch) dadens ils «Bruners» ei buca pli; ella fuva oriundamein sisur casa dil maun encunter il **Drun**. Il mument ch'ins ha baghegiu la via da **Gonda** ha la truasch stuiu untgir da siu plaz.

La Stena ei stada ina femna singulara, ina stendida e smagrentada cun fiug els egls e che veva il dun da tedlar. Cura ch'ella mirava culla lenta els egls, tedlava la historia dil mal ed ha fatg la diagnosa.

Ed ord ils egls ha ella saviu leger sco ord in cudisch, la Stena, la femna dad jarvas.

Naven digl avrel entochen viaden el meins d'october eis ella ida stediamein a calzerond, cun in canaster sin bratsch, aschia per flurs e feglia, fustitga e ragischs. Plontas da tuttas uisas ha ella mess ora el suleagl, fatg en tocs manedels, pisau u sfattau. Per far ordlunder etgs e rars per glied e tiers. Schebein igl etg dalla Stena fuva lu e veramein in agen product, lezza emparada seriusa lein nus schar d'ina vart. En mintga cass eis ella stada ina spir discus ed il misteri da siu etg ha ella tenu tschelau.

Nuotatonmeins ei la glied vegnida tier la Stena culs mals ils pli divers, en casa e vi nuegl. Segiramein glied ch'ei veramein stada ellas stretgas ed outra che clutscha cuntinuadamein e seplira sc'ina orgla igl unviern.

Anecdotas raschunan ins dalla Stena, apartias tuttavie, sco per exempel:

Ina poppa miola giu da **Salins** vegneva traso; ella hagi gust da nuot e possi ni far cul caz ni cun la palutta. E la Stena sissu; ella dueigi far stein dil min che magli tschintschigniva e trebla e seigi aspers e magli si tut. Ch'ella prendi sezza dil zerclen e fetschi buglir el sco da cuer strias e beibi e tuorni a beiber da quella tisana; ella hagi sill'aua ed ils narunchels schirien vi.

Ad in'otra hagi la Stena semegliontamein dau in prima cussegl. Lezza vevi in um che siglievi si e da tetg ora per mintga trapla. Peina agli te d'urtgiclas e mischeida el cun plantagen epi sbuglienta scosauda. Milsanavon - ch'el setegni en dieta e detti buca duront mintga tschavera vid la carn e magli suren buca aunc si igl endisch e tut.

Fontaunas

Soliva, Bruno. Indicaziuns al telefon. November 1985

La tissunza e siu taler

Dus talers en combra sur stiva ed il letg tratgsi en in cantun, quei ei ina manifestaziun. Giun stiva ha zatgi mess en pegna ed il barcun ei aviarts e tievgia per la letga. - Las teilas sil sughel fan da saver; duas femnas endiridas sedostan dad ir cul temps, la Johanna e la Martina Venzin, duas feglias ledias dalla Margreta Venzin-Peder da **Rueras**. Avon onns han ellas tessiu zatgei pigl artisanat indigen - per pauc detgavunda. Dapi da daditg enneu urdeschan ellas plitost mangola e tilan en lumpa. Cun teppis da colur viva e da sdrems pon las tissunzas tener tila cun enzatgi.

Forsa che la Johanna ei la tissunza per propi; el petgen da glietschs sefan las vegnotg purtadas cun lur fils fins e satels che dattan schigentamauns. Suenter che la tschefla ha traversau la teila, dat la tissunza ina frida pli leva ed ina onz pli stagna cun la cassa; il petgen sez siara mintgamai il fil. Ed en quei mument che la cassa ei tratga anavon, passa la tissunza sin l'auter pass. Il moviment cuntinuau da peis e mauns fa pretensiuns seriusas. In dils fils sa magari rumper, in auter stat anavos, ferton ch'il tierz ei lucs ni ch'in dent dil petgen va empermiez.

Ina teila da 30 bratscha (in bratsch = 80 centimeters) ei in tschuat e lai far giu e far giu (far giu vul dir teisser). E sch'ella fa giu ina ed ina mesa noda (la tissunza quenta suenter nodas, ina noda quater bratscha) tucca ei per cass da schar pigliar, aschia 7-8 uras mintga di.

Da giuven ensi han la Johanna e la Martina Venzin da **Rueras** urdiu mangola e tratg en launa (mesalauna) e glin (letgs e batlinis e schigentamauns) e stuppa (blahs), mess a lumiar epi a schigiar e la finala blihiu las teilas sin la samada. Mo aschia dasperas - filau entochen Nadal, fatg si speuls il schaner ed urdiu per allura semetter en da detschiert duront la cureisma e teisser.

Dalla mumma Margreta ha ina e scadina dallas feglias retschiert sco dota tschun bellezza bials letgs da glin cun sdrems ed ina ragla lada che setegnan zuppai ella trucca ch'ei menada cun la clav.

Fontaunas

Venzin, Gion Antoni. Il fil dat teila, skizza culturala. En: Igl Ischi 42/1956, p. 95-117; *Intervista* cun las tissunzas sezzas.

La scarsinaria da Salins

Ins di **Salins Sura** e **Salins Sut**, duas uclivettas cun casas e clavaus e buntades, silmeins avon onns eis ei stau aschia. Sco per semeglia igl onn 1768, cura che **Salins** veva aunc ventgiasiat habitonts. - Aunc ha **Salins** da far enzatgei cun ina scarsinaria. Ver veva ina famiglia Gisler neu dalla Val da Fier la fatschenta. Cuortet avon l'emprema uiara mundiala ha il Sep Antoni Schmedt-Deragisch da **Mustér** cumprau la scarsinaria da Salins. La mumma Lucia ed ils fegls Josef e Benedict han scarsinau la launa - e quei onns ed onns, entiras plunas da sacs cun launa, da sutensi e ed in bien ton neu digl Uri. Igl onn 1947 ei igl Josef setratgs giu **Sumvitg**, a **Sogn Benedetg**, ed il Benedict e la mumma han fatg vinavon, tocca pressapauc ils anno siatonta, il Benedict silmeins.

Oz perencunter eis ei semidau dil taliter a **Salins**; odentuorn la veglia scarsinaria sefan las casas novas. Giusep Alig-Venzin (la dunna ei ina feglia da Giachen Antoni Venzin da **Rueras**) ha cumprau la casa dils Salinsers ed ha rugalau ella tscheu e leu.

Ed ils scarsins dallas zuolas spartan e sliagian buca pli ils gnocs e las zoclas e fan buca pli ina parallela culs cavels dalla launa.

La fabrica da filar a Sedrun

Buca ch'il menaschi da **Salins** vessi ugliu enzatgi da concuorer, cura che lez veva tondanavon strebel cul da viver. E tonaton ha Luis Jacomet (1899-1955), in vischin da **Cavorgia** secasaus a **Sedrun**, fatg l'emprova. El che fuva buca da daditg enneu semess en cun la Rosa Derungs e la letg giuvna veva in avegnir.

Igl ei stau all'entschatta dils anno 1930, il temps dalla crisa economica e ventgatschun onns e varga ha zatgi scarsinau e filau launa sisum il vitg da Sedrun. - En sacs malters ei la launa vegnida tut a dubel neu dil **Valleis** e digl **Uri**, silmeins tonta sco el **Grischun** sez. Las spediziuns ein buca adina stadas sufficientamein schubras, mo cun quei ch'ils indrezs per la lavur supplementara fuvan avon maun, han ins lavau e detg nuot.

Igl andament sez ei staus sco dapertut; la launa vegnida schetga va atras ils scarsins che schubregian ella da puorlas e rumians e stendan ils cavels parallel. Ils scarsins dallas zuolas fan lavur manecla ed il flor neu dils dents ei enzatgei da num.

Il principi dalla macchina da filar ei accurat sco da filar a maun, numnadamein: stender e dar la finezia giavischada epi storscher il fil, sina quei che la fermezia sefetschi. Duront l'uiara (en special 1943/1944) han ins era zuarnau maseinas e s'entelli tut a maun. La lavur da pesar e spedir (mintga furniziun per rembursament) ha fatschentau enzatgi ed il gudogn ei tuttavia staus beinvegnius. Bruno Soliva-Jacomet stat botta per sias indicaziuns; el hagi gudignau gliez temps treis francs mintga di e la spisa suren.

Pervia dil consum dalla forza electrica ha il menaschi magari giu difficultads, schebi ins ha luvrau di e notg en squadras, mo mai astgau surpassar las limitas da silpli 20-22 uras.

Malgrad che Luis Jacomet-Derungs e ses luvrers han teniu stendiu (il temps da fuola ha l'interpresa occupau 6-8 luvrers, certins mo per temps) ha la fatschenta pigliu la digren. Ualti spert suenter la mort da Luis Jacomet-Derungs (1955) han ins liquidau la fabrica. Dils locals han ins baghegiu ora ina habitaziun; Maria Luisia Jägler-Jacomet, la feglia dil fabricant, habitescha oz lien.

Fontaunas

Soliva, Bruno. Informaziuns a bucca dils 20 da december 1985

Ils calgers che van a dis

Cun lur rabaizas ein els dai en dad esch e pumfata sisum la stiva, la damaun marvegl, bunamein avon ch'ei pari dis. Ils dus frars, oriunds da **Cavorgia**, e calgers per propi. Enaquella ch'els han fiers il turnister cun la sutga ed ils laischs giun plaun, ei il gat mitschus orasut la pegna. Martials e zaungas e dasperas il peifier culla sibla ed il cunti mulau da tagliar il curom che sestgirescha ein tut caussas da num.

Ferton ch'il Luis seposta sper la finiastra e ferma ils fils suren vid il nuv dad arver, fa ir els entuorn e va culla peisch-rascha surenvi. Il trauc che setila sin ner dat color osum la detta ed il ner dallas unglas vegn grond. El cun sia vusch dad uors che ha traso in spass osum la bucca, el dominescha la scena. Il Leci encuntercomi fa stem dalla calzeramenta ch'ei messa en in migliac, tut raubetta scalchergnada ed isada ch'ei ora sil peter pir. Far in per calzers novs ei ina megliera lavur che cuntschar ils veders. Ed enten prender la mesira ed ir cul centimeter sur la ragisch dil pei dat ei enqual intermezzo, sch'il Luis catscha per semeglia ina quota spels pezs dalla detta-pej ed il caltschiel ei rentaus vid l'aissa da calger. Duront ch'il calger spanegia ils eglis e fa fentas da far enzatgei, sco per exempel da ruir giu in'ureglia, priu il cass ch'enzatgi detti is. Ferton ch'il calger schluppess avon che schar dar suto il rir, tuttavia sch'ina dallas buobelas prendan il spass da detschiert.

E da batter la gala vegnan ils calgers energics e paupra,- sch'enzatgi ughegia da far mucs.

Pigl auter ein ils dus frars neu da **Cavorgia** dus leghers cumpogns che contan e rian e rabetschan in'aura emperneivla en stiva. - Las mattatschas che pruin e las mattauns che spetgan cumpran ora ils dus calgers; davos noda vegnan ellas cun ovs e garegian ch'ils calzers schulien. Il tun entelgeivel dil schuit - schult cudezzi; ils menders ed ils mats semeinien ed aschia. E per tals giavischs dallas bialas han ils calgers in'udida.

Da miezdi e la sera maglian ils calgers si tut e la sera sontga sa cuzzar ina piazza, priu ch'ils calgers ed ils cussadents semettien aunc vid las troccas.

Fontaunas

Beer, fargliuns (Cristina, Sep Antoni, Ludovic). Informaziuns dils 9 da november 1985. Sedrun

Il fravi per propi

Sia truscha

Probablamein exista il mistregn da fravi gia dapi ch'il metal vegn culaus, pia in tschuat onns avon igl imperi roman. La lavur ei sefatga entras l'evoluziun dil temps e dalla materia. En nies temps ha el plitost da temprar l'iseglia dils purs e pinar ulteriuras caussas e caussettas dils vischins, sco per semeglia: las ruosnas barschadas en las cazzettas d'iom e d'alumini, ruogs e scadialas da tiara cotga, skis e scarsolas, gie magari perfin vischals da notg. Veva zatgi piars ina clav, ni era la barba dalla clav rutta giu, il fravi gidava adina ord las miserias. Ed ils carpians novs vegnevan enferrai en fravgia, ed ei veva num vus da saver tscherclar endretg ils carrs. Bia stenta dumandava il pitgar segirs e marcladiras, ils zappuns e zappins, sco era ils agens uaffens en fravgia. Batter ils fiars cavagl ed enguttar els era pil fravi in ver plascher. Perfin el smuttar e rugalar la grefla dils bos era el in bien cusseglader. Gie, schizun dents da latg saveva il meister ner trer ora, sch'ei fageva basegns e prescha. E l'aua forza per l'ischiva d'in member infectau, era quella furneva il fravi. Igl unviern vegnevan ils purs culs schambuns a pressegjar. Detg cun auters plaid, il fravi era ina persuna distinguida, silmeins cura ch'ins duvrava siu agid. Pigl auter untgevan biars el, cu el spluntava per la pagaglia che fuva pli che modesta.

Il luvratori

La fravgia, quei local stgir cun preits reschneas e tartginadas dil fulin e dalla vapur d'aua che sedat enten dar tempru al metal, veva daditg enneu ina calamita tut speciala per giuven e vegl. Cheu era il local da sentupada temps da malauras e tuttavia igl unviern. Roschs umens e buobs stevan a garnugl ed eran savens en peis al fravi. Lez che veva il tgil plein lavur semudergiava e barhava d'ina alva a l'aua, e quei savens per strusch in engraziament. El luvratori regeva per regla in pauper uorden, quei silmeins da vesta dil laic anora. Mo il fravi sez saveva exact, nua ch'el veva cavigliau quei uaffen ni tschei utensil. Il center dalla fravgia era la fueina e la massa ed il butschin d'aua. Cheu era il fravi propi da casa, leu nua ch'il fier cauld vegneva battius e modulaus tenor giavisch e nua ch'el ei daventaus in ver artist. Tut quei che sefuorma sut il marti, semeglia sempel, mo igl ei in resultat d'ina habilitad nundetga. Fier cauld tucca ei da batter dabot ed inschignusamein, aschiglioc sesfreida el schi spert che tut pitgem porta pign fretg. Bugliadiras pli pretensiusas, sco per exempel igl entschilir segirs e sigurins, fageva il bien fravi el fiug. Cheu vegneva igl itschal buglius perfetgamein cugl ulterior fier dalla segir. Jeu vesel aunc oz quella bellezza flomma reschblaua che seformava sur la cotgla, cu la temperatura era ideala; ussa fageva ei prescha dad ir e marclar sin la massa ch'ei tut sbrinzlava. Era en quella lavur severificava il ver mistergner artist. Vieifer la fueina steva ina hazra mola da crap che vegneva movida d'ina transmissiun da curegias che fageva sterment. Dasperas in sempel smerigl steva aunc in apparat vegl da tagliar fier ed ina maschina da furar. Schia, quei era pressapauc tut las maschinas en fravgia. Bein, aunc in apparat sempel da buglir autogen veva il fravi era da lezzas uras. Il baun da luvrar era sempels, mo fetg stabils. Pli bia duvrava il fravi buca, quei che muncava construeva el sez dafertontier. Illuminaus vegneva il local d'ina cazzola brausla, pendida vid la preit sur il baun. Per l'aua era la schliata glisch en fravgia era d'engrau, cura ch'il fravi luvrava cul fier cauld. Las nianzas dalla colur dil metal indicavan la temperatura ed aschia saveva il mistergner adina entschilir tenor basegns, inaga pli fetg ed inaga pli pauc.

Sia manonza

Damai che jeu hai giu il cletg da passentar mi'entira affonza el cerchel stretg d'ina fravgia, enconuschel jeu la caussa da rudien. Igl ei lavur stentusa, il far fravi, ed ella

pretenda ina sanadad da fier. Emprender sa mintgin il mistregn, mo esser in fravi per propi, gliez drova dun. Igl egl sto esser scolaus e pipa da differenziar tuttaz nianzas dalla colur, quei ei nundispensabel per saver luvrar cul fier buglient. Epi, senn e gust da dar fuorma. La crusch da fier en santeri fatga dil maun inschignus da fravi ei ina perdetga viventa per il mistergner d'art. Oz san ins cumprar tontas e tontas caussas prefabricadas culla maschina. Il fravi sez ha mo pli da buglir ensemen, e quei ei mo mesa lavur. Miu bab ei staus in fravi da num. La fravgia ei stada siu dacasa. Cheu saveva el semiserar cun in artist d'ozildi. Ad in toc fier freid e stinau saveva el dar fuorma e veta. Fuva la lavur fatga, allura scriveva el quella en successiun cun in greffel sin ina tabla da platta morta. Tochen il davos digl atun s'emplunava tabla sper tabla leu en fravgia sil baun finiastra, in rosch da quendis e varga. Tard viaden egl atun prendeva el allura quellaz notizias sin stiva e scriveva per mintga client in conto en ina gronda agenda. Biaraz tablas ch'eran igl entir onn ora en fravgia fuvan tartignadas taluisa, ch'ei era da leger mo la mesadad. Mo quei ch'era buca pli da saver leger, per quei vegneva buca tschentau quen.

Basta, suenter haver giu scret tut giud las tablas en l'agenda, per lura vegneva il quen per mintga vischin screts. El incassava ils quens la dumengia suenter messa. Con mal stueva ei far al car bab, cu el tunscheva cun siu maun mudergiau e tschuf il quen al vischin per la lavur digl entir onn ora e quel veva buca pli raps da pagar el. Ei deva nuot auter che spitgar e sperar. Numdadiu, ei era semplamein aschia, igl emprem vegnevan ils auters e per suenter il fravi, e per biars tunscheva ei buca pli per quel. Mo cul mistregn vess il bab maina saviu nutrir la famiglia. Il chischlet armauls e tiers manedels en nuegl ei adina staus dapli che d'engrau.

Mulins e muliners

Lez onns ch'ils vischins da **Tujetsch** han aunc mess ora passa treitschien tschaveras graun ein ils mulins sterna per l'entira val stai da gronda purtada, quels baghetgs sco tegias giudapeis allas auas, naven da **Prau Mulins** dadens **Tschamut** entochen **Mulinets** spel **Drun da Bugnei** ed allas rivas da **Nalps** e **Val Giern**.

Oravontut duas familias han sviluppu in'activitad immensa sco muliners; igl ei quei ils Giossis sper l'aua dalla **Val Mila** a **Rueras** ed ils Solivas spel drun da **Sedrun**. Ed ei drova in tschuat fantasia da sefigurar cascadas e canals e sclusadurs e la funcziun dalla roda-mulin.

A **Rueras** ei il baghetg remarcabel naven dil tut, a **Sedrun** perencunter mola zatgi aunc, ella **Tgèsa Mulin**, vieifer la punt. Silmeins in tec dumiech aschia - che vegn ruts per dar da lenscher als tiers. E pervia da quella pintga quantad che vegn miulta sepaga ei buca pli da prender la flur per il diever en casa, sco per semeglia da far la broda.

Igl onn 1984 han ins miult nuot dil tut a **Sedrun**. Encuntercomi igl atun 1985 ei Duri Vigeli Cavegn, dils anno 1918, vegnius cun siat sacs dumiech, en tut pressapauc 190 kilos. La notizia ch'el ha fatg silla preit en mulin di, ch'el vessi bugen in techet frina biala. E siu giavisch ei buca ius en vigur, essend ch'ei ha buca valiu la peina da metter en funcziun ils dratgs fins.

Navenda 1957 mola Pieder Deflorin, in vischin neu da «dadains gl'uat». El che ha maridau l'Anna, la feglia da Duri Vigeli Soliva-Beer e la niaza dil muliner per propi, dil Giachen Antoni Soliva (1885-1963). Ils emprems onns ha Pieder Deflorin miult dabia, entochen 10 tonnas ina ga ad onn; aschia duront il meins da november, tocca 14 uras ina suenter l'aua, 500 kilos mintga di ed ina multira da 20 raps il kilo.

La lavur ei biala e las molas van grazia alla forza electrica e la tschenta da transport ei ina cumadeivladad. Pil Pieder Deflorin ei la lavur da muliner ina variaziun e l'occupaziun schi emperneivla sco da far il manischnun cun autos da vitgira u la truscha vid ils runals. Ed ei vegn a vegnir adaquella ch'el ei il davos muliner dalla val, tuttavia uss ch'ins ha entschiet a vegnir cun la medunza-schudunza da sutensi sils ers ed il dumiech va ladinamein anoragiu. Quels paucs che s'arranschan e mettan ora il dumiech en emprema lingia pervia dil premi da multira.

Fontaunas

Deflorin, Pieder. Indicaziuns a bucca, 7-11-1985. Sedrun

Smart SA a Sedrun

Smart ei ina societad d'accias; la fabrica ha siu domicil a **Sedrun** e producescha nezzas, oriundamein nezzas da far la barba. Il basegns da lezzas uras ei staus gronds ed ils coiffeurs han fatg pretensiuns. Oz perencunter fabrisheschan ins nezzas dallas uisas, oravontut per l'industria.

Ina fabrica ella **Val Tujetsch** ei enzatgei da num, aschia enamiez in'economia purila ed in turissem en flur. - S'entelli che ina interpresa semeglionta sefa buca enina; enzatgi ha dau in stausch da detschiert.

Igl ei stau in jester cul num Szabo che ha schau baghegiar ina casa en **Tujetsch**, ina da vacanzas ual sut la staziun denter **Gonda e Camischolas**. Igl um spir curtesia ha gleiti anflau contact cun la gliend dalla val e president communal Theophil Schmid, il mistral da pli tard, ha ugliau il hosp da vacanzas da vegnir e producir sias nezzas a **Sedrun**. Ad enzatgi ha ei tuccau da far dabia uliv; ils sforzs ein buca stai per nuot.

Igl origin da Smart

La fabrica da metal deriva da **Vienna** neu digl onn 1932 ed ha produciu all'entschatta nezzas da far la barba e dasperas cigarettas. La fatschenta ha giu ell'**Austria** in bien num ed ei vegnida enconuschenta sur ils tiarms dalla tiara ora. Entochen che la firma Szabo-Weber SA a **Turitg** ei seschada en cun **Vienna** ed ha acquistau l'entira fatschenta. E perinaga ei la fabrica stada a **Turitg** ed ils anno 1969 han ins translocau la fabricaziun a **Sedrun**.

Il fundatur Szabo miera 1969, enamiez las lavurs da baghegiar. Malgrad la frida han ins menau vinavon e la fabrica a **Sedrun** ei sefatga.

Ils apparats da tagliar cavels, mess neu d'ina materia sintetica han ora ed ora giu in bufatg esit. Il cau dall'interpresa ei buca staus culs mauns en sac; maschinas fatgas aposta per quei diever singular han fatg ir vinavon la produzioni ed ulteriuras ein vegnidas vitier. La cumpletaziun digl onn 1974 ei stada d'impurtonza. Ultra dallas nezzas da far la barba han ins entschiet a far dallas uisas nezzas, tuttavia nezzas da tagliar teppis ed aschia.

Harry

Harry ei in hit dad ussen, in prima tagliacavels, construius d'ina stupenta materia sintetica che fa bravuras dapertutanavon.

Tener tila cul reglament da fiera da nos dis, gliez ei buca honzeli. Nunche il product seigi excellents, autramein va ei semplamein buc. Ei fa oz la pareta che la Smart a Sedrun hagi capiu la pretensiun dil mument. Ins retscheiva las incumbensas e realisescha ellas ual tenor il basegns ed il gust dil client. Leutier drova ei secapescha las maschinas adattadas e che corrispundan alla pretensiun dad ozildi. Las apparaturas d'automatisaziun fabrisheschan ins egl agen luvratori. Ina tenuta semeglionta pretenda; ed esser sil current taluisa ei in strapaz.

Schau ora cups

Enzatgi sto adina tener stendiu. Il fundatur ha stuiu murir avoncaduras e siu fegl Stefan Szabo ha stuiu siglir els fiars bien e baul. Stefan Szabo veva tuttina empriu enzatgei e las enconuschientschas dil menaschi ein stadas d'engrau. Sco per semeglia las experiencias dalla fabrica a **Solingen** ha el tratg bein a nez; dallas sistischen interpresas da caussas da tagliar existan oz mo ual curonta, forsa. Tut las autras han ils gronds concerns smuttu e magliu. E Stefan Szabo ei staus pertscharts dil fatg; el ei semess en da detschiert, ha schau sviluppar maschinas aposta, per gie puder tener la dira alla concorrenza.

Stefan Szabo stat oz alla testa dil cussegl d'administraziun e meina la fatschenta da **Turitg** anora.

In bien cader

Per ch'ei mondi bein, drova ei buna glied. Per exempel sch'il patrun ei aunc dalunsch. E las premissas mauncan buc. Stefan Szabo metta gronda peisa sil fatg che ses umens che stattan davontier hagien in bien maun, buca mo sco specialists, mobein era dad entruidar enzatgi en enzatgei. Sper l'enconuschientscha dalla lavur e dalla qualidad dalla materia drova ei aunc dapli. Ils umens dil rom ein pri neu dils fravis d'utensils e dils mecanists che sescoleschan vinavon els fatgs da professiun. Far igl empaladur denton, gliez pretenda.

Stefan Szabo ha in sentiment per la glied dalla regiun, aschia ordamiez dil puresser ed ord la laisa dil turissem. La lavur precisa sidavon ina maschina damonda e garegia in bien ton. En mintga cass dapli che l'ulteriura lavur sin quei e tschei plaz da lavur. Epi surtut ina perseveranza, aunc pli gronda ch'in paster dad asens. Esser da cuoz e spitgar cun pazienza, gliez ha num vus. E la disa tschenta damondas.

Per satisfar a quella pretensiun, ha Stefan Szabo priu siu cader ed ei ius cun el en in seminari on **Tiaratudestga**. La strategia da fuormas e la dinamica da gruppament sto esser emprida; la sentupada cugl empermer carstgaun ed ir in cun l'auter ei ina dallas pli grondas premissas. Forsa ual en quei senn ha Stefan Szabo fatg gronds sforzs. E ual quei fatg san ins semplamein buca metter d'ina vart.

La materia prima

A per cul bien maun dil luvrer va la materia prima e la buna intenziun ei impurtonta, sco per exempel ch'ins hagi ina relaziun cun quella rauba criua. Stefan Szabo retila ella, igl itschal per semeglia, neu dalla **Svezia**, **Tiaratudestga**, **Frontscha** ed **Engheltiara**, la substanza sintetica perencunter deriva dil **Canada** e dalla **Belgia** e **Hollanda**.

Plazs da lavur

Il patratg dil fundatur e da tut quels che han susteniu l'interpresa stat enta maun. Tons plazs da lavur sco pusseivel ella val, sinaquei che la glied indigena sappi star a casa. E pressapauc vegn plazs da lavur dat la Smart en **Tujetsch**; quei ei bia. Stefan Szabo secuntenta buca cun quels; el vul engrondir e cumpletar in bien ton.

Per che la Smart sappi e semantener e survivor, tucca ei d'impunder. Sa mintgin che las pagas ein tuttavia buca stravagantas, lein dir permiezvi ed adualas allas ultras interpresas da quei gener.

Dil reminent ein ils plazs da lavur per femnas da gronda purtada; pressapauc 6-10 giuvnas e dunnas lavuran en fabrica. In pachetadi prompt e fidau ed ina buna spediziun han num vus. - Ed ina ulteriura caussa mereta menziun; ins sa era luvrar a casa, per bein enqual femna ei quei bein ina lavur adeguata.

La fabrica Smart ha in temps da lavur movibel e normalmein fan ils luvrers nov uras mintga di, meinsilmein 180 uras.

La sviulta digl onn 1986

Ins ha l'incarica e la lavur ei programada sco suonda:

- 15 milliuns nezzas d'industria per teppis ed aschia
- 1 ½ milliun nezzas da tagliar cavels, sistem vegl
- 400 000 tagliacavels «Harry» e las nezzas leutier

Ton ch'ins sa quintar cun ina producziun da 3 milliuns francs.

Il product sereparta:

- 8 pertschien en **Svizra**
- 40 pertschien **Tiaratudestga**
- 42 pertschien en autras tiaras

L'organisaziun dil menaschi

- societad d'acziis

- cussegl d'administraziun
- administratur Stefan Szabo
- caumenaschi a **Sedrun** Mario Flepp
- schef da producziun e substitut Gion Cavegn
- administraziun Annemarie Schlegel

schefs da squadra:

- Roland Riedi, luvratori e materia sintetica
- Andreas Monn, pachetadi e spediziun

luvrers specialists:

- Fernando Schuoler, menaschi da tagliar ora
- Willi Hendry, temprà d'endirida
- Luis Monn, mularia
- Paulin Deragisch, mularia
- Norbert Dibella, mularia
- Bernard Degonda (substitut)

Intervistas:

Stefan Szabo, Turitg, e Mario Flepp, Sedrun

Tujetsch e sia economia

Lunschora il pli dallas vuschs han ils purs giu en **Tujetsch**; purs pigns ch'ein setratgs atras cun stenta e fadigia e che han giu nuot danvonz. Epi - cun tschien e varga parcelas, sternidas dapertutanavon ei il menaschi daveras buca staus fetg raziunalisau. Ed ins emblidi e buca il manteniment da tons nuegls e baghetgs e faners ed aschia. Nuotatonmeins ei sapocu in dils vallers vegnius sura ed ha fatg bancrut, quels vallers cun lur spert da manischar e tener adaquen enzatgei. Dasperas ha ei matei adina dau gliend da mistregn, prima fravis e scrinaris e vischlers e casarinas che han saviu filar e teisser sco negliu.

Il di dad oz

Aschia sil plum schess negin; **Tujetsch** ha oz 126 patrums che dattan lavur ad enzatgi, era lura, sch'els dattan lavur mo ad els sezs. E quels 126 patrums dattan paun a 665 personas che serepartan sco suonda:

Plazs da lavur indigens	Svizzers	exteriurluvrers	sur onn	temporar	umens	femnas	gudogn	
665	403	143	119	355	310	404	261	Ø 2700

Ed ei vala la peina da luvrar ora la pasta, ina pasta che sefa nuota mal, sch'ins caveglia ella tanientamein:

suttetgs

10 hotels

20 casas da colonias

3 bars

2 caffeterias

victualias

7 fatschentas

2 pasternarias

2 cascharias

3 mazlarias

vestgadira e sport

4 fatschentas

8 fatschentas da rauba manecla

biros
6 biros d'architectura
fabricas
1 fabrica da nezzas

mistergners per propi
6 lennaris e scrinaris
2 fravis
2 calgers
2 resgiaders
4 installaturs
4 garaschists
6 frisunzs e frisunzas

fatschentas da construcziun
5 interpresas

beinstar public
1 miedi
1 casa da vegls
1 bogn cuvretg
1 serenera
2 ovras electricas
1 staziun da viafier
3 biros da posta
2 bancas

Dils patruns gronds san ins numnar:

	patruns	Luvrers sur onn
1. Vischnaunca da Tujetsch (administraziun, runals, ovra electrica, uauls e.a.v.)		39
2. ORA (Ovra electrica Reinanteriur)		25
3. Fabrica da nezzas, Smart		22
4. Murer SA, fatschenta da construcziun		21
5. Viafier Furca-Alpsu , staziun e crampers		17
6. Loretz SA, fatschenta da construcziun		15
7. Soldanella, casa d'affons		12
8. Frars Berther, construcziun da lenna		11
9. Frars Giossi, construcziun da lenna		9
10. Coop, victualias		8
11. Schmid-Bass Marcel, pasternaria		8
12. Constraba SA, fatschenta da construcziun		7

Sco detg - ils luvriers domineschan ed igl ei instructiv da saver, nua ch'els stattan e tgei che mintgin ha empriu:

liug	total	mistergners	entruidai	studegiai	luvriers
Sedrun (Bugnei, Surrein, Cavorgia)	220	58	63	12	87
Rueras (Selva, Tschamut)	77	31	6	3	37
Camischolas	30	13	4	3	10
total	327	102	73	18	134
en %	100%	31,20%	22,30%	5,50%	41,00%

Ina ulteriura statistica muossa ora che **Tujetsch** hagi, quintau ils purs ed ils luvriers:

143 = 38,25%	pensiunists
13 = 3,45%	invalids
17 = 4,55%	ledis
46 = 12,30%	vieuas
11 = 2,95%	vieus

Ils vallers da **Tujetsch** ein glied da gronda curascha ed han buca tema digl avegnir. Ed ad ina damonda tondanavon persunala han ins rispundiu senz'auter, aschia:

(total dallas persunas dumandadas = 374)

340 persunas =	90,90%	vesan clar
34 persunas =	9,10%	vesan stgir
344 persunas =	92,00%	stessen aunc inaga ella val
30 persunas =	8,00%	fussen idas egl jester

Dils 37 purs ella val, fagessen 9 = 19,15% buca pli il pur

Il diever dallas auas

Aqueducts

Nos perdavons han baghegiu lur avdonzas damaneivel dils uals ni en loghens, nua ch'ei fuva la pusseivladad da menar neutier l'aua en dutgs ni canals entochen tiels begls da lavar e buentar. En casa havevan ins buca indrezs d'aua. Talas installaziuns ein vegnidas fatgas alla fin dil schenivavel tschentaner els emprems hotels dalla val e quei mo il pli sempel e necessari. Els vitgs havev'ins pistregns comunabels che survevan per far la lischiva gronda e magari era per caschar ni per la mezca da casa. Per part fuva quei pistregns cun dretgs da gruppas da vischins.

Zun interessant eisi era da constatar, tgei lavur nos vegls, probablamein emigrants vallesans, fagevan per menar neutier l'aua en lur aclas e mises. Aschia han ins avon tschentaners tschaffau l'aua da **Mila** e menau quella atras gondas, vals e crests sur ils baghetgs da **Mila** tiegl anteriur mises dil **Gendus**, sut igl **Uaul Flurin** ora entochen sil **Crest Tschuppina**. Pertgei ina semeglianta tenda dutg? Sin quella lingia eran ils «hofs» da **Mila Sura**, **Cascharolas**, **Cresta** e **Valschella** (probabel **Pardatsch**). La **Via Dutg**, sco ins numna ella oz, ei ina dallas grondas perdetgas dall'antieriura presenza dils Vallesans, e talas perdetgas anfl'ins aunc en auters loghens dalla val.

Aua per vitgs ed uclauns

Tschamut

Ils emprems avdents dil vitget da **Tschamut** han tschaffau l'aua per lur provediment in per tschien meters enasisu las casas e menau neutier quella en bischels da lenn. Ei fuva plitost aua da schliata qualitat (paliu) e bein savens havev'ins scartezia d'aua. Il begl comunabel era tschentaus sper ils baghetgs davart sut dalla via. Leu vegneva ei lavau, buentau e sesurviu cun aua pil diever da casa. Igl onn 1865 ha Lucas Cavegn, hotelier da **Sedrun**, baghegiu il hotel Rheinquelle ed ha sco emprem menau l'aua en in agen conduct da bischels en sia casa d'albiert.

Duront ils onns 1912-1914, cura ch'ins baghegiava il trasse dalla viafier **Furca-Alpsu**, haveva in pulit diember da luvriers lur domicil a **Tschamut**. Cunquei ch'ins haveva manco d'aua, han ils vischins da **Tschamut** concludiu igl onn 1913 da tschaffar ina fontauna enasi **Plaunca Biala**, alla spunda dil **Calmut**. Igl ei vegniu installau in conduct da bischels da differentas grossezias (diameter). Sco ei vegn raquintau, han ins stuiu purtar tut il material d'installaziun sil plaz e quei fuva stentus. Las purtadiras smaccavan sin la schuiala e per levgiar empau il transport, hagi ins tschentaus ils bischels satels enasisum ed ils gross oragjudem. Quei ha giu la consequenza ch'ins ha mal giu la pressiuin sufficienta, tuttavia buca pils dus hidrants dil vitg.

Cul temps han era ils vischins da **Tschamut** installau l'aua ellas casas. Damai ch'il schliet conduct era empau defects, pudeva ei buc adina furnir aua avunda, principalmein duront igl unviern. Las difficultads carschevan onn per onn. Per temps deva ei nuot auter ch'ir per l'aua dil begl sco pli baul. Quella situaziun ha cuzzau duront plirs decennis. Ils onns 1976/77 han ins finalmein acceptau in project digl architect Meinrad Gamboni e baghegiu in aquaduct niev. L'aua da **Plaunca Biala** ei vegnida tschaffada empau meglier. Il reservuar ha in cuntegn da 150 m³, il conduct niev, las installaziuns el vitg ed ils quater hidrants survechan oz cumpleinamein al basegns da quei vischinadi.

Selva

La fracziun da **Selva** retergeva dapi ch'ins seregorda l'aua pil provediment dil vitg giud la **Val dil Plaun**. Sco conduct surveva ina turera che menava l'aua tochen giu sper la casas. In tschancun sur ils begls haveva ins erigiu in truc da lenn e da leu flessegiava l'aua en bischels. Cunquei che quella pintga tschaffada el vitg vegneva adina puspei tschuffernada, han ins pli tard construiu quei truc in toc sur las avdonzas. Ils dus begls amiez il vitg survevan sco dapertut per lavar resti e buentar. Leu stueva mintga casarina ir di per di per aua da cuschinar e pil diever da casa.

Ils dadens igl uaul ein stai iniziativs e progressivs. Il fevrer 1926 concludan els da baghegiar in aquaduct niev. Els tschentan alla vischnaunca da **Tujetsch** suandonta damonda:

«**Selva**, ils 9 da matg 1926

Alla Tit. Suprastonza per mauns della ludeivla vischnaunca **Tujetsch**

Sut datum dils 27 da fevrer 1926 han ils vischins de **Selva** concludiu definitivamein de metter en in aquaduct. Sequent aquaduct vegn fatgs sco suonda:

L'aua vegn tschaffada sur la lingia e vegn menada giu en il reservuar, il qual vegn fatgs sut la lingia. Il reservuar survegn in cuntegn de 25 000 liters. L'aua vegn menada en ina lunghezza de 260 m rors, che han ina grossezia de 6 cm. Igl aquaduct survegn dus hidrants, ils quals vegnan tschentai, in sissum il vitg e l'auter giudem. Igl aquaduct vegn calculaus total sin 8000. - frs. Ils vischins da **Selva** damondan per il sura aquaduct in subsidi la vischnaunca de 10% e silmeins 80% dils cuosts dils schlauchs.

En num dils vischins da **Selva**

Venzin Placi

Giger Gion Battesta»

Ils da **Selva** han buca battiu ditg plans, mobein ein semess immediat alla realisaziun da quei project. Per spargnar cuosts ha ei tuccau a mintga vischin da prestar in tschuat lavur cumina, ch'ins ha repartiu sin las 21 casadas e sin il diember da tschuncheismas fein (203.03 tschuncheismas)

Sin fundament d'in quen final exemplaric, il qual ei deponius egl archiv communal, san ins constatar ch'ils vischins da **Selva** han luvrau total 2597 uras a 0.80 frs. l'ura, pia pigl importo da 2077.60 frs.

Il quen final per quei aquaduct sepresenta sco suonda:

1. Installaziuns e furniziuns da material	5 470.50
2. Lavur da miradur	466.40
3. Lavur dils vischins da Selva (sco sura)	2 077.60
4. Scaffa da schlauchs	50.00
5. Quen d'administraziun	66.00
	8 130.50
Diversas reduenziuns	100.00
Total cuosts	8 030.50

Quei ei bein in exempel eclatant, co nos antenats fagevan calculaziuns seriusas e sespruavan da gie buca survargar ils cuosts calculai. Il cantun **Grischun** ha dau per quei aquaduct da **Selva** ina contribuziun da frs. 1099.30, 15% da 7 328.50 francs. Aschia astgan ins bein pretender ch'ils da **Selva** havevan a sias uras in dils megliers aquaducts ella **Val Tujetsch**.

Dieni

Ils proprietaris da funs e baghetgs ed ils emprems avdents da **Dieni** retergevan l'aua da diever ord ina buna fontauna dator la punt, enasisu la hodierna via cantunala e pli tard ella **Rufna**. Cun l'erecziun dil stradun ha ei dau ina midada. Ins ha lu baghegiu in tumbin e menau l'aua atras la via nova giu en in begl da lenn ch'ei pli tard vegnius remplazzaus entras ina fontauna da betun. Duront il temps da buentar ha ei dau cheu bein enqual sepugnada denter «carpiens» e pugnieras. Buca senza raschun selamentavan las masseras meinsvart ch'ei seigi lunsch e ualti fadigiun dad ir per aua e lavar il resti, tuttavia duront il temps d'unviern.

Igl onn 1949 ein ils vischins da **Dieni** seligiai cugl aquaduct **Fontauna Sogn Gions** ed ins ha lu erigiu ina biala fontauna denter la via veglia ed il stradun cantunal. Secapescha ch'ins ha cun quella caschun era installau l'aua ellas casas.

Sin la stagiun d'unviern 1962/63 han ins mess en funcziun ils runals **Dieni-Milez-Cuolm Val**. En lur vischinonza sesviluppescha in'activitad intensiva da baghegiar. Il vitget fa prova e s'extenda encunter sera. Per proviantar cun aua las casas e fatschentas dadens la punt, ein ins necessitai da prolungir il conduct entochen tiels luvratoris e tier la staziun dils runals.

Rueras

La situaziun a **Rueras** era pli baul empau mendra ed ualti cumplacada. In per proprietaris da casas sur ni sper il stradun cantunal havevan erigiu agens conducts per menar neutier l'aua. Aschia haveva Giachen Lurenz Caduff, fravi, tschaffau in'atgna fontauna sur **Rueras**, dadens l'anteriura casa dil Fridulin (nua che la casa Imthurn stat oz).

Medemamein havevan las famiglias Brugger e Vigeli Venzin (casa dalla posta) odem il vitg in agen aquaduct cun ina fontauna sin la **Val da Crestas** sut il **Crap Gries**. Ils avdents entadem e per part amiez il vitg retergevan l'aua pil diever general e per la casa ord igl ual dalla **Val Mila**. La semplia tschaffada era construida sut il tumbin dil stradun cantunal. En in rapport dils 11 da settember 1918 recamondan las instanzas cantunales d'encurir autras fontaunas, essend che quell'aua vegneva savens tschuffernada. Sinquei anflan ins e tschaffa ina fontauna enasi **Trutgs** sper l'ustonza. Quell'aua surveva per diever da casa ad ina grupp da privats. L'aua pil begl grond communabel vegneva aunc adina ord igl ual dalla **Val Mila**.

Per haver empau reserva d'aua en cass da fiug, han ins plinavon tschaffau aua sur la lingia da viafier e menau quella en in dutg aviert giu en in pign reservuar sper il pistregn e sper la fontauna amiez il vitg. Il provediment cun aua da diever e fiug era denton improvisaus e tuttavia buca sufficientes. Ins stueva plaunsiu encurir autras sligiazions. Ils 24 da zercladur digl onn 1931 ha la vischnaunca dau la concessiun allas fracziuns da **Gonda, Camischolas** ed eventualmein da **Zarcuns e Rueras** (tenor protocol dalla corporaziun digl quaduct **Fontauna Sogn Gions**) da tschaffar aua da 5 ni 6 fontaunas sin territori da **Fontaunas Sogn Gions, Dadens il Mir**, per in aquaduct cun hidrants, proviantaziun d'aua per la fontauna dils numnai vischinadis ed en casa.

Deplorablamein han ils vischins dalla fracziun da **Rueras** buca saviu s'entelgir e sedecider da far caussa communabla cun las autras fracziuns e quei malgrad in plogn purtaus da plirs vischins encunter l'opposiziun e decisiun dil vischinadi. Ins raqueta da sedutas ualti burasclusas.

Ils habitonts odem il vitg da **Rueras** formavan in'atgna corporaziun. Els havevan tschaffau ina fontauna si sut ils baghetgs da **Cresta** e possedevan in agen begl da lavar e da buentar e pil diever da casa. Quel era situaus sut la casa nova da Vigeli Venzin.

Igl onn 1938 ein ils coninteressai stai radunai per decider d'engrondir la tschaffada (rimnar pli bia aua), rugalar la turera ed il conduct e plinavon da schar construir in begl da betun ella dimensiun da 3 m x 0,50 x 40 ed in begl da lenn per lavar (ord il protocol dalla corporaziun). La repartiziun dils cuosts per quella midada era fixada tenor ina clav sils dretgs sco suonda:

1. ina quarta sils fiugs pil dretg da lavar
2. ina quarta per aua installada en cuschina
3. ina quarta sils dretgs da buentar tiers manedels
4. ina quarta sils dretgs da buentar tiers gronds

Sin mintga quarta dretg ha ei tucchau da pagar ni luvrar per 61.65 francs. Els vischins han luvrau 355 uras per pressapauc 0.75 francs l'ura. Aschia ha quella megliuraziun custau la summa da 514.90 francs. Era quei ei in eclatant exempel, co nos perdavons repartevan minuziusamein ils cuosts e co els luvravan, spargnavan e segidavan. Quella situaziun a **Rueras** ei restada entochen igl onn 1947. Suenter liungas e ualti diras contractivas cun la corporaziun **Fontauna Sogn Gions** ein ins vegni a frida da far in contract cun quella societad; dapi 1949 retilan ins tut l'aua da beiber e per hidrants da quei aquaduct. L'indemnisaziun per quella colligiaziun ei vegnida fixada sin 27 500. - francs, l'amortisaziun annuala silmeins sin 1000. - francs.

Per menar vinavon las fatschentas pendentas, sco per exempel la liquidaziun ed amortisaziun dils deivets, manteniment da conducts e fontaunas, incassos ed aschia, han ils vischins da **Rueras e Dieni** fundau ina societad nova cul num «Aquaduct **Dieni-Acla-**

Rueras». Quella ha administrau la part dil aquaduct naven da **Zarcuns** entochen **Dieni** e quei entochen igl onn 1970. Seligiaj, respectivamein s'integrai definitivamein alla corporaziun **Fontauna Sogn Gions**, ein ins per ils 27 d'avrel 1958. Dapi lu exista ei mo ina corporaziun. Igl ei stau il tierm final d'ina ualti liunga e buc adina emperneivla historia.

Aquaduct Fontauna sogn Gions

Il stausch final e definitiv per la fundaziun dalla corporaziun **Fontauna Sogn Gions** ha la ferdaglia dilg unviern 1931 dau (mira protocol dalla corporaziun). Principalmein ils vitgs da **Camischolas** e **Gonda** han giu miserias d'aua. En diversas radunonzas separadas e comunablas han ils dus vischinadis tractau la damonda per l'erecziun d'in aquaduct ed alla fin da matg 1931 han ins decidiu da far caussa comunabla. Era ils vischins da **Zarcuns** ein bein spert sedecidi da seprofitar da quella caschun. La preparaziun dil project ei vegnida surdada ad inschignier H. Solca ensemen cun M. Stauber, **Cuera**.

Sco gia menziunau pli baul, ha la vischnaunca dau ils 24 da zercladur 1931 la concessiun da tschaffar las auas da 5 ni 6 fontaunas sin territori da **Fontauna Sogn Gions**, **Dadens il Mir**. **Rueras** e **Dieni** han lu buca aunc saviu sedecider da far part da quella corporaziun.

Sin fundament dils plans presentai dils dus inschigniers, han ins saviu surdar ad uras las lavurs ch'ei aunc vegnidas terminadas quei onn.

Enzacontas cefras

Lunghezia dil conduct cun bischels 100 e 125 mm diameter: 1400 m;

Grondezia dil reservuar = 150 m³, inclusiv 100 m³ reserva da stizzar.

Bonificaziun per traversar ils praus = 2,5 raps il m², pil plaz dil reservuar 500 francs.

Cuosts finals: 94 467.45 francs

Subvenziun cantunala: 14 100. - francs pigl aquaduct e 452.50 francs per ils cuosts da 90 000. - francs.

El decuors dils onns 1949-1962 ein ils commembers dalla corporaziun **Fontauna Sogn Gions** stai necessitai da tschalfar ulteriuras fontaunas a **Gonda Cotschna** e **Plaunca Fadal**, plinavon d'engrondir ils conducts e da far pliras midadas. Per consequenza dil svilup continuau en nossa val, ein tut quellas investiziuns buca stadas sufficientas. Ins ei perquei semess al studi da novs projects.

Ils 14 d'october 1981 surdat la suprastonza dalla corporaziun ad architect Meinrad Gamboni ed ad inschignier Rensch l'incarica da projectar in aquaduct ella **Val Mila**. Il project «**Val Mila**» cumpeglia 5 tschaffadas da pliras fontaunas, il grond reservuar ed il reservuar a Pardatsch cun in cuntegn da 500 m³, inclusiv reserva da fiug = 100 m³ - e plinavon il conduct da bischels da PVC cun in diameter da 200 mm. Ins entscheiva cun las lavurs ils 25 da matg 1982 ed ils 30 d'october da quei onn ei igl entir stabiliment gia en funcziun.

Ils cuosts totals muntan a biabein 1.3 milliuns francs.

Ensemen cugl aquaduct da **Salins** dispona la corporaziun **Fontauna Sogn Gions** oz da bunas reservas d'aua.

Zarcuns

Igl ei remarcabel ch'ils emprems habitonts da **Zarcuns** havevan buca baghegiu lur avdonzas damaneivel da uals e fontaunas. Els menavan neutier l'aua per lur provediment naven da **Plaun Pardé** ord igl ual dalla **Val Strem**. En in dutg aviert flessegiava quella sut ils baghetgs da **Camischolas-Sura** entochen tier la fontauna dil vitg. Ins po s'imaginar, tgei qualidad da bubronda quei era. Las masseras mavan la damaun marvegl per aua da diever da casa. Lu fuva ella aunc ina fuorma schubra e gudeivla. Igl onn 1931 han ins lu nezegiau la pussevividad da seligiar cun la corporaziun **Fontauna Sogn Gions**. Il provediment cun bun'aua ei aschia segiraus.

Camischolas

Sco **Zarcuns** fagevan era ils emprems habitonts da **Camischolas** diever dall'aua digl ual dalla **Val Strem**. En in dutg aviart e per part en canals da lenn menavan ins neutier l'aua. Sco ins raquenta, havevan ins savens difficultads durant unviarns freids. Neivs e glatscha interrumpivan tscheu e leu il vauet. Entuorn ils anno 1914 han in per gruppas da vischins entadem ed odem il vitg tschaffau l'aua dil vau da **Salins**. Ina sligiazion cuntenteivla ha ei dau per igl onn 1932, cu ins ha mess en funcziun igl aquaduct **Fontauna Sogn Gions**.

Sedrun

Nos perdavons da **Sedrun** han giu pli baul ualti dirs cumbats e diversas difficultads pervia dil provediment d'aua. Per spisgantar begls e fontaunas dil vitg, aveva ins tschaffau ina fontauna sin la **Val dils Bischels**, numnada aschia, perquei ch'ins rimnava l'aua en bischels e canals. Durant decennis ed entirs tschenteners flessegiava quella en in dutg aviart permiez il vitg giu tier begls e fontaunas.

Pli tard eisi vegniu erigiu in per aquaducts privats. Aschia han ils anteriurs proprietaris dil hotel dalla Cruna schau baghegiar in'atgna tschaffada oragiuem la **Val da Sedrun-Sura** e menau l'aua en bischels da fier entochen il begl dadens casa e da leu en cuschina. Anno 1906 ha la famiglia Decurtins survegniu dalla vischnaunca da **Tujetsch** la concessiun da tschaffar l'aua dalla **Val Custeri** per diever dil hotel **Alpsu**, baghegiava 1905/06.

Ils 10 da mars 1910 tschantan ils vischins da **Sedrun** alla vischnaunca la damonda per l'erecziun d'in aquaduct cun tschaffar l'aua ella **Val Bugnei**. Ins survegn quella concessiun e baghegia igl onn 1911 las tschaffadas ed il reservuar ella grava dadens il **Drun**. Il reservuar cun in cuntegn da 60 000 liters vegn tschentaus damaneivel digl **Uaul Stgir**, nua ch'ins quintava ch'el seigi schurmegiaus il meglier. E tuttina ha ei dau enqual sorpresa. Igl onn 1951, quel dallas nevadas grondas, ei il reservuar vegnius donnegiaus considerablamein entras las lavinas dallas **Palas** e dalla **Val Garviuz**. Ina plonta ha scarpau si in ton dalla preit e dil tetg da betun. Suenter la reparatura han ins erigiu in pign mir da schurmetg e fatg plena la scarpa davart su cun material.

A caschun dalla fundaziun dalla corporaziun digl aquaduct ha ei dau bia discussiuns e malaveglias pervia dalla dimensiun dils bischels pil conduct. Ei fuva temps missignins e scartezia da daners. Per quei motiv vuleva ina partida vischins spagnar e metter en mo bischels da 6 cm, enstagl dad 8 cm grossezia. Enzacons curaschus umens da vasta egliada han malgrad l'opposiziun fatg installar in conduct cun bischels dad 8 cm ed igl ei semussau che quei ei stau ina buna sligiazion.

La **Fontauna dalla Grava** furneva ina bun'aua. Beinsavens, tuttavia la primavera da marschauna ni suenter malauras e draccas, vegneva ella denton tschuffergnada dil **Drun da Bugnei**. Quei caschunava savens donns vid installaziuns e maschinas da casa. Per schurmegiar empau la tschaffada ed evitar tals donns, han ins erigiu igl onn 1962 in rempar encunter il drun. Cheutras han ins saviu reducir empau l'infiltraziun, denton buca contonschiu la remedura giavischada.

Il reservuar digl aquaduct aveva dall'entschatta enneu in anzi pign cuntegn e negina reserva da fiug. Suenter l'erecziun digl aquaduct **Fontauna Sogn Gions** (1932) ha igl uffeci da fiug cantunal pretendiu che **Sedrun** baghegi ora ed engrondeschi ses indrezs, aschia ch'ei seigi reserva sufficienta e pressiun ni ch'ins eregi ina lingia d'aua sur la punt dil **Drun** e seligi per cass da fiug cun **Gonda**. Il subsidi (rabat da fiug) vegni schiglioc scursanius ni negaus. Il temps era buca adattaus per far pli grondas investiziuns.

Sedrun ha perquei preferiu da seligiar cun la corporaziun **Fontauna Sogn Gions**. Quei conduct sur punt ha caschunau bein enqual fastedi allas suprastonzas dils aquaducts. El dueva vegnir aviarts mo en cass da basegns. Las grondas difficultads deva ei durant igl unviarn, sch'ins serrava buca endretg ils sclusadurs ni svidava buca la lingia d'aua ella punt dil **Drun**. Per evitar quellas difficultads, han ins pli tard fermau ils bischels d'aua vid la punt ed a caschun dalla slargada dil stradun cantunal vid la platta da betun. Era ils sclusadurs ein vegni piazzai meglier e pli veseivel. Quei ei segir ina buna sligiazion, sch'ins ha il quitau necessari. Ton d'ina vart sco da l'otra ein ins tier incendis e mancos

d'aua, ni era duront las reparaturas, staus leds da saver far diever da l'aua dils vischins da l'autra vart dil **Drun**. Igl onn 1962 ha la suprastanza dalla corporaziun d'aua **Sedrun** tschentau alla corporaziun **Fontauna Sogn Gions** ina damonda per ina colligiaziun definitiva. Las contractivas han giu in resultat negativ e quei ord motiv ch'ins havess stuii far grondas investiziuns per survir sur onn tut ils vischinadis da **Sedrun** entochen **Dieni**.

Ils commembers dalla corporaziun **Sedrun** han sinaquei priu certas mesiras per spargnar aua e surmontar las difficultads. El decuors dils onns haveva ei dau grondas midadas. L'aua era vegnida installada en tut las casas e per part en in grond diember da baghetgs d'economia. Ins duvrava buca pli zeivers e sadialas per ir per aua allas fontaunas, e la biestga saveva lippar l'aua ord in vischi pendius vid il pursepen. Quella situaziun ha motivau ils vischins da dismetter enzacons begls comunabels che consumavan di e notg in tschuat aua ed impedeavan per part transit e traffic. Igl ei en sesez donn ch'ins ha stuii prender talas mesiras. Begls e fontaunas ein in ornament e dattan veta en in vitg. Igl onn 1971 ha perfin la fontauna gronda cun tetg, cun ses dus begls gronds da betun e cul venerabel begl da lenn per lavar resti stuii ceder ad ina fontauna pli pintga. A caschun dall'engrondaziun dalla cascharia igl onn 1982 ha era la hetta veglia, che ha surviu onns ed onns al diever general, stuii naven.

Malgrad quellas mesiras vegn la situaziun cul manco d'aua adina pli delicata, tuttavia suenter ch'ils vischins da **Sedrun** han aunc concediu l'aua pil bogn cuvretg (1971). Cul svilup sil sector da baghegiar crescha il consum d'aua onn per onn. Ussa ha ei num agir e buca targlinar pli ditg, sch'ins vul buca riscar in cumplet bancrut dil provediment d'aua. Ils 14 da fenadur 1973 concluda la corporaziun da baghegiar in aquaduct niev. La planisaziun vegn surdada agl architect Meinrad Gamboni. Quel presenta in project che vegn acceptaus da tut las instanzas communalas e cantunalas ed exequius igl onn 1975. Ins vul untgir la tschaffada spel **Drun da Bugnei** ed anfla in per bunas fontaunas si la **Val Liunga**, sut il prau dil mises dalla **Val Dadens**. Il reservuar cun in cuntegn da 500 m³ vegn plazzaus el niedem liug sco il vegl. Naven dallas tschaffadas novas entochen tiel stradun cantunal a **Niriel** vegnan tut ils stabiliments construi da niev. Ils bischels per quella etappa han in diameter da 200 mm e las reits principalas tiel vitg ina tala da 150 mm. Ils cuosts totals per quei project muntan a biabein 700 000. - francs. Igl onn 1979 arvan ins il quartier **Niriel** entras in niev conduct, ed in per onns pli tard (1984) vegn ei prolungiu ed engrondi la lingia sisum il vitg. En connex cun l'erecziun dalla via nova dil quartier **Alis** tschentan ins ina lingia d'aua sut il vitg **Sedrun** viaden e garantescha aschia era als habitonts en quella zona in bien provediment. Grazia all'iniziativa dils organs dalla corporaziun, sco era al sustegn davart dils vischins e dallas instanzas surordinadas, posseda **Sedrun** oz in stupent aquaduct.

Bugnei

Nos perdavons da **Bugnei** havevan anflau ina buna fontauna in per tschien meters enasisu la hodierna punt da viafier, seniester dil drun dalla **Val Bugnei**. Naven dalla semplia tschaffada flessegiava l'aua en bischels da lenn alla fontauna enasisum il vitg. Dil temps ch'ins ha erigi la punt (1912/13) ein ins stai necessitai da construir ina tschaffada nova e da midar il conduct. Sco tut ils auters loghens ha era **Bugnei** profitau dalla conjuntura. Il vitg crescha considerablamein ed ei dat nuot auter ch'encurir novas fontaunas, sch'ins vul buca impedir gl'entir svilup. Ils onns 1963 e 1964 meinan ils vischins da **Bugnei** contractivas intensivias cul vischinadi da Sedrun - per eventualmein seligiar cugl aquaduct dalla **Val Bugnei**. Ord divers motifs vegn ins buca ad ina sligiaziun cuntenteivla. - Cul temps dat ei nuot auter che baghegiar in agen aquaduct. Gia daditg havevan ins en egl e lai controllar la **Fontauna dils Crauns** orasi gl'uau dil **Bostg**. Architect Meinrad Gamboni vegn incaricaus, ensemen cun inschignier Thomas Deplazes, d'elaborar in project per in aquaduct niev. E pilver, ins survegn la garanzia per las subvenziuns necessarias e sa passar igl onn 1964 alla realisaziun. Il reservuar cun in cuntegn da 100 m³ ei plazzaus ualti giudem igl uau dil **Bostg**, sur la via d'uau. Il conduct en bischels da 10 cm ha ina lunghezia da circa 770 m entochen tier las casas dil vitg. Aschia ha era il vischinadi da **Bugnei** in stupent aquaduct. Ils cuosts totals muntan

a biabein 122 000. - francs. Las subvenziuns ein stadas las medemas sco tier ils auters vischinadis.

Surrein

Tenor in rapport dil luvratori chemic cantunal dils 11 da settember 1918 possedeava il vischinadi da **Surrein** duas tschaffadas cun buna aua. **Surrein-Sut** haveva tschaffau si'aua en **Plauns** egl uaul e menau neutier quella en in conduct cun bischels da lenn. **Surrein-Foppas** perencunter haveva erigiu ina tschaffada si sut **Canadal**. Cul temps eisi semussau ch'ils dus conducts eran buca sufficientes. Ils vischins da Surrein ein perquei semess ensemen ed han baghegiu igl onn 1947 in reservuar els **Plauns** ed in conduct niev entochen ellas duas fracziuns. Quei aquaduct surveva stupent per lur diever.

Ina midada nunspitgada dat ei sunter la concessiun dallas auas all'Ovra electrica **Reinanteriur**. Per consequenza dall'erecziun dallas gallarias dil **Tgom**, constatescha ins tuttenina munconza d'aua. Duront in pulit temps sto **Surrein** far diever digl aquaduct da **Fontauna Sogn Gions**. L'interpresa electrica sedeclara immediat prompta da cumpensar la sperdita d'aua ed ils cuosts caschunai.

Ella gallaria da pressiun **Nalps-Tgom** anfla ins ina buna fontauna. Sin fundament d'in project dil biro d'inschigniers Kuratle e Bruni baghegia la ORA sunter ualti liungas contractivas in aquaduct niev. Naven dalla gallaria dil **Tgom** vegn l'aua menada a **Canadal** tiel reservuar cun in cuntegn da 150 m³. En quei connex ston ins era procurar aua per ils buntades e begls ellas aclas. Igl onn 1965 sa il vischinadi da **Surrein** sorprendere igl aquaduct cun tut las installaziuns.

Cavorgia

Il vitget da **Cavorgia** haveva da vegl enneu plitost schliatas relaziuns cul provediment d'aua.

Cavorgia-Plaun: Tenor in rapport dallas istanzas cantunales digl onn 1918 possedeava quella fracziun ina tschaffada d'aua (truc da lenn) en in prau in toc sur las casas. Dil laborator chemic cantunal vegn quell'aua taxada per schliata, gie schizun prigulosa. Quella hagi ina temperatura da 10,8°. Ins recamonda da translocar la tschaffada ord il prau engarschau si egl uaul. Quei cussegl vegn suandaus mo per part. Ils vischins dil Plaun construeschan pli tard in reservuar da betun enasi las «**Palius**» sur **Giassa**. En in conduct da bischels da fier meina ins quell'aua tier la fontauna dil vitg ed ellas casas. La qualidad d'aua era denton buca bia megliera che pli baul.

Cavorgia-Su: Era ella part sura dil vitg da **Cavorgia** eran las relaziuns d'aua pauca letga sco ora giul **Plaun**. Quei seresulta dil rapport da controlla digl onn 1918. La tschaffada sesanflava en in prau in tschancun sur las quater casas. Quell'aua vegneva menada entochen al begl e per part ellas casas. Probablamein fuva ei aua sfundrada che derivava dil dutg vischinont e per part da palius. Igl uffeci cantunal recamonda da clauder ora la tschaffada e da buca ladar en sia vischinonza.

Pli tard han entgins habitonts da **Cavorgia** tschaffau igl onn 1953 sezs ina fontauna si els praus dallas **Sorts** e menau quella en bischels en lur casas. Mo era quei era ina sligiazion che saveva buca cuntentar alla liunga. Era quei conduct menava neutier pauca e schliata aua.

Ord in ulteriur rapport dil departament da sanadad digl onn 1955 san ins concluder che la fontauna sul vitg furneva anzi pauc aua pil begl public. Ins hagi lu tschaffau aua dil dutg, circa 30-50 m sul begl, ed erigiu in secund conduct. Cheutras seigi l'aua buca vegnida megliurada, anzi mendra. Quei san ins tgunsch capir, sch'ins sa ch'ei vegneva lavau resti, menau en aua da cuschina e cultivau ils praus sisu quella secunda tschaffada. Per cletg retergevan la pli part dallas casadas l'aua directamein neu dalla fontauna dallas **Sorts**.

Finalmein ha ei dau ina sligiazion. Ils vischins da **Cavorgia** semettan ensemen e fundeschan la «Corporaziun d'aua **Sogn Leci**». Ils 2 da matg 1970 tschentan els alla vischnaunca la damonda da baghegiar in aquaduct niev. La planisaziun vegn surdada agl architect Meinrad Gamboni. Quei project vegn realisau duront ils onns 1970/71. Ins

anfla in per bunas fontaunas si egl uaul. Il reservuar ha in cuntegn da 100 m³. En bishels da 100-125 mm vegn l'aua menada els dus uclaus. Ils cuosts totals muntan a biabein 200 000. - francs. Confederaziun, cantun e vischnaunca dattan las contribuziuns usitadas e possibiliteschan aschia a nos vischins da **Cavorgia** da vegnir en possess d'in stupent aquaduct cun ina fetg buna aua.

Fontaunas

Archiv dalla vischnaunca da Tujetsch: Provediment d'aua. Scatlas 121-121d
Corporaziun d'aua Sedrun. Protocols. Corporaziun Fontauna s. Gions. Protocols

Ovras hidraulicas

Senz'aua negina veta! Da vegl enneu survescha l'aua buca mo sco nutriment per carstgauns, animals e plontas, ins trai era a nez sia forza. Quella energia elementara metta en moviment las rodas per mulins, resgias, falluns, fabricas ecetera. Igl ei in gidonter nunstunclenteivel che lavura di e notg senza paus e ruaus, spargnond al carstgaun immensas stentas e strapazs.

Cun l'invenziun dalla maschina a vapor piarda la roda da lenn empau sia impurtonza. Ina midada radicala en caussa utilisaziun dalla forza hidraulica caschuna l'invenziun dalla maschina da dinamo e dils motors electricis. Alla fin dil 19avel ed all'entschatta dil 20avel tschentaner crescha igl interess per nossas auas rapidamein. Interpresas privatas e pliras vischnauncas semettan plein curascha al studi da projects per ovras electricas e quei malgrad dubis e vuschs pessimisticas. La roda da lenn sto tec a tec ceder vi siu domini alla turbina d'itschal.

In'atgna ovra electrica

En **Tujetsch** vegn l'emprema ovra electrica erigida mo per diever privat igl onn 1918. Ei setracta d'in motor cun la roda d'aua en la resgia dils Solivas sper igl ual da **Gonda**. Quella maschina provisorica furnescha glisch en emprema lingia pils hotels Cruna ed Alpsu, lu era per las casas dil mulin e dil coiffeur Maurus Berther. Cun quei indrez provisoric ein ils vischins tuatschins tuttavia buca cuntents. L'aua duei servir al generaleesser. Ord quei motiv concluda la radunonza da vischnaunca il suandont:

«Sut datum dils 16 da zercladur 1918 ha la vischnaunca da **Tujetsch** en ina radunonza regulada dau la concessiun d'explotar la schinumada aua da **Salins** ad ina societad acziunara dils vischinadis da **Sedrun, Gonda, Camischolas, Zarcuns** e **Rueras** per ereger ina installaziun electrica. Per normar las condiziuns da tala concessiun da vart dalla vischnaunca visavi la numnada societad, ha la vischnaunca eligiù sequents signurs:

gerau Vigeli Berther, **Camischolas**

Rest Antoni Gieriet

stalter Tumaisch Berther, **Rueras**

president Felici Monn

stalter Leci Giacumet

stalter Gion Antoni Peder

stalter Tumaisch Schmid

Il medem di ei numnada commissiun (cun excepziun dils dus davos numnai signurs) stada radunada a **Sedrun** e ha stabiliu il sequent:

1. Sco taxa de concessiun dat la societad 10 glischs (amplas) gratis per diever della vischnaunca. L'installaziun de quellas amplas ei caussa della vischnaunca.
2. Propona la commissiun alla vischnaunca d'era prender aczias vid tal capital egl importo de frs. 3000. -
3. Pil cass ch'in ne l'auter vischinadi pli allontanau eregiess sin agen quen in conduct electric, ussa ne pli tard, s'oblighescha la societad de dar giu a quel forza electrica per il madem prezi ch'ella gauda senza quella e supponiu che quella seigi suficientamein avon maun.

4. Per il cass ch'ei vegniess cul temps eregiu en vischnaunca da part de societads jastras ina pli gronda installaziun electrica, la quala fagiess nunpusseivla l'existenza de nossa fundada installaziun, s'oblighescha la vischnaunca de condizonar ella concessiun dell'aua per allegada pli gronda installaziun, che quella prendi giu nossa installaziun. - Vegn ei pagau per nossa installaziun pli bia che quei ch'ella ha custau, sche vegn il surpli partius denter societad e vischnaunca.

Sedrun, ils 16 de zercladur 1918

Monn Gion

Felici Berther Wigeli»

Ils dus vischinadis **Dieni** e **Surrein** targlinan buca ditg da separticipar dall'ovra electrica per saver retrer forza da quella.

Ils 13 d'avrel 1919 suttascrivan quater cumissiunai dil vischinadi da **Surrein** in contract cun la societad acziunara «Installaziun electrica **Sedrun**». Per l'erecziun dil conduct pagan els la summa da 1200. - francs e quei a fonds perdu. Plinavon s'obligheschan els da prestar alla societad ina garanzia annuala, minimala da 300. - francs e da sorprender eventualas indemnizaziuns dil funs da vart dretga dil **Rein** per schar tschentar las lattas necessarias.

Il vischinadi da **Dieni** lai suttascriver lur delegai in contract semeglient ils 15 d'avrel 1919. Els han da pagar 700. - francs pil conduct electric e quei era a fonds perdu e da dar ina garanzia annuala da 100. - francs sco era il dretg da tschentar las lattas sils praus dils vischins da **Dieni**.

Bugnei fa diever da siu dretg igl onn 1935.

A **Tschamut** existeva ei dapi 1925 in'ovra electrica che furneva forza per quei vischinadi e per part naven da 1928 era per Selva. Fundatur e proprietari da quella fatschenta ei Carli Cavegn staus. Pli tard ei quell'installaziun vegnida surdada a Attiger-Cavegn che fuva domiciliaus a **Tschamut**.

Suenter il barschament dil vitg da **Selva** (1949) ei il contract vegnius sligiaus e quei muort munconza da forza (capacitad) da quella installaziun. Cun sustegn dalla confederaziun, dil cantun e dil comite d'agid per **Selva** eisi reussiu d'ereger in conduct electric en quels dus vischinadis che ein vegni ligiai cun l'installaziun electrica Sedrun igl onn 1953. Il conduct el liber ha custau 84 000. - francs.

Il pli ditg hart ils vischins da **Cavorgia** stuiu spitgar sil benefeci electric e quei muort la gronda distanza ed ils cuosts considerabels. Quella situaziun ha caschunau bein enqual malaveglia. Damondas e petiziuns davart da **Cavorgia** han buca muncau. En connex cun la concessiun dallas auas all'NOK, respectivamein all'Ovra electrica **Reinanteriu**, eisi stau necessari d'ereger in conduct electric naven da **Surrein** entochen tier la tschaffada dall'aua da **Val Giern**. La vischnaunca ha dau quella lubientscha cun la cundiziun ch'ins detti la pusseivladad da furnir als vischins da **Cavorgia** forza electrica giud quella reit. Quei ei reussiu e dapi 1957 ei il davos vischinadi ligiaus cun noss'ovra electrica. Quella ei stada necessitada d'engrondir successivamein lur indrezs e conducts.

La concessiun d'aua dalla vischnaunca da **Tujetsch** all'installaziun electrica **Sedrun** era limitada sin 50 onns. Ils 2 da mars 1969 decida la radunonza da vischnaunca da sorprender la fatschenta cun igl entir menaschi per la summa da 1.1 milliun francs e da conceder in'ulteriura indemnizaziun da 50 000. - francs (Goodwill). Quella partiziun communal senumna oz «Ovra electrica **Tujetsch**». Ils onns 1979/80 eregian ins l'ovra **Val Giuv**, aschia che la produenziun ei carschida considerablamein, numnadamein sin biabein 7,5 milliuns kWh ad onn. Previu mo buca decidiu eisi d'aunc trer a nez l'aua dalla **Val Mila**. Cun in consum da forza da pressapauc 13 milliuns ei il basegns segir avon maun e l'energia ch'ins sto retrer sutsi ei pli cara. Motivs avunda per studegiar quei project.

Entginas indicaziuns ord il rapport annual 1984 dall'ovra electrica Tujetsch illustreschan las investiziuns fatgas entochen igl emprem da schaner 1984.

1. Ovra Val Giuv	4'797'511.35
2. Ovra Val Strem	4 02'127.25
3. Casa da maschinas Val Strem	65'000.00
4. Reits da distribuziun	1'739'722.90
5. Comando da reit ed instruments da mesiraziuns	653'182.15
Total	7'657'543.65

Svilup d'energia dapi 1965 en kWh

	1965	1970	1975	1981	1984
Producziun					
Val Strem	719 640	641 730	684 360	940 000	873 804
Energia cumprada	1 536 348	4 492 325	5 808 730	4 544 804	6 099 613
Val Giuv				6 850 000	6 135 594
Total kWh	2 255 989	5 134 055	6 493 090	12 334 804	13 109 011

Grond interess per l'utilisaziun da nossas auas

Buca mo **Tujetsch** semetta da lezzas uras all'utilisaziun dallas forzas d'aua, era societads d'ordeifer nossa regiun vegnan attentas da quei reservat hydraulic.

Igl onn 1929 han las vischnauncas da **Medel**, **Mustér** e **Sumvitg** concediu allas viafiers federalas da tschaffar l'aua dil **Rein da Medel** en la **Val Cadlimo** e menar quella el **Lag da Ritom**. Malgrad che quella tschaffada sesanfla buca sin territori da **Tujetsch**, (era negina deflussiun sin nies intschess) ha nossa vischnaunca survegniu entochen 1950 ina contribuziun voluntaria annuala da 900. - francs, quei vul dir 3% dalla part dallas treis vischnauncas cumpigliadas. Essend quella concessiun limitada entochen 1950, eis'ella vegnida renovada dallas treis vischnauncas numnadas. **Tujetsch** ha denton, en vesta dils novs projects avon maun, stuiu desister da quella contribuziun.

Gia ils onns 1918/19 ha ina gruppa d'inschigniers M.P. Enderlin, **Cuera**, fatg gronds studis e plans per utilizar las auas dil **Rein Anteriu** e dil **Rein da Medel**. La realisaziun ei buca reussida. Igl onn 1943/44 presentan ins a nossa vischnaunca il project dalla **Val d'Ursera**. Tenor quel havess ins tschaffau tut las auas dretg e seniester da nossa val sin in'altezia denter 1639 e 1648 meters sur mar e menau quellas vi ella vallada dalla **Reuss**. Plinavon era ei previu da tschaffar las auas dil Rein, quellas da **Nalps** e **Val Gierm** sin ina cota da 1273 e 1280 meters sur mar, e d'ereger ina staziun per pumpar quell'aua vi la **Val d'Ursera**. - Quei project ei vegnius cumbattius da tuttas varts (buc'il pli pauc ella **Val d'Ursera**). Malgrad il cudez e las purschidas ha nossa vischnaunca per cletg desistiu da suttascriver tals contracts.

El decuors dils onns 1943-1947 ha igl iniziand Killias, inschignier, **Sogn Gagl**, presentau in cunterproject per l'explotaziun da quasi tut las auas dil **Rein Anteriu**. La suprastonza da nossa vischnaunca ha era ponderau quei project cun gronda atenziun e demussau interess.

Ins era denton gia dapi plirs onns en contractivas cun la societad da forzas electricas dalla **Svizra Centrala** (CKW) a **Lucerna**. Quella interpresa haveva primarmein el senn da menar en ina gallaria quasi tut las auas da nos flums ed uals principals vi el territori dalla Reuss. Quella varianta han ils Tuatschins renviu detschartamein. La finala ei la interpresa electrica dalla **Svizra** centrala sedeclarada promta d'utilisar ils uals da **Nalps**, **Curnera**, **Val Gierm**, **Val Mila** e **Val Strem** en nossa val cun tschaffar quels sin in'altezia da circa 1830 meters sur mar. La centrala era prevedida a **Rueras** sin ver 1350

meters sur mar. En ina emprema etappa vulevan ins tschaffar las auas da vart dretga dalla val. Ils mirs da fermada eran previ a **Nalps** e **Curnera**. Suent l'utilisaziun dallas auas en nossa val era ei tuttina aunc resalvau el rapport tecnic il dretg da menar naven quellas, vi egl **Uri** ni el **Tessin**. En lezzas cundiziuns han ins buca vuliu entrar. Davart dalla vischnaunca dat ins la finala quella concessiun e suttascriba ils contracts ils 7 d'october 1947. La regenza dil cantun **Grischun** accepta denton buca la concessiun dada alla CKW, aschia che quella survegn negina vigur legala. Ella motivescha sia decisiun sco suonda: «La concessiun corrispunda buca alla prescripziun digl artechel 5, litera b, dalla lescha cantunala dil dretg d'auas, essend ch'ella risguarda buca sufficientamein l'exploitaziun economica e gesta dallas forzas d'aua en favur da tuttas vischnauncas dalla **Surselva**.»

Situaziun favoreivla da realisaziun

Nunspitgadamein dat ei ina midada. El mument ch'ins carteva ch'ils contracts cun la CKW seigien quasi perfetgs, s'interessescha era la societad dallas forzas electricas dalla Svizra orientala e dil nord (NOK) dallas auas dil **Rein Anterior** e da ses flums laterals. Quella societad presenta in plan che cumpeglia quasi igl entir territori dalla **Surselva**. **Tujetsch** vul buc ir vias separadas. Sin siu intschess eisi previu d'ereger gronds stabiliments ed indrezs, sco ils dus mirs da fermada da **Nalps** e **Curnera**, la centrala sutterrana a **Sedrun**, vias, gallarias ed aschia vinavon.

A dretgas uras reussescha ei da sedistaccar dil contract cun la CKW. Communablamein e solidaricamein contraheschan las vischnauncas dalla **Cadi** cun ils representants dall'NOK. Quella lavur comunabla ha giu success ed ha purtau buns fretgs. Il pievel tuatschin ha all'entschatta empau dubis ch'ei savessi dar retards per l'utilisaziun da sias auas. Ins elegia perquei ina cumissiun che ha fincumbensa da contrahar cun la nova societad e cun las ulteriuras vischnauncas. Grazia allas contractivas comunablas sa il contract cun l'NOK vegnir fatgs ed acceptaus speditivamein da tut las vischnauncas dalla **Cadi**, e quei ils 13 da fevrer 1955. Quellas separticipeschon cun 8,5% dil capital d'acziun che munta a 80 milliuns francs. Il rest da quei pachet d'acziun vegn repartius cun 10% sil cantun **Grischun** e 81,5% sill'NOK. Quei contract da partenadi garantescha era allas vischnauncas il dretg da retrer in cert quantum energia gratuita, da preferenza e da participaziun, plinavon tscheins d'aua e taglias.

Quella concessiun leventa en nossa regiun satisfacziun, legria e grondas speronzas. E pilver, las entradas ord las forzas da nossas auas lubeschon da realisar plans e projects daditg preparai. Il fundament d'existenza da nossa populaziun vegn slargaus. Ins astga ughiegar d'investar. Alla populaziun indigena sepresentan novas pusseivladads d'acquist e gudogn. Ins sa s'occupar pli intensivamein dils problems dil turissem e dall'infrastructura. Igl ei l'entschatta d'in svilup plascheivel, quei grazia a nossas rehas reservas d'aua.

Muntada dall'Ovra electrica Reinanterior pil svilup da Tujetsch

Suent ch'ils contracts da concessiun ein stai suttascrets ed approbai da tuttas varts, fixescha la vischnaunca da **Tujetsch** in plan directiv cun tschentar prioritads pils projects ils pli urgents. Senza retard semettan ins alla planisaziun da novas casas da scola. Igl atun 1959 san ins inaugurar il stabiliment da scola a **Rueras** ed alla fin da november 1962 vegn la scola da **Sedrun** inaugurada e surdada. Cuort suenter eregian ins ina nova casa pervenda a **Sedrun**. Ils Tuatschins patratgan buca mo dalla giuventetgna, mobein era dalla generaziun veglia. Ei reussescha d'acquistar en in liug central ad adattau la casa d'affons Reichlin cun in regress da 3000 m². Suent differentas midadas ed engrondaziuns arva la «Casa s. Vigeli» sias portas all'entschatta da matg 1969. - Ussa maunca aunc la casa comunala. Sil plaz **Dulezi** sto la casa da scola veglia far plaz ad in edifeci plascheivel che dat suttetg all'administraziun comunala, all'installaziun electrica, all'uniun da cura e traffic ed alla societad dils runals.

Slargar il fundament d'existenza

Las autoritads communalas ein intenziunadas d'applicar ed investir endretg las resursas dil tscheins d'aua. Per procurar alla populaziun indigena novas pusseivladads d'acquist e gudogn, s'occupescha ins intensivamein dils problems dil turissem e dall'infrastructura. Igl onn 1962 vegn la societad acziunara dils runals «**Dieni-Milez-Cuolm Val**» fundada e la vischnaunca separticipescha cun 51 % dil capital d'aczias e quei cun 230 000. - francs. Cheutras possibilitescha ella l'erecziun da quels stabiliments e franchisescha il fundament pil svilup turistic en nosssa val. Senza dubi - quella investiziun ei sepagada e porta buns fretgs. Las cefras dil diember da surnotgs e las entradas da differentas spartas da sport dattan perdetga da quei fatg. Ultra dils stabiliments pil sport d'unviern, han ins erigiu el decuors dils onns in grond diember d'auters indrezs ed ulteriuras installaziuns per cura e sport: In bogn cuvretg, in plaz da sport, in tal per tennis e glatsch, plazs da giugs per affons, parcadis, vias e sendas ed aschia. Il grond diember da habitaziuns da vacanzas, baghegiadas ni renovadas enteifer ils decennis sunter la concessiun dallas auas, ei in mussament evident che la populaziun tuatschina ei stada activa ed iniziativa. Aschilunsch sco pusseivel fan ins diever dalla caschun da seprofitar dall'industria dad jasters. Tut quellas investiziuns privatas dattan in bien impuls pil svilup economic en nosssa cuntrada; ellas sepagan.

Utilisaziun dil territori communal

Las instanzas communalas patratgan a dretgas uras all'utilisaziun dil territori communal. Gia igl onn 1964 elaborescha ins in reglament da baghegiar; ins ha aschia giu la pusseivladad da direger empau il svilup sil sector da baghegiar. Ils 7 da november 1970 vegn la corporaziun da megliuraziun ed arrundaziun fundada. El medem temps s'occupescha ins dil problem dalla planisaziun zonala cun in niev uorden da baghegiar e cun la lescha per las contribuziuns d'avertura e las taxas da diever. La collaboraziun denter las instanzas dalla corporaziun da megliuraziun ed ils organs communalas per la planisaziun zonala ei trasatras stada buna. Quei proceder comunabel levgiescha la lavur e gida a sliagar meglier ils problems che sepresentan en connex cun ina planisaziun generala. Igl ei in fatg nundispiteivel che la megliuraziun da funs porta buca mo al puresser, mobein era al traffic dad jasters zun gronds avantatgs. Oravontut fan ins stedi diever dalla gronda reit da vias da funs.

Planisaziun e svilup caschunan considerabels cuosts d'infrastructura. En quasi tut ils vitgs ed uclauns ston ils acquaducts e conducts d'aua vegnir engrondi; novas reits da canalisaziun vegnan erigidas e cun quellas era la serenera. Buca emblidar lein nus las grondas expensas dalla vischnaunca per lavineras e rempars e vias. Ed adina tucca ei da far il sbargat tenor la comba.

Malgrad il svilup menziunau ei **Tujetsch** carschius successivamein ed organicamein senza la surbaghegiada stravaganta. Il character dil vitg puril ei restaus, silmeins per la gronda part. Quei duei era esser la devisa pil futur. Il hosp dalla **Bassa** fui da fuolas e caneras ed enquera ils loghens da ruaus.

Entginas ponderaziuns

Igl ei buca surfatg da pretender che **Tujetsch** ha d'engraziar per gronda part all'ovra electrica **Reinanteriur** il svilup economic e turistic. Co stess ei oz senza quellas entradas annualas che survargan per in bien ton il milliun. Ed il maletg dalla cuntrada, ei quel vegnius disfatgs? Tgi che pren la peina da visitar e contemplar ils imposants stabiliments ed indrezs dall'ORA (plazs, parcs, baghetgs ed aschia), lez sa constatar ch'il maletg dalla cuntrada ei vegnius meglioraus considerablamein en certs loghens, sco per semeglia ella vischinonza dalla casa da survetsch ed all'entrada dalla centrala sutterrana a **Sedrun**. Loghens da ruaus e recreaziun! Tgi desistess bugen dallas duas bialas vias che meinan als lags da **Nalps** e **Curnera**? Buna fadigia ed existentas solidas ein garantidas ad in pulit diember luvrers e mistergners.

Cronica dallas lavurs principalas ch'ei exequidas sil territori da **Tujetsch** entras l'ovra electrica Reinanteriur:

1956	Construcziun dalla via d'access a Nalps
1957	Entschatta dalla construcziun dalla gallaria Sedrun-Medel
1958	Entschatta dalla construcziun dalla centrala e caverna sutterrana a Sedrun
1958	Construcziun dil mir da fermada Nalps
1959-62	Construcziun dalla via d'access al liug da fermada Curnera
1962-66	Construcziun dil mir da fermada a Curnera e da differentas gallarias
1962	Entschatta dil menaschi cun duas gruppas da maschinas a Sedrun
1963	Inauguraziun dils stabiliments dall'ovra e dalla messa en vigur d'ina tiarza gruppa da maschinas a Sedrun

Mirs e lags	Nalps	Curnera
Cuntegn dil lag (en milliuns) m ³	45	40
Surfatscha dil lag ha	91	81
Altezia dil mir m	125	152
Ladezia dil mir sisum m	7	7
Ladezia dil pei dil mir m	23	24
Lunghesia dalla cruna m	480	350

Ord il plaid festiv da president communal Theophil Schmid a caschun dall'inauguraziun dil mir da Curnera ils 11 d'uost 1966

Oz, biabein endisch onns suenter la concessiun dallas auas all'ORA, savein nus gia inaugurar il secund mir da fermada en nossa vischnaunca, il mir da **Curnera**. Nus selegrein da quei fatg, da l'otra vart deplorescha la populaziun tuatschina che las lavurs dall'ovra electrica **Reinanteriur** sereduceschan e van gleiti alla fin. Sco tut ils cheu presents san constatar, ei **Curnera** stau in plaz da lavur plein prighels e difficultads. Nus engraziein als inschigniers, alla direenziun dallas lavurs sco a tuts emploiai e luvriers per lur engaschi curaschus e per lur perseveranza. Igl ei quei prestaziuns che fan surstar e meretan cumpleina renconuschientscha.

Il mir da fermada ei erigiun. L'aua dalla **Val Curnera** ei stuppada e flessegia buca sco dapi tschentaners a **Tschamut** el letg dil giuven **Rein**. La ramur dil flum ei ida a piarder oragiu las **Vals**. Ils luvriers bandunan la stretga val greppusa. Cheutras piarda la vischnaunca grondas entradas ord la taglia alla fontauna ch'ella ha saviu incassar duront biabein in decenni. Suenter quels onns d'ina activitad extraordinaria e zun intensiva cun in diember da varga 800 luvriers sils differents plazs da lavur savein nus constatar cun plascher e cuntentientscha che las relaziuns denter quellas gruppas d'impressaris e la vischnaunca ein stadas bunas. Intragliauter havein nus fatg bunas experientschas culs luvriers jasters da differentas naziuns; glied luvrusa e spargnusa! E tut tgi che ha contribuì all'ereenziun da quella ovra imposanta engraziein nus e giavischein bia cletg e ventira per lur veta futura.

Fontaunas

Archiv dalla vischnaunca da Tujetsch. Protocols da vischnaunca

Archiv dalla vischnaunca da Tujetsch. Scatlas 14, 121, 121d

Berther, Norbert. 50 onns Ovra electrica Sedrun. 1918-1968. Sedrun 1969

Die Kraftwerke Vorderrhein im Bündner Oberland. Disentis 1963

Ovra electrica Tujetsch. Rapport annual 1984. En: Rapport annual dalla vischnaunca da Tujetsch 1984

IX Il turissem

da Edgar Hitz, **Camiscolas**

Il svilup dil turissem

La situaziun d'antruras

Ils davos decennis ei l'industria d'jasters sesviluppada a quen dil puresser alla pli impurtonta petga dall'economia en **Tujetsch**. Il motiv principal che ha menau a quella structura sebase sin la raziunalisaziun en fatgs d'agricultura. Bia forzas da lavur ein vegnidas remplazzadas cun indrezs e cundrezs mechanics e technics; gliend ei vegnida senza lavur sin quei sectur. Ei ha pia tucchau alla gronda part da nosa populaziun che ha buca giu pli occupaziun ell'agricultura d'encurir ina outra fadigia, ni da bandunar bugen ni nudis la val. Da biars han anflau paun tier il turissem. Denton ha ei era tucchau ad enzatgi da tscherchar lavur egl jester. Oz ei il turissem la petga la pli impurtonta dall'economia en **Tujetsch**.

Nos emprems turists

Igl emprem hotel che ei vegnius aviarts sin nies territori communal ei stau il hotel Cruna entuorn 1850 entras Lucas Cavegn. El devi albiert a circa 20 persunas. Da gliez temps era nosa val orientada sulettamein cun ina via da sauma e da pei cun la **Val d'Ursera** e cun **Mustér**. Sco igl anteriur convischin Christian Berther da buna memoria ha relatau, seigi l'industria dad jasters sesviluppada all'entschatta quasi ord ina famiglia. Quei ei stau enviars la fin dil 19avel tschentaner circa cun l'avertura dalla via nova cantunala atras **Tujetsch** e sur il pass che hagi atgnamein entschiet a trer neutier enqual hosp entras il transport da crotschas, organisaus dalla posta. Il bab Lucas Cavegn menavi la pensiun Cruna - en quei baghetg eri era integrau la posta ed ina stizunetta - ferton ch'il fegl Carli administravi il hotel «Rheinquelle» e cun in pign hanletg da mineralias hagi il fegl Florentin endrizzau ina cantina sil **Cuolm d'Ursera** per la schuldada. Ils locals da Tschamut e quels dil pass vegnevien aviarts mo duront enzacons meins la stad.

Ils emprems skiturs

L'emprema notizia sur digl ir cun skis en **Tujetsch** ch'ins anfla, datescha digl onn 1896. Ei era reussiu ad enzacons alpinists dad ascender cun skis igl emprem cuolm svizzer da passa 3000 meters sur mar, numnadamein il **Pez Tgietschen** (3327). Carteivel era l'ascensiun succedida da l'outra vart, dalla vart digl **Uri**. Sco Christian Berther raschunava - seregordi el aunc bein, cu ils emprems hosps d'unviern seigien vegni neu dil **Cuolm d'Ursera** entuorn 1910. Quei seigi stau ina sensaziun en **Tujetsch**, pertgei entochen lu enconuschevan ins nuot auter ch'ils tscherchels da neiv ni las dubas da buots ch'ils marcadonts da purschals utilisavan per ir da l'outra vart dil pass.

Il desideri da posseder vers skis eri staus aschi gronds, cura ch'el hagi mess a guvern ils skis dils hosps, ch'el hagi aunc clamau lezza sera il vischin, ch'era scrinari, per schar tagliar ora in per skis semegliants per el. Il hab da Christian Berther hagi lubiu al scrinari la fabricaziun da quels novs utensils, aschia ch'el seigi ius cuort sissu per l'emprema ga cun skis. Gliez unviern seigien aunc pliras persunas tuatschinas idas cun skis.

Dabot hagi quei sport anflau ina vera fascinaziun, principalmein tier ils buobs e tier ils giuvenils. En las scrinarias hagien ins entschiet a scalprar e dular cun forza aissas da lenn badugn ed ischi e fabricau la finala detgs bials skis. Ladinamein vegnevi ei montau suenter, tier il calger ni tier il fravi, la ligiadura. Sco emprems fests da skis hagien ils monis-scuva surviu. Rodettas badugn osum ils monis impedevien gia il sfundrar dalla festa ella neiv entira.

L'emprema organisaziun

Il stausch propi decisiv d'ir cun skis als indigens hagi atgnamein il club da skis dau. La fundaziun ha giu liug igl onn 1914 entras circa 10 umens. All'entschatta miravien ins aunc cun egls gross sin quella organisaziun, custava gie l'entrada el club treis francs e la contribuziun annuala dus francs. Denton, il fatg ch'il president communal ed igl emprem

hotelier dalla val stevan alla testa dall'uniun, ha pudiu effectuar che novs commembers han prest fatg part. Ins ha lu beinspert organisau las empremas cuorsas da skis che han dau igl impuls duiu alla nova uniun sportiva. Alla fiasta dils 1918 fuvi l'uniun vegnida gronda e pussenta ed igl entir pievel da **Tujetsch** hagi rendiu honor al sport da skis. A caschun da cuorsas serimnavi in pievelun ed admiravi las bialas prestaziuns dils concurrents.

Il cronist dil giubileum da 50 onns dil club da skis, Vic Hendry (Gasetta Romontscha dils 24-3-1964) che ha scret questas notizias menziunescha ch'ins hagi retratg regularmein skis dad instituziuns socialas naven da 1918 per ils affons. Jeu seregordel aunc bein che cumpogns da scola ord grondas famiglias obtenevan gratuitamein skis aunc entuorn 1956/57.

Ei sefuorma ina industrietta

Cuort avon l'emprema uiara mundiala vegnevi ei adina pli savens skiturs sur il **Cuolm** neu. La glied jastra schavi mintgamai plascher oreifer il **Tujetsch**. Quels da vasta eglia da han lu spert realisau ch'ei savessi sezuppar davos il niev sport d'unviern in avegnir.

Ils possessurs dil hotel Cruna a **Sedrun** hagian fatg l'emprema ga propaganda per sport e vacanzas d'unviern igl onn 1916. En lur prospect vegneva ei offeriu hotel e pensiun cun cuors da skis per la fin dalla jamna.

All'entschatta quasi negin che savevi aunc ir da num cun skis. Perquei seigi ei stau capeivel ch'ils hosps da vacanzas tschercavan in scolast. Sco emprem scolast da skis en **Tujetsch** hagi siu frar Lucas Berther funcziunau, raquintava il Christian. Igl onn 1918 hagi ina gruppa da Tudestgs internai fatg vacanzas a **Sedrun** el hotel Alpsu. La plipart era academichers, tips fetg sportivs, che emprendevien igl inschign d'ir cun skis senza pli grondas difficultads.

Da gliez temps deva ei buca normas, co ins hagi dir cun skis. Perquei eri l'instrucziun ualti differenta, empau tenor la fantasia dil mussader. Ei eri pusseivel mo a glied beinstonta da far vacanzas d'unviern. Cun la popularitad dil sport d'unviern seigi era la concorrenza d'auters loghens da cura e traffic carschida.

Controla dad jasters 1921-1928

Sur dallas controllas dallas pernottaziuns d'antruras dat ei sulettamein in cudisch egl archiv. Aschilunsch che quei ei stau pusseivel, vai jeu addiu ellas e sun vegnius al suandont resultat (mo hotels):

12 da zercladur - 16 da settember	1921	3'019 pernottaziuns
12 da zercladur - 10 da settember	1922	1'256 pernottaziuns
14 da zercladur - 22 da settember	1923	2'494 pernottaziuns
14 da zercladur - 22 da settember	1924	1'850 pernottaziuns
13 da zercladur - 15 da settember	1925	2'395 pernottaziuns
23 da matg - 15 da settember	1926	2'447 pernottaziuns
14 da zercladur - 11 da settember	1927	3'622 pernottaziuns
1 da fenadur - 20 d'uost	1928	2'373 pernottaziuns
13 da december - 22 da mars	1928	3'822 pernottaziuns

Uniun da cura e scola da skis

In tiern marcant el svilup dil traffic dad jasters da stad ed unviern seigi l'avertura dalla viafier **Mustér-Sedrun** (1925) stada. Principalmein hagi l'avertura dil sport d'unviern rabbitschau hosps. Ils interessents dil turissem seigien prest s'organisai ed hagian fundau igl onn 1927 l'uniun da cura e traffic che ha giu per intent da promover il svilup dil turissem dad omisduas sessiuns.

Igl onn 1929/30 ei l'instrucziun da skis vegnida organisada ed ins ha eligiu in menader. Entochen lu instruevan mo enzacontas personas igl ir cun skis individualmein, quei ch'eri buca cuntenteivel alla liunga. L'organisaziun da lu era praticamein cussa interna dils hoteliers, pertgei la damonda d'ina instrucziun da skis vegneva quasi mo ord ils

menaschis da hotels. Sper il pensum da hospitalisar ils jasters, ha l'instrucziun da skis da gliez temps prest purtau enzatgei fadigia ella val. Quei ei il motiv che quellas duas frastgas dall'industria dad jasters ein sesviluppadas praticamein parallel.

La scola da skis da **Sedrun** ei ina dallas empremas scolas organisadas en **Svizra**. Neu dallas notizias sin basa naziunala san ins prender ch'ei seigi vegniu dau l'emprema ga instrucziun da skis igl onn 1930 en fuorma da scola organisada. L'uniun svizra da scolas da skis exista per 1934 ed il cantun **Grischun** ha era reglau pli tard l'instrucziun da skis, aschia ch'igl ei grev da saver mussar ora, tgei scola ei stada l'emprema en nosssa tiara (**S.Murezi** era igl 1929).

Igl εμπrem menader dalla scola da skis ei Gustav Walty staus che ha menau la scola cun sia dunna e sia feglia. Sper empalar la scola funcziunava Walty era en in cert senn quasi sco directur da cura. El ei staus in dessignader excellent ed in bien fotograf. Aschia han ins beinspert surdau ad el l'incumbensa dad instradar la propaganda da stad ed unviern. En cuort temps ha il menader dalla scola da skis sviluppuau ina stupenta paletta da prospects per omisduas sessiuns e quei en plirs lungatgs. Quels hagien purtau in bien success. Entras sia intermediaziun activa han ins saviu exponer la propaganda da nies liug da cura els marcaus gronds dalla **Svizra** sco era egl exterior gia da gliez temps. Sper las offertas per cuost ed albiert dils hotels eri igl ir cun skis per lunsch ora il meglier mied da propaganda.

Igl onn 1929/30 han ins erigiu igl εμπrem plaz da glatsch sut il hotel Alpsu a **Sedrun**, naturalmein sut la bitgetta da G. Walty che instrueva perfin igl ir cun patinas. A caschun dalla radunonza generala dall'uniun da cura ha Walty - che haveva dau sco εμπrem in segl cun skis da varga 50 meters - suttamess la proposta da baghegiar ina schanza a **Surrein**. Sco il protocollist da lezza radunonza attesta, seigi l'idea vegnida sustenida dalla radunonza. Mo silsunter han ins buca udiu pli la massa dalla schanza.

Il grond pionier tuatschin ell'emprema fasa dil sport d'unviern ei Lucas Berther staus. Entras sia iniziativa ein las organisaziuns dil club da skis, dalla scola da skis sco era dall'uniun da cura vegnidadas fundadas. El menava excellentamein il hotel Cruna cun siu frar Christian Berther ed ha en cuort temps mess neu ina clientella da num. Aschia ha ei dau cuninaga relaziuns e ligioms pli fermes cun ils hosps dalla **Bassa** che secumponevan da persunalitads beinstontas. Gia da gliez temps tschercavan ils hosps contact cun ils indigens; perquei eis ei atgnamein vegniu fundau igl onn 1929 la secziun «dalla Bassa» dil club da skis da **Sedrun**. Naven da gliez onn rapporta il radio mintgamai il venderdis las relaziuns da neiv a **Sedrun** (dapi enzacons onns cun **Mustér** ensemen).

Sch'ins analysescha ils schabetgs e las frequenzas, san ins dir che l'industria dad jasters hagi atgnamein obteniu naven da 1929 impurtonza economica en **Tujetsch**. Cun mieds sempels, denton eficients, eri ei reussiu da metter neu en cuort temps ad in relativ pign cerchel da personas che s'interessavan aunc da gliez temps per il turissem, ina industrietta impurtonta. Era sche las cefras eran aunc mudestas - cumparegliadas cun quellas dad oz e sch'ins tila en consideraziun che nosssa val sesanfla sisum la Surselva ellas relaziuns da comunicaziun d'antruras - ston ins dir oz che nos antenats hagien prestau lavur da pionier e ch'els meritassien in monument.

Survista dalla avertura dallas fatschentas da sport

Fatschenta Thomas Cavegn

(ussa Carli Cavegn)

menau en artechels da sport aschi spert sco la damonda ei sepresentada

Theophil Schmid-Venzin

1932-1984

Sport Cristal

1960

Sport Albin

1975-1979

Survista dalla avertura dils hotels en Tujetsch

Cruna, Sedrun

1850 (entuoorn)

Rheinquelle, **Tschamut**

1867

Oberalp, Sedrun	1905
Posta, Rueras	1906
Krüzli, Sedrun	1914
Soliva, Sedrun	1934
Badus, Rueras	1956
Alpina, Sedrun	1963
Mira, Sedrun	1965
Cresta, Dieni	1966

In temps spir novaziuns

1930 han ins fullau via per l'emprema gada cun in crie da neiv. Quel vegneva tratgs da cavals, essend ch'il traffic d'autos ei vegnius daus libers en **Tujetsch** per igl onn 1931. Oz san ins strusch capir lezzas relaziuns, cura ch'ei vegn reclamau tut a dubel, sch'igl ei buca fatg via igl unviern la damaun dallas sis en mintga streglia.

Ina atgna organisaziun da gliez temps era il telefon. Ei existeva in sulet apparat els gronds vischinadis el local da posta. Il postin stueva clamar neutier la persuna dumandada. All'entschatta savevan ins telefonar mo duront las uras da biro, naven da 1931 han ins dau caschun da telefonar pli ditg la sera.

Ord las cronicas screttas ella Gasetta Romontscha a caschun da giubileums ni pli grondas renovaziuns ch'ils possessurs dils hotels han mess a disposiziun resulta ei ch'ils hotels Cruna ed Alpsu ein vegni renovai ed engrondi ils onns 1930/32, aschia che l'offerta da letgs els hotels ei s'augmentada gia da lezs onns a 140. Senza dubi, ei ha duvrau ina curascha speciala ed iniziativa da realisar tals objects da gliez temps. Oz san ins dir ch'ils emprems hoteliers hagien - cun lur vasta egliada ottimistica egl avegnir - tschentau igl emprem fundament per l'industria dad jasters ella val ed els van ella historia locala sin quei sectur sco vers pioniers. Sper ils hotels deva ei da gliez temps aunc circa 100 letgs en stanzas privatas.

Igl onn 1936 ei l'uniun da scola da skis vegnida fundada. Ins vegnevi buca propi bein perina denter ils hoteliers e scolasts da skis, tgi che hagi d'eleger il menader dalla scola da skis e reglar l'organisaziun. Perquei ein ils interessents seformai ad ina uniun.

Ir cun skis era buca in sport da femnas

Igl ir sin skis era in sport che vegneva plitost praticaus dils umens. Ina femna indigena en rassa sin skis valevi quasi sco in scandal public ed ella vegneva strusch acceptada dalla societad da lu. Christian Berther ha relatau ch'il caplon Rageth da **Sedrun** astgavi ir cun skis en sia rassa nera senza ch'enzatgi vessi reclamau enzacu. Era il plevon Fetz dil liug tgiravi buns contacts cun ils hosps dalla **Bassa**, principalmein cun ils commembers dil club da skis. Il president dil club da skis dalla **Bassa**, M. Fiedler, eri buca ual incantaus dil seamond dil plevon, numnadamein che las buobas indigenas astgavan buca ir cun skis. El ha lu vonzei pudiu urbir ora ch'il decret ei vegnius sligiaus. Naturalmein che la vestgadira dallas femnas da lu muntava in grond impediment. Ins sa s'imaginar levamein, tgei difficultads la rassa liunga caschunava ella neiv. Caultschas eran aunc da gliez temps buca in attribut dalla schlatteina feminina. Denton ei la moda da caultschas lu vegnida applicada tec a tec era dallas femnas. En in vegl cudisch da cuolm stat il verset tudestg che va a prau cun quella tematica: «Von den schönen Alpenrosen an, da haben alle die Hosen an.»

Ils commembers dalla secziun dalla **Bassa** dil club da skis eran ils pli fideivels hosps da vacanzas avon la secunda uiara mundiala. Els vevan era urdiu buns contacts cun la populaziun tuatschina. Quella uniun finanziava per exempel ils premis dalla cuorsa da skis dils affons indigens. Il president prelegeva mintgamai la gliesta da rangaziun. El vegneva numnaus dils affons «il bien amitg».

Las concorrenzas da skis

Igl emprem sport d'unviern che ha derasau vera concorrenza denter ils indigens ella val ein las cuorsas da skis stadas. Beat Ritter raqueta ch'ei seigi vegniu ad ina concorrenza da skis dall'**Alpsu** entochen a **Sedrun** gia igl onn 1923 (Tuatschina 1977) dallas qualas

era vischins d'**Ursera** hagian priu part stediamein. Ei vegnevi entschiet cun la cuorsa entadem il lag, epi iu sur **Tiarms** e sur **Cuolm Val** vi, lu suandava la cuorsa rapida a Dieni; da leunaven mava la cuorsa liunga sur **Sumpraus-Zarcuns-Valtgeva** tocca a **Sedrun**. Il final era a **Niregl**. Campiuns da gliez temps erien denter auter Baseli Huonder, vegl bostger, e Nicolaus Albin, seregorda Theophil Schmid.

Vonzei han era ils impurtonts vitgs dalla **Surselva** fundau lur club da skis ed organisau inaga duront igl unviern lur cuorsa. Biars clubs vevan era gruppas activas da concurrents, enqualga schizun cun in trenader. A caschun d'ina cuorsa regionala obteneva pressapauc la quarta part dils megliers concurrents ina medaglia per lur prestaziun. Quellas dinstincziuns vegnevan aunc veramein apprezzadas e tenidas en honor. Ins seregorda aunc bein dils cumbats che regevan sin pista ellas stortas denter las portas, dalla tensiun denter ils aspectaturs, ton sil sectur alpin sco sil sectur da cuorsa liunga. A caschun da quellas cuorsas eis ei era vegniu urdiu bia buns contacts denter ils concurrents, avon e suenter las lutgas diras sin la pista. Ils concurrents stuevan natiralmein caminar ensi e smaccar la pista per vegnir engiu. Avon la partenza vegnevan ils skis unschi, mintga gruppa da siu persei, pertgei cheu entscheveva gia igl εμπrem cumbat. Ils gronds campiuns dil vitg da gliez temps vegnevan admirai dils buobs, ual sco ils buobs dad oz admiran ils campiuns da renum mundial. Sur dall'execuziun da quei sport ella fuorma d'antruras - inclusiv las triumfadas e terradas - fuss ei segir aunc bia legras reminiscenzas avon maun, quellas ch'ei succedidas sin pista, agl ur dalla pista ni schiglioc en quei connex. Igl ei veramein donn che quella fuorma da sentupada dalla giuventetgna ella regiun ei sparida; in tec alla ga, cura ch'ils runals han entschiet a transportar concurrents ed aspectaturs els aults.

Las pistas d'antruras

Las pistas principalas, quellas «da casa», che sesanflavan el raiun da **Niregl (Niriell)** ed el territori dadens il restaurant Badus a **Sedrun** viers la staziun da viafier, ch'era aunc buca surbaghegiaus da num, vegnevan frequentadas dallas classas bassas (Bogenklassen) dalla scola da skis. L'ascensiun a **Valtgeva** valeva gia sco tura pintga. Plinavon deva ei aunc en mintga vitg «las pistas dils buobs e dils giuvenils» (**Val Caluster**, giu las **Rueras, Mariros, Tgamaura, Surplauca** ecetera). Cheu vegneva ei sedivertiu il temps liber, suenter scola e las dumengias suenter viaspras.

Il sport d'unviern principal ed attractiv da In per hosps ed indigens era il far turas da skis. Ei deva las turas grevas sils cuolms che vegnevan frequentadas dalla classas aultas (Schwungklassen) dalla scola da skis, per exempel Pez tgietschen, Badus e las turas medias da **Cungieri** ni **Cuolm Val**. La tura preferida era quella da **Milez** u dil **Cuolm d'Ursera** - (sco il pass vegn dil reminent numnaus el vocabulari Vieli/Decurtins) sur **Tiarms - Cuolm Val** ni enasi da **Dieni**. La tegia dil Vigeli Monn da Bugnei si **Milez** (inaugurada 1933) era il punct da sentupada. Cheu fuvu ei - sco igl ei aunc veseivel sil film vegl da Lucas Berther - magari legher. Ins ha vonzei perfin schau montar in telefon en quella tegia. Il recav dueva vegnir partius denter il possessur dalla tegia e l'uniun da cura, era ei vegniu concludiu sin ina radunonza dall'uniun. Il telefon vegneva denton plitost surdovraus e muntava ina fatschenta deficitara, aschia ch'ins ha schau allontanar el igl onn 1952.

Igl onn 1946/47 arvan ins in local semegliant a **Planatsch**. Il menaschi da tegia si **Milez** ei ius anavos e vonzei eis el vegnius transferius a **Planatsch**. Tgi seregorda buca pli digl ustier original Leci Deflorin? All'entschatta teneva el siu muvel duront igl unviern a **Planatsch** e devi ora vivondas e bubrondas als hosps che mavan sperasvi. La tura sur **Tiarms-Cuolm Val** vegn aunc adina numnada suenter siu bien vin vuclina. Igl εμπrem ustier da Planatsch ei staus ina personalitad unica che vegneva apprezzada dils hosps. EI va ella historia dil turissem ton dil punct dalla originalitad anora sco da ses plans. Realisau ha il Leci da **Planatsch** l'ustria en pliras etappas, construida pli u meins dil material rimnau che outra gliued betteva. Il runal da **Planatsch** ch'el ha stagiau ora biaras gadas e luvrau ditg vidlunder ha lu la societad dils runals erigiu. Bia plans fussen aunc d'exequir, aschia era l'exploraziun dalla aua minerala ella **Val Giuv**.

Il turissem dalla stad secumponeva gia baul da passants. Sch'ins dat in'egliada els cudischs da hosps dils hotels vegls, traversavan persunas dalla Bassa, persunas dall'**Europa** digl occident e dils **Stadis uni dall'America** nies **Tujetsch**. Ei era pli u meins hosps che vegnevan ord la classa aulta dalla societad e che savevan prestar da gliez temps vacanzas e viadis tras nosa tiara muntagnarda.

Ina interessanta survesta dil menaschi sil sector dall'industria d'jasters resortescha dils protocols dalla uniun da cura e traffic. Ses commembers ein stai activs ed han promoviu cun tut sforz ed ils mieds pusseivels il svilup. In grond cumbat, en vesta dalla situaziun finanziaria da lu da vischnaunca e cantun, ha ei dau entochen che la via atras **Sedrun** ei stada cuvretga cun catram. Il meglier maletg, co ins ei sestellegiaus da financiar l'emprema cuvretga dalla via atras **Sedrun** dat igl extract dil protocol dalla radunonza communal dils 20 da december 1951 che secloma:

Finanziaziun digl asfalt tras il vitg Sedrun

Il president prelegia las proposiziuns dalla cumissiun eligida dalla radunonza da vischnaunca dils 1 da settember:

1. L'uniun da traffic **Tujetsch** paga la summa pauschala da 2'800. - francs
2. Tuts burgheis e domiciliai sur 20 onns cun facultad en vischnaunca pagan l'in frs. 1,65
3. Il Sporthotel Cruna, il hotel Oberalp, il consum liber, il consum general, la societad electrica, la firma Murer, l'**Aare - Tessin** (ATEL) pagan 100. - francs l'in
4. La pensiun Soliva e l'ustria dil **Krüzlipass** pagan 50. - francs l'ina
5. La pasternaria T. Venzin, la pasternaria Giusep Monn, Vigeli Cavegn, camiuner, Battesta Vinzens, sorprendider, Felici Monn, auto da persunas, Giusep Jacomet, auto da persunas, Gaudenz Loretz, auto da persunas, mazler Curschellas, Luis Curschellas, coiffeur, Helena Monn, coiffeusa, Theophil Schmid, drogaria, pagan mintgin 40. - francs
6. Cusunz Placi Beer, calger Alexander Schmid, calger Vigeli Hendry, Lucas Cavegn, posta, pagan mintgin 10. - francs
7. Tuts fiugs (tenercasa) el raion da **Sedrun e Gonda** pagan 10. - francs l'in.

Suenter haver giu discussiunau e ponderau sura proposiziun vegn concludiu d'approbar la proposiziun dalla cumissiun senza neginas midadas.

Aschilunsch il text dil protocol. Sco ins seregorda aunc oz, ha quella expensa aunc mudergiau onns ora las paupras finanzas dall'uniun da cura e traffic. Suenter ina partida onns ha la vischnaunca surpriu il davos rest dil deivet. Cu la realisaziun ei inagada stada terminada, mettevan ins cul detg quet l'annexa els prospects: «**Sedrun** hat staubfreie Strassen». Sco ins sa prender ord il protocol citau, deva ei aunc da gliez temps paucs autos en **Tujetsch**. Pli biars pareva ei da dar igl onn 1959, pertgei lu eis ei vegniu concludiu sin ina radunonza da vischnaunca ch'ils autos astgien buca carrar pli che 30 km per ura tras nos vitgs! Sche quei conclus ei insumma vegnius exequius enzacu, ei buca enconuscent.

L'uniun da cura ha era procurau per las empremas cazzolas electricas publicas els vitgs. Ei vegneva era tschentau bauns els loghens exponi e megliurau sendas, procurau e derasau material da propaganda per nies liug da cura sco era organisau classas da nossas scolas che plazzavan mintgaton las pistas da skis a **Niregl, Valtgeva** e schizun a **Milez**.

La secunda uiara mundiala

L'industria dad jasters era sesviluppada el decuors da circa 20 onns ad ina tschecca industria che purtava caschuns beinvegnidas da gudogn a nies pievel, specialmein duront il liung unviern. Ins patertgava ual dallas ereziuns dils emprems indrezs mechanics da transport dils skiturs. Nunspitgadamein rumpa la uiara ora ellas tiaras vischinontas. Ei dat in cal radical dil turissem. Il catsch da turists digl exterior ei interruts dil tut. Ils umens ein vegni clamai sut las armas ed igl ei vegniu tuttenina ruasseivel sil sector dil turissem. Il meglier mussament intermediéscha la statistica da lecziuns dalla scola da skis. Quellas ein sesminuidas da 7285 igl onn 1938/39 sin 885 igl onn 1939/40. Malgrad il temps da mobilisaziun e d'uiara ei il catsch da turists buca tschessaus dil tuttatg.

L'economia dil turissem serevegn mo plaun

Suenter la secunda uiara mundiala serevegn l'industria dad jasters ruc a ruc. Las plagas che l'uiara veva schau anavos ein semegliuradas plaunet ed il svilup ha giu plum ellas giugadiras. Consequentamein ei la perioda suenter l'uiara entochen entuorn 1960 stada quieta ed ha buca fiers bia undas sil sector turistic. Sch'ins cumpareglia la statistica da lecziuns dalla scola da skis - ch'ei denton mo ina mesira alla buna dallas pernottaziuns - ha ei tuttina cuzzau tochen igl onn 1966; per lu ha il diember contonschiu il nivo da 1938. Ual sco avon la secunda uiara mundiala ha ei puspei duvrau 20 onns dad obtener il medem scalem. Lein tuttina far menziun d'enzacons eveniments interessants neu da gliez temps.

Igl onn 1942 han ins installau dador **Sedrun**, sin il schinumnu crest dils «idiots», igl emprem cundrez da trer siado gliud. Vegls scolasts da skis seregordan aunc ch'il runalet aveva spert obteniu il surnum «cundrez da metter a schigiar resti». Quel duessi esser staus mo cuort temps en funcziun, ha Alfred Decurtins raquintau. Igl onn sissu han ins aviert «En Canossa» la bar cun il local da sault. La veta da notg en **Tujetsch** ha pia priu sia entschatta igl onn 1943!

Igl enconuscent «Ski-Jöring» ei vegnius instradaus gia igl onn 1935 ed ei atgnamein staus onns ora in'attracziun da vacanzas fetg tschercada. Per quella spassegiada da schletras cun cavals era la via denter **Sedrun e Tschamut** la pli adattada. Dis da bialaura entupavan ins meinsvart 8-12 schlittadas sin via. Ils hosps eran s'enzugliai en bialas cozzas da launa ni schizun en finas pials cavriel ni uolp. Ina part dils passagiers predeva plaz ella schletra, l'otra perencunter schava runar suenter. Ei vegneva rentau ina suga vid la sliusa bein ornada. Mintga 4-5 meters pendeva ins in fest da skis atraviars quella, vid il qual mintgamai duas persunas sependevan. Ei devi «runadas» da tochen 15 persunas. Oravontut organisavi la scola da skis viadis per lur hosps. Jeu seregordel aunc bein dallas schlittadas, co nus buobanagls currevan agl ur dalla via, cu ins udeva da lunsch ils bransins dils tglis - cun lur bellezza cumets ornai cun plemas da tuttas colurs - che tunavan el tact dil trot dils cavals, aschia per admirar ils bials convois. Ins quitava che quels transports schavien anavos ina atmosfera tut speciala en nos vitgs ed uclauns aunc buca disturbai dalla canera e dils tuffians da motors. Deplorablamein ha quei bi ed original mied da transport prest stuiu untgir al traffic hodiern d'automobils, in che garegia vias bein fulladas e curcladas cun gera e sal ch'ellas seigien gie spert terrenas e negin seleischni.

In onn ei il Vigeli Cavegn, ni sco el vegneva numnaus «il Figheli» vegnius sin in'idea originala. Gia baul veva el mess neu in «Jeep» ed exequeva survetschs da transports e taxi en ed ord vischnaunca. Sco gia menziunau eran las schlittadas in'attracziun da vacanzas fetg dumandada ed ils mieds da transport avon maun erien limitai. In bi di pren nies Vigeli dus curtauns pli ferms, tschenta sissu in sistem da seser per circa 15 persunas. Cun siu vehichel targeva el la caravana tras la val. La polizia ei dada denteren ed ha fatg fin cul transport.

Ils emprems sforzs da metter neu runals ein stai vans

Las empremas ponderaziuns da metter neu runals tonschan anavos el temps cuort avon la secunda uiara mundiala. Quels plans ni giavischs ein lu prest stai emblidai cul temps d'uiara ei vegnius. Igl onn 1947 ha Alfred Decurtins montau igl emprem runal «il runal dils tagliors» ella vischinonza dil **Sontget dils Gediis** che ha tratg ils hosps circa entochen si tier il trasse dalla viafier. La stad stueva el puspei vegnir demontaus e vegneva mess a guvern en in baghetg d'agricultura. Igl onn dils gronds barschaments 1949 ei era quel daventaus ina unfrenda dallas flommas.

Cuort suenter han ins montau dador **Sedrun** el territori **Foppa-Niregl** in runal mo da suga senza cundrez da setener che vegneva tratgs d'in motor da benzin. Ins stueva setener cun tutta forza vid la suga e serrar ella mordio sut bratsch per serabitschar egl ault. Ei mava denton aunc pli tgunsch e pli spert che a pei. Cun ils raps che nus buobs incassavan da cattar biemaun, savevan ins selubir enzacontas ascensiuns che custavan mintgamai 20 centims. Ei deva magari enqual sfriada pli maltschecca ella giacca, els

vons e schizun vid la pial. Cu ins mava a casa cun quels bategls sfranzlai e bratscha sgarflada, deva ei lu aunc ina detga reprimanda enstagl plaid da cumpassiun. 1951, igl onn dalla neiv gronda, han enzacons scolasts da skis montau in runal modern al pei dil **Calmut**. Jeu seregordel d'ina spassegiada dalla scola sil pass. Ei era stermentusas ferdaglias ed il runal era prest staus schelaus en. Il motor da benzin leva buca funcziunar, cura ch'ei era freid. Muort las enormas nevadas da gliez onn eis ei da supponer ch'il runal seigi buca staus las massas en funcziun. Aunc gliez onn ein plirs umens iniziativs dalla val s'organisai per examinar la pusseivladad da realisar in runal stabel sil **Calmut**. Ins era digl avis che mo il manteniment e la promoziun dil svilup dad jasters possi meglierar la paupra situaziun economica da **Tujetsch**. En tut havess l'erecziun previda custau entuorn 70'000. - francs. Tutta entschatta ei greva. Quella experientscha han ils iniziants stuiu far persenn cuninaga, cura ch'igl ei iu per la finanziaziun dil project. Ord ils medems motivs ein era ils plans dall'uniun da cura e traffic digl onn 1953 i dall'aua giu. Da gliez temps stevan treis projects en discussiun: il runal **Dieni-Milez** che custava 125'000. - francs, il runal **Dieni-Cuolm Val** che custava 250'000. - francs ed il runal **Surrein-Sutseivs** ch'era calculaus cun 90'000. - francs. Era ei aunc memia paucs daners avon maun, ni fidavan ins aunc buca al turissem?

La sutgera da Cungieri

Malgrad ils fiascos dils projects menziunai, lai il patratg da baghegiar mieds da transport buca ruaus als Tuatschins. Vuleva il liug da cura da **Sedrun** sesviluppar ad in liug che stat era en concorrenza cun auters loghens el **Grischun**, stueva ei vegnir anflau mieds e vias revoluziunaras che promovevan detschartamein il turissem. Ei era clar, il hosp prefereva pli e pli cuntradas da vacanzas cun mieds cumadeivels da transport da stad ed unviern. Suentar gronds sforzs han ins finalmein saviu fundar all'entschatta digl onn 1956 la societad «Sutgera SA, **Sedrun-Cungieri**». Ord il protocol dalla radunonza da fundaziun san ins prender la remarca: «Senza lavur da pionier da Lucas Berther e vessen nos hosps d'ordeifer buca purtau daners sco cufla sur cuolms e vals, fussen nus stai paupra glied.» Il nuder da lezzas lingias ha giu tutta raschun. En **Tujetsch** han ins rabbitschau ensemen sulettamein 19% dil capital d'acziass!

La pintga sutgera ei aunc vegnida realisada gliez onn ed ins ha saviu metter ella en funcziun la fin digl onn 1956. L'erecziun da sutgera e restaurant han custau da gliez temps 235'000. - francs e quella investiziun ei vegnida curclada cun in capital d'acziass da 195'000. - francs. Deplorablamein ha la giuvna interpresa stuiu prender encunter gia igl emprem onn in mudest deficit. Quei ei era stau il cass ils proxims onns, pertgei ad ina dividenda ha ei mai tunschiu. La sutgera ha tuttina ademplier cumpleinamein sia incarica, seigi quei sco mied da transport dils turists ni sco attracziun supplementara dil liug da sport da stad ed unviern. Aunc oz eis ella il sulet implont da transport da stad els aults e vegn aunc adina frequentada bugen da giuven e vegl, da hosp ed indigen. Ils 27 da zercladur 1967 ha la societad acziunara dils runals **Dieni-Milez** surpriu ella e dapi lu ein tuts fastedis da deficits e finanzas stai sligiai. Aunc avon paucs onns, entuorn 1983/1984 levon ins far pli attractiva la sutgera cun ereger ina ruschnera da **Cungieri** giadora sco divertiment supplementar pil hosp da stad. Denton ei «la paupra ruschnera» cun ses prighels vegnents per glied ed animals vegnida cumbattida aschi da rudien d'ina part dalla populaziun che negin ughegia pli da prender ord truchet ils plans.

Ei suonda megliers temps

La suandonta perioda flurenta dil turissem san ins dir che l'erecziun dalla Ovra electrica **Reinanteriur** 1956-1968 hagi effectuau. Cun l'erecziun dall'ovra ei la tscherca da forzas da lavur s'augmentada considerablamein. Oravontut ha l'erecziun purtau bia mieds liquids als vischins ed allas interpresas indigenas da baghegiar. Ils Tuatschins ein buca stai lischents, cu igl ei inaga stau enzacons daners avon maun. Ins ha restaurau hotels, restaurants ed oravontut las habitaziuns privatas. Nua ch'igl ei stau pusseivel, han ins beinspert scaffiu novs suddetgs per ils hosps da vacanzas.

Ina fatschenta che ha empermess da rabitschar spertamein daners senza pli grondas investiziuns e cuosts da menaschi ein las casas da colonias stadas. Tuttenina era ei cheu in triep casas da quei gener, bunamein sco ils bulius suenter ina pli liunga plievgia da bunaura.

Igl emprem runal ei vegnius erigius sil Calmut

A **Selva** ei Fidel Venzin vegnius surura - entras ina ierta neu digl exterior - ad ina mudesta facultad; el ha realisau ensemblamein cun Benedetg e Stiafen Venzin in runal al pei dil **Calmut** igl onn 1959. Quei runal ha oravontut vivificau la frequenza dalla viafier **Furca-Alpsu**, sco era fatg pli leva ed attractiva la tura da skis sur **Tiarms-Cuolm Val**. Da lezs onns era il project da lavineras e plontaziun **Scharinas** aunc buca realisau, aschia che la viafier cursava sur il **Cuolm** mo cu ei era propi segir da lavinias. Ei capitava che la viafier era serrada jamnas ora. Il menaschi dil runal **Calmut** era naturalmein interruts, cura che la viafier cursava buca, essend negin sin la pista.

Igl onn 1982 han ils frars Venzin - essend arrivai els onns da pensiun - fatg venal l'interpresa da famiglia. Suenter dirs cumbats cun il concurrent viafier **Furca-Alpsu** eis ei tuttina reussiu alla societad dils runals **Sedrun-Rueras** SA d'acquistar il runal dil **Calmut**.

Controlla da pernottaziuns dil cantun (persunas da 12 onns ensi)

1946	8 090
1947	8 316
1948	8 423
1949	8 863
1950	4 813
1951	4 893
1952	7 409
1953	8 248
1954	7 785
1955	7 966
1956	9 408
1957	13 619
1958	17 204
1959	13 268

Gronds territoris vegnan aviarts cun runals

Suenter biars onns da pupira era la vischnaunca vegnida tier raps en connex cun l'erecziun dalla Ovra electrica **Reinanteriur**. Igl augment d'entradas da taglia, oravontut la taglia alla fontauna dils luvrers digl exterior, veva fatg vegnir pussenta la cassa communal. Las lavurs d'execuziuns dall'ovra electrica mavan alla fin. Ins ei sedaus giu cun la politica da scaifir novs plazs da lavur el sectur dil turissem per evitar ina pli gronda sminuaziun dalla populaziun. Ord quels motivs porta l'uniun da cura la proposta alla radunonza communal dad intercurir la pusseivladad d'arver pli gronds territoris cun implonts da skis. La radunonza communal elegia ina cumissiun cun l'incarica da elaborar propostas concretas. Gia cuort temps sissu propona la cumissiun dad arver il territori da **Dieni-Milez-Cuolm Val** cun dus runals. La radunonza dat ladinamein glisch verda alla cumissiun da luvrar vinavon. Ei sappi vegnir fundau ina societad acziunara cun la resalva che 51 % dil capital d'accias vegni signaus dalla vischnaunca e ch'ins detti vinavon en emprema lingia la caschun alla populaziun indigena da schar sutsignar igl ulteriur capital d'accias. Il rest dil capital d'accias da 450'000. - frs. ei prest staus d'ina vart, aschia ch'ins ha scochemai saviu semetter alla realisaziun. Igl atun 1962 han ins surdau ils dus runals **Dieni-Milez e Milez-Cuolm Val** al traffic.

La realisaziun tgeua dil runal **Valtgeva** digl onn 1961 entras dus «fifcs» vischins da **Sedrun** era quasi vegnida survesida, muort il grond dafar el territori da **Milez**. Cun risguardar las cundiziuns dils erigiders (in ha teniu ora il dretg da survegnir cun caschun in'occupaziun adequata tenor sias habilitads tier la societad dils runals, l'auter ha teniu

ora la preferenza d'affittaziun dil restaurant **Milez**, per cass ch'el fetschi offerta, cu ei vegni scret ora da schar a tscheins el) ha la societad dils runals saviu acquistar il runal da **Valtgeva** sco ei era vegniu teniu ora dalla vischnaunca a caschun dalla lubientscha. Oz san ins dir che la realisaziun dils runals seigi stada ina fatschenta dad aur per igl entir **Tujetsch**. Buca mo menaschis e hotels, casas d'albiert, habitaziuns privatas, menaschis da vendita ed aschia han profitau, mobein ina entira cudria da luvrers d'interpresas da baghegiar, purs ed auters han obteniu ina buna occupaziun d'unviern.

Survesta dalla erecziun dils runals

1947	Runal dils tagliors sper Sontget dils Gadius a Sedrun
1950	Runal da suga a Niregl
1951	Emprem runalet sil Calmut
1956	Erecziun dalla sutgera si Cungieri
1959	Erecziun dil runal existent sil Calmut
1961	Erecziun digl empren runal a Valtgeva
1962	Erecziun dils runals Dieni-Milez
1966/67	Erecziun dil runal a Surrein
1966	Erecziun dil runal Drun si Valtgeva
1969	Erecziun dil runal Tegia Gronda
1973	Erecziun dil runal Planatsch
1974	Erecziun dil runal Strem
1980	Erecziun dil runal Val Val-Cuolm Val
1982	Erecziun dil runal schumellin Cuolm Val
1986	Fatg la damonda per la concessiun d'ina sutgera el territori Cuolm Val-Val Val-Calmut.

Statistica da lecziuns da 1/2 di scola da skis

1933/34	1 674
1934/35	3 548
1935/36	4 369
1936/37	6 138
1937/38	5 920
1938/39	7 285
1939/40	885
1940/41	728
1941/42	1 199
1942/43	2075
1943/44	1 339
1944/45	1 702
1945/46	2 242
1946/47	3 363
1947/48	2 342
1948/49	2030
1949/50	1933
1950/51	1 724
1951/52	2093
1952/53	2042
1953/54	1 720
1954/55	2201
1955/56	2033
1956/57	2 688
1957/58	3 049
1958/59	2 896
1959/60	2 726
1960/61	3 710
1961/62	4 247

1962/63	3 248
1963/64	5 049
1964/65	6 308
1965/66	7 032
1966/67	10 450
1967/68	15 119
1968/69	20 210
1969/70	22 539
1970/71	23 697
1971/72	26 813
1972/73	28 697
1973/74	30 074
1974/75	31 373
1975/76	30 353
1976/77	29 200
1977/78	31 464
1978/79	28 643
1979/80	26 552
1980/81	26 784
1981/82	25 394
1982/83	24 439
1983/84	22 558
1984/85	22 100
1985/86	21 912

Avertura d'in biro da cura e traffic

Pli baul vegnevan las prestaziuns da survetsch als hosps fatgas dallas recepziuns dils hotels anora ni dalla fatschenta da sport da Theophil Schmid-Venzin ch'exista dapi 1932. Igl onn 1963 han ins aviert in biro ella casa da scola veglia a **Sontget**. Felici Monn, ch'era lu president dall'uniun, seregorda ch'ei vevi dau in grond cumbat. Sco emprema «directura da cura e traffic» ei Anna Berther - pli tard ustiera dil hotel Mira - vegnida pladida. Ei vegneva reparti prospects, dau informaziun als hosps sco era intermediau dimoras da vacanzas. All'entschatta era el aviarts mo enzacontas uras a di. Igl ei lu prest vegniu surdau per gronda part all'uniun l'administraziun dalla scola da skis, dils runals, dil bogn cuvretg e dils auters menaschis da sport in tec alla ga, aschia ch'il pensum ei carschius considerablamein. Ussen occupeschan ins treis emploiai ed in emprendist el biro. Dapi 1975 ein ils biros uni cun la casa communal. Sper las prestaziuns da survetsch als hosps, mantegn l'uniun ina gruppetta da luvriers per la stampa e per lavurs ordaviert. Ella venda era cudischs dapi ch'ins ha translocau ils biros dalla scola veglia ella nova tgesa communal.

Tgi ei "La Tuatschina"?

Sper la cara dunna ni feglia dil Tuatschin vegn era la concorrenza da cuorsa liunga che ha mintgamai liug il fevrer en **Tujetsch** numnada aschia. Denton la pli renomada «Tuatschina» ei la gasetta che cumpara dapi ils 22 da december 1972. En quella vegnan las publicaziuns ufficialas fatgas enconuschentas, quellas ch'ins metteva pli baul silla «tabla nera». La Tuatschina ha remplazzau «il feagl mellen» jamnil ch'ei staus igl organ da publicaziun per vischnaunca ed uniun da cura enzacons onns avon quella periodica. El cunteneva gia cuortamein las impurtontas publicaziuns dalla val. Ils emprems treis onns ei la Tuatschina cumparida mintga jamna. Il directur da cura da gliez temps, Beat Ritter, ch'ei staus igl iniziand dalla gasetta, scriveva savens vastas reportaschas ed illustrava ella cun bialas fotografias ch'el sez fageva e sviluppava. Las ediziuns specialas eran fetg plascheivlas, denton era ualti custeivlas e stuschavan meinsvart sin critica davart dils vischins, essend ch'ils mieds finansials da propaganda muncavan enzanua auter. Dapi igl

onn 1976 cumpara ella mintga duas jamnas e cuntegn atgnamein pli u meins las publicaziuns officialas dalla vischnaunca, dil biro da cura e dallas biaras uniuns e societads dalla val. Igl organ da communicaziun vegn stampaus dall'uniun da cura che posseda ina pintga stampa dapi la fin 1972; avon vegneva il cuntegn dil feigl mellen screts sin ina madriza da tschera e multiplicaus. Ins squetscha dabia lectura in onn ora.

Ils films vegls dalla val

Entuorn igl onn 1930 ha Lucas Berther fatg enzacons bials films dalla maniera da viver da stad ed unviern en **Tujetsch**. Quels tals ein vegni mussai dapertutanavon per reclama. Igl onn 1963 offerescha il possessur els cun igl apparat da mussar alla vischnaunca. Ils vischins han refiers la tractanda cun il giavisch da saver veser els avon. In onn suenter ha la radunonza communal da dau in credit da 5500 frs. per films ed apparatus. Avon entgins onns han ins schau copiar els per ch'ils films originals mondien buca empaglia.

La tura da Valtina

La frequenza denter **Calmut** e **Milez** ei s'augmentada da detschiert. Ord quels motivs eis ei vegniu engaschau dapi 1967 in survetsch da pista duront igl entir unviern per quei territori. Els cuosts ein vegni reparti denter las instituziuns interessadas. Il patruglier veva da marcar e survegilar pistas, d'organisar transports d'accidents sco era da serrar il passadi a caschun da prighel da lavinas. Cun la surprida dil runal dil **Calmut** entras la societad da runals **Sedrun/Rueras** vegn la pista piazzada surenvi ed il survetsch d'accidents ed aschia vegn exequius dils emploiai dils runals.

Dapi 1968 organisescha l'uniun da gimnastica dils umens d'Ursera la tura da **Valtina**. Quella entscheiva pils skiturs sil **Pass dall'Alpsu** e finescha a **Sedrun**. Mintga participont che fa la tura enteifer il temps prescret, (entochen circa allas 17.00 uras) obtegn ina biala medaglia. Els pedunzs van naven da **Tschamut** a **Sedrun** a pei. Onn per onn prendan denter 12'000-20'000 persunas, part da quella spassegiada. La frequenza ei fetg dependenta da l'aura. Meinsvart vegn il vin vuclina bunamein surduvraus ed ei vegn fatg bravamein legher. Dapi enzacons onns meina era in'uniun da **Rueras** atras la tura da **Valtina** dalla stad. A lezza caschun dat ei buca tons participonts.

Nossas sendas

«In allen Richtungen zeigen die Wegweiser nach <Senda>. Ich finde es einfach nicht auf meiner Landkarte. Wie weit ist es noch bis dorthin?» ha in hosp dumandau inaga in indigen. Quei ei buca da sesmarvegliar, cu ei exista buca meins che 269 kilometers sendas marcadadas. Felici Monn che fa quella lavur dapi onns ed onns raquenta ch'el hagi entschiet cun ella igl onn 1946. Quei onn seigien ils emprems 12 muossavias vegni montai en **Tujetsch**. La signalisaziun dallas sendas stetti sut il patrunadi dall'uniun da sendas svizra, secziun grischuna. Ina dallas empremas sendas ch'ins hagi erigiu sin territori tuatschin seigi quella che meini al lag da **Tuma** stada. Ella seigi vegnida construida dalla viafier retica! La viafier **Furca-Alpsu** hagi aunc oz l'obligaziun da mantener ella. La reit dallas sendas existentas ei per gronda part vegnida realisada da Felici Monn. Els emprems onns luvravi el per nuot. Pli tard hagi el obteniu 10. - frs. per di. Biaras sendas seigien mo marcadadas e mo ils grevs tschancuns seigien fatgs passabels. Quei seigi era signau aschia sin la carta geografica da viandar. Els trutgs che vegnan denton frequentai savens dils turists, ein vegni baghegiai ora endretg. Bia lavur hagi la senda che meina dil **Pass Alpsu** sil **Pez Pazzola**, sur il fil entochen al **Lag da Tuma**, dau. Quella vegn numnada senda Felici en favur dil construider. L'uniun da sendas hagi investau entochen oz la summa rodonda da 500 000. - frs. Sper la gronda lavur da Felici Monn hagi l'uniun da cura era aunc construiu entginas sendas ella val ils davos onns. El decuors dils onns seigien era differentas cartas da viandar vegnidadas edidas, bunas ed ina meins buna. Dil reminent han ins gia entschiet a circumscriber las turas ella brochura «Der Luft-Kurort **Sedrun**» ch'ei cumparida igl onn 1905. Oz han ins cartas, brochuras cun circumscripziuns detagliadas dallas differentas sendas e turas

alpinas sco era panoramas dils cuolms, da stad ed unviern. La reit da sendas ha gronda impurtonta per nus, pertgei la viandonza ei senz'auter l'occupaziun principala dil hosp da vacanzas da stad.

Sedrun ni Tujetsch

Pli baul eran ils hotels impurtonts situai el vitg da **Sedrun**. Consequentamein vegneva ei fatg reclama tradiziunalmein mo cun il num **SEDRUN**. Entuorn 1960 han ins era entschiet a construir da camifo habitaziuns e baghetgs per vacanzas el contuorn dils ulteriurs vischinadis, principalmein a **Rueras**. Il territori principal da skis era situaus el territori dadens il **Dutg Grond**. Ord quels motivs han ins battegiou il domicil dalla societad da runals «**Sedrun/Rueras**». La uniun da cura fa dapi entgin temps reclama cun **Sedrun/Tujetsch**. Quei num ei era vegnius integraus egl actual signet da reclama. Da remarcar s'ei ch'il tetel principal da propaganda **Sedrun, Tujetsch ni Rueras** ha dau inaga ni l'otra discussiuns e schizun rabantschas ella val.

Cuorsa liunga

Pli baul practicavan ins la cuorsa liunga plitost per semesirar sin ina moda ni l'otra en concorrenzas. La massa sediverteva atgnamein mo sil sector alpin. La scola da skis ha menau en l'instrucziun da cuorsa liunga igl onn 1971. Igl emprem onn eis ei stau 10 lecziuns. Gia il proxim onn ein ellas carschidas sin 100. Il stausch decisiv alla popularitad da quella nova attracziun da vacanzas han atgnamein ils buns resultats dils concurrents svizzers sin l'olimpiada da 1972 a **Sapporo** dau. Ella ei lu aunc vegnida sustenida massivamein cun la reclama LLL («Langläufer Leben Länger») ch'ha fatg populars quei bi sport en paucs onns. Oz occupescha la scola da skis ina persuna cun l'instrucziun da cuorsa liunga, quasi igl entir unviern. Ils emprems onns vegnevan las loipas preparadas cun fullar e smaccar in trasse culs skis. L'uniun da cura ha lu mess neu in «Töff» da skis ch'ha fatg ina partida onns buns survetschs als curriders dil pass liung. Quei vehichel ei ussa vegnius remplazzaus entras ina pistera moderna che prepara las pistas da cuorsa liunga sco era las sendas da spassegiar digl unviern.

Las casas da colonias

Enteifer ils onns (principalmein denter 1960-1970) eis ei vegniu erigiu ella val circa 20 casas da colonias per la giuventetgna. Quei ha alzau considerablamein l'offerta da letgs enteifer cuort temps, quei che ha naturalmein giu in'immensa influenza sil carschament dallas pernottaziuns. Vonzeivi eis ei stau memia daries da quellas casas. Perquei ha l'uniun da cura inoltrau igl onn 1965 la petiziun alla vischnaunca da vuler scumandar l'erecziun da casas da vacanzas per la giuventetgna. Ins ha buca saviu far la massa ordlunder. - In'ulteriura supplica dall'uniun ei vegnida exaudida, aschia ch'igl ei vegniu scumandau da schar ir pors e gaglinas libramein per las vias entuorn.

Fastedis ha ei dau cul baghegem da canortas da vacanzas ordeifer ils vitgs. Igl onn 1970 pren la radunonza communal il conclus da buca vender terren en territori da pistas a **Cungieri, Valtgeva e Milez**. La soluziun finala da quei problem ha il pievel tuatschin priu igl onn 1975 cun acceptar la nova lescha da baghegiar ensemen cun la planisaziun locala. Ussa san ins baghegiar egl ulteriuor territori dalla val mo edificis ligiai al liug.

Avertura dallas casas da colonias

Badus, Sedrun	circa 1950	62 letgs
Alpenrösli, Rueras	circa 1953	48 letgs
Canadal, Surrein	1954	48 letgs
Spinatscha, Sedrun	1956	52 letgs
Nual, Selva	1958	49 letgs
Rheinquelle, Tschamut	1960	27 letgs
Alpenrose, Selva	1961	47 letgs
Putnengia, Rueras	1962	55 letgs
Salins, Sedrun	1962	90 letgs
Planatsch	ver 1965	65 letgs

Surcrests, Cavorgia	1965	70 letgs
Scola veglia, Rueras	1965-1980	45 letgs
S. Ilario, Milez	ver 1964	90 letgs
Sutfoppas, Cavorgia	1966	32 letgs
Casa Reichlin	ver 1955-1968	30 letgs
Scola nova Rueras	1960-1964	circa 30 letgs
Casas Sutcrests, Selva	1964	60 letgs
Tgesa Strem, Sedrun	1966	84 letgs
Aurora, Sedrun	1967	93 letgs
Steil'alva, Sedrun	1968	64 letgs
Larisch, Sedrun	1970	65 letgs

Plazza da sport Dulezi

Il medem onn ch'ins ha dau il dretg da votar allas femnas en **Tujetsch**, numnadamein igl onn 1972, ha la radunonza communal fixau il plaz **Dulezi** sco liug dalla piazza da ballapei. Ei ha dau bia da far avon che la finanziaziun seigi stada garantida. La piazza che fuss era destinada per exequir disciplinas per l'atletica leva ed auters sports ha custau 350'000 francs. La plipart ei vegnida subvenziunada d'instituziuns d'ordeifer da sport. Ultra da quei han ils commembers da lu aunc prestau lavur circa ella valeta da 40'000 frs. Sis onns suenter la fundaziun dil club da ballapei, igl onn 1976, han ins saviu arver ufficialmein la piazza da ballapei.

L'istoria dils skis cuorts

Entuorn 1968 tschaffa in trend tut niev l'instrucziun ellas scolas da skis. Quel ei naturalmein beinspert era vegnius menaus en tier nus. Ins ha praticau el enzacons onns. Dils skis cuorts als skis liungs (0,65 -1 m e 1,30 -1,60 m. lunghezia normala) empredeva il hosp bia pli spert la habilitad dad ir cun skis. All'entschatta era tut fiug e flomma per quei novum, instruiders e scolars. Denton eis ei tuttenina vegniu in temps che negin leva instruir cun ils skis cuorts ed il menader parteva lu en la classa da skis cuorts a quei scolast da skis ch'el leva dar ina reprimanda.

Ils scolasts da skis ed ils menaschis da restauraziun

Pli baul ha ina classa da skis quasi pariu sco ina famiglia. Ils hosps encurevan recreaziun comunabla suenter l'instrucziun sin la pista. Avon il temps dil concubinat era ei regla che amitgs ni amitgas vegnevan dapersei en vacanzas e tschercavan dapli recreaziun ch'ozildi el vitg da vacanzas. Savens stevan ils scolasts da skis - quels che stuevan buca ir a perver - ensemen suenter la lavur en legra cumpagnia e la veta famigliara cuzzava magari entochen tard viaden ella notg. Biars scolasts da skis eran mintga sera per «las baitas» entuorn. Leu nua ch'ils instructers eran da casa, fuva ei era adina hosps. Enqualga fagevan ins veramein da memia ed igl ustier stueva far uorden en caussa. Cheu capitava ei magari ch'ils magisters midavan canorta. En cuort temps vegneva igl ustier tier ils scolasts da skis e seperstgisava en tutta fuorma e supplicava els da turnar en siu local. Ussa ei quei empau auter. Oz va il scolast da skis ed il hosp suenter l'instrucziun mintgamai a casia sco quei ch'igl ei usit en autras branschas. Bein s'entaupan ins aunc per regola ina sera durant la jamna culs hosps, denton ein ils locals da sault occupai il pli savens da giuventetgna. Tgei midada quei ha dau, sch'ins cumpareglia cun tschels onns. Lu astgavan mo personas sur 18 onns ir en ina bar. La controlla era rigurusa. Era stuevan ils umens purtar culier e cravatta!

Eveniments dils davos 20 onns che han giu influenza sil turissem

- 1965 s'ei vegniu concludiu sin radunonza da vischnaunca da scumandar il schar ir liber entuorn pors e gaglinas.
- 1966 ein nos vitgs vegni illuminai.
- 1967 ei il territori dil **Lag da Tuma** vegnius mess sut il schurmetg dalla natira.
- 1968 ei il parcadi sin il plaz **Dulezi** a **Sedrun** vegnius erigius. En quei connex eis ei era vegniu approbau ina nova lescha da parcadi ch'ei vegnida integrada

- igl onn 1975 egl uorden da baghegiar. Quei onn ei l'ura da polizia vegnida reglada da niev. Il temps da sesiun san las ustrias tener aviert lur locals duront la jamna entochen allas 12.00 uras.
- 1969 ei il territori dil **Calmut** vegnius mess sut schurmetg dalla flora. 1970 ei vegniu erigiu ina antenna sin l'**Alp Tgom** per emetter ils programs svizzers da televisiun. Igl onn 1986 ei quella vegnida baghegiada ora, aschia ch'igl ei ussa pusseivel da retscheiver 3 ulteriurs programs digl exterior en **Tujetsch**.
- 1970 ei la corporaziun da meglieraziun vegnida fundada che ha erigiu bia sendas per ils hosps da vacanzas.
- 1971 ei vegniu scaffiu el territori dil **Cuolm da Vi** igl emprem reservat d'animals selvadis sin iniziativa dalla uniun da cura e traffic; 10 onns pli tard ei quel vegnius translocaus el territori da **Caschlè**. Regularmein vegn ei organisau inaga ad jamna ina spassegiada per admirar ils tiers selvadis. Quei onn ei era vegniu concediu gratuitamein alla societad da pendicularas a **Mustér** la lubientscha da traversar territori tuatschin el raiun dil **Pez Ault**.
- 1972 ei la brochura «Tuatschina» cumparida per l'emprema gada. La vischnaunca ha declarau ella sco fegl official da publicaziun. Quei onn eis ei semegliantamein vegniu reglamentau il diever da scarsolas a motor.
- 1975/76 baghegiu la casa communal.
- 1980 avertura dil parcuors dalla segirada «VITA».
- 1981 ha il pievel tuatschin concludiu cun 588 gies encunter 94 nas da scumandar il vender terren a personas digl exterior.
- 1982/83 s'ei vegniu erigiu duas plazzas da giug per ils affons.
- 1985 ei la serenera publica vegnida aviarta.
- 1986 ei il museum «La Truaisch» vegnius aviarts.
- 1987 ha ina gruppa da lavur scret la historia da **Tujetsch**.

Arranschaments d'impurtonza en Tujetsch

- 1965 Campiunadi grischun da cuorsa liunga
- 1969 Campiunadi grischun alpin
- 1976 Campiunadi svizzer da clubs
- 1977 Interbancario
- 1978 Cuorsa FIS slalom gigantic
- 1979 Cup europeic da damas, slalom e slalom gigantic
- 1979 Campiunadi svizzer dils scolasts da skis e cuorsa da patentada dils scolasts da skis dil **Grischun**
- 1980 Campiunadi dalla tiara da **Luxemburg**
- 1985 Campiunadi dalla tiara da **Luxemburg**

Bunas prestaziuns da skiturs tuatschins

- 1933 Alfred Decurtins daventa campiuon grischun en cuorsa liunga
- 1933 Felici Monn-Decurtins contonscha il 12avel rang en cuorsa liunga sil campiuonadi svizzer, sco senior II. Dils 73 concurrents en quella categoria vevan 16 obteniu in premi. Felici Monn raquenta ch'el havevi priu part plitost sco emprendist, per rimnar experientschas. Igl onn sissu vevi el propi exercitau intensivamein sut la reschia da Gustav Walty ed eri veramein en fuorma. Deplorablamein hagi in grev accident cuort avon il campiuonadi fatg fin cun sia carriera activa da sport sin palancau naziunal.
- 1945-51 ei Baseli Schmid da buna memoria staus in dils megliers campiuons sursilvans da lezs onns en cuorsa liunga e cuorsa rapida. Deplorablamein ha in accident mortal fatg fin cun sia carriera da sport, e quei igl onn 1952 il davos da zercladur.
- 1942-59 Patruglias tuatschinas han giu differentas gadas gronds success els divers campiuonadis militars sin basa naziunala.

- 1973 Daniel Deragisch daventa campion mundial da para-ski en tuttas disciplinas (siglir, cuorsa da skis e combinaziun.)
- 1973-75 Corsin Jacomet ei staus duas ga campion grischun ellas cuorsas da JO. 1975 ha el contonschiu il 16avel rang sco junior sil campionadi svizzer e priu part da differentas cuorsas FIS. Qualificaus da prender part dil campionadi svizzer sil sectur alpin, denton buca saviu prender part da quella muort in grev accident. Silsunter sedicidius da calar cun la carriera activa dil sport da skis ual avon che daventar commember dalla equipa naziunala.
- 1983-86 ha Damian Curschellas contonschiu buns resultats en cuorsa liunga, principalmein el maraton engiadines e sin il campionadi svizzer da cuorsa liunga.

Il svilup dil turissem ord vesta dils prospects

Christian Berther da pia memoria ha tenu en salv ils prospects dalla val e cumpletau els cun igl onn d'ediziun. Per dar ina envesta, cun tgei mieds igl ei vegniu fatg propaganda el decuors dil temps, suonda in cuort extract, specialmein dallas atgnadads da reclama. 1904 ei igl emprem prospect vegnius edius cun enzacons maletgs da pader Carl Hager che circumscriva en ina spassegiada la Val Tujetsch:

"Westlich von **Disentis** überrascht das eingenartig liebliche Landschaftsbild des Tavetschertales. Ein weites, flaches, sanft ansteigendes Gelände liegt vor dem Wanderer, Dörfchen am Dörfchen lugen friedlich aus dem smaragdgrünen Wiesengrund mit seinen bundfleckigen Flachs-, Roggen- und Gerstenäckern heraus; werden belebt von einem arbeitsamen räto-romanisch redenden Völklein."

1905 ei il cudisch «Luft-Kurort **SEDRUN**» cumparius cun 20 paginas informaziun da **Tujetsch**. El cuntegn circumscripciuns da turas e reclama per il hotel Cruna, **Sedrun**. 1908 ha il hotel Cruna ediu in agen prospect. Cheu in cuort extract:

"**SEDRUN** an der Oberalproute, zweimalige tägliche Postverbindung nach **Disentis** und **Andermatt-Göschenen**. Ausgangspunkt zum **Kreuzlipass**. Subalpines, mildes Klima, sonnige Lage, besonders geeignet für Rekonvaleszenten, die ein hochalpines Klima nicht ertragen. Halbtagestouren in die schattigen ozonhaltigen Wald- und Weideterassen der rechtsufrigen Rheinseite. Spezialitäten: **Tavetscher** Honig und Käse, Bündner Bindenfleisch und Schinken. Passantenpreis: Zimmer Fr. 2-3. -, Frühstück Fr. 1.30, Dinners von Fr. 3. - an. Nachtessen Fr. 2.50."

1912 han ils hoteliers dau ora in prospect che cuntegn denter auter il suandont:

"Sedrun ist ein alpiner Luftkurort für Kuranten und Sommerfrischler, Für Rekonvaleszenten und geistig überarbeitete Menschen. Passübergänge: **Oberalp-Andermatt, Kreuzlipass-Amsteg, Nalpspass-Val Catlimo, Lukmanier-Olivone**. Geologie, Botanik. Für den Wintersport würde sich das **Tavetschertal** in idealer Weise eignen."

1915 carta postala cun skitur:

"Wintererholungs- und Skiplatz **Sedrun**, Hotel Krone."

1918 extract dil prospect dil hotel Cruna:

"Sedrun ist bekannt als Sommerkurort und Wintersportplatz, Skilehrer zur Verfügung. Im Winter warme Zimmer mit den beliebten Tavetscher Speckstein-Oefen, Badezimmer, elektr. Licht und Dunkelkammer."

1920 cumpara ina carta dubla che cuntegn in program da turas digl unviern e prezis da pensiun el hotel Cruna. Denter auter:

"Wir haben eine Landschaft, die für den Wintersport, speziell für den Skisport, zu den geeignetsten der ganzen **Schweiz** gehört. Winternebel kennt unsere Landschaft kaum."

1925 eis ei avon maun in prospect cun bellezza fotos veglias cun il tetel:
SEDRUN ist im Sommer und im Winter schön

"Zuoberst in Alt fry-Rätien liegt wie ein herumgeschlossenes Kleinod das liebe Tavetschertal. Gleich einem weltentrückten Wunderland liegt es da, das Geburtsland des vielbesungenen Vaters **Rhein**. Eine Welt für sich, das liebe **Tavetsch** ... "
Quei ei in citat ord ina brochura da 20 paginas cun maletgs dils vitgs dalla val.

1928/29 se presenta igl emprem prospect dalla scola da skis ei format pli grond che C5.
El muossa fotografias dalla scola da skis. Citats:

«**Sedrun** das Skiläufer-Paradies», Warum nach **Sedrun** zum Wintersport? Weil grossartiger Sportbetrieb, wunderbare Skifelder, Ski-Unterricht nach der schweizerischen Einheitstechnik.»

1929 cattan ins dus differentes prospects ord la plema dil capavel menader dalla scola da skis Gustav Walty. L'in ei edius els lungatgs tudestg, engles e hollandes e secloma:

"Gustav Walty's Schweizer Skischule **Sedrun** für Anfänger und Vorgerückte. **Sedrun** liegt heute im Munde aller Skiläufer! Die nächste Umgebung bietet eine reiche Auswahl an herrlichen, unbeschwerlichen Skitouren, und dem, der sich hohe Ziele gesteckt hat, leuchtet der grosse Kranz idealer Skiberge einladend entgegen. Die Skileute sind unter sich, sind Alleinherrscher in Ihrem Gebiet und unbehindert durch die Anwesenheit anspruchsvollen Hotelpublikums. **Sedrun** gehört gottlob zu jenen Sportplätzen, die jedem Toilettenzwang abhold sind."

Il secund prospect cun reclama per stad ed unviern en treis lungatgs cun bialas fotografias ed igl emprem panorama dalla val secloma:

DAS SKI LÄUFER-PARADIES

«Träume im Tal des jungen **Rheins** mit offenen Augen hinaus über die allmächtige Flut des Lichtes - hinauf auf die unvergesslichen Bergzinnen. Immer und immer wieder soll mit Nachdruck betont sein, dass **Sedrun** mit seinen unvergesslichen Skigelände der Rendez-vous-Platz der Skigilde ist und bleibt!»

1930 stat ei scret ella carta da viseta dil hotelier dalla Cruna:

"Und wo das **Tavetsch** zu suchen ist, weiss heute im Zeitalter der praktisch angewandten Geographie jedes Kind. **Tavetsch** ist doch das **Engadin** des **Bündner Oberlandes** und kommt bald hinter **Disentis**, wenn man der **Oberalp** entgegenfährt."

1931 Citat ord il prospect dil hotel Cruna:

«Du aber - zögere nicht und rüste Dich! - Steige hinauf in das göttliche Land der Wintersonne! Es wird für Dich ein Erlebnis sein, ein Empfinden, dass nur das höchst Glück den Menschen schenkt!»

1932 "Wann kommen Sie nach **Sedrun**?" damonda ina matta sigl emprem prospect dall'uniun da cura.

"**Sedrun** ist ein kleines Winterwunder unserer Zeit, weil es das Glück hat, von der Natur in jeder Weise für den Wintersport begünstigt zu sein."

En quel ein ils hotels: Cruna, Krüzlipass, Oberalp, Soliva e Rheinquelle menziunai.

1933 ha l'uniun da cura e traffic dau ora in prospect cun fotos da Lucas Berther cun ina matta davontier cul text:

«Ich rate Ihnen gut. . gehen Sie nach **SEDRUN. Sedrun**, das anmutige Dorf im **Tavetschertal** ist aufs neue gerüstet. Die Schweizer Skischule **Sedrun** wird von anerkannten Ski-Instruktoren unterrichtet. Die Gliederung erfolgt in drei Hauptgruppen nämlich: für Anfänger, Bogenfahrer und Schwungfahrer. Sie gewährleistet eine systematische Ausbildung bis zum vollkommenen Geländefahrer.»

Naven dils 1935-1938 han ils hosps dalla secziun dalla **Bassa** dil club da skis dau ora onn per onn ina broschura cun il program da turas e cuorsas. En quel ein era cumparidas duas poesias cun tetel «**Tujetsch** 0-ho». Citats ord gliez temps:
"**SEDRUN** Im Sonnen- und Schneeland **Graubünden**",
"Sedrun lehrt Dich Skijahren!"

1935 vegn **Sedrun** presentaus als hosps en in prospect dil «Sporthotel Krone» sco suonda:

"**Sedrun**, das Hochtal, dass sich vom `Dach **Europas**' dem **Gotthardmassiv** gegen Osten in herrliche Alpenhänge absenkt, ist auch in den kritischen Wintern schneesicher. Wer rassige Steilhänge liebt, steigt zur **Alp Culmatsch**. Alpines Tourenfahren zählt zum Schönsten, das dieses ideale Skigebiet in den Monaten März und April zu bieten vermag. Lange gleichmässige Schussfahrten bietet das **Val Maighels**, wer Neuland entdecken will, zieht seine Spur auf **Cuolm Davi**. Von den Hochgipfeln können **Piz Maler, Piz Borel, Piz Badus** und der mächtige **Oberalpstock** schon im Februar erstiegen werden."

1937 **Sedrun** ... Sport ... Erholung ... Geselligkeit, ei in tetel dil prospect dil hotel Cruna, **Sedrun**.

1940/50 ein ils prospects vegni pli rars. Cheu enzacons citats:

"Sedrun ist der Hauptort des an landwirtschaftlichen Reizen überdurchschnittlich gesegneten und von einem urwüchsigen Volksschlag bewohnten Tavetschertals ... "
Sedrun ist im Sommer ein Ferienparadies
Sedrun ist im Winter ein Traum der Skifahrer

1956 Goldene Sommer- und Winterferien im Hotel Krone, **Sedrun**

Sommer: Ferienort der guten Schweizer Familie

Winter: Schneesicherer Winterparadies

1969 Snow, sun, fun, that's Sedrun

1971 Erholung, Bewegung und Freude im Hallenbad, **Sedrun**

SEDRUN - das Winterparadies

SEDRUN- einzigartiger Sommerkurort

Sedrun

Skiland von einzigartiger Vielseitigkeit
und vielgelobter Sommerkurort

Sedrun - Grischun, alla tgina dil **Rein**,

zu jeder Jahreszeit, eine kleine Welt gepflegter Gastlichkeit

SEDRUN

Sommer und Winter, Sport und Erholung

Willst Du ruhn oder Sportliches tun, dann komm nach

... **SEDRUN**

SEDRUN

- Wo das Skifahren die Gesundheit und die gute Laune stärkt
- Wo das Baden und Schwimmen zum fröhlichen Erlebnis wird

SEDRUN- GRISCHUN

Versets momentans da reclama

Sedrun

- wo der **Rhein** noch Ferien macht
- wo das Skifahren noch Spass macht - der Langlaufhit
- das Kinderparadies
- das Familienskidorf

Hallo z'**Sedrun** isch Kinderfäscht

z'**Sedrun** wirsch brun

Statistica da letgs e pernottaziuns

onn	letgs	pernottaziuns	dis occupai intragliauter	eveniment special
1959	549	32 656	59	runal Alpsu
1960	639	66 433	104	
1961	1 087	75 243	69	runal Valtgeva
1962	1 292	89 540	69	runals Milez
1963	1 347	99 249	74	
1964	1 666	120 882	73	restaurant Milez
1965	1 834	137 120	75	
1966	2 173	153 818	71	
1967	2 481	156 565	63	
1968	2 796	199 294	71	Finiu erecziun ovras
1969	2 945	216 603	73	
1970	3 137	246 062	78	Fundau meglieraziun
1971	3 326	289 108	87	Aviert bogn cuvretg
1972	3 373	319 235	95	Fundau Tuatschina
1973	3 442	333 383	97	
1974	3 744	321 686	86	
1975	3 784	316 266	84	Nova casa communal
1976	3 872	310 538	80	
1977	3 920	322 669	82	
1978	4 163	299 960	72	
1979	4 166	326 628	78	
1980	4 190	349 080	83	
1981	4 171	321 912	77	
1982	4204	344 984	82	
1983	4 268	343 167	80	
1984	4 600	327 340	71	
1985	4 657	332 757	71	Aviert serenera

Fontaunas

Concept da turissem Tujetsch = Tourismuskonzept Tujetsch. Sedrun 1986

[Fünfzig] Jahre Ski-Club Tavetsch-Sedrun, 1914-1964. Sedrun 1964

Hitz, Edgar. Skischule Sedrun 1929-1979. Sedrun 1979

Ritter, Beat. Veltlinertour, ein Begriff seit 30 Jahren. En: La Tuatschina, nr. 2, 1977

Schmid, Theophil. Giubileum da 25 onns, 1962-1987, Runals e sutgeras Sedrun-Rueras SA = 25jähriges Jubiläum ... Sedrun 1986

Wildhaber, Robert. Touristische Orientierungshilfe für den Sport- und Ferienort Sedrun-Tujetsch. Sedrun 1982

X L'organisaziun sociala

Fatgs publics

Tujetsch ei vegnius colonisau sunter la fundaziun dalla claustra da **Mustér** ch'ei succedida igl 8avel tschentaner. Ils avdents eran subdits digl avat da **Mustér** che reveva sur dils Tuatschins entras ils ministerials ni administraturs «de Rueras» e «de Pultengia». Propi enconuschenta ei la davosa schlatteina, quella de Pultengia. Las ruinas da siu casti sut **Dieni** dattan aunc oz perdetga da sia existenza. Siu pli enconuschent representant ei igl avat Pieder de Pultengia, il renovatur dalla Ligia Grischa da 1424. Con gronda la dependenza visavi la claustra era, demuossa il fatg ch'igl avat da **Mustér** ha saviu vender ils 26 da fenadur 1300 ina certa femna agl avat da **Wettingen**. Il patrun dalla tiara saveva pia disponer sur da ses subdits sco sclavs. Plaun a plaun svanescha quella dependenza totala. Gia 1325 vivevan libers burgheis (vicini de **Tuvez**) en **Tujetsch**. Sil cumin da **Mustér**, che va anavos el 13avel tschentaner, ha il pievel il dretg dad eleger il mistral. Igl emprem dignitari tautschin da quei mandat ei il Peter de Cavorgia staus igl onn 1871. Aschia ei il stadi claustral sesviluppau plaunsiu ad ina vischnaunca da giurisdicziun (Gerichtsgemeinde). El cantun **Grischun** existevan 48 da quellas corporaziuns che havevan il status d'in stat. La vischnaunca da giurisdicziun da **Mustér** secumponeva da 4 parts ni cuorts:

1. **Mustér**
2. **Tujetsch**
3. **Sumvitg e Trun**
4. **Breil e Medel**

Mintga cuort haveva 4 representants che formavan la dertgira. Quella autoritad formava ensemen cun igl avat da **Mustér** la regenza. Ella haveva buca mo cumpetenzas giudizialas, mobein era politicas. Els interess dallas 4 cuorts representavan ils schinumnai «stattalters». Els vegnevan eligi igl emprem digl avat, pli tard dil pievel ed havevan pli u meins la funcziun d'in president communal dad oz. Quei emprem gerau vegneva sustenius en sia vischnaunca dad in cussegl che corrispunda alla hodierna suprastanza communal. Impurtontas caussas stuevan denton vegnir presentadas alla radunonza da vischins che decideva surlunder. Ei setractava pil solt da damondas dalla utilisaziun dils uauls, dallas pastiras e dallas alps, aschilunsch che quellas udevan alla vischnaunca. En Tujetsch deva ei era alps cooperativas (en possess da singuls vischins), privatas e feudalas. Las alps feudalas udevan alla claustra da **Mustér** che ha per exempel possediud **Val Val** e **Val Giuv** entochen igl onn 1866.

La vischnaunca haveva era ina cassa communal che vegneva spisgentada da castitgs polizials, differentas taxas e specialmein da tscheins per pastiras, denton mai da taglias directas. Quels daners vegnevan per part empristai a vischins per in tscheins da 5%, aschia che la cassa communal haveva era da funcziunar sco banca.

Vegls uordens da vischnaunca

Las fatschentas publicas sebasavan sin leschas ni statutas. Els emprems uordens enconuschents dateschan dils onns 1811, 1814, 1818 e 1832. Els cuntegnan pli u meins la reglamentaziun da fatgs agricols, sco per exempel digl arver, dallas alps, pastiras ecetera. Interessants ei il fatg ch'il Tgom era ina alp da cavals. Sto esser ch'ei deva da gliez temps pli biars da quels animals che oz. In auter fatg remarcabel ei la prescripziun, tenor la quala il pigrer bergamasc da **Nalps** astgava buca star sur notg cun sias nuorsas sin territori da **Tujetsch**, nunch'el pagavi ina taxa per nuorsa ed asen. Surstar fa era igl artechel dils statuts da 1832, tenor il qual ei vegn ordinau da far mintg'onn ina devoziun «en consideraziun dil gron don che las talpas fon on e mintg'on».

Ils uordens da vischnaunca plaidan era dallas autoritads communalas. La pli aulta era il schinumnai «Oberkeit» che secumponeva dils geraus e dils cussegliers. Quella autoritad che corrispunda alla suprastanza hodierna, vegneva eligida mintga dus onns. Tenor igl uorden da 1818 duei ella vegnir pagada «honestameing» per ses survetschs. Novs geraus havevan denton da pagar ina taxa alla vischnaunca per l'honor d'uffeci.

Sper quellas prescripziuns pertuccont l'agricultura e las autoritads vulan ils uordens era influenzar la veta religiosa e morala. Aschia vegn scadin admonius da frequentar dumengias e firaus ed interessantamein era las sondas la messa e las devoziuns («s. offizis») e da buca far lavurs manilas quels dis. Era dueigi mintgin observar las leschas divinas ed ecclesiasticas, cass cuntrari vegni el admonius ni castigiaus digl «Oberkeit». Ins capescha quellas ordinaziuns, sch'ins endriescha ch'il plevon ei staus gideivels enten stabilir ils uordens da vischnaunca. Probabel vegn el era ad haver influenzau il conclus tenor il qual neginas femnas («sentalli femnas ch'ei sin 13-14 onns e lau densi») astgien maner ellas alps ni sin mises.

La nova structura da vischnaunca suenter 1848

Suenter la fundaziun dalla confederaziun svizra 1848 han era ils cantuns stuiu adattar lur constituziuns al niev uorden svizzer. El **Grischun** ei quei denton reussiu per suenter 3 votaziuns negativas. 1853 accepta il suveran la nova constituziun che va en vigur cun l'entschatta da 1854. La partiziun dil cantun en districts, cumins e vischnauncas era denton gia vegnida fatga 1851. En piazza dalla vischnaunca da giurisdicziun vegn il cumin che ha dad uss naven denton mo pli cumpetenzas giudizialas. Sias pussonzas politicas van vi al cantun ed allas vischnauncas. Era **Tujetsch** daventa ina vischnaunca politica autonoma.

Igl emprem uorden da vischnaunca suenter l'acceptaziun dalla constituziun cantunala datescha digl onn 1857. El cuntegn denton mo prescripziuns davart grevezias e gudidas dils beins communalas. Pli detagliaus ei igl uorden da 1866 che vegn revidius 1880 e 1904. Els han pli u meins tuts la medema structura: La pussonza suprema ei la radunonza da vischnaunca che secumpona da tuts vischins che han cumplenu 20 onns. Ella stabilescha e reveda ils statuts da vischnaunca, elegia la suprastanza e las differentas cumissiuns ed examinescha ed approbescha l'administraziun da vischnaunca. La radunonza da vischnaunca vegn convocada dil president da vischnaunca che dat part il datum e las tractandas als cauvitgs che han da dar vinavon quella cunzina als vischins dils differents uclaus. La dumengia sissu ha il salter l'obligaziun da clamar en baselgia suenter messa: «Quels stimai vaschins en supplicai da spatge vischnaunca.» La radunonza ha liug per ordinari sil plaz cadruvi a **Sedrun** ed enqualga era a **Rueras** da dumengias da fiasta. Mo da malaura ed a caschun dalla radunonza generala vegn ella salvada ella sala da scola a **Sedrun**. Tier impurtontas tractandas vegn ei fatg la proposta da schar ir entuorn il meini. Suenter ch'il president ed in gerau ein s'exprimi, ha il salter la missiun da clamar pil num mintga gerau staus ina gada en uffeci. Enqualin di: «Mu vinavaun» ni «I è schon vegniu detg quai tg'è da di». - Las radunonzas da vischnauncas ein frequentadas fetg bein, era dils vischins da **Rueras** che stuevan vegnir da gliez temps a **Sedrun** a messa las dumengias. Probabel vulevan ils votants era buca stuer pagar il castitg da 50 raps entochen 1 franc per absenzas nunlubidas a radunonzas obligatoricas che la suprastanza saveva fjar per tractandas impurtontas.

La suprastanza che vegn eligida mintgamai gliendisdis Tschuncheismas per dus onns secumpona da 3 geraus e 6 cussegliers ni suppleants che serepartan sin ils differents vischinadis. Ord da quels cussegliers vegn ei mintgamai tscharniu in cassier (staltalter) ed in salter ch'ei ulteriuramein cautegia da nuorsas. La lavur dils geraus vegn repartida sco suonda:

Igl emprem gerau ha la funcziun da president, il secund ei actuar ed il tierz ha da survigilar la lavur cumina. Schiglioc ei la lavur buca repartida exactamein tenor in sistem departemental. Aschia han per exempel igl emprem e secund gerau ed il cassier da s'occupar da damondas da quens e finanzas. Sper la suprastanza han secapescha aunc differentas cumissiuns e divers funcziunaris da s'occupar da fatschentas communalas. Uffecis svani ein ils ugaus dalla spenda da graun e da sal. Tier in mortori vegneva ei da dau dalla famiglia dil defunct ina spenda per ils paupers. Sut survigilonza dalla vischnaunca eran medemamein ils ugaus dallas baselgias, capluttas, pervendas e caplanias. La separaziun dalla vischnaunca e pleiv ei succedida per 1973, avon era quei in esser.

Sistem departamental

La gronda midada dalla revisiun dalla constituziun da 1935 munta l'introducziun da 4 departaments per la suprastanza:

1. fatgs finanziars
2. fatgs forestals, da rempars, vias, punts ed auters edificis
3. fatgs d'agricultura e da lavur cumina (gerau zappun)
4. fatgs da polizia e pauperesser (gerau pulenta)

La survigilanza dils caus dils departaments ha il president ch'ei specialmein responsabels che las leschas ed ordinaziuns dil stadi e dalla vischnaunca sco era camonds ed ordras d'autoritads e vischnauncas vegnien exequi. Il diember dalla suprastanza ei pia vegnius alzaus da 3 sin 5 commembers. Leutier appartegnan 4 suppleants che han da substituir ils geraus en cass da basegns. Quels ensem cun ils 5 geraus fuorman il cussegl da vischnaunca. Quella autoritad ei la dertgira poliziala che ha da decretar castitgs per surpassaments dils uordens da vischnaunca. La «dertgira» aveva mintgamai liug gievgia grassa. Ins di ch'ils da **Tschamut** e **Selva** surpassavien sapientivamein certs scamonds per ch'els hagein la pusseivladad dad ir a «far tscheiver», quei che cuzzavi magari entochen gl'auter di. - In auter pensum dil cussegl da vischnaunca ei da conceder lenna.

In'autoritad nova ella constituziun da 1935 ei la cumissiun gronda che secumpona dil cussegl da vischnaunca e dils delegai dils vischinadis. Sia missiun ei da preponderar ed interpretar leschas, sentenzias e convenziuns, d'eleger certs officials, sco per exempel il spazzatgamin, da decider las damondas per novas patentas d'ustria e da decider sco istanza da recuors da decisiuns, sentenzias ni quens dai dalla suprastanza, dils departaments ni dils emploiai.

La constituziun da 1935 fa per l'emprema gada la differenza denter la vischnaunca politica, burgheisa ed ecclesiastica. Fertion che l'emprema autoritad cumpeglia ils vischins svizzers domiciliai en **Tujetsch** che han il dretg da votar, involva la vischnaunca burgheisa mo ils burgheis da **Tujetsch**. Quels han da recepir novs burgheis, administrar il pauperesser e fixar las taxas dils domiciliai che vegnevan pli baul numnai «anderses» (Anderssässige) e magari discriminai. La vischnaunca burgheisa ha il dretg da stabilir atgnas statutas ed in'atgna suprastanza. Ella ha denton mai fatg diever da quels privilegis ed ha acceptau ils statuts e la suprastanza dalla vischnaunca politica. Quei ha era la pleiv fatg che ha per dapi 1973 in'atgna constituziun ed in'atgna suprastanza. L'autoritad suprema politica ei la radunonza da vischnaunca che ha pressapau las medemas cumpetenzas sco els uordens gia numnai. Ella vegn convocada entras il president che tarmetta la gliesta da tractandas als cauvitgs che ston pender ora ella silmeins treis dis avon la radunonza. La participaziun alla vischnaunca d'elecziuns e da render quens sco era radunonzas cun tractandas fetg impurtontas ein obligatoricas. Absenzas nunperstgisadas vegnan punidas cun 1 franc. - Interessanta ei l'ordinaziun, tenor la quala la suprastanza sa punir ina conduita malvuglida duront las radunonzas da vischnaunca cun 2 entochen 20 francs. Sco in um vegl ha raquintau vegneva ei sescagnau mintgaton ualti fetg e detg si «schemel e bless» in a l'auter. Ei seigi capitau ch'ins hagi stuiu menar tals «revoluzers» giu dil plaz. Era hagi in ni l'auter stuiu revocar certas caussas, sco per exempel quel che veva pretendiu che la suprastanza seigi buna per tut per in bien migiel vin ni per ina buna marena.

Parlament communal

La constituziun communal vegn puspei revedida 1954 e 1964. Midadas essenzialas ha ei buca dau. Quei ei denton stau il cass tier la revisiun da 1973. La novaziun impurtonta ei l'introducziun dil parlament, numnaus il cussegl da vischnaunca, stada. El secumpona da 17 commembers e 3 suppleants e survegn diversas cumpetenzas impurtontas ch'eran avon adossadas alla radunonza da vischnaunca ni alla cumissiun gronda che vegn

dismessa. Il cussegl da vischnaunca ha denter auter d'eleger differents officials da vischnaunca, da relaschar e midar ordinaziuns e reglements executorics ni senza vigur generala, da deliberar las fatschentas ch'ei da suttametter alla radunonza communal ni all'urna, da crear novas piazzas stablas e da fixar la salarisaziun dil personal e las schurnadas dils commembers dallas autoritads communalas. El ha era grondas cumpetenzas financialas: entochen 100 000 francs per novas expensas ed entochen 15 000 per expensas che serepetan. Per expensas che survargan quels importos numnai ei la radunonza da vischnaunca cumpetenta. Quella autoritad ha denter auter era il dretg da decider davart la participaziun a corporaziuns ed instituziuns regiunalas, d'approbar il quen annual ed il preventiv e da far midadas e revisiuns parzialas da leschas e reglaments cun vigur generala. La cumpetenza da relaschar novas leschas ni da reveder talas totalmein ha la cuminonza dils votants che dat la decisiun entras l'urna. Quei ei era ina gronda novaziun dalla nova constituziun. Ins ha cheutras vului possibilitar meglier a tuts votants da far diever da lur dretgs democratics. Da l'otra vart vegn ei denton deplorau che las cumpetenzas dalla radunonza da vischnaunca seigien vegnidas sminuidas e cheutras era lademocrazia directa. - All'urna ston ulteriuramein aunc las suandontas fatschentas vegnir suttamessas: relaschada e midadas dalla constituziun, impegnaziun ed affittaziun da schischom che survarga igl importo da 500 000 francs e concessiuns per l'explotaziun da forzas d'aua ni per autras explotaziuns da pli gronda muntada. Era las elecziuns dil cussegl da vischnaunca, dalla suprastonza communal, dalla cumissiun da gestiun e dil cussegl da scola vegnan fatgas entras l'urna e quei ei decuors dil matg e zercladur.

La constituziun da 1973 numna sco habels d'eleger e da vuschar ils burgheis svizzers d'omisduas schlatteinas ch'ei stgis d'agir e che han cumplenu il 20avel onn. Pia han era las femnas il dretg da votar. Quei dretg han ils vischins concediu ad ellas igl onn 1972 malgrad ch'ellas ein stadas encunter quei en ina votaziun consultativa.

Administraziun communal e menaschis da vischnaunca

Per saver ademplir ses differents duers ei la vischnaunca stada dependenta da ditg enneu dalla collaboraziun da divers funcziunaris. Quels fagevan lur lavur en uffeci accessoric ed havevan lur «biro» per ordinari a calur. Ils impurtonts collaboraturs eran il gerau militar, il bostger, igl archivari ed ils administraturs digl uffeci civil, dil cudisch funsil e dalla cassa da cumpensaziun. Cul temps ei denton stau necessari da crear piazzas stablas. Igl onn 1966 engascha la vischnaunca il bostger en uffeci cumplein. El survegn beingleiti agid d'ina grappa da luvriers d'uaul ch'ei per part era engaschada en piazza stabla. Ina gronda midada administrativa sedat cun l'erecziun dalla canzlia igl onn 1971 nua ch'igl emprem canzlist communal vegn eligius. El survegn beingleiti sustegn d'in gidonter che vegn promovius suenter enzacons onns a canzlist. Ils dus canzlists ein sil medem scalem, repartan denton la lavur: l'in administrescha igl uffeci civil, da taglia, da lavur e da militar e l'auter ei contabilist, cau dalla cassa da cumpensaziun ecetera. In dils intents da crear ina canzlia ei staus quel da centralisar ils differents uffecis spatitschai en l'entira vischnaunca. Quei ei era daventau lu successivamein. Oz sefa la gronda part dalla administraziun da vischnaunca ella «Tgesa communal», baghegiada igl onn 1975. En quei center communal lavuran ulteriuramein il polizist communal, il cau da construcziun ed igl administratur dil cudisch funsil. L'administraziun ei vegnida modernisada 1983 entras l'introducziun d'in computer, dil qual era la ovra electrica - sorprendida dalla vischnaunca 1969 - e l'uniun da cura e traffic fan part. Quels dus menaschis han medemamein anflau suttetg ella «Tgesa communal». Personal stabel ha era la Casa sogn Vigeli basignau che la vischnaunca ha saviu far diever 1969 per ses vegls. Era per la survigilonza dalla serenera messa en funcziun 1984 eis ei stau necessari dad engaschar in emploiau stabel. En tut occupescha la vischnaunca (cumpriu l'installaziun electrica) gleiti 40 collaboraturs stabels. Leutier vegnan aunc 16 scolastas e scolasts. Sper quels emploiai stabels dat ei secapescha aunc differents funcziunaris che fan lur lavur en uffeci accessori sco per exempel igl archivar, ils cutschs, ils termadurs ed aschia vinavon.

Ils vischinadis

Era sche la vischnaunca ha d'ademplier la gronda part dils duers per il beinstar public, havevan ils vischinadis pli baul differentas incumbensas per part ordinadas dalla vischnaunca. Ina da quellas era da pladir in ni plirs pindrers che haveva da pindrar tiers che mavan pil prau, suenter ch'ei era vegniu fatg mundi. In auter pensum era la controlla da fiug las dumengias. Da messa gronda, cura che tut la gliעד era en baselgia, haveva ina ni pliras persunas dad ir pil vitg entuorn per controllar, schebein tut seigi en uorden. Quella obligaziun mava en roda da casada tier casada. Sco simbol da quei duer ni era sco agid da memoria surveva in pal che vegneva daus da famiglia a famiglia che veva mintgamai da far quella obligaziun.

Ils vischinadis havevan pli baul era certs baghetgs communabels. In da quels era il pistregn che vegneva pil soltt numnaus «hetta». Ins duvrava quellas localitads per far lischiva, per euer ils truffels pils pors e per far la mezga. In auter edificci era la cascharia ni la «senaria» che vegneva duvrada specialmein la primavera. Per far paun havevan ils vischins in fuorn communabel. In tal indrez havevan magari era mo singulas famiglias ni enzacontas famiglias ensemen.

Auters duers ch'ils vischins havevan d'ademplier era il provediment d'aua (mira provediment d'aua, pagina 343) e las canalisaziuns realisadas entuorn ils 1950.

L'allontanaziun dallas auas piarsas ha la vischnaunca surpriu entras crear ina serenera. - Plinavon havevan ils vischins da mundar las pastiras da casa, rugalar e mantener trutgs, begls, classenas ecetera. Mintga vischinadi haveva ed ha aunc oz in cert territori da pastira per ils tiers da casa. Il cauvitg haveva da pladir il cavrer, il paster da casa e magari era il purtger. Oz ein las cauras svanidas en differentis vischinadis e leu nua ch'ellas ein aunc avon maun, audan ellas mo a paucs proprietaris che ston sez procurar per il cavrer. Per il paster da casa ei il cauvitg responsabels, aschilunsch ch'igl ei vaccas el vitg durant la stad. Schiglioc ha il cauvitg buca da far bia pli. Tochen dacuort haveva el aunc da reparter ils cedels da votar. Quei fa ussa denton la canzlia entras la posta. Ina dallas sulettas incumbensas dil cauvitg ei da clamar mintga dus onns ina radunonza per numnar ils candidats per las autoritads communalas che succedan enconuschentamein entras l'urna. Enqual vischinadi organischa aunc mintg'onn Ina sera da famiglia.

Litteratura

Berther, Alfons. Uordens ed usits vegls dalla vischnaunca da Tujetsch. En: La Tuatschina, nr. 11, 30 da matg 1980

Berther, Toni. Temps da pastur a Camischolas-Zarcuns. En: La Tuatschina, nr. 37 e 38, 1975

Muoth, Giachen Caspar. Die Thalgemeinde Tavetsch. Ein Stück Wirtschaftsgeschichte aus Bünden. En: Bündner Monatsblatt, nr. 1-4, 1898

Regulativ per il vischinadi de Sedrun. 1954

Uordens, e constituziuns da Tujetsch da 1811, 1814, 1818, 1832, 1857, 1866, 1904, 1935, 1954, 1964, 1973

(Ils uordens da 1811, 1814 e 1818 ha Caspar Decurtins publicau en la «Rätoromanische Chrestomathie», tom 1, p. 507-512, quels da 1857 e 1866 ein avon maun en fuorma da manuscrets egl archiv communal. Las ulteriuras constituziuns ein vegnidas stampadas sco scartiras independentas).

Nodas-casa

Las nodas-casa ein segns linears. Ellas consistan da lingias gradas e rodundas, enqualga completadas dil punct. Las lingias gradas domineschan e varieschan dalla fuorma verticala alla horizontala, e quei en tuttas direcziuns. Aschia eis ei stau pusseivel da crear variantas e cumbinaziuns differentas.

Pli tard ein era ils bustabs da nies alfabet vegni duvrai per scaffir nodas-casa. Quels segns ni nodas-casa vegnan aunc oz duvrai sco mussament da proprietad. - En Svizra vegn la noda-casa avon gia el 15avel tschentaner, el Grischun perencunter per all'entschatta dil 17avel.

En emprema lingia ein las nodas vegnidas applicadas per indicar il proprietari. Tuttas sorts d'utensils ed uaffens ed iseglia fuvan nudai cun la noda dil possessur ... Pli da vegl han ins fatg diever dalla noda per suttascriber in document.

Quella part sco Nodas casa

Cumprovas neu digl onn 1863 muossan ora. Alla fin dil contract secloma ei sco suonda:
«per confirmaziun dil surra fa la Madleina Decurtins si sia noda-casa»

Semegliontamein:

1866 Vieua Lisabet Loretz fa si sia noda casa

Rosa Riedi fa si sia noda casa

Barclamaiu Berther fa si sia noda casa

Mr. Catrina fa si sia noda casa

Quella varianta da suttascriber documents ei svanida pli e pli, il mument ch'ins ha saviu scriber. En **Tujetsch** anflein nus per l'emprema ga las nodas-casa el cudisch "rodel da castitgs digl onn 1793-1804." Ils castigai da 1794 ein setradi cun nudar la lenna, prida ord igl uaul senza la lubientscha digl «oberkeit» ... e quei fuss

Statalter Adalgot Berter

Melcher de Gonda

Toni de Curtins

Duas gadas ein mo las nodas dils culponts indicadas, numnadamein:

Las nodas da mintga possessur ein per l'emprema gada vegnidas rimnadas e nudadas el «Cudisch da nodas della Vischca **Tujetsch**» e quei igl onn 1900. Pongir - l'applicaziun dallas nodas svanescha pli e pli, in di vonzei vegnan ils segns misterius ad esser senza muntada. Mo aunc in per nodas-casa neu dil vischinadi da Rueras, aschi per curiositad:

Berther Sep, Dieni

Berther Sigisbert

Berther Gion Antoni

Berther Gion Fidel

Berther Paul

Berther Gion Fidel (hoita)

Berther Giachen Giusep

Brugger Leci Antoni

El cudisch numnau sisura secattan 135 nodas; enteifer ils onns ein ulteriuras vegnidas vidlunder. Buca da meins impurtonza pils purs fuvan e las nodas dils tiers manedels. Ellas ein semegliontamein registradas en quei cudisch. Mo ual entginas cumprovas:

Berther Sep, **Dieni**:

ureglia dretga:

giu da sum

ureglia seniastra:

ina ruosna, in snez davos en

Berther Sigisbert:

ureglia dretga:

o

ureglia seniastra:

ina ruosna ed in snez davos en enagiu tier il tgau

Ils 10 vitgs u uclivas dalla **Val Tujetsch** muossan ora in diember da 201 nodas-casa. En memoria ein las biaras, en diever denton mo pressapauc ina tiarza forsa. Ei savess esser cunvegnent da far resortir las nodas-casa da dus vitgs, in da «dadains gl'uaut» e quel dad odem la val, numnadamein da **Selva** e **Bugnei**.

Selva

Deflorin Toni Vigeli

Giger Battesta

Giger Gion Gieri

Loretz Gion Antoni

Loretz Michel

Peder Ignazi
Peder Vigeli
Venzin Augustin
Venzin Giachen Martin
Venzin Martin
Venzin Paul Benedetg
Venzin Stiafen
Venzin Vigeli

Las nodas-casa dils possessurs screts cursiv ein oz aunc en diever. Nudai ein milsanavon ils tiers manedels (cauras e nuorsas), mintgamai ellas ureglias.
In exempel tonscha.
Venzin Stiafen ureglia seniastra: ina ruosna, in snez davon en

Bugnei

Curschellas Tumaisch
Decurtins Adalbert
Deragisch Giusep
Deragisch Vigeli
Hendry Luis
Loretz Augustin
Monn Murezi
Monn Vigeli

Ils possessur screts cursiv fan aunc diever da lur noda-casa. Pils tiers manedels (cauras e nuorsas) ha Adalbert Decurtin sia suandonta enzenna: ureglia dretga in snez atraviars davos en ureglia seniastra ina furcletta davon en
Las nodas-casa vegnan era a ver el futur ina certa calamita. Per che lidinuot mondi a piarder, ha Nazi Berther-Tuor da **Gonda** rimnau las nodas da tut la val e siu cusrin Manuel Berther-Maissen ei staus sissu che las gliestas seigien completas.
Ed oz ein ellas rasadas ora sin ina gronda tabla el museum «La Truaisch» a **Sedrun**. Enzatgi vegn a far stem; il dessegn e la caligrafia da Gieri Schmid da **Zarcuns** semuossan scosauda.

La bilanza dil quen da vischnaunca

Sche nus mirein atras ils quens dils davos onns, varieschan els buca per bia; quel digl onn 1985 duei mussar ora. L'argumentaziun dil canzlist Stanislaus Gamboni ei specificada manedlamein; il vischin survegn in'idea dalla sviulta da daners. - Ei caztga da metter a per las finanzas dad oz cun quellas d'avon e suenter la secunda uiara. Quels onns leu che l'affittaziun dall'alp **Tschamut** (7000. - frs.) e las condottas da lenna (forsa annualmein per in bien tozzel mellis) ein stadas dallas capo entradas. Senza quels dabiens fuss ei insumma buca stau pusseivel d'ulivar e far quen. En quei senn ei il maletg digl onn 1985 singulars:

affittaziun d'alp 4'500. - frs.
entir dallas entradas da lenna 117'000. - frs.

Cun quels dus imports savess la vischnaunca da **Tujetsch** buca tgei cantun pigliar. Aschidadir oz che passa otg milliuns van anen e passa otg milliuns van anora; ina sviulta da daners semeglionta tacca e la vischnaunca da **Tujetsch** stat bein agrads. En scadin cass, sch'ins pecla ord il quen communal las uettas grossas, fan ins persenn:

- taglia da gudogn e facultad (80 pertschien) e quella persunala; pressapauc 1'000'000. - frs.
- taglia da personas giuridicas (ORA persula circa 900 000. -) 1'000'000. - frs.

- taglia da schischom, 1,5%0	620'000. - frs.
- taglia alla fontauna	60'000. - frs.
- tscheins d'aua	340'000. - frs.
- ovra electrica Tujetsch	180'000. - frs.

Postas aschia declaran dabia ed igl ei ina causa fatga ch'ils tscheins d'aua creschan entochen 1990 pil dubel e vegnan allura a far ora la summa da 800'000. - frs.

Naturalmein ch'ei tucca era da metter in encunter l'auter las expensas che s'augmentan semegliament da detschiert, sco per semeglia:

- tscheins currents	550'000. - frs.
- scolaesser	910' 000. - frs.
- administraziun	465' 000. - frs.
- casa sogn Vigeli	106' 000. - frs.
- tut ils fatgs da baghegiar ora ed aschia	600' 000. - frs.

Naven digl onn 1986 fan ins il quen ch'ils tscheins d'aua uliveschien en **Tujetsch** tut ils tscheins passivs; ton ch'ils aspects ein buca mal ed enzatgi sa interprender enzatgei. Da l'otra vart eis ei buca da surveser che la nova lescha da taglia dils 8 da zercladur 1986 smasa las entradas da taglia per pressapauc 200'000. - frs. Milsanavon schunta **Tujetsch** e aunc 70'000. - frs. cun la nova lescha cantunala d'ulivaziun da finanzas. E ... sch'ei mass lu propi da mal en mender, tueca ei alla vischnaunca da **Tujetsch** d'alzar il pei da taglia, forsa dad 80 pertschien sin navonta %, poda, malgrad siu prima entsehat da finanzas.

Intervesta cul canzlist Stanislaus Gamboni, Sedrun, bilanza dil quen annual

La planisaziun locala

Igl ei da dir quei da detschiert; la revuelta dils anno 1970 ei stada en **Tujetsch** relevonta ed il mument decisiv ein ils vischins e lur suprastonts stai da liunga vesida, tondanavon che la promtezia e lur spert aviert ein digns da laud.

Enaquella ch'els ein s'entupai per propi ed han fatg igl inventari grond, han ins fatg persenn. Las ordinaziuns existentas dattan buca garanzia per ina planisaziun pli gronda. E la causa ei stada siper la detta: crear immediat in manual ch'ins sappi applicar la lescha a pro dall'organisaziun e dalla economia entira entratga.

Igl ei stau la stad digl onn 1970 ch'ils vischins da **Tujetsch** ein sedecidi da realisar la planisaziun locala; ual sissu han ins aviert in credit ad enzatgi ch'ei semess alla lavur. Ed igl ei schabegiau ina causa maisudida; la suprastonza communal da **Tujetsch** ha decretau ina serrada da construcziun per in onn ed ils vischins han concediu. Per tgi ch'ei staus da lezzas uras davontier, ei quei per cass lu buca stau fafanoias. - Ton ch'ils suprastonts cun lur comites ha siu prender peda da trer tier enzatgi, per mintga sparta in um dil rom, risguardond igl aspect dall'entira cuntrada, sco per semeglia:

- la segironza dils habitadis (encunter lavinas, boas e crappa)
- il funs e sia surfatscha d'utilisaziun (arrundaziun e las zonas differentas da star e ruassar)
- vias e sendas (atras la cultira e pil ruaus)
- auas da beiber ed indrezs da stizzar per tut las fracziuns entuorn
- auas piarsas ed ina serenera
- spazis da recreaziun e da ruaus

Igl entir complex ha fatg pretensiuns enormas ed ins ha prolungiu la bloccada per in ulterior onn. Ella votaziun dils 26 d'uost 1973 han ils vischins da **Tujetsch** fiers la planisaziun cul resultat da 272:232 dallas vuschs. - Enstagl da schar dar giu la bratscha han ins fatg vinavon, la suprastonza communal e ses comites tutttavia. Cun ir pils vischinadis e ver endamen ein novs aspects semarmeni. Il muossavia general (era per

las vischnauncas vischinontas da **Mustér** e **Medel**) ei staus da gronda purtada; ils vischins ein buca vegni unfis da ponderar vinavon. S'entelli - ins ha serrau la construcziun per dus ulteriurs onns, tocca ils 30 da mars 1975. Ed ina stendida semeglionta ha pretendiu bia.

Ils 23 da mars 1975 ei staus in tierm; cun 348 encunter 310 vuschs han ils vischins da **Tujetsch** acceptau la planisaziun locala. Pongir - las caussas ein tuttas stadas bein enfiladas e sin in tal fundament ein las caussas sefatgas endretg.

Ed igl ei nuota da metter d'ina vart; pervia dil plan da zonas ha zatgi fatg nuaus. Ton ch'ins ha la finala tscheu e leu stretganiu u slargau per la letga, zatgei gadas in techet. Pils uclauns entuorn han ils logs da surbaghegiada buca dau ton dil far sco forsa els centers da **Sedrun** e **Gonda**, **Camischolas** e **Rueras**. Quei che pertucca il vitg da Sedrun ei la slargada encunter **Niriel** e ual sut il stradun cantunal enadora segiramein d'engrau, accurat sco la stendida denter **Gonda** enviers **Camischolas** ed a **Rueras** encunter **Flurin**.

En mintga cass han ton ils logs principals sco las uclivas d'in maun grondas pusseivladads da serasar; ils Tuatschins han giu bien quitau pil futur e quei ch'els han fatg ad uras ei senza paregl e ... savess schizun survir d'exempel ad enzatgi.

Las scolas da vischnaunca

Igl ei da crer che l'instrucziun en ducrina seigi sefatga ualti a per cun la baselgia sezza - e la baselgia parochiala da **Sedrun** datescha dils anno 1205. Ed igl entruidament ei ora ed ora staus il duer dil plevon e da ses gidonters, dils caplons tuttaviva. La cardientscha en Diu ha pigliau fermamein ragisch en **Tujetsch**, dapi dadaditg enneu, probablamein dapi adina. Quei ei enta maun che glied aschia da siu persei, sternida siper las plauncas e messa ora allas forzas malguessas dalla natira, ha stuiu crer enten enzatgi.

Ils documents ein scarts, quels che dian dallas caplanias da scola; ina notizia dils 23 d'uost 1643 fa valer ch'il plevon stetti avon e detti scola, il plevon da **Sedrun**. Il plaid «detti scola» ei apartis, pia buca mo instrucziun en ducrina. - Ton che la baselgia veva da mussar enzatgei ad enzatgi e las ordinaziuns ein vegnidas dalla curia si da **Cuera**. La tschera da talas scolas, lezza ei buca leva da fixar; en mintga cass in tec lectura, principalmein religiusa, leger e scriver e las specias da quen. La calligrafia ei stada davontier - far bials bustabs e tschentar si els endretg. La scola sezza ha giu liug pil sollt en stiva dil spiritual u mussader ed ils mieds leutier ein stai schampers detgavunda. Il cuoz dalla scola ei staus differents, per ordinari navenda sontga Catrina tocca viaden ella Jamna sontga.

Las disposiziuns dalla scola veglia ein idas ditg, entochen viaden els emprems decennis dil schenivavel tschentaner. Mo plaunsiu ein ils mussaders sefatgs, mussaders che han suandau in tec alla ga Jean Baptiste Girard (1765-1850) e Johann Heinrich Pestalozzi (1746-1827).

Las casas da scola per propi ein sefatgas en **Tujetsch** entuorn la mesadad dil schenivavel tschentaner ed ils vischins ein selubi enzatgei pils vegnentsuenter. Igl ei stau igl onn dil «Sten nair» (Tumaisch Giusep Schmed, 1784-1866; igl onn 1847 veva el puspei pudiu el Cussegl grond ed el ei seprius en) ed ils vischins han priu il conclus sin vischnaunca da baghegiar novas casas da scola e quei lu ual quater enina, a **Sedrun** (**Cadruvi**), a **Rueras**, **Selva** e **Cavorgia**. Nuota casualmein, per cass, onz plitost perquei ch'ina buffera maisudida veva dersch ina massada lenna ed ins ha vuliu far diever dignamein dad ella. E treis casas da scola han ins era baghegiu sil plum (1848); ils «da dadains gl'uaud» perencunter, ils ezs han aunc spitgau ditg e liung, tocca ils anno 1919, sin lur casa da scola a **Sutcrestas**, schebi ch'il fondo da scola fuva avon maun ed il cantun veva aunc dau ina premia suren.

La «gliut» da **Camischolas** e **Zarcuns** han buca dau luc; finalmein han els survegniu igl onn 1862 in'atgna casa da scola, buca ual ina gronda, mo tuttina.

Bunamein curont'onns han ils mussaders mussau da leger e scriver e far quen ella scola sin cadruvi a Sedrun, raquintau praulas e legiu ord il cudisch da ducrina e priu neu da quel «da steilas», entocca igl onn 1886 ch'ils vischins han baghegiu la scola nova a **Sontget**, veramein enzatgei da num. - Per **Zarcuns** e **Camischolas** eis ei stau ina frida

da tarmetter lur affons a scola o **Sedrun**. En vischnaunca ein els secuntermess e per la decisiun dil Cussegl pign ha dau la viulta. Ton che naven digl onn 1892 ein ils affons vegni vess e nuidis o **Sontget** sin **Dulezi**; da lur casa da scola ha la finala l'entira val fatg diever, enaquella ch'ins ha fatg lunderora la nova scola reala (secundara). Quei ei schabegiau igl onn 1908. Als vischins dadens il **Dutg Grond** ein ins era vegni en agid, il mument ch'ins ha alzau lur casa da scola e fatg ordlunder ils anno 1911 ual duas scolas. Ei fa tuttavia smarvigliar che la plipart dils scolasts ein vegni da sutensi, sco per semeglia il Placi Antoni Bisquolm (che veva 1849/1850 76 scolars a **Sedrun**) ed il Giusep Steiner da **Cumpadials** ed ils auters, sch'ins citescha per exempel ils scolasts Caderas e Caplazi e Cavegn. Ed indigens per propi s'ei per cass nuota ton biars ed ins numna bugen la Maria Barla Pally, il Gion Antoni Soliva e Stiafen Beer.

Duront l'emprema mesadad dil vegnavel tschentaner ha Sep Mudest Nay da **Danis** dau la tempra els fatgs da scola en **Tujetsch**, el sco scolast dalla scola reala a **Camischolas** ed enconuschents empau dapertutanavon sco referent ed autur. Suentar che scolast secundar Hans Giachen Decurtins ha giu midau clamada ed ils dus ulteriurs Benedetg Bundi ed Albert Cadalbert ein i naven. Pongir tut en inaga ein mussaders dils uclauns sefatgs amogna, sco per semeglia ils dus Peders (Barclamiu e Gion Michel) ed il Tumaisch Venzin o da **Selva**, ils treis Hendrys si da **Cavorgia** (Gion Antoni, Gion Felici e Gion Ludovic) e Theophil Schmid e Leci Jacomet fussen oriundamein è aunc da **Maunsut**, ferton che Vigeli Berther e Giusep Gieriet ein d'amiez la val. Tons mussaders aschia in suenter l'auter che Augustin Pally da **Camischolas** ei setratgs a **Vaz**. Aschiprest che pusseivel han ils vischins da **Tujetsch** fatg rodund cun lur scolas e scolasts tochen la fin dalla secunda uiara e perinaga.

Enten baghegiar ora las auas ei ina scola tudestga sefatga a **Rueras** (scolast Alfons Schmet), suenter ch'il vischinadi grond dadens il **Dutg Grond** veva giu survegniu ina casa da scola nova (1959) odem il vitg siviars la bellezza squadra da **Flurin**.

A per culs novs implonts electricis ei il turissem sefatgs gronds ed il regl da novaziuns ei vegnius tut insurin. La scola secundara a **Rueras** e quella da **Camischolas** han ils vischins mess en lur liug ella casa nova da scola a **Sedrun**, quei stupent edifeci dadens **Gonda** sur via e quei tut igl onn 1962. - La centralisaziun ei ida dabot e la gliעד ora sigl ur, quels dils uclauns, ein stai mal, enaquella che **Selva** (1959) per exempel e **Cavorgia** (1968) han piars lur scolas.

E co stat ei oz, sch'ins interquera da rudien? Il meins da schaner 1986 ei nies meins da controlla ed ha da star botta. Il svilup sco tal ei sco usitau, l'instrucziun sefa bein, ils aspects empermettan sco las cumprovas che suondan muossan ora.

Rueras:	44 affons
scoletta, Francisca Gieriet	8 affons
scola pintga (1-3 classa), Pally Vincens	18 affons
scola mesauna (4-6 classa), Monn Hans	18 affons
tratg ensemen	44 affons
Sedrun:	206 affons
scoletta a Gonda , Michelina Schmet	19 affons
scoletta a Sedrun Sr. Ulrica Flury	18 affons
1. classa, Hendry Tarcisi	14 affons
2. classa, Valier Jovita	12 affons
3. classa, Cadalbert Ursula	15 affons
4. classa, Hendry Benedetg	14 affons
5. classa, Monn Ciril	25 affons
6. classa, Bearth Marcus	16 affons
scola reala	
1. classa, Schmet Alfons	17 affons
2.+ 3. cl., Vincens Norbert	18 affons

scola secundara	
1. classa, Cathomas Erwin	15 affons
2.+ 3. cl., Jacomet Leci	22 affons
Scola auxiliara, Mustér	1 affon
tratg ensemen	206 affons

Survista dallas scolas en **Tujetsch**

Scolettas Rueras e Sedrun	affons pigns	45
scolas publicas:		
scola primara	132 scolars	
scola reala	35 scolars	
scola secundara .	37 scolars	
scola auxiliara (Mustér)	1 scolar	205
addiziun da tuts ensemen		250

Ils affons dalla scola publica serepartan sco suonda sils differents vischinadis:

Tschamut	0
Selva	2
Dieni	5
Rueras	50
Zarcuns	8
Camischolas	30
Sedrun	104
Bugnei	5
Surrein	1
Cavorgia	0
total	205

La providientscha ei digna da laud - che **Tujetsch** ha quasi negins affons mendus e ch'els ein habels per l'instrucziun. - E sch'ins mira propi, dattan ils nums dils mussaders els egls, ina tiarza ei d'ordeifer las stagias dalla val. Forsa buca ual ina situaziun sco avon onns, mo tuttina.

La damonda nundetga stat enta maun; tgei fan quels scolars e quellas scolaras suenter la scola da vischnaunca? La retschercha dallas annadas 1965-1969, pia tschun onns enina, dattan l'emproma. Dils 153 mattatschs u mattatschas ch'ei vegni ord scola - fan:

in emprendissadi	124	= 81 %
scola media	10	= 6,5%
buca emprendissadi	19	= 12,4%

Ton ch'il mistregn e l'instrucziun ulteriura ei senza paregl, sch'ins metta las caussas a per culs onns vargai. Auncallura ha **Tujetsch** oz endisch students allas universitads u scolas aultas che fan empermischuns.

Fontaunas

Archiv dalla vischnaunca da Tujetsch. Gliestas dils scolars pigl onn 1985 (rapport dil cussegl da scola) Gadola, Guglielm. Historia della scola rurala della Val Tujetsch. En: Igl Ischi 1957, p.89-120
Hendry, Toni. Per regurdientscha della casa da scola a Sontget Gonda. En: La Tuatschina, nr. 34, 1975

L'uniun purila

Igl ei schabegiau suenter la secunda uiara mundiala; ins fuva mitschus ed en **Tujetsch** ein ils purs ed ils luvrers sereghigliai. A per cun l'uniun da luvrers ei medemamein ina uniun purila sefatga e quei da miez matg 1950. - Il stausch grond ei vegnius neu dil vischinadi da **Rueras**. **Rueras** ei da daditg enneu il vitg da purs ed ils ezs han cuntinuadamein giu da dir in plaid el capetel. Els ch'ei sefatgs valer cun la tratga da

biestga ed han reglamentau democraticamein la cumpra e l'envernada dils tauris da tratga; tocca bunamein alla fin dil tschentaner vargau vevan ils geraus l'obligaziun da tener ils tauris. Consequentamein cumandavan els era las fiastas ed ils purets han giu da dir pauc.

Cun agid da cusseglier naziunal Christian Foppa ed il giuven inschignier agronom Felici Berther ein ins secarti e l'uniun purila ha dau l'entschatta. Aschidadir purs sco Francestg Berther e Christian Cavegn ein semess davontier ed han gidau a trer. Bein l'emprema radunonza ha sancziunau ils statuts ch'ils iniziants vevan giu pinau. Suentar la neiv gronda dils anno 1951 ha l'uniun saviu dar l'emprova. Ils purs fuvan vegni ora sils quendis ed ins ha cumprau e distribuì 125,6 tonnas fein per passa 22'000. - francs. E las seras d'unviern ein stadas d'engrau per instrucziun ulteriura e glied dil rom d'eifer ed ordeifer la val ein seprì en persuentar.

En emprema lingia han ins bein giu quitau dil latg e dil product dil pur, senza naturalmein surveser il fastedi dil luvrer. L'idea d'arrundar ed amegliar il funs ei vegnida dabot; la realisaziun perencunter ei tuttavia buca sefatga enina, schebi che la terminaziun e las vias da funs fuvan munglusas, in fatg ch'ins ei forsa seperschuadius per propi per suenter la megliuraziun. - Milsanavon han las exposiziuns da biestga dau tschaffen ed ils pervesiders han buca schau per breigia dad era saver metter ora futuramein tiers da qualitad. La pussevliadad da saver e setrer vi cun nuorsas ei carschida pli e pli ed ina reuniun ha promoviu igl intent. Buca pauc da risdar ha la societad da latgiras a **Rueras** e la cuntinuaziun dalla centrala da latg da **Sedrun** dau. Las alps e l'alpeggiaziun ha ora ed ora dau dabia ella val, oravontut il conduct dall'aua e silsuentar ils cundrezs e las structuradas. Igl ei per semeglia stau bien che l'uniun purila ei seprida en da metter ad alp ils vadials ch'ei veramein stai mender sin las pastiras da casa. - In'ulteriura caussa resortescha la stad digl onn 1957, cura che purs e marcadonts dalla **Bassa** ein vegni ed i culs nos sillas alps per cumprar directamein la biestga. S'entelli che la fiera da **Sedrun** ha pitii giudlunder e la finala han ins annullau ella. Mulissier e marcadont ein da haheias enneu in mistregn da resca e ch'ei ha dau meinsvart enqual caussa permiezvi e schizun mendra ei cumpatg buca stau d'evitar. Sco per exempel ch'in marcadont dalla **Bassa** ha cumprau biestga e buca pagau ella ed igl intermediader ha retschert ina distincziun, gliez ei en mintga cass buca en uorden ed ei gidass e buca da zuppentar vi.

Ed ei fust semeglientamein buca tenor il reglament, sch'ils exponents dalla uniun purila surdrovan ella sco sigliera sin in u l'auter uffeci da vischnaunca.

Cun l'entschatta dils anno 1970 e silsuentar dabot - ha ei dau la gronda midada. Cugl agid dall'uniun purila han ils vischins decidii e menau atras:

- mo duas alps da vaccas (**Cuolm Val** e **Val Giuv**)
- suttetg da mulscher cun maschina ed ina lingia da latg dil **Cuolm Val** giu **Val Giuv**
- drenadi dil terren da paliu a **Val Giuv**
- nova centrala da latg a **Sedrun** sut l'egida d'in um dil rom; il latg da **Val Giuv** e quel dils differents vischinadis vegn tratgs a nez ella centrala. Oriundamein sco emprova e sissu prolungiu per 4 onns
- ils purs progressivs instradeschan ina iniziativa pervia dil pastg cumin; dalla votaziun denton seresultescha il fatg da vuler star vid il veder

Ton ch'ei ha dau durant ils davos onns, lein dir ils trenta davos, ina midada suenter l'otra. Il fatg dils purs ei vegnius gronds e las schanzas dil puret ein pintgas. - Schebein tut las innovaziuns ein allura stadas a pro dils vischins da **Tujetsch**, sco per semeglia las investiziuns considerablas sillas alps, gliez stat per cass scret d'ina altra vart.

Ulteriuras uniuns

Ins ei s'unius cun enzatgi - e en **Tujetsch** - per esser pli ferms, purs e mistergners ed ils luvrers e schizun las dunnauns e mattauns, per semeglia.

Ch'ins metti pia ina dallas davosas uniuns ch'ein sefatgas davontier e numni l'uniun professiunala da **Tujetsch**.

Uniun professiunala Tujetsch

E buca meins che curontatschun commembers ein inscrets, mistergners dallas uisas che vulan tuts esser bein en mongia cun enzatgi. La gronda midada lai fitgar pei e tut ils plazs da lavur ella val ein d'engrau. - Ils tschentaments dall'uniun dateschan digl onn 1973; oz tgamunescha Tumaisch Venzin ils mistergners. L'organisaziun sco tala ei quella da mintga uniun, cul dretg da commembradi, favurs ed obligaziuns. Igl intent ei circumscrets sco suonda:

- promover il svilup da professiun
- sustener l'indipendenza da professiun
- cunterdir e cunterfar alla concorrenza illoiala
- enfirmir l'influenza enviers l'autoridad e la publicidad
- informaziun generala e participonza dils fatgs publics

Uniun da luvvers

Tocca igl onn 1950 han ils luvvers da **Tujetsch** (appartenent al sindicat da luvvers dil lenn e dalla construcziun CHB) fatg part dalla secziun da **Mustér**. La malcumadeivladad dad ir mintgamai a **Mustér** ha fatg semarmenir l'idea da fundar en **Tujetsch** ina secziun. Bruno Soliva-Jacomet da **Sedrun** ha priu l'iniziativa ed ils 21 da fenadur 1950 ei l'uniun sefatga a caschun d'in referat dil secretari Brugger da **Cuera**. Neu dil gruppament da 28 commembers han ins scochemai eligiu ina suprastonza, numnadamein:

president: Gion Caduff Hendry, **Rueras**
actuar: Alexander Loretz-Schmid, **Rueras**
cassier: Bruno Soliva-Jacomet, **Sedrun**

Las statutas s'accordeschan cun quellas dil sindicat cristian dalla **Svizra** e dian da salvar e cultivar il beinstar etic e material dils commembers. Instrucziun e sentupada duein promover il bien spert; ulteriurs tschentaments indicheschan detagls e visan ils duers dalla suprastonza.

Ins ha fatg plaunsiu e la gruppa ei sefatga bein, tut avon la revuelta dil temps. Culla sondaziun da gallarias digl onn 1955 ha ei entschiet; lura veva la gruppa fitgau pei. Las lavurs dils implonts electricis han cuzzau entochen 1968 e l'organisaziun dils luvvers ei daveras stada cunvegnota. Il plaz da lavur ha siu malart ed il luvver ha meinsvart da sbatter. E l'uniun ei stada trasatras a pro dil luvver.

Ei fa smarvigliar ch'era pressapauc in tozzel purs da **Tujetsch** han fatg art e part dall'uniun da luvvers. L'intenziun ei tuttavia stada simpatica, il mument ch'era ils ezs han gidau ad enfirmir.

Igl ei evident; cunquei che tut va bein agradora e mintgin ha detgavunda, s'empatschan ins pli pauc da l'auter. En general ei il tschaffen dalla cooperativa sespiars. Malgrad quella digren fan tuttina aunc 58 commembers part dalla secziun da luvvers en **Tujetsch**. Il gruppament ei respectabels e la suprastonza secloma:

president: Giusep Alig-Venzin, **Salins**
actuar: Dumeni Cavegn
cassier: Silvio Monn

Uniun da dunnauns e mattauns

Quell'uniun ei sefatga igl onn 1966 e dumbra oz 230 commembras; bein in diember relevont. A per exista aunc ina gruppa da gimnastica. Tschels onns fuvan las terziaras cun lur commembradi dil Tierz uorden. -

L'uniun da dunnauns e mattauns cumpeglia ils vischinadis da tut la val; contact ed amicabladad stattan sidavon. En emprema lingia promova il gruppament ina formaziun generala sils differents intschess: educaziun, cultura ed economia. Consequentamein vul ins separticipar dallas damondas actualas che pertuccan oravontut la femna e la famiglia, accurat sco ils intents dallas femnas catolicas dil cantun e dalla confederaziun. In viadi a pei u cugl auto sustegn l'amicabladad e la realisaziun d'in bazar renda e metta enzatgei ella cassa.

Enteifer ils onns ei ina activitad surprudenta sefatga, ina che mereta laud, sco per exempel:

- participaziun meinsila dil survetsch divin a **Rueras**, a **Sedrun**
- oraziun ed unfrenda per las dunnas dil tierz mund
- agid enten lavar ora baselgias e capluttas, spender ed ornar il tscheri pascal
- cumpra da vestgius pils premcommunicants, repartgida e turnar e metter els en uorden
- sentupada culs seniors dalla val (emprema dumengia d'Advent)
- visetas als malsauns e far adatg da glied abandonada
- prender enconuschientscha dils nievnaschi e seregurdar dad els e dallas mummas

La tenuta ei da schar valer; l'uniun da dunnauns e mattauns vegn tgamunada da:

presidenta: Paulina Cathomas-Pally, **Sedrun**

actua: Reginalda Degonda-Monn, **Sedrun**

cassiera: Veronica Giossi, **Rueras**

Intervistas:

Tumaisch Venzin, Sedrun/Cuera

Giusep Alig, Salins/Sedrun

Paulina Cathomas-Pally, Sedrun

La necessitad ei vegnida gronda; tilan ins ensemen las societads e las uniuns ed ils clubs, arrivan ins scochemai ad in diember da trenta ed igl ei strusch da crer. La plipart dallas reuniuns ei sefatga pervia dalla organisaziun dil temps liber. Il mument ch'ins ha entschiet a luvrar mo tschun dis ad jamna, han ins e dapli peda per in program da divertiment, in che ulivescha empauet il strapaz da mintga di.

Milsanavon han ils Tuatschins patertgau ad uras da muments socials, sco per semeglia dalla uniun samaritana. - Ual ussen han ins instradau igl agid da famiglia. Famiglias che vegnan ellas stretgas, glied veglia e malsanetscha han meinsvart basegns d'ina assistenza. In survetsch d'agid ei sefatgs, in ludeivel, ed il canzlist Stanislaus Gamboni che representa la cassa da malsauns dalla **Cadi** en **Tujetsch** ha e quita da quella glied che sa vessamein sevolver.

L'uniun samaritana

La cassa da malsauns ei menada en ual suenter l'emprema uiara mundiala. Ualti a per ei il survetsch samaritan vegnius introducius. Onns ed onns ei il post samaritan staus els buns mauns dils Bruners a **Gonda** (fargliuns Soliva) ed a **Rueras** ha la famiglia digl anteriur president communal Vigeli Venzin giu bien quita per tut tgi che ha giu da basegns d'in emprem agid. Sche zatgi savess dumbrar las peischs ed ils plasters che quellas duas famiglias han mess si?

All'entschatta digl onn 1987 ha l'uniun samaritana da **Tujetsch** celebrau il giubileum da 50 onns. En quei connex tucca ei da dir in'otra caussa. La scoletta da **Sedrun** ei semeglientamein vegnida fundada igl onn 1937. Quei ei stau aschia; la claustra dallas soras dominicanas a **Glion** ha surpriu la tgira da malsauns en **Tujetsch** mo sut la cundiziun dad era ual saver sorprendere la scoletta e delegar ina gruppa da treis soras en **Tujetsch**. Ed en quei senn eis ei succediu.

Pongir - navenda igl onn 1937 ha enzatgi adina puspei realisau cuors samaritans.

S'entelli ch'ei ha dau denteren enqual onn pli uap, sco per exempel duront la secunda uiara mundiala ed all'entschatta dalla gronda explotaziun dallas auas. Denton dapi igl onn 1961 ei l'uniun puspei daventada pli activa ed ins ha realisau buca meins che siat

cuors cun 145 participonts. Enzatgi ei semess da detschiert a disposiziun ed ins sa buca metter d'in maun numns sco: Francestg Berther, Tumaisch Venzin e Placi Deragisch e pli tard Bernardetta Berther (oz Demund) e Culastia Monn (oz Bergamin). Ed igl ei in summa dueivel da far ressortir l'activitad fritgeivla da talas uniuns.

L'uniun dramatica da Rueras

Stat davontier. Duri Battesta Venzin-Monn da **Rueras** e ses gidonters ein sefatgs fetg meriteivels pil teater popular a **Rueras** e quei lu ual naven digl onn 1947. Las representaziuns han giu trasatras ina stupenta frequenza; ils vischins d'eifer ed ordeifer la val ein vegni ed han mirau. In fatg forsa onz pli remarcabel; igl ei oravontut stau ina gruppa mo dad umens. Pervia da quei e da tschei ein las femnas stadas sclaussas da far teater. Per cul Zennet da Tarasp dils anno 1957 han ins riscau la resca e partgiu ora rollas allas femnas.

La caussa ei stada in veniment!

Pli ras gadas han ils animators empruau da far reviver l'uniun dramatica da Rueras. En mintga cass ei in bien spert da far teater presents; denton - rabbitschar ensemen la glied, gliez ei aschia ina caussa. Empei dall'uniun dramatica ei ina gruppa da teater sefatga, ina zun activa che dat in toc suenter l'auter e quei lu cun success. La gruppa stat sut la pertgironza da Hubert Venzin, vertider e reschissur.

Ton ch'ei fuss aunc da metter vitier entginas autras uniuns e clubs ed aschia vinavon:

- uniun sportiva da **Rueras**, navenda 1968
- uniun da catschadurs Badus, dapi 1943, ina uniun cun gronda forza e che ha in bufatg num en **Tujetsch**
- uniun da pescadurs, dapi 1951 e che senumna Tuma **Tujetsch**
- uniun da tiradurs, naven digl onn 1908 (pressapauc); il tschaffen da sittar noda ei gronds e suenter ver sittau onns ora enasi il **Drun**, han ins translocau la piazza da sittar giu las **Rueras** ed il stan ei buns
- uniun da cavacrappa
- colonna d'agid, dapi 1967 e sias acziuns ein da gronda purtada
- club da ballapei, dapi 1970 e la piazza sin **Dulezi**, sin la squadra dalla pervenda, e la capientscha dalla curia giu **Cuera** e quella dalla vischnaunca ein stadas enzatgei da num
- uniun dils seniors; ch'era ils vegls ein sereuni ei ludeivel
- uniun da Lourdes. En quei connex fuss ei da dir ch'ils Tuatschins van stediamein a sogns e Lourdes ei da muntada. Carli Curschellas-Bearth ei staus davontier e ses merets per l'uniun ein considerabels

Fontaunas

Gadola, Guglielm. Historia dil teater romontsch. (Tiarza perioda 1850-1960). En: Igl Ischi 1961, p. 77-113

Muossavia dramatic. 2 toms. Cuera 1947-1966

Tujetsch, la vischnaunca alla tgina dil Rein = Tujetsch, die Gemeinde an der Rheinquelle, Zürich 1985

Cant, teater e musica

La glied da **Tujetsch** ha buca mo cultivau ers ed Orts; nuotatonmeins han ins giu enzatgei danvonz da daditg enneu per il cant e la musica. L'impurtonza d'in chor viril ellas muntognas ei considerabla ed ei fuss buca in di da fiasta senza la musica instrumentala. Omisduas uniuns ein sefatgas en **Tujetsch** entuorn ils anno 1870 ed han gidau a far clar, aschia sclarend viaden ella profunditad dils sentiments.

Ed ellas, las uniuns ein aunc oz senza paregl, malgrad ils mieds electronics che inundeschan ed ein tscheu e leu enta peis.

Chor viril Sedrun

Probablamein ein ins semess a cantar avon, ditg avon la notizia che numna igl onn 1867 sco data. Lezs onns ha **Sedrun** aunc giu in caplon sper il plevon ed in da ses duers fuva il cant. Silsuenter ei il duer ius vi el carnet dil scolast, semplamein ina obligaziun d'uffeci.

E senza sustener e promover il cant, vess il scolast muncau a sias obligaziuns. A per cul cant han ins fatg cumedia; els han fatg da cor bugen teater, ils Tuatschins.

Ton ch'in rosch giuvens a **Sedrun** han schau perreger da cantar; sur Gion Antoni Casanova ha priu enta maun. Tenor dir dils vegls veva il chor da lezzas uras plirs stupents cantadurs, sco per semeglia il «Grond Madlainer» (Gion Antoni Monn), il Bruno ed il Giachen Antoni Soliva ed il Stiafen Beer. Il sur caplon ei staus mals avunda; el ha scochemai viu che ses cantadurs levan far teater. Ella casa da scola sin cadruvi fuss ei buca iu. Perquei han ils giugadurs retratg la remisa dalla Cruna ed enzatgi ha detg ch'ei seigi stau legher. Dil reminent - remisa ei simtomatic; la sala da teater ella scola nova dils anno 1886 a **Sontget** ei buca stada bia dapli ch'ina remisa. Giugadurs e regissurs savessen raschunar dil con, sco per exempel dallas seras freidas, cura ch'ei ha piztgau las unglas duront las emprovas da teater. - Auncallura han ins ora ed ora fatg teater e biars e biars ein vegni a teater, la gliעד da **Tujetsch** en mintga cass e dad ordeifer entiras cudrias.

Buca mo ils cantadurs, era la societad da musica e la cumpignia da mats ein segidadas cun las cumedias, aschia alternativamein. Igl onn 1867 han ins entschiet cul toc « Il fabricant dell'aura» e biars dramas ein suandai, sco per semeglia:

- Il zenn miraculus (senza indicaziun)
- Paulinus de Nola (pader Baseli Berther)
- Igl aughel della pasch (Maurus Carnot, translatau da Gion Felici Monn)
- Sogn Willibald (translatau da Giachen Giusep Tomaschett, arranschau per la tribuna da pader Baseli Berther)
- La mort de Garcia Morena (vertiu libramein da Gion Felici Monn)
- La mort della garda svizzera (Franz Heinrich Achermann, translatau da Sep Mudest Nay)
- Ils heroxs da Nidwalda (Franz Heinrich Achermann, vertiu da Sep Mudest Nay)
- La cameriera da Robespierre (Franz Heinrich Achermann, vertiu da Toni Hendry)
- Ils frars Taverna (Max Hansen, translatau da Riget Bertogg e Felici Hendry)
- Sontga Genoveva (original tudestg, vertiu da Carli Fry) La crusch zuppada (Giusep Durschei)

La gliesta ei tuttavia buca cumpleina e la lavur dils participonts ei ludeivla, buca il davos quella dils reschissurs, oravontut Gion Felici Monn, Toni Hendry, Giusep Durschei, e silsuenter Sigisbert Giossi, Duri Battesta Venzin e Hubert Venzin.

Dils auturs e translataaders cunvegn ei da prender ora ils nums suandonts e numnar silmeins entgins da lur tocs, sco per exempel:

Deragisch, Placi, 1913, **Sedrun** (plitost scenas humoristicas, originalas):

- Igl aug Casper vegn d'engrau
- Il giubileum da 25 onns maridaglia
- Il siemi dellas auas
- las auas sutterranas ni Sabotadi ellas cavernas
- La veta de schuldau
- Onda Mengia
- Dus metschafadigias

Giossi, Sigisbert, 1924, **Rueras**, translaziuns

- Cuolpa ed expiaziun da Johann Radermacher
- Cumpogn da viadi, drama en 5 acts

Hendry, Felici, 1919, **Cavorgia**, autur

- Pievel, salva tia dignitad
- Il tat da Nacla

- La sort d'in affon, tenor la novella cont Frideric d'Eichenfels da Christoffel Schmid e canzuns da Giusep Huonder translatau
- Lavinias e carplinas (da J. Muff)
- Tuts rampins han lur confins (da A. Brühwiler)
- Ils frars Taveran (Da Max Hansen)
(menader dalla truppa da teater Culissa sursilvana)

Hendry, Toni, 1905-1982, vertiu

- La cameriera da Robespierre Milsanavon ha Toni Hendry translatau ensemblamein cun Gion Felici Monn hitorias da Jeremias Gotthelf; el ha e scret il cudischet «Il vischinadi da **Cavorgia**»

Hendry, Vic, 1920 (autur da scenas radiofonicas)

- Serada tuatschina
- Sin las ruinas da **Putnengia**

Monn, Gion Felici, 1876-1954, **Camischolas**, translatader

- Igl aunghel della pasch da pader Maurus Carnot
- La mort de Garcia Morena

Pliras versiuns ed adattaziuns neu dil tudestg

Venzin, Hubert, 1957, **Rueras**, sco autur

- Psalm 43 (tenor il roman da E. Dreisbach) cumediettas
- Mal ils dents
- Pli vegls e pli stuorns
- Il lader dils laders vertiu
- Survetsch a Golgota da Dornier
- Il valser dalla carezia (Thorton Wilder)
- Il prau dil barlot (Arnold Schwengler)

Ei fuss giud via da dir ch'il chor viril fussi buca selegraus dil success duront ina producziun publica. Da l'otra vart fuss ei semegliantamein surfatg da pretender ch'ins hagi mo cantau pervia dil cant da pag. La sentupada dils cantadurs e star si legher - gliez ei stau in bien ton. Forsa ch'il pli dils commembers ei staus pertscharts dils agens tiarms; ils vents dil mesanotg ein ruhs ed ils vellers da **Tujetsch** han da far quen cun lur vuschs. Schebi ch'ins ha priu part dallas fiastas da cant a:

- **Breil**, 1913
- **Glion**, 1927
- **Losanna**, exposiziun
- **Trun**, 1930
- **Flem**, 1933
- **Mustér**, 1946

Pervia dalla cronica eis ei matei convegno dad indicar ils dirigents dil chor viril da **Sedrun**, schebi che mintga cantadur ha contribuì nuotatonmeins il siu.

Dirigents, naven dall'entschatta tocca la dissoluziun, pia dils anno 1867-1970

sur caplon Gion Antoni Casanova	1866-1870
scolast Fidel Caderas	1870-1873
sur caplon Giachen Antoni Augustin	1874-1878
scolast Stiafen Schmed	1879-1880
sur caplon Tumasch Berther	1881-1885
scolast Stiafen Schmed	1889
scolast Gion Antoni Deragisch	1895-1897

scolast Giachen Antoni Paly	1897-1900
scolast A. Camartin	1900-1903
forester Gion Antoni Monn	1903-1908
scolast Hans Giachen Decurtins	1908-1914
scolast Bistgaun Bundi	1914-1918
scolast Barclamiu Coray	1918-1920
scolast Sep Mudest Nay	1920-1933
scolast Toni Hendry	1933-1948
scolast Vic Hendry	1948-1951
dissolvius	1951-1959

Chor da vallada (1959-1970)

Ina brava uriala han ins tratg alla liunga, entochen ch'ina partida cantadurs, plitost pli passai, ei sebrustgada ed ha priu ina decisiun, numnadamein da fundar in chor da vallada. Quei ei stau enzatgei tut niev ed enzatgi ha vuliu far diever dalla caschun e la sentupada dils cantadurs da dadens e da dado il **Dutg Grond** ha empermess sontgamein.

Ed ins ei veramein ius silla tscherca da cantadurs ed il resultat ei staus maisudius; in diember da 84 commembers ei staus ina empermischun. - Il chor da tala purtada basegna e in dirigent per propi. Ils confidents ein vargai ils confins dalla val e scolast Giusep Huonder da **Mustér** ha buca dau canaster. In pugn da partenza semegliant ha sussedau.

Ils exerchezis regulars ein sefatgs dil bi e dil bein e gleiti gleiti han ils cantadurs dil chor da vallada vuliu semussar publicamein, els cun lur vuschs muladas e harmonicas. Il concert da gliendisdis Pastgas 1960 (21-4-1960) sin cadruvi a **Sedrun** ha fatg impressiun. Ina mantunada umens aschia ch'ei daveras sedada neu stupent.

Ulteriurs concerts ein sefatgs ed il chor da vallada da **Tujetsch** ha giu in success suenter l'auto. Il sumfil denton ei la fiasta da cant da **Rueun** stada, quella dils 3 da matg 1964. Ils Tuatschins cun lur dirigent Giusep Huonder ein reussi cun lur canzun.

Il pievel sez ha ludau il chor da vallada e las emprovas da cant, inaga a **Rueras** e l'otra a Sedrun, ein tuttas sefatgas tscheccamein. Forsa ch'igl ei vegniu onz bia per il dirigent Giusep Huonder, el che fuva tuttina engaschus bravamein a **Mustér**. Suenter otg onns, igl onn 1967, ha il dirigent surdau la bitgetta dil chor a scolast Stiafen Berther e lez suenter dus onns puspei a scolast Giusep Caduff. Entochen il di ch'ins ei puspei vegnius staunchels dad ir a cantar (ed ils cantadurs onz pli passai ein era buca vegni pli giuvens) e muort munconza da commembers ei il chor da vallada da **Tujetsch** sesligiaus ils 13 da schaner 1970.

Chor baselgia da Sedrun

Els omisdus, il chor viril ch'ei sefatgs en tschei tschentaner, sco il chor mischedau (dapi 1914) han giu ina funcziun ed ils cantadurs sco las cantaduras han fatg dil bien, dumengia per dumengia, onns ed onns - senza pli bia. E duront las funcziuns da bara e denteren adina puspei - ed aschia. Ed il chor dad umens ei vegnius pli stediamein vidlunder.

Era cheu ei Gion Antoni Monn forester ed administratur dil consum siglius els fiars, en mintga cass, cura ch'ins ha giu fadigia culs dirigents. - Da tut temps ei il plevon da Sedrun sur Giachen Antoni Fetz staus sidavon als chors; el che ha mussau messas ed offertoris e scret notas, entirs cudischs plains, tut a maun e senza ch'enzatgi vessi mumentau in det. Sia ierta ei considerabla.

Toni Hendry ha fatg siu assistent, ditg e liung, tocca ch'el sez ha surpriu la direcziun dad omisdus chors, dil chor viril da baselgia e dil chor mischedau, ual sco siu successur Alfons Schmet che ha giu accurat las medemas funcziuns.

Oz perencunter diregia Tarcisi Hendry il chor da baselgia, il chor ch'embellescha tondanavon il cult divin. Aschia dumengia per dumengia, firaus e fiastas, tut cun gronda promtezia, impundend bia forza.

Chor mischedau Sedrun

Norbert Vinzens ha surpriu la direcziun dil chor mischedau che conta mo ual in per gadas ad onn en baselgia. Igl engaschament per propi ei profans. Il chor mischedau sepost meinsvart ella publicitad e dat concerts, concerts da num che muossan ora ch'ins hagi mulau las vuschs tocca osumsum. Ed igl ei tuttavia buca giud via da dir ch'ins seigi ius in bufatg tschancun vinavon. Era duront ils fortis pon ins seretener ed emprova d'impedir enzatgei.

Ils vischins da **Tujetsch** e quels d'autrora laudan las bialas vuschs ed enzatgi po buca spitgar entochen l'otra producziun. Cun ses curontanov commembers ei il chor mischedau ualti pulpius ed aschia.

Resuns dil Rein

Per amur da quei fatg ei ina filialetta sefatga, numnadamein il quartet dubel da tschun cantaduras e quater cantadurs, in chor pign che semova sc'ina furmicla e conta e conta cun gronda vigur. Siu num da batten ei schits, in pop ch'ins ha battegiu ils anno 1984 e ch'ins cloma pil num cun: Resuns dil **Rein**. Ed el vegn dirigius da Tarcisi Hendry.

Il cant da Rueras

Umens e femnas han cantau e contan a **Rueras**; il chor ha embelliu las devoziuns en baselgia e meinsvart ina fiasta u l'otra cun canzuns profanas. Ed ei fuss buc en uorden da sbassar il chor da **Rueras** sco ina filiala dil chor da **Sedrun**. La baselgia da sogn Giachen ei veglia (dapi 1491) ed il vischin da dadens il **Dutg Grond** ei cunscients da sesez e fa pretensiuns. - Buca ch'ins sappi la massa dils cantadurs e dallas cantaduras da **Rueras**; mo matei ch'ils umens vegnan a ver detg si las antifonas e fatg bials il survetsch divin trasatras. Els e las femnas crein ed ein taccai vid il tschespet.

En mintga cass muossa la nudauna ora in chor gia ils anno 1908, in chor che ha cantau sut la direcziun da scolast Giachen Fidel Berther. Il cant duront il survetsch divin ei staus sidavon ed ils organists han fatg bien. Ed organists ha il vischinadi da **Rueras** giu danvonz, schi da num ch'il Vigeli Venzin-Giger ha sunau las orglas a **Sedrun**. A **Rueras** ha Leci Antoni Brugger fatg onns ed onns il survetsch.

Cul dirigent Barclamiau Coray ei il cant danovamein ins ad ault; il Coray da **Lags** ei staus in professionist, ual sco il Giusep Cavegn da **Surcuolm**. Denton - il dirigent persuls contonscha pauchet, sch'ils cantadurs e las cantaduras segidan buc. Igl ei buca giud via da dir che la promtezia dils commembers seigi stada ludeivla; la suprastonza dalla societad ei stada davontier ed ei vegnida en agid ad enzatgi. Dapi ils anno 1980 sedosta Giusep Giger pils interess dil chor ed il fein va ad ault. Pervia digl uorden e dalla survesta eis ei cunvegnet da pustar ils nums dils dirigents ed igl andament dil svilup:

scolast Barclamiau Peder	1925-1936
scolast Gion Mihel Peder	1936-1939
scolast Giusep Gieriet	1939-1960
scolast Vincens Pally	1960-1968
dissolvius	1968
fundau chor viril, Vincens Pally	1968
scolast Giusep Caduff	1969-1976
senza dirigent	1976
scolast Norbert Vinzens	1977-1979 ad interim
scolast Armin Caduff	1979-1981
scolast Vincens Pally	1981-1983
scolast Hans Monn	1983-1986

Uss ed en quell'ura ha il chor mischedau da **Rueras** 32 commembers e commembras che serepartan ualti ulivamein denter umens e femnas, ferton che Vincens Pally suna las orglas, il survetsch che Giusep Gieriet ha fatg vivon. Ei capeta ch'il chor mischedau da **Rueras** dat in toc humoristic ed embellescha la sentupada cun canzuns divertentas.

Ils cantadurs da Selva

Per tgi ch'ei talmein d'in maun, ei la sentupada en baselgia d'impurtonza. Era quels dils pass cuorts ein vegni stediamein, cun la canna magari, giu da sum **Tschamut** ed han detg paternos ella baselgia da **Selva**. E duront las devoziuns ha zatgi cantau sin lautga, dad onns ed onns enneu, forsa in chor da biabein dus chischlets umens e la glied giu els bauns ei vegnida leda. In dirigent ed in organist ed in triep umens che contan; quei ei buca pauc.

S'entelli, all'entschatta dil vegnavel tschentaner han ils dadens igl uaul giu ils dus scolasts Peder, il Gion Mihel ed il Barclamiu; els ein segidai bein, en baselgia ed ora, tuttavia il Gion Mihel che fuva ledis e per regola el vitg. Leutier ei il magister dil liug vegnius, il Giusep Gieriet, el cun siu dun aparti da cant. L'elecziun da Giusep Gieriet dils anno 1934 sco scolast da **Selva** e **Tschamut** ei tuttavia stada d'engrau.

Las seras d'unviern ein liungas ed ils vischins da **Selva** e **Tschamut** han priu amauns enzatgei; els ein seradunai ed han cantau. Giusep Gieriet ei staus davontier ed in tschec cant ei sefatgs. La messa choral e gartegiada ed ils responsoris ein vegni megliers. Denteren ha il dirigent mussau enqualgadas canzuns profanas e schizun tocs da teater. Tut senza ch'enzatgi hagi dau in stausch e la glied dadens igl uaul han registrau cun satisfacziun sia premura. - E quellas seras da matg fuvan bialas, cura che la Ludivina Venzin e l'Onnamareia Peder intunavan las canzuns da Nossadunna.

Il di che Giusep Gieriet ei vegnius eligius scolast a **Rueras** (1939) han ils vischins da **Selva** e **Tschamut** spiars. Ils cantadurs sin lautga han fatg viaspras e detg si las antifonas vinavon, mo negin ha vuliu star pli davontier.

Societad da musica

Dalla biala entschatta enneu ha la societad da musica **Sedrun** giu ina mira decisiva, numnadamein d'embellir las fiastas, oravontut quellas dalla baselgia. Igl intent ei culs onns vegnius onz pli gronds ed ils musicants han sunau a caschun da fiastas profanas. Igl origin dalla societad ei singulars; scolast e forester Stiafen Schmed ei semess en cun entgins giuvens spir premura, sco per exempel cul grond da mulin (Sep Antoni Venzin) e Vigeli Biart epi culs treis students Giachen Martin e Tumaisch Giusep Berther da Dieni ed il Paul Schmed da **Camischolas**. Ulteriurs ein scochemai semess a per; ton ch'ils musicants han entschiet cun lur exerchezis ils anno 1875, entschiet a sepinar per la primizia da sur Tumaisch Giusep Beer che ha giu liug ils 5 d'uost 1877.

La cumpra da siat instruments muossa ora detgavunda; 430 francs ei in tschuat e tgi che camonda paga. Per otg onns suenter dat la vischnaunca in subsidi da 180 frs. e la convenziun dils 19 da mars digl onn 1883 cul president Gion Antoni Soliva ei particulara; ils musicants hagian da governar e conservar ils instruments che seigien denton proprietad dalla vischnaunca. -

La vart finanziaria ei stada trasatras in buordi per la societad; cun da tuttas uisas, cun fiastas d'uaul e seras da recreaziun, cun tombolas e giugs ein ins sespruai da setener sur l'aua vi. Cun las autras uniuns han ins e fatg teater ed aschia e las entradas ein savens stadas pli che mo falombras.

Nuotatonmeins ein ils musicants seduvrai. La fiasta da musica dils 1899 ei stada in success ed il dirigent dalla musica da **Tujetsch** (Gion Antoni Deragisch) ha dirigiù il toc general. - In fatg tuttavia ei enta maun; enaquella che la musica ha buca giu in dirigent cun la duida istruzion, ei forester Gion Antoni Monn siglius els fiars, ual sco tier il chor viril, nua ch'el ei semeglientamein staus davontier. S'entelli ch'el ha giu in bien dun, auncallura ina promtezia nundetga.

Fiastas da parada senza la musica ein semplamein buca stadas da s'imaginar. Ch'ins patratgi mo dalla glied dils uclauns che vevan da lezzas uras veramein lidinuot; ella selegrava dalla producziun e dil marsch da quels umens. E co quels tocs tunavan mintgamai en baselgia enamiez las bandieras e giudapeis als altars. - Tgi che teidla capescha ils plaids che sur Murezi Elvedi ha detg 1915 en siu plaid da suentermiezdi a **Rueras**, numnadamein ch'el seigi vegnius vegn onns pli giuvens, il mument ch'el hagi udiu da **Sumsassi** anora la musica che marschavi encunter **Rueras**. Ch'ins bein sappi,

el vevi fatg il quen senza, cu tons umens seigien sils confins. Ed ussa seigi ei da far fiasta scosauda.

Igl onn 1917 ei scolast Tumaisch Venzin sebrattaus giu cul forester Gion Antoni Monn; el, il Tumaisch ual frestgs e d'in spert interprendent. Speras las fiastas religiosas ein ils musicants era aunc in tec sedai ora, sco per semeglia ein els i a magliar groma, els mises anenasi, sin **Scharinas** e **Milez** ed a **Mulinatsch**. In tierm da num ei la sentupada a **Scharinas**. Sep Modest Nay ha descret igl eveniment en bellezza bials vers e mess els ella Romontscha dils 7 da fenadur 1921.

Secapescha da sesez che la musica da Sedrun ha era exercitau per fiastas da pag ordeifer la val. Star a per ad enzatgi ha adina in tec calamita. Dalla fiasta da musica districtuala a Mustér (1929) ei la musica turnada ledamein a casa; ils musicants vevan fatg ina prima nota. Silsunter han ins priu stediamein art e part dallas fiastas da pag, tuttavia sut l'egida da scolast Theophil Schmid. Ton che las occurrenzas da musica d'ordeifer han dau catsch ed ils musicants ein vegni en voga, tondanavon ch'ins ha mess il pindel da colur silla capiala d'ina vart ed ha tratg en ina uniforma. Quella parada el niev vestgiu dils 24 da matg 1951 ei daveras stada enzatgei da num. En pressapauc diesch onns han ins lu puspei midau la mondura ed il gatti ei carschius.

Eifer las stagias da **Tujetsch** ein las fiastas ecclesiasticas adina stadas sidavon, oravontut las messas nuvialas, era sch'ellas vegnan pli e pli scartas. - Ulteriurs dis da fiasta numna ins auncallura bugen, sco per exempel:

1950 la fiasta sil **Calmut** a caschun dalla radunonza generala dalla uniun alpestra svizra
1967 l'inauguraziun dil lag artificial a **Curnera**

1971 beneventaziun dil mistral dalla **Cadi**, dil commember d'honor Theophil Schmid

L'explotaziun dallas auas ha insumma purtau dabia impuls ella val. Igl onn 1961 ha Josef Bünter fundau ina uniun da tamburs; quei ei stau ina particularitad ed il sinzur ei staus gronds. Diesch onns pli tard ei l'uniun da tamburs da Tujetsch vegnida incorporada ella societad da musica.

La musica **Sedrun** (enteifer ils onns ein era plirs commembers dils ulteriurs vischinadis sefatgs) ha plirs veterans federals ed in entir rosch veterans cantunals. Lur commembradi ei ina caussa da num e mereta laud. Pervia dalla survesta suondan ils nums dils dirigents:

Stiafen Schmed	1875-1890
Vigeli Venzin e Adolf Cavegn	1890-1894
Gion Antoni Deragisch	1894-1904
Giachen Antoni Pally	1904-1909
Gion Antoni Monn e Luis Beer (Mustér)	1909-1917
Tumaisch Venzin	1917-1939
Theophil Schmid	1939-1964
Vinzens Pally	1964-1968
Stiafen Berther	1968-1973
Benedetg Hendry	1973
Emil Schmid (tamburs)	1971

Fontaunas

Berther, Toni. Musica Sedrun. Giubileum da 100 onns. 1875-1975. Sedrun 1975.

Durschei, Giusep. Societad de musica Sedrun. Giubileum de 75 onns. 1875-1950. Sedrun 1950

Nay, Sep Modest. Chor viril Sedrun. 1869-1929. Regurdientschas per la fiasta giubilara de 60 onns celebrada ils 3 de mars 1930. Sedrun 1930

Protocols dallas differentas uniuns

Pauperesser

Paupers ha ei segiramein adina dau ed era el temps dad oz cun surabundanza mauncan els buc. Co ils paupers ein vegni gidai all'entschatta dalla colonisaziun da nossa vallada ei buca d'eruir. Scadin cass ha ei gia lu dau glied ch'ha gidau e che ei segidada culs fleivels e pupratschs.

Las spendas

L'emprema instituziun organisada che ha giu quitaun dils paupers e basignus ei la baselgia stada. La baselgia ha rimnau dils beinstonts graun ed autra vivonda per reparter als paupers. Per segirar quell'almosnas per onns ora e garantir als paupers silmeins in tec paun da mintga di, ein quell'aspendas vegnid'as registradas el cudisch dalla baselgia, numnai cudischs dalla spenda.

Quei ei aunc buca stau sufficient. Per mintga spenda ha il benefactor stuiu metter sut in frust. Quei frust ha salvau quella grevezia da dar spenda da generaziun tier generaziun. Era tier la vendita d'in tal prau restava la grevezia da spender in quantum graun sco indicau els cudischs.

Las empremas registraziuns da spendas anflein nus gia egl'anniversari da 1456. En tut secattan otg da quell'aspendas che obligheschan ina quantitat dumiech als «arme lütten», sco ils paupers vegnevan numnai.

Las midadas da tals funs entras cumpras, brats ed iertas han da temps en temps pretendiu revisiuns dils cudischs da spenda. Aschia succedan nov'as registraziuns ils onns 1627, 1668, 1751, 1806 e 1839.

Lein dar ina egliada el cudisch da 1806. Suenter ina introducziun dils ugaus da spenda, suondan, tenor vischinadis, ils benefactors. Ils ugaus vegnevan eligi sin vischnaunca. Gia els documents da 1555 anflein nus notizias davart quels ugaus che vevan d'administrar la cassa dils paupers e distribuir il dumiech spendiu tenor basegns a tut la glied basignusa. Els havevan era da rimnar il graun che vegneva deponius e conservaus els arcuns dalla baselgia da sogn Vigeli.

Ord il cudisch da 1806:

Enten Num della Santissima Trinitad

Nus alla fin Screts vein anflau per bien e necessari de Scadin debitor dils Paupers far vegnir e metter, e Sigierar per Unterfand, Sinaquei che ils paupers Seigien de tut Temps per Sia pretensiun Sigierai, sche eissei pia de mintgia debitor mess per Scret enten quest Cudisch per Comissiun dilgs ugaus della Spenda, Numnadameing Sigr. Landamand Gion Antoni Gieriet, et Stalter Giachen Antoni Caviezel che eran de quei tems ugaus anno 1806.

Exempels co ils debitors vegnevan registrai els cudischs dalla spenda:

Tschamut

Gion Gaudios Riedi dat Spenda ina Kurtauna adaschia, Sin quei che ils Paupers Seigien Sigierai, per quella pretensiun sche ha il Surra numnau debitor Sigierau, et metz per underfand in frust Prau grass enta **Clavadi**; Stauscha la Damaun encunter il funs d'Martin Hasper Riedi, ad mezdi paul Peder, alla Serra il **Duitg**, e d'messa noitg Gion Fidel Venzin, a quei tut per liber a fry.

Camischolas

Hans Giochen d'Flurin dat Spenda als paupers, davart siu Bab ina Kurtauna, a mietz minal; il mietz minal aber sto esser a tgiembel, dapli davart sia Dunna 4 minals a I/z, Sinaquei che ils paupers pia Seigien Sigieraj, per quella pretensiun sche metta il Surra Num, debitor per underfand in frust prau gras via si Sur **Zarcuns**; il frust dilg Thomaisch stauscha la Damaun encunter il funs d. J. Hans Giachen de Curtins, ad mietdy Artavels Hans Gieri Schmet, alla Serra artavels Giachen Antoni Berr, ad messa Noigl Gion Batesta Berter, a quei tut per liber a fry.

Survesta dils debiturs e quantum spendiu alla spenda dils paupers tenor il cudisch da 1806.

Vischinadis	debiturs	curtaunas	minals
Tschamut/Selva	24	11	90 1/2
Rueras	51	84 1/2	217 1/2
Camischolas/Zarcuns	21	36	79
Sedrun/Gonda	33	12 1/2	217 1/2
Cavorgia/Surrein	15	1	66 1/2
total	144	145	671

Tenor la dumbraziun dil pievel digl onn 1791 dumbraiva l'entira vischnaunca 229 fiugs. Da quels ein igl onn 1806 sco la sura tabella muossa 144 benefactors dalla spenda da graun; quei fa circa sissonta per tschien dils habitonts.

Las 145 curtaunas ed ils 671 minals dils benefactors muntan ad in total da 23451 graun ni 1751,70 kg graun.

Valeta en daner ver 2200. - francs.
ina curtauna = 7.51(in minal = 1/4 curtauna)
ina curtauna = 4 guldas = 7. - francs)

Las empremas notizias davart il pauperesser anflein nus era els protocols da vischnaunca. Vischnaunca e pleiv fuvan eguals. Omisduas parts havevan comunablamein quitaun dils basignus. Aschia plaiva il protocol digl onn 1839:

«Negin pauper dueigi suenter Daniev ira ord vischnaunca a rugar. Davart il ver quitaun dils paupers ei concludiu da trer ora ina cumissiun, in per vischinadi cun il plevon.»

In onn pli tard vegn approbau il suandont pareri dil pauperesser:
«Ils paupers dueigien puder ira inaga per jamna casa per casa e rugar, e quei il venderdis e la sonda. Da parter ora il graun dalla spenda ei surschau als ugaus ed al plevon.»

Suenter strusch quater onns ein ils vischins buca cuntents cugl uorden pertuccont ils paupers. Sin vischnaunca vegn sedispitau ualti ditg e decidiu da
«scumandar d'ira a rugar per l'escha suenter calonda matg».

Muort consequenza dils onns d'uiara 1799, caschunai entras ils Franzos, denton era entras catastrofas dalla natira ed onns da crisas, fomaz e malsognas, ei la summa dils paupers e basignus carschida da 1800-1850 considerablamein. Sco paupers vegnevan quels tals numnai che baselgia u vischnaunca stuevan sustener cun dar almosnas.

Ils onns 50 dil 19avel tschentaner sto la vischnaunca surprendre il pauperesser e quei sin squetsch dil'cantun. Sinquei han ins preparau in niev uorden.

Gl'emprem uorden

Igl'emprem uorden datescha digl onn 1855:

Mintg'onn il schaner duei vegnir tratg si ina collecta voluntaria. Mintgin ei obligaus da spender tut tenor pusseivladad. Ina persuna per vischinadi haveva dad ir a collectar da vischin tier vischin ed aschia rimnar per ils paupers.

Ina cumissiun eligida dils vischins administrescha rauba e cassa dils paupers. Quella serimna silmeins quater gadas ad onn. Ils paupers e basignus han da s'annunziar e far valer il basegn. Graun vegn repartiun ina ga il meins. Ils benefactors dueigien dar rauba

en naturalias. Duess ei alla fin digl onn' aunc vanzar, duei la rauba vegnir capitalisada per schia saver augmentar il fondo pauperil.

La cassa dils paupers haveva ulteriuramein era la funcziun d'ina banca. A vischins vegneva ei dau ora daners a tscheins. Ils tscheins che muntavan il bia tschun per tschien purtavan al fondo pauperil novas entradas.

Plinavon vegnan era tocs pastira fixai per schar segar ni spelar. Certs tocs pastira damaneivel dil vitg vegnan surdai als paupers per cultivar. Tals che han nezegiau la caschun e cuglienau las autoritads, gliez ha ei era dau.

Perquei plaيدا in artechel il suandont:

«tals che ein buca avunda "flissiamein", pia culpeivels da marschadetgna duei vegnir retratg l'almosna».

Artechel tschun descriva il reparter las almosnas:

«La Spenda de Graun, che vegn distribuida sco la collecta, dueigi era vegnir distribuida a gratis quei ei per nuot, per amur de Diu e sin quels dis, che quella vegn dada ora, sche deigien ils paupers, che sepon esser presens a buna ura tier ils Uffezis divins en baselgia parochialla, per suenter lur Soign duer rughar per ils benefactors.»

Davart il collectar plaيدا il davos artechel:

«Cun quei deigi esser a tuts basegnius scumandau de ira per las casas e rughar sut negin pretesc, e quei sut peina de stroff - e negin ei da quels obligaus de dar a quels ensitgei. Duess ei esser entgins malobedeivels, che massen per l'escha, sche deigien quels tals vegnir clomai avon l'emprema redunonza della comissiu pauperilla. Duess ei aber schabegiar, che in u l'auter basegnius curdas en urgens basegns, enten ils quals el savess buca sustener cun il fixau agit, sche deigien tals trer tier in u l'auter della comissiu, per il mumen dischponer, u schar vegnir tier enzatgei, bein aber reportar tgei ei seigi dau et a tgi e sut tgei circumstantias.»

Per augmentar il capital dil pauperesser ei vegniu vendiu entras la vischnaunca denter 1850-1860 plirs tocs pastira. La notizia muossa:

«1855 Obligaziun per las pistiras wendida per ilg Pauperesser. Gion Paly dau a

Scharinas per Cp. de fr. 170. Croda de S. Martin a5%

Tujetsch ils 2 de Mars 1856

Confesel sco sura

Gion Ludavig Paly.»

Spelar e segar fein

Il schar spelar fein ei gia vegniu proponiu sin vischnaunca igl onn 1853. La collecta voluntaria funcziunava buca per cumpleina cuntentientscha e purtava buca il desiderau megliurament. Il diember da paupers carscheva.

«Plinavon ha era il patertgiamen, ch'il Pauper sez, en schi lunsch sco sias forzas laian tier, seigi obligaus ton avon Diu sco aigna lavur e perquei per gidar lautier, e cautras prevegnir alla lamentaschun de biars paupers ch'ei survegnien nuot de fadigias, sche ha ins era voliu empruar lur buna veglia e dar entamaun de encurir en part lur sustimen entras lur aigna bratscha.»

A **Cavorgia** retscheivan treis paupers la **Paliu dil Varetg** sco era els englars enagiu sut la **Cresta** per segar ni spelar.

Bugnei: *«retscheivan si **Platabiala** silla **Val** ed anen entochen sil **Crest dell Pala Quadra** e sco quel taglia si e giu tochen il **Pastg de Biestg** et enasi era.»*

«1866 Eisei vegniu dil president mess avon che ils paupers de **Rueras** vessien de Spallar e Sagar avunda cun igl uaul **Carmihut**; et las rofnas de **Valgiuf**, vender per diever della Cassa generala, eisei della vischnaunca vegniu decretau de vender quellas e naging degi Spalar ner Sagar pli de cau navenda.»

La spenda da sal

Sper la spenda da graun existeva plinavon la spenda da sal. Quella funcziunava a medema moda e maniera sco quella da graun. Da quella anflein nus las empremas notizias gia els cudisehs da 1751/1764 e pli tard 1839. Ina notizia da 1858 relata: «deigi igl ugau dil Sal dar ora quella Spenda tenor sco el ha en cassa, seigi en natira de Sal, era deigi el cun ils daners che vegnan tratg en cumprar il al e tenor tabella fixada distribuir quel.»

Dasperas deva ei aunc autras spendas, spendas specialas. Aschia tier sepulturas, messa dil tierz e messas caudonn da glied beinstonta. Quellas consistevan da pieun, paun, caschiel e frinas. Ellas vegnevan medemamein repartidas als paupers.

Las spendas svaneschan

Gia 1806 relai il cantun ina lescha pertuccont il saver e puder secumprar libers dallas obligaziuns da spender. En **Tujetsch** va quella lescha bia pli tard en vigur. Per dils onns 1860 ensi anflein nus notizias da secumprar libers dallas spendas.

Igl uorden da vischnaunca da 1866 rugalescha il pagar giu sco suonda:

«*Capitals de raubas pias, san vegnir pagai giu mo de S. Martin ne s. Andriu, e zwar sto scadin, chur ch'el dat il tscheins de s. Martin declarar, ch'el detti era il capital, il qual sto alura daventar sil pli tard de s. Andriu.*»

In exempel ord il cudisch che cuntegn las indicaziuns pertucca la spenda da graun: Gion Antoni Deragisch ei culpons alla spenda 11 minals graun. Igl onn 1873: «*retschiert de Gion Antoni Deragisch per ils sura 11 m capital 56,10 aschia Chai totalmein pagau et Saldau.*»

Auters vevan pulitas grevezias cun la spenda. Aschia fuva Gion Flurin Riedi s'obligaus da dar 67 minals alla spenda. Quei fageva, quintau 5,10 frs. per minal, in capital da 341,70 frs. Quei deivet ha el pagau giu 1886. Ils davos vischins ch'ein secumprai libers dallas veglias grevezias ein registrai ils onns entuorn 1910.

Consequentamein svaneschan tec a tec las veglias fundaziuns da spenda. Il capital cassaus dils proprietaris da funs ei vegnius investaus en vaglias dalla banca ni en obligaziuns da hipoteca da privats e vischnaunca. Tscheins da quels imprests han formau onns ora las entradas principalas per il pauperesser.

Oz possedan ils cudischs dallas spendas diversas mo pli valeta archivala. Els restan denton documents da valeta per nossa historia locala.

Paupers, spendas e capitals da 1850-1985

Onn	Paupers	Entradas	Expensas	Capitals : Spenda da graun da sal
1860	22	398.-	202.-	10301.-
1863	42	520.-	346.-	10'512.-/252 sacs (360 curtaunas) sal
1878	14	7500.-		(656 mesiras graun) 11'144.-
1890	14			
1902	4	1'823.-	1'823.-	26'243. -
1910	5	1'844.-	1'785.-	
1920	14	2'446.-	2'160.-	46'433. -
1930	29	8'065.-	6'944.-	62'776. -
1940	36	10'739.-	9'802.-	39'562.- 12'990.-
1950	22	22'469.-	22'116.-	39'986.- 12'990.-
1960	39	38'878.-	38'860.-	57'936.-
1970	15	42'223.-	41'531.-	59'370.-
1980	5	16'067.-	23'117.-	
1985	10	14'044.-	39'457.-	55'804. -

Il prau dils paupers

Las empremas notizias anflein nus 1918. Sut tractanda 4 dalla radunonza dils 14 da fenadur vegn il prau dils paupers schaus vi.

A **Rueras** secattan 5 differents frusts:

ina sort a **Mila**

ina sort a **Candentschuns** ed ustonza

ina sort a **Milar**

ina sort **Cumin**

ina sort entuorn casa **Crestas**

Plinavon a **Selva** in frust e lu a **Sedrun/Gonda** tschun ed in ulteriur a **Bigliel Sura**.

Per ina mudesta summa saveva tgi che haveva nuot ni mo pauc prau cultivar quei prau dils paupers.

Casa dils paupers

Per dar suddetg a paupers e basignus ha la cumissiun pauperila giu cumprau pliras casas.

Aschia cumpra quella 1895 ina mesa casa a **Rueras/Crestas**. 1897 venda Giochen Deflorin sia mesa casa e truaisch medemamein enasi **Crestas** alla cumissiun pauperila.

1938 cumpra dalla casa da F. Riedi per mauns dalla cumissiun pauperila. Quella vegn vendida 1941 a Duri Riedi.

Davart las duas sura numnadas casas ein buca dapli notizias els protocols da vischnaunca.

Pli enconuschent ei la casa dils paupers a **Bugnei**. Igl onn 1959 venda la vischnaunca quella casa ad Augustin Loretz.

Ils uordens da 1866, 1935, 1973

Igl uorden da vischnaunca da 1866 plaida il suandont davart il pauperesser:

«Per survegilar diregier il Pauperesser vegn ei mintga 2 onns legiu ora ina commissiun pauperilla, consistente ord 7 comembers. Il Sgr. Farrer ei ex' officio comember de quella, et ils Sgrs. Caplons, ugaus dils paupers de sall e spenda de greun san era vegnir tratgs tier. Quella comissiun ha de administrar conzienziusamein ils beins della spenda de mirar che quels vegnien buca schminui sondern carschentai. Els han milsanavon de reparter la rendita della spenda als paupers, cun particular risguart dils pli basegnius e meriteivels.

Era ha quella comissiun de disponer sur las pistiras cultivadas dils paupers, et a quels tenor bein maniar dar ora de schar guder quellas, et aschi savens sco el anfla per nezzessari prender ad in e dar ad in auter; era las pistiras ch'ein predistinadas de schar segar e spelar ils paupers ha la comissiun de disponer e dar a scadin basegnius sco po tucclar ner ils basegns damondan.

Il greun e sall = Spenda duei buca vegnir partius denter artavels sonder ei duei adina vegnir incassau dal possesur digl Unterpfind vegn in tall Unterpfind vendius ner artaus sche dueien ils contrahents u artavels far de saver tallas midadas en termin da 15 dis als ugaus = spenda.

Igl ugau pauperil tilla en il tscheins et il sall. Igl ugau spenda tilla en il tscheins et il dumieci; il dumieci vegn rimnaus el cumats de spenda, en dispositiun della comissiun; il tscheins annual en daners surdat el, cura chel dat giu quen alla comissiun de quen, la qualla surdat quei agl ugau pauperil, il qual cun igl ugau spenda ensemen reparta ora (resalvont il sall) als paupers ton daners sco graun tenor la liesta che vegn ad eis consignada dil president ner della comissiun pauperilla. Quella distribuziun duei daventar regularmein mintga 2 ner 3 meins ner sch'il basegns damonda era pli savens. Il sall vegn daus ora sollet entras igl ugau pauperil.»

Igl uorden da 1935 resta pli u meins il medem. Las veglias fundaziuns da spendas ein denton svanidas sco era il spelar e segar pastiras. Vitier e da niev ein la casa ed ils beins (praus) pauperils vegni.

Mo dus artechels drova la constituziun da 1973 per rugalar ils fatgs dil pauperesser. En nies temps da surabundanza stuess ins dir ch'il num «pauper» seigi buca pli da duvrar. Igl ei deplorablamein buca aschia. Oz spluntan auters basignus ch'antruras tier la cassa pauperila. Igl ei quei affons illegitims, affons ord letgs separadas, glied giuvna ch'ei sviada, dependenta da drogas e d'alcohol, ni era glied ch'ei curdada en fallonza.

Fontaunas

Vincenz, Pieder Antoni. L'administraziun dil pauperesser de Trun entochen il temps niev. Mustér 1934. (Sep. Ischi 24)

Archiv communal

Cudischs dil pauperesser nr. 8.1 - 8.13 Scatlas nr. 89-100

Protocols da vischnaunca

XI Casaments e casas - habitaziuns da proprietad

Hetta, casament e stabiliment

Hettas cun lenna rodonda vegnan els a ver baghegiu, ils umens dallas vals e nossas tegias da cuolm ein aunc adina ina semeglia. Aschia in albiert amiez la runca da praus ed ers ed in toc glin - per star a suost e temprar la membra beinduras miez schelada. Ed ei vegn a ver tratg sco gheislas, malgrad ch'ins veva misclau ad uras il plantschiu e las preits. Sper la fueina ein ins puspei vegni a cauld e las plattas da gneis han scaldau la plontapei.

Lein metter il cass ch'ils vellers hagien baghegiu silsunter vitier, sco per exempel truasch e talina, aschi sper las camonas ed odentuorn clavaus e clavazeuls cun nuegls da dudisch. Ed ils faners encunter munt ein matei vegni en buca ditg. - Investigar quels suttetgs dall'entschatta enneu piztgass osum la detta ed il fuorn sper casa leventass las marveglias. Leu nua che enzatgi ha fatg paun ed ils vellers han dustau la fom.

Graun e glin dattan lavur, avon ch'ins snezzi e metti la talgia sin meisa u sevestgeschi ni secuvieri culs ponns. Ton ch'ils mulins ed ils falluns ein vegni a per, silsunter las fravgias e zacu era la resgia. - Naturalmein, enzanua sper l'aua che tschallata e ramura e promova bunamein adina la veta. Naven dall'aua dil **Cuolm d'Ursera** encunter **Val Val** entochen las cavas da **Prau Mulins** e **Nislas** setilan dudisch kilometers per liung.

Eifer quellas stagias sburflan reins e dutgs e bognan la tiara, aschi abundantamein - pongir forsa sco bunamein negliu. Schi numerus ein els stai, quels mulinets da **Tschamut** e **Selva** e **Mulinatsch** tocca silla ravera dalla **Val Mila**.

Sch'enzatgi savess mo raschunar dallas pellas da **Tgamaura** e dir entgins plaids bufatgs dils mulins da **Salins** e **Sedrun**, da **Mulinets** e **Reinsut** e dils ulteriurs indrezs osum la greppa dalla **Val Gierm**. Ils plaids denton - els vegnessen dalunsch e vanzai ein strusch ina risteina u in plat e la toccanaglia ei tutta naven. Accurat sco ils chischners - ed ils faners sterna ora sil funs han dapertutanavon il treranavos. En quels logs ei zatgi buca mo vegnius staunchels, meinsvart era leds, sco per semeglia el mulin, nua ch'ins ha saviu ver endamen u schizun seconfidar.

La digren ha atgnamein entschiet per pressapauc avon l'emprema uiara e lu da detschiert dapi ils davos curonta onns; quels albierts en sesez ualti pagadus che ein semanteni atras tut ils tschentaners e la dunsena ei stada semplia ed ils cussadents han dumignau enzatgei.

La casa da Tujetsch

Schebein ei dat ina casa tuatschina per propi - gliez ei per cass ina damonda seriusa. L'influenza dil stil sul **Cuolm d'Ursera** vi, in tec perfin atras las vals enviars il miezdi e s'entelli buca il davos da sutensi ei stada considerabla. Ils Gualsers tuttavia han giu lur atgnas ideas e la glieud indigena ha mess enzatgei vitier.

Il dessegn dallä casa da **Tujetsch** ei clars. En tuttacass ei il sutterran da crappa massivs ed ils quaders dallas preits ed il gebel stabel sedistinguan tuttavia. Mo sapocu ch'ina trav ei tagliada ora u la lenna dil tetgom e la mudestadad mira giu dils mugrins. La fatscha che mira encunter il vonn dalla val ha ina lunghezia da pressapauc otg meters ed ei la part da num, la part che visa la stiva e la stivetta (stebli) e suren mintgamai duas combras da durmir, ina pils buobs, l'autra per las buobas ed ils letgs stattan sut circumstanzas ualti datier. Mess il cass ch'ei tonschi aunc per ina combra u l'autra ei gebel ein ellas scursaladas, stgiras e pintgas e da buca gronda muntada.

La part viers munt ei la mendra; d'ina vart sesanfla la cuschina e sch'ei va tut agradora ina streglia sco tgaminada e davostier ina bargia. Ed il mistregn da cuschinar ha ditg buca quintau la massada. Denter stgir e clar ei bien; ins vesa buca schi bein las spisas che vegnan sin meisa. Tschels onns ha la fueina e la glimera fatg clar e sper la platta da fiug ei zatgi s'entupaus ed ha saviu ver endamen. Ed il fulin e la rascha han buca fatg tschuf. Sur la cuschina secattan igl arcun e las maglias ed el combretgel suren encunter il tetgal penda la festa cun la carn sechentada. Pil solit - aschia, damai che mo paucs han ina truasch per propi, in schenghetg dils Gualsers, in baghetg pign per metter giudamaun ed el schetg victualias e resti.

Ils zulers ein magari scardali e stgirs sc'in fuorn; da cheu anora metta zatgi pil solit en pegna e scaulda la stiva ed il stebli, essend che la pegna scalegl va atras e survescha enina ual en duas localitads. Quei ei perbia buca adina il cass, damai che la stivetta ei tscheu e leu baghegiada vitier, ditg suenter schizun.

Il casament dil Gottard

Casament ei nuota giud via, aschia en eumparegliaziun cun la casa plitost schampra da **Tujetsch**. Duas stivas e stivetta ella vart davon garegian in sulom adequat ed il spazi ellas ulteriuras alzadas ei sfarlataus e danvonz, accurat sco las grundas ladas e la pendenza teissa e surfatga dil tetg. Il vitg da **Sedrun** ha giu mo duas casas da quella specia, quella dil plevon (dil farrer) e la «Casa paterna» d'ozildi da Giusep Monn (vivon la casa fravgia da Giusep Flepp). La casa pervenda han ins mess giu ed ha fatg ordlunder il consum dil Volg, l'autra perencunter ei vegnida alzada ed il stil dil **Gottard** ei pigliaus naven.

Ina atgnadad singulara ei la «Tgèsa alva» enamiez il vitg da **Sedrun**; ella ei da crap da sum tocca dem e la mira digl um che ha giu baghegiu ella avon biars biars onns ei mai vegnida propi alla glisch, damai ch'el hagi entschiet a batter ils quarts, cura che la casa seigi stada finida.

Dils colons si per las plauncas dalla val s'ei tuttina vanzau enzatgei, sco per semeglia las cuschinas da crap cun tgamins d'ina outra urdadira. E la colur da pastel secumporta gnanc mal cun la patina dil lenn; omisduas colurs han zatgei aparti ed envidan da star eri e mirar.

La prioritad

Na, en **Tujetsch** ein ins buca sedispitaus per la palma; ils uauls e las alps ein dapi daditg, dapi adina stai sidavon. Els han ora ed ora recurriu agl agid dils avdonts dalla val. Turnighels da vent, lavinas ed auas grondas han fatg largias crusch e travers ed ils uauls han pitiu donn. Schetgas cuostan raps, sco per semeglia quellas da **Rusas e Liets**, igl **Uaul Flurin** e la plontaziun da **Niregl** e vi davart dretga dalla val las dustonzas e las vias dil **Cuolm Cavorgia**. Milsanavon ei la megliuraziun dallas alps adina vegnida en damonda; igl ir per aua sin las rodondas ei stau in strapaz. En vesta dil schurmetg da tuts e pervia dalla prosperitad dils animals, ha zatgi stuiu metter d'in maun ils giavischs en casa.

Las forzas grondas han ils vellers da **Tujetsch** impundiu per baselgias e capluttas; las perdetgas ein enta maun e paupra tgi che vess tuccau en els, ils sanctuaris. Cun las casas da scola han ins ditg tenu anavos; striegn nuot - igl ei semplamein stau scart. Culs emprems raps dil conduct ad aulta tensiun en da **Garmischeras** ed atras la **Val Mila** suls sumfils vi han ils vischins da **Tujetsch** baghegiu la casa pervenda enamiez il vitg da **Sedrun**, in casetg- e scartamein pertut.

Igl onn 1955 san ins scriver cun scartira grassa; in onn da naschientscha per propi. Ils umens dalla vischnaunca da **Tujetsch** han dau la concessiun dallas auas. Bunamein enina ha il fein entschiet ad ir ensi ed el ei ius fetg ad ault. Las casas da scola fuvan pagadusas, per l'entira val entuorn. Els vischins da dadens il **Dutg Grond** han survegniu l'emprema (1959), ina casa da scola scosauda che ha custau in miez milliun. Scochemai han ins stitgnau giu il toc per quella da **Sedrun**, ina gronda e biala dadens il vitg da **Gonda** encunter **Mira**, ina che ha custau tschun ga dapli che la scola da **Rueras** e ch'ins ha inagurau ils anno 1962.

Cun la casa veglia da scola a **Rueras** ha ei buca dau gronds hantieris; ins ha fatg ordlunder ina casa da giuvenils, e silsuenter vendiu ella ad in privat. Onz pli bia ha il plaz a **Sontget** dau da far, la scola veglia a **Sedrun** ch'ei dapi ils anno 1886 stada sin in prima plaz. - Cun precauziun e prudientscha ei zatgi ius entuorn cul patratg. Cun igl entir menaschi dallas auas e la cumpra dall'ovra electrica da **Tujetsch** (1969) e secapescha cul progress anetg dil turissem - fuva l'administraziun dalla vischnaunca vegnida gronda. Ton ch'ins ha patertgau d'ina casa communal ed ils plans ein buca sefatgs enina. La lescha federala che ha pretendiu in stabiliment dalla protecziun civila ha schau semarmenir l'idea; la suprastanza communal ha dau peda, ella che stueva

semegliontamein prender en vesta ils tschalers da schurmetg publics e collectivs. Ed in ulteriur problem ei staus sin rucca, la slargada dalla via cantunala atras il vitg da **Sedrun**. La veglia casa da scola a **Sontget** fuva els peis.

Buca mo; autras caussas ein vegnidas vidlunder. Il regress fuva terren dalla pleiv e la vischnaunca politica ha giu da seregular, tuttina cun ina parcella da pressapauc 2300 meters quadrat, tenor la calculaziun fatga. Epi dalla vart dil **Drun** eis ei stau grev da vegnir vitier. Alla biala entschatta ha ei tuccau da cumprar la resgia da Lucas Monn ed emplenir ed ulivar la ravera.

Tut ensemen in tschuat e zatgi ha sligiau exemplaricamein l'entira damonda tenor il project da num digl architect indigen Meinrad Gamboni.

La targida ei stada da muntada ed ils cuosts muossan ora:

<i>parts dil baghetg</i>	<i>cuosts entirs</i>	<i>subsidis</i>	<i>vischnaunca</i>
localitads da protecziun	1'430'595.-	881'976.-	548'619.-
tschalers da schurmetg	482'946.-	225'452.-	257'494.-
Tgèsa communal	1'471'556.-		1'471'556.-
contuorn	171'000.-		171'000.-
parcadi Dulezi	150'000.-		150'000.-
	3'706'097.-	1'107'428.-	2'598'669.-

La piazza avon la Tgèsa communal sefa bein e dat all'entrada in aspect da num. El plaun sura ei l'entira canzlia communal messa sut tetg, ella cun ses dus canzlists Edgar Hitz e Stanislaus Gamboni, dus umens giuvens che han omisdus empermess dabia e che administreschan:

- la contabilitad
- la taglia
- uffeci dil causecziun
- controlla da habitonts
- filiala dalla segirada per vegls e survivents
- uffeci da lavur
- uffeci civil
- controlla da prezis
- lavur da canzlia insumma

Sil plantiu sesanfla igl uffeci dallas construcziuns publicas ch'ei vegnidas grondas, ual sco ils uffecis dil register funsil e dalla polizia communal ch'ei en ulteriuras stanzas pli afuns ed igl archiv grond e bi suten ch'igl archivari Toni Hendry ha mess ora exemplaricamein.

Ella Tgèsa communal secattan milsanavon las localitads ed ils biros dall'Ovra electrica **Tujetsch**, dils runals e dalla scola da skis sco era ils locals vasts e clars dall'uniun da cura e traffic cun ina stupenta stampa e libreria.

Mo da mirar encunter smina negin; il stabiliment dalla protecziun civila culs indrezs differentes ei ina gronda causa e la schuldada dils cuors da repetiziun ed ils umens dalla protecziun civila indigena semegliontamein. - Ils tschalers da schurmetg sut il parcadi dil **Dulezi** (naven dil stradun cantunal tocca vitier la Tgèsa communal) ein spaziuns ed endrizzai endretg; mo gliez datier da melli plazs, publics u privats. In amen ein ins stai sissu scol gianter, oz perencunter mettan ins puspei pli bia peisa sil tschaler da schurmetg ella casa privata.

Nuota mo **Sedrun**, per cass, è ils vischinadis da **Tschamut** e **Selva** e **Rueras** han lur tschalers da schurmetg, sco per exempel:

Tschamut (1976) 50 plazs, sut la casa da Ignazi Albin
Selva (1976) 50 plazs, entrada sur la casa da Ignazi Peder
Rueras (1978) 327 plazs, sut la nova casa da scola (schurmetg civil)

Igl ei buca stau il regl d'activitad, plitost il ner basegns, essend ch'ins veva onns ed onns munchedau da baghegiar pervia dalla finanziaziun. Culs raps ch'ei vegni ei la glied da **Tujetsch** semessa en da detschiert. E lezs 27 d'uost 1978, pil di dil sogn Cor da Maria, ei memorabels. Ils Tuatschins han inagurau gliez di ual dus stabiliments, numnadamein la Casa Sogn Vigeli e la Casa **Cadruvi**; lur andament ei singulars ed ei merets ch'ins s'entardi.

La habitaziun da proprietad

Tuttavia durant ils davos diesch onns ei in entir triep da casas grondas sefatgs en **Tujetsch** e quei principalmein enamiez la val, aschidadir naven da **Dieni** tocca odem il vitg da **Sedrun**.

Biros d'architectura ed impressaris e schiglioc glied da fatschenta han giu in nas fin; ina habitaziun da proprietad sevenda sco da beiber aua ed ei ina buna fatschenta. Mo gliez tratg tut ensem ha **Tujetsch** ozildi silmeins 150 habitaziuns da proprietad. Ed il trend ei aunc buca alla fin, schess ins, malgrad ch'ins tegn sut la vendita als cumpraders digl exteriur.

Casa S. Vigeli

«Vegnir vegls ei buca `flot'», ha zatgi detg ed ei insistius sissu. - Tgi che resda aschia ha tema ed il sentiment dad esser persuls e danvonz. E per prevegnir a tals plaids tucca ei da proveder enzatgi cun enzatgei.

Il provediment dils vischins da **Tujetsch** a pro dils vegls ei ludeivels; el mereta igl engraziament da tuts.

Igl onn 1956 ha Dora Reichlin da **Sviz** giu intuiziun da metter sia nova casa d'affons, numnadamein d'in maun denter **Gonda** e **Mira**, aschia amiez liug e sin in plaz spir sulegl. Ils anno 1968 ha ella fatg amogna siu stabiliment als da **Tujetsch** ed ils ezs ein sedecidi enina - ina caschun sco fatga per ereger in casa da vegls. Schebi che la suprastanza communal veva buca fatg il quen da retscheiver contribuziuns d'ordeifer, sco per exempel dil cantun u dalla confederaziun. Ed en vesta dil fatg han ins stuii serestrenscher da reparar e baghegiar ora. Mo enaquella che las soras da **Glion** han saviu sedecider da surprender il menaschi e la direcziun, ei zatgi staus da gronda curascha. Las bunas dominicanas eran daditg semessas a per culs vischins da **Tujetsch**, dapi passa dus decennis, e vevan rugalau ils malsauns ed aschia, per pauc detgavunda. Las lavurs da preparaziun ein idas bein giu dil scav ed in onn sissu ein ils emprems cussadents dalla casa arrivai, passa in tozzel - en combras dad in e da dus. En ton sco nuot han ins clamau ed ha detg las caussas pil num, pliras insufficienzas, sco per exempel:

- ina caplutta en casa
- in ascensur
- localitads da cumionza
- cuschina pli vasta

Ils suprastonts competentes han buca surudiu il clom; els ein semess vidlunder ed han entschiet a far plans. In niev project ei sefatgs, ina bufatga engrondida e slargada encunter munt ed anen e cun balcuns ed uorden. Las lavurs han entschiet cun la primavera 1977 ed ein sefatgas dabot e bein e per cuntentientscha dil patrun. Ed ils cuosts secloman:

prezi da cumpra (Dora Reichlin)		362'070.70	
emprem endrizzament			278'000.00
secunda investiziuin		1'591'592.55	
subvenziun dil cantun	388'500.-		
subvenziun federala	513'041.-		
Pro senectute	6'000.-		
bazar e benefactors	84'000.-	991'541.00	660'051.55
en tut frs.			1'240'122.25

Casa Cadruvi

La casa da scola sin **Cadruvi** ha ina historia per propi; ils 4 d'avrel dils anno 1848 ha statalter Valentin Cavegn vendiu ella alla vischnaunca per 255 risculdils (= 433.50 frs.). In liug sco fatgs ed ins ha vuliu far ordlunder ina casa da scola. E quei ei daveras schabegiau e quei onn, ina localitad pintga detgavunda per dar albiert a tocca siatonta affons enina. E tuttina ha la casa sin **Cadruvi** fatg biars e buns survetschs, sco liug d'instrucziun entochen 1886, mo era aunc silsuenter per ina classa u l'otra e tuttavia per la scola da lavur. Enzacuras ei il caplon da **Sedrun** vegnius en l'alzada sura; dalla emprema alzada perencunter ha la suprastanza communal (oravontut il cassier) ed il cussegl da scola fatg diever.

Igl onn 1965 ha la vischnaunca politica cumprau ella dalla pleiv per la summa da 190'000.- frs. e las suoschnas ein era aunc vegnidas vidlunder egl import da 23'000. - frs. Mo la finala han ins matei tertgau ch'ina casa en in liug schi adequat mondi nuota per l'escha. Ils cuosts dil niev baghetg han custau in bien ton, tratg giu la subvenziun federala da 40'000. - frs. aunc adina 405'000. - frs.

Las localitads suten ein in prima liug da fatschenta ed ella emprema alzada han ins mess la scoletta da **Sedrun**, ferton che dil gebel han ins fatg ora ina habitaziun. E negin vegn a stuer sestrapazzar da schar vi las stanzas sin **Cadruvi**.

Las auas piarsas

La turera

Lezs 23 da mars 1975 ha la vischnaunca da **Tujetsch** priu ina decisiun da num; enaquella ch'ils vischins han zavrau las zonas da baghegiar, ei la basa dil project general da canalisaziun sedada. A caschun dalla revisiun digl uorden davart la planisaziun regiunala dils anno 1979 han ins danovamein midau ils bratschs principals, tut tenor la nova disposiziun.

Entochen ussa veva mintga fracziun dalla val procurau sezza per l'aua da beiber ed era menau naven l'aua tschuffa. Cun la nova zona da baghegiar ed igl entir svilup han ils indrezs existents buca pudiu tener tila. Ton ch'il project general ei staus indispensabels. Da **Niregl** entochen **Milez** ei l'entira questiun sefatga senza difficultads. Ed a per cun la via cantunala en da **Bugnei** vegnan las auas tschuffas dil vischinadi; neu da **Surrein** vegn la turera a vegnir sur la punt nova vi e pumpada directamein ella serenera. Ils vischins da dadens igl uaul e quels da **Cavorgia** vegnan a ver ina serenera particulara. Naven digl onn 1977 tocca alla fin dils anno 1984 han ins tuttina erigiu 10 kilometers lingia da canalisaziun; ils bishels d'eternit han in diameter da 25-70 centimeters. Enzatgi ha viu bein ed ha e patertgau dils dis vegnents. Era sche la subvenziun ha muntau sin bunamein in milliun francs, vonzan tuttina aunc passa dus milliuns ch'il singul ha da pagar.

La serenera

El vonn dalla val, sin in'altezia da 1343 meters sur mar, ual dadens l'aua dalla **Val Strem**, silla ravera dalla tschaffada dil **Rein**, stat la serenera da **Tujetsch**. Ei ha bein dau tractativas e la finala ein ins vegnius perina; la serenera secatta el dretg liug ed ei erigida tenor ils principis ils pli novs. L'aua purificada sbucca en quella retenida dil **Rein** e vegn aschia tuttavia tratga a nez. Dils quasi treis milliuns che vonzan, suenter ver tratg giu las subvenziuns, dils ezs han ins tagliau pustretsch tenor la summa da segirada

dil baghetg che mintgin posseda. La vischnaunca sezza paga per ses stabiliments, ual sco il possessur privat.

Poda ch'ins sa metter vitier che la vischnaunca da **Tujetsch** hagi dau in bien exempel. Ella purifichescha sias auas tschuffas. Ed ei fuss stau alla liunga ina pretensiun nundetga da schar ir l'aua piarsa dalla val giu tocca el lag dil **Bodan**, il mument ch'ins sa ordadora che pressapauc quater milliuns habitonts retilan lur aua da beiber neu dil lag.

Il museum La Truaisch

Tochen uss ed en quell'ura han ins detg museum; oz senumna el «La Truaisch». Ei fuss malgiustia da dir ch'ils vischins hagian fatg pauc per la cultura dalla val. S'entelli en vesta dad entradas semegliontas; mo na, ins ha era mess d'ina vart raps per quei intent. Il museum ei staus la casa paterna da Heinric Monn, sesents en **Spagna**, ina casa stabila da crap che siu tat ha giu baghegiu da sias uras osum il **Drun** siviars Pitgmun. Il stabiliment amiez liug ei sco fatgs per in museum. Cun la cumpra e la gronda midada e ses indrezs ha la casa tuttina custau datier d'in miez milliun francs e la retscherca da rauba veglia va vinavon, schebi ch'igl inventari rimnau astga semussar.

Il bogn cuvretg

L'avertura dil turissem ei ida da cuntin ed ils aspects ein vegni gronds. Mo a pèr ha zatgi e stuiu s'obligar da far enzatgei da num, sco per semeglia metter neu in bogn cuvretg. Ed igl ei buca stau da surudir il clom, tochen ch'ils exponents dall'uniun da traffic han detg da gie.

Per la garvera dil **Drun** (denter las duas punts: viafier e stradun) han ins onns ora buca spidau giun plaun. Il dargun giu dil **Cuolm da Vi** ei malmaneivels; en quella ch'ins ha giu mess el en siaras, ein ils avdents giudapeis seconfidai ad el. Il liug sco tal ei d'engrau ed il biro d'architectura Dettling-Maissen ha planisau endretg.

Igl onn 1971 ei l'idea stada semarmenida ed ins ha ladinamein entschiet cun las lavurs. Igl indrez d'in baghetg semegliont cuosta raps e la summa ei vargada ils cunfins dil milliun; ina curascha aschia ha num vus e l'uniun da traffic ei stada all'entschatta en schliats calzers. Perencunter han ils vischins saviu far da grond cun in bogn cuvretg e la calamita dalla val ei carschida considerablamein.

All'entschatta ei la caussa ida pulit ed ins ha fatg stediamein diever d'in tal indrez; in bogn cuvretg ei dapli ch'in puoz ed il liug da sentupada ei endretg, per jasters e dumiasstis. - Igl emprem entusiassem ha buca pudiu tener la dira e la frequenza ei vegnida anetgamein dil meins, tondanavon ch'enzatgi ha stuiu sefar si e dar bratsch, il mument che l'uniun da traffic ei vegnida en perfetg. La vischnaunca sezza e la societad da runals ein semessas a pèr ed han tuttas tratg ulivamein, senza grond gust, s'entelli. Bunamein surura ei il capital dil bogn cuvretg vegnius screts giu sin in ed ils duamelli acziunaris han scret lur aczias sin tgamin, ferton ch'il deficit ei vegnius onn per onn pli gronds ed ha la finala contonschiu igl import da 130'000. - frs. annualmein, senza prender risguard dad isadas e rugaladas.

Ton ch'ins ei arrivaus sigl ault ed ei tucca da prender las mesiras; ins mira a vegnend ina midada radicala. Probablamein vegn la societad da runals ad integrar il bogn cuvretg en siu menaschi, ella che ha la gronda forza.

L'empunida culs bigliets dils runals savess esser la scompa e la vischnaunca e l'uniun da traffic vegnan a dar quei ch'ellas san.

Ovra da cuors Val Giuv

Culs 16 da zercladur digl onn 1918 ha la vischnaunca da **Tujetsch** mess ina stagia; l'explotaziun dallas auas ha entschiet cul rein da **Strem**. - Ina societad d'aczias ei semessa precautamein vidlunder ed il svilup ei staus bufatgs, ual sco igl ulterior ch'ei sefatgs 1925 a **Tschamut**. Il culp per propi ei sedaus cull'Ovra electrica **Reinanteriur** ed ils 2 da mars 1969 ha la vischnaunca da **Tujetsch** surpriu l'ovra electrica dalla societad acziunara en **Tujetsch**.

Ils vischins han tratg ils tscheins dallas auas ed ein sezs buca stai culs mauns a calun. Sin quella idea tucca ei da star, per cass ch'ins ha egls el tgau. - Culs plans dalla **Val**

Giuv ha il pareri già entschiet a semarmenir 1975, numnadamein d'interpreter danovamein enzatgei.

La cota 1740 secatta sisu **Mulinatsch** e cumpeglia in intschess da 6,8 kilometers quadrat, cull'aua da **Val Giuv** ed il dutg da **Milez**. Ni il reservuar silla cota da 1740 (5500 m³), ni la lunghezia dil conduct da 2500 meters sco era buca la centrala electrica giu las Rueras han stermentau ils vischins, schebi ch'ils cuosts da 4'787'500. - frs. ein buca stai ina cagna. Dil reminent ein ils Tuatschins economics avunda; cun in surpli dallas entradas da passa 40'000. - frs. astgan ins tuttina secer enzatgei.

E puspei ha enzatgi previu enzatgei da num, numnadamein da menar en l'aua dalla **Val Mila**, mess il cass ch'ins vegli vonzeivi engrondir l'interpresa. Cun l'aua dalla **Val Mila** savess ins nuotatonmeins carschentar la producziun d'energia sin 70 per tschien. Igl um laic sedamonda, schebein ei fussi buca stau ina targida maisecattada d'explotar enina las auas dalla **Val Giuv** e dalla **Val Mila**. - Ch'ins ha fatg il pass suenter la comba va tuttavia a prau e muossa danovamein ora ch'ins hagi lezs onns patertgau e buca agiu en furtina.

L'Ovra electrica **Tujetsch**, OET, ei in fetgapei pils avdonts dalla val. Tut senza ina visiun u l'aua - mo il di da damaun vegnan ulteriuras a sefar.

Caplanias e la casa pervenda

Ton quellas dils caplons da **Selva** e **Rueras** sco la casa pervenda a **Sedrun** ein stai baghetgs plitost sempels e tonaton da num. Il caplon da **Selva** veva siu suttetg per propi enamiez il vitg ed ina ulteriura habitaziun dapi igl onn 1853 a **Sutcrestas** ella secunda alzada dalla baselgia da Nossadunna. S'entelli - sco refugi pervia dallas lavinas! Digl albiert a Sutcrestas han ins mintgamai fatg vessamein diever, essend ch'ei fuva semplamein malcumadeivel ed il casament ha ora ed ora tratg da lien. La casa dalla caplania a Selva ei vegnida disfatga dil fiug dils anno 1949. Ins ha fatg si ina nova, accurat sco ina nova baselgia ed enzatgi ei ius per la statua da Nossadunna a **Sutcrestas** ed ha tschentau ella en la baselgia pli moderna da **Selva**.

La caplutta da **Sutcrestas** ei naven e la casa dalla caplania a **Selva** ei vita. Igl augsegner da **Rueras** proveda ils vischins da **Selva**, dapi ch'il davos caplon da **Selva**, sur Stiafen Schuler, ei buca pli. El che ha pertgirau tondanavon bein sias nuorsas «dadains gl'uaud».

Ils vischins da **Rueras** han bassegiu ch'il gidonter dil «farrer» da **Sedrun** astgi habitar sco caplon a **Rueras**. La gronda supplica han els presentau agl uestg cun caschun dalla visitaziun episcopala digl onn 1643. Igl uestg Gion VI Flugi ha concediu, aschispert sco ils vischins da **Rueras** hagian baghegiu ina casa pil caplon, ina cun in iert e las entradas pil caplon seigien e leusunter. La glied da **Rueras** ei scochemai semessa vidlunder - e la casa pil caplon ei sefatga, tgeinina ei nuota lev dad eruir; d'ina casa caplania tschontscha la cronica digl onn 1782 - ed igl ei buca lev da dir, schebein ins ha fatg si ina casa nova pil caplon u mo restaurau quella che existeva gia. Dapi da daditg enneu fuva il caplon denton ella casa ual sut la baselgia da sogn Giachen, la casa che Gion Antoni Giossi-Berther ha cumprau per el e silsunter dau giu a ses vegnentsunter. La nova casa dalla caplania da **Rueras** stat sil **Crest**, sut il stradun, e quei dapi igl onn 1936.

La casa pervenda a Sedrun ha daveras sia historia. En mintga cass steva il plevon da **Sedrun** igl onn 1643 en la casetta sin **Dulezi**, en ina casa pintga, unida cun in nuegl, damai ch'el fageva il pur. La cronica plaida ch'ils Monns, ina famiglia beinstonta da **Sedrun**, vevi baghegiu ina ustria enamiez il vitg. La vischnaunca hagi acquistau la casa nova ed hagi fatg ordlunder igl onn 1745 la casa pervenda.

E la casa dils Monns, oriundamein preveda per ina ustria, ei stada in baghetg scosauda, in bischu, el cun sias grundas ladas ed ina dimensiun da detschiert. Il stil dil **Gottard** ei ora ed ora daus els egl. Dils onns 1745-1949 han dudisch augsegners habitau lien. Entochen 1849 ensemblamein cul caplon da **Sedrun**, igl onn ch'ins ha baghegiu la casa sin **Cadruvi** ed ha dau al caplon ina habitaziun ella secunda alzada.

Ella retrospectiva ha la vendita dalla casa pervenda da **Sedrun** ina color fuostga. Ils anno 1949 han ins vendiu ella al consum liber a **Sedrun**, suenter ver giu fatg si ina nova

casa pervenda, ual sut la «senaria». Oravontut han ins baghegiu ora suten il consum ed en buca ditg, igl onn 1968, han ins bess giu l'entira casa ed ha fatg si tut da niev. Il bellezza bi puffen dalla stiva ha enzatgi vendiu al restaurant **Tödi** a **Glion**, ferton che la pegna scalegl entagliada, onns d'in maun el local da vendita, vegni è vendida. Ils onns grass han ins schau a tscheins la casa pervenda sut la cascharia; ins ha dau agl augsegner igl onn 1964 ina casa nova, ual sur baselgia da sogn Vigeli.

El trend dil grond menaschi ella val han ins fatg giu la casa dil caplon sin **Cadruvi**; la nova che se presenta va buca mal a prau cul maletg dil vitg che vul tuttina mantener il caracter da pli vegl. Pressapauc la medema sort ha la casa da Giusep Flepp en amiez il vitg da **Sedrun** giu, la veglia casa fravgia. Siu stil dil **Gottard** ei naven ed enzatgi fa valer che la casa nova seigi pli spaziusa e cumadeivla.

Enteifer ils davos decennis ein bia bialas casas novas sefatgas en **Tujetsch**. Dil stil vegl denton, sco per semeglia neu dil **Gottard**, eis ei vanzau ton sco nuot. Ina excepziun legrevla ei forsa aunc la casa veglia da Tumaisch Deflorin-Hitz a **Zarcuns**. La stiva cun siu plantschiu sura turniclau e ual dus tschalers in sur l'auter ein restonzas che fan tut bein.

Fontaunas

Tomaschett, Paul. Mulins e rodas-mulin ella Cadi. Da Paul Tomaschett e Tobias Deflorin. En: *Annalas* 1983, p. 104-118

Berther, Norbert. En memoria dalla veglia casa pervenda Sedrun. En: *Gasetta Romontscha* dils 6 da mars 1970

Serenara da Tujetsch. Transl.: Felix Giger. Fotos: Erwin Cathomas. Sedrun 1985.

XII Ei vegn detg

Cardientschas blauas

Dil liug

Tujetsch ei d'in maun ed isolaus ed igl intschess entir ei tschinclaus da tschemas e sumfils. **Vallatschas** e canals grondas ein s'encavadas afuns e reins seseufan e creschan. Las gravas da **Cavradi** e **Carmihut** san bia memia bia e tegnan tschelau allas uras ordinarias. L'aura ei per part nuota da cuoz e sestrida tgunsch e burasclas e stempraus sefan dabet. Paupra - cura ch'in urezi sepeina ed ina garniala spessa misla enina giu dils garvers da **Culmatsch** e **Caschlè**. Ed ei capeta che la sferdentada vegn ual sissu ed ils pots neu dil mesanotg dattan igl asperges si dad ault. E per la stratscha da neiv duront igl unviern che rimna tatschadas e caschuna squatschs e lavinas. Enamiez ils cuflaus e duront ils dis da marschauna peglia enzatgi tema, sco per semeglia la glied dils habitadis giudapeis allas plauncas; els van giudavon. Sch'ei fa nuaus pil di vi ed ils suentermiezdis e las seras ein stendi ed ei para mana dis. -

Igl ei buca stau striegn, sch'ils vischins dils vischinadis da **Tujetsch** ein bunamein vegni ordasenn - tschels onns - en ina retratgadat semeglionta. Sa e zatgi, co ils vellers ein sefigurai e la fantasia ei ida sur tut ils tschops ora - aschia duront las fetgas e furtinas. Dir semplamein che tut seigi stau tuppadas fuss dau entiert ad enzatgi, dau entiert als avdents dils habitadis da **Tujetsch**, sch'els han cartiu e fatg dapli che quei ch'igl ei stau.

La surpussonza dil nauschaspert

Ils Tuatschins han teniu ils mauns da ludaus ed han ludau il Segner - quei ch'ils vegnentsuenter fan pli e pli darar. Ed igl ei nuota da metter d'ina vart ch'era els hagian cartiu sur mesira ella surpussonza dil nauschaspert e lez hagi giu pertut la detta ella pasta. Quei nauschaspert che hagi stendiu ora ses mauns ed hagi fatg pugns e patgs, cunzun cun las femnas. La cardientscha el striegn ei carschida e vegnida gronda en Tujetsch e sias uras ein stadas malguessas, lezzas uras che las capialas dil giavel han fatg prova; ils vellers ellas vals solitaras ein sefitgai sin enzatgei ed ils process encunter las strias ed ils striuns ein stai endinai.

Paupers avdents dallas vals ch'ei vegni tondanavon malsegirs; auncallura en cumpignia da tontas baselgias e capluttas han las muotas dalla **Siara** e da **Nurschals** ed ils logs solitaris da **Nacla** e **Cavorgia Sura** fatg tema ad els, tuttavia cura che la ducrina dalla surforza dil nauschaspert ei vegnida da sutensi e prers e paders (clom dils dominicans digl onn 1487) han surfatg. Ellas vals han ils vellers stuiu suttacumber. Entuorn la fueina ha enzatgi entschiet a raschunar dil marti dallas strias (Malleus maleficarum) e la finala ei il suspect ella glisch dalla seiv vegnius gronds entochen ch'ina malsogna horrenta ei rutta ora. Davos mintga schabetg pli aparti ha la glied dil vischinadi entschiet a sminar nuot dil bien. Pil solit han las femnas stuiu pagar; ina entira purziun dunnauns e mattauns da **Tujetsch**, las singularas ed atgnas probablamein, allas qualas ins ha adossau da tuttas uisas, las pli nunpusseivlas per part, sco per semeglia:

- ch'ellas mettien si la vanaun gronda ellas vals (las niblas alvas e penderlidas ella cavorgia da **Cavradi**) e tissientien cun fein e vapur glied e tiers
- ch'ellas sezuppien ella malaura e fetschien better la neiv da mesastad si dad ault
- ch'ellas rochen crappa e lavinas dallas plauncas giu e nuscheschien ad enzatgi (Londadusa)
- ch'ellas spuontien la muaglia ord stavel e catschien ella osumsum ils precipezis u schizun sur cuolms e vals ch'ella retuorni cun furmantun els calzers (**Caschlè** e **Culmatsch**)
- ch'ellas caschunien turmegls e portien naven il bien fein sec (**Mila** e **Salins**)
- ch'ellas seigien schluonzas e fladien perfin encunter ils affons ch'els peglien ina mala fin

Enzatgi vul dispet saver che striuns hagi ei buca dau aschi daries, en **Tujetsch** ed ora buc; mo ei hagi era dau tals ed ins ha era buca priu risguard dils ezs. - Aschidadir - las

baselgias e las capluttas sternidas per l'entira val han e buca schau cumbien enzatgi cun enzatgei, schebi che la glied da **Tujetsch** vegn a ver fatg riugs e riugs. Gnanc las confraternitads dil sogn rusari e quella dil sogn scapulier han pudiu urbir ora; nuotatonmeins la cavazza d'in armaul sur igl eschnuegl ed il num dils treis sogns Retgs (C+ M+ B) e l'aua e la cotgla benedida.

Las peinas da lezs onns ein bunamein stadas sco quellas dalla stgiradetgna dadora, las peinas dil gissiatavel tschentaner en nossas vals, peinas che han cuzzau passa tschien onns.

Ditg e liung ha la malvuglientscha humana semplamein saviu denunziar. E fuva la denuncia inaga avon maun, allura fuva ei strusch da mitschar. - Suenter il capetel da Lumbrein dils anno 1670 ha il magistrat entschiet a pretender pliras perdetgas che vevan dad ir a prau avon dretg. Mo ton l'inquisaziun da Como sco il magistrat dallas cuorts ella **Cadi** han surpassau ed ein i surora; igl onn 1675, aschia stat ei scret ella Synopsis, ha la dertgira dalla Cadi sentenziau trenta persunas, femnas ed umens, alla mort. E tgi stat buns che **Tujetsch** vai giu negin? Nuotatonmeins ch'ins ha era prevegniu ad enzatgei. Ils nums dalla glied ch'ins ha mess vi, ein buca screts ella nudauna. Ton ch'ins ha buca mo disfatg la persuna, mobein era la memoria.

Las torturas ed il liug dalla fuortga per las cuorts dalla **Cadi** ein enconuschentas, numnadamein dadora la baselgia veglia da sogn Martin e naven dalla claustra viers la Val sogn Placi. Treis petgas da crap e sisum travs atraviers che uneschan. Avon che stender il sughet e schar carpar, han ils boiers fatg proceduras smisereivlas, sco per exempel ligiau vid in pal e cun la zuola da pezs dil dies sidangiu u el bloc da martuir, in cundrez da murchels per tener a ferm las combas e stender. Per retener ils grius dils paupers murtirai han ins catschau ad els in per en bucca. - E quella entira installaziun fuva messa ora sigl ault, clar e surveseivel per temprar la glied odentuorn.

Enteifer ils onns han ils folclorists dumandau repetidamein la glied da **Tujetsch** da risdar praulas e detgas. E zatgi ha risdau detgavunda, tuttavia la glied odentuorn, sco per semeglia ils dels particulars dadens igl uaul e da **Maunsut**; quei stat siper la detta, sch'els vegnan inaga dumandai. Dano quellas da vegnir rehs, sco per exempel igl um cun la butteglia ch'ei vegnius enzacu duront igl onn ed ha empleniu ella cun daguots dad aur (ils logs ein localisai a **Val Val** e **Cavorgia**), las autras praulas perencunter han bunamein tuttas da far enzatgei cul derschalet (gats ed uolps che vegnan da notg e smaccan il pez) ni cul striegn e la rateina dil giavel. E las detgas serepetan en pintgas pintgas variaziuns e la platta dil barlot si **Caschlè** vegn strapazzada; neiv e neiv giu dalla Londadusa e sur Giachen Biart ei vegnius suten ils 6 da fevrer dils anno 1749. Sontga Margriata ei stada ina Tuatschina; il buob da vaccas sil **Cuolm Cavorgia** ha discuvretg il misteri. La smanatscha dalla sontga ei severificada: Il paster ei ius afuns ella tiara e l'alp ei stada enina smarschentada. E quei ha il Leci Antoni Peder-Venzin fatg valer e Giuanna Schmedt e Giachen Hendry-Monn e Margreta Riedi-Peder han confirmau ual sco ord ina bucca.

Ottilia Beer da Giuv

Ei stat scret el cudisch da baselgia en **Tujetsch** ed ei in document veseivel. L'Ottilia Beer da **Giuv** ei satrada en tiara benedida dil santeri da sogn Vigeli a **Sedrun**; quei ei schabegiau ils 2 d'avrel 1676.

Enzatgi veva catschau cugns e la finala ein ils mess dil magistrat dalla **Cadi** vegni per ella. A **Mustér** ha la procedura entschiet malamein ed ils turmentaders ein buca stai indulgents enviars ella. Da tgei malfatg ella ei stada denunziada san ins buca vegnir sissu. Igl ei da supponer che zatgi vevi fatg valer ch'ella seigi ina stria. - Duront l'inquisiziun denton han ils derschaders tuttina fatg persenn; l'Ottilia Beer da **Giuv** batti ils quarts e zatgi ha schau ir ella a casa.

Atgnamein san ins nuota la massada da quei temps leu, dano che sur Ludovic Jagmet da **Trun** (1672-1685) fuva caplon a **Rueras** ed a **Sedrun** pastorava il farrer Gion Schgier (1672-1690), omisdus d'ordeifer.

En claustra da **Mustér** perencunter regeva Adalbert II, in de Medell da **Tujetsch**. Igl ei grev da mussar ora enzatgei per propi. Ed ins fagess pli tgunsch da dir ch'igl avat da

Tujetsch hagi mess en in bien plaid per l'Ottilia Beer da **Giuv**. Mo pervia dalla verdat tucca ei da sefermar in tec. Avat Adalbert II de Medell ei buca mo staus in um perdert ed in docter dalla teologia ed ha engrondu la claustra tenor il plan da Caspar Mosbrugger, el ei e staus in superiur serius e rigurus. El process encunter Nicolaus Maissen (ND fol. 170, Nr. 31, da ca. 1676/77) stat ei scret: Si consta, che nel Criminale s(alvo) h(onore) delle strege l'Abate a detto per fine delle ingiustitie, che mai se posse dare tormenti abastanza et pgnalarli.

Quei ei in plaid fiars e cumpatg ch'ins ei ius sil viv era encunter igl avat. In auter fatg ei semegliontamein screts ed ei aunc menders. Igl avat Adalbert II de Medell hagi priu partida per pader Carli Decurtins da **Mustér**, il pader Carli ch'ins veva giu citau a Lucerna ils anno 1678 avon il nunzi Oduardo Cybo. Ses inimitgs vevan giu detg ch'il muntg seigi da buna fei e creigi tut el striegn. En confessiunal detti el penetenzias rigurusas a «persunas dil malefiz» (ed ins ha detg ils nums da: Barbara Florin, Margreta Genialla ed Anna Maissen) e pretendi da far da saver lur malfatgs als magistrats. Dil reminent collaboreschi il pader cun la dertgira dalla **Cadi** e scatschi il demuni.

Clar sco l'aua che la cunterpart fa diever da differentes mieds, en in process sco quel encunter Nicolaus Maissen tuttavia. Tut quei ei da trer en consideraziun e dar il pareri sur d'enzatgei ei ina resca. - Denton san ins nunpusseivel metter d'in maun il dubi ch'era il clerus seigi staus grondamein influenzaus dil striegn.

Fontaunas

Berther, Baseli. Baselgias, capluttas e spiritualesses de Tujetsch. Studi historic. Mustér 1924
Büchli, Arnold, Mythologische Landeskunde von Graubünden. 2. Teil: Das Gebiet des Rheins vom Badus bis zum Calanda. 2. Aufl. Aarau 1970
Gadola, Guglielm. P. Baseli Berther. Sia veta e sias ovras. Mustér 1943. (Nies Tschespet; 23)
Hendry, Tarcisi. Baselgias e capluttas da Tujetsch. Fotografias: Erwin Cathomas. Mustér 1983
Maissen, Felici. Da tschels onns - Las strias e lur process. En: Radioscola, 1. cudischet, 1972, p. 25-27
Müller, Iso. Geschichte der Abtei Disentis. Von den Anfängen bis zur Gegenwart. Zürich 1971
Müller, Iso. Zum bündnerischen Hexenwahn des 17. Jahrhunderts. En: Bündner Monatsblatt, Nr. 2, 1955, S. 33-41
Pader Placi a Spescha, morts la vigelgia da Nossadonna d'uost 1833. Cun caschun dil centenari ... festivaus a Trun ils 27 d'uost 1933. Da Guglielm Gadola ... ed auters. Mustér 1933

Al stariegn dal calgè

Quella tgaussa tga ju raquenta co è vaira. Mia mumma o raquintau ella. Qual era aun dal tiams tga nos mastagnès: maisters, maridurs, calgès e schnadrinas mavan aun a dis. Scu ins scheva da gliez tiams ain **Tujetsch** sel stèr. Ai setracta dad in schabetg ualti hanau, capitaus cun in calgè. Al Sep Antoni Geriet ne scul vagneva numnaus ain **Tujetsch** al Geriet pot veva fatg atras ina veta empau da dira e criua. Parfin schuldaual staus anzacuns onns - ain tiaras jastras. Staus maridaus trais jèdas e trais jèdas eran sias dunnas mortas, scu el schevi. Schagliuc eral in um spir humor e da bien cur. Turnaus a tgèsa fagev'el al pot naven da **Mustair** a **Rueras**, aun senza tgar a tgavai. Cul o calau cun gliez, fagevi el aun al calgè, a lura nueta schi mal.

Uscheia vev'el amparmez dad i a cuser giun **Cavorgia**, a quai sen **Cavorgia Sura** tiellas Venerandas. Begn marvegl, i er'atun, o'l priu siu abersac cun uaffens e laischs, samez sen vièdi per savai antschaiver ad uras sia lavur. Solver, genta, marianda a tschaina devi sacapescha tiella famiglia nuc'el luvrava. A gliez stun ins di, als mastagnès fuvan huslis tocca tard viadain alla sera. Avaun ch'ira vagnev'ai aun tschanau ansiamen culla familia, api eri da sametter sen vièdi ancunter tgèsa cun uaffens ad abersac. Uscheia ol angraziu palla lavur dada, dau pietigot a samez sen vièdi. - I era atun a pulitamain stgir. La via giu da **Cavorgia Sura** è taissa a stretga; giu spel fallun stuevan ins lu vai quitau da betga passa spella pun giu. Al Geriet è dantaun sarabitschaus giu saunamain. Da lo naven eri lu ina pulita vietta atras la paliu ain ancunter al **Plaun sogn Leci**. El mavi in dètg pass, per era aun vagni in tec ad uras a tgèsa. Vidainagiu tragl uaut, sulla pun dall'aua da **Nalps** api dalla tassaglia plaunca dalla **Ravera** sedo, ina via pagadusa, bunamain ina via dalla crusch. Dantaun - tge stuev'ins betga fa pal paun da mintga de, ben è da gliez tiams.

Uscheia s'el Sep Antoni vagnius se al **Plaun da Claus**, giusut al vitg da **Surrain**. La glina deva ina brausla glisch nogiu dal **Cuélm Cavorgia**, ina biala farcla. Viase ancunter la spunda cuérta, séper ina muschna, steva tut agradse in hazer buc nair - tut parsuls. Cul buc o viu al calgè, ol dau se in tec in beschel. Al Geriet o lu clumau: «Tit, tit, tit ... » Dantaun ol nuéta fatg ple biè stem ad è ius se tral vitg da **Surrain**, da giassa se, spella baselgia da sontg Antoni ora, betga senza aun seregurda da quai sogn dallas tgaussas piarsas. - Dallas **Traviarsas** ain, la via tga maina dagl uaut **Surrain** ainta **Rueras**, è ampau ple cumadaivla ad el vagneva bein vinavaun. Tuttainina vezal tg'al buc nair vagneva sianter el. Quai leva el nuéta vai. Ad el o priu se in crap a spuantau al nair anorase. Mu quel leva nungrazia turna anora. Al Geriet, in um spir cunziencia, leva nuét esser la cuélpa, tga outra gliut stupprien ancurei seis tiers parvia dad el. Tocca orase nuc'al grep dallas **Traviarsas** ol spuantau el, a lu s'el buc ius da sez anora. Al calgè è samez sen vièdi ad e ius vinavaun. Ainagiu ain la largia sulla pun-baselgia, nuc'als da **Sadrin** catschan se las tgauras, cullas von ainta **Pardatsch**, ol aun mirau giu sel **Rain** tga tarlichava sc'in argen. Ussa veva el aun da traversa gl'uaut tocca ain la fantauna sogn Martin ad am **Plaun da Pors**, nuca la pun mava da lezzas uras vi **Mila**. Cul è propi staus ain agl uaut spess, eri bien a stgir ed el o staviu mira bein da sta sen via. Tuttainina survegn al vidainagiu ina frida ain in calcogn. In mumen s'el staus tut stuius airi, in mumen - api ol cuntinuau siu vièdi. Forsa pudeval esser ius otgonta tocca tschien pass tg'al survegn puspè ina ainagiu ailas tgombas. Quagl jèda ol magari pagliau tema a betga saviu tge tartgè. Uscheia ol, avanca tg'al saigi al Lai, aun survagniu quater tschun jèdas vi d'ails vantrels a spir tema a furia s'el ius sc'in sturn tragl uaut.

Cul è staus aila fantauna sogn Martin, ol aun survagniu la davusa scadanada. La curascha da mira anavus ol betga giu ple.

El o giu tga mava schnavurs dad i sulla pun dal **Rain**; culla dètga prescha s'el ius da Mila se a vidain dad esch dalla amprema tgèsa dal vitg, tiel scarvon Grisch, mu gliez miez morts. Lezs èn sagli tut agradse ad on dumandau: «Mu nun da Diu, tge sai è schabagiau?»

Al Sep Antoni o mez siu abersac giun plaun ad o raquintau al schabetg li scarvon ad a sia gliut.

«Ju a viu questa sera al giavel - ad ju a tratg crappa sen el. Parsianter ol parsaquitau me tragl antir uaut **Surrain** ad è tratg crappa sianter me ... »

Als cussadents tadvan ad eran scu sturni.

Tuttainina mir'al Geriet sen siu abersac ad antschaiva a ri a ri. El veva viu tg'al veva piars tut seis laischs o dalla corda - ad el è spertamain sefatgs ain tg'al stariegn eran seis laischs stai. El tga veva piars tut seis laischs ad als ezs eran dai li el giu pallas tgombas.

O - cu tuts en stai leids, tga la tgaussa era ida o ain begn.

Quai co vai ju raquintau par angraziamain a nos mastagnès da tschels onns, a nos calgès, maridurs, schnadrinas e maisters tg'on luvrau pruamain par nos vegls par ina paupra piaglia, cunzun ain regurdientscha da meis aucs, als calgès Luis a Leci Hendry ad e als conlvrès.

XIII Fenomens e motivs dalla mort

Cronica da disgrazias

Malsognas e murias, onns da miserias, fiugs, auas grondas, lavinas ed ulteriurs schabetgs e disgrazias.

Nudau cronologicamein

- 1558 Muria gronda. Quei onn ei miert en **Tujetsch** 600 persunas. La gliעד survegneva biergnas da marscha che rumpevien anen enstagl ano e tussegavien quell'uisa ils malsauns.
- 1566 Fetg bia neiv.
- 1568 200 persunas mortas dalla muria.
- 1584/1585 Muria gronda; 800 persunas seigien mortas.
- 1588 Negin graun en **Tujetsch**.
- 1617 Scart da fein la primavera.
- 1628 Gronda miseria e fomaz.
- 1635 Pestilenza da biergnas. Quella ha fatg murir en pign temps 70 persunas.
- 1637 La «Synopsis» raquenta che la pestilenza da biergnas hagi giu liug en **Tujetsch**.
- 1637 Duront la pestilenza da 1637 ein 70 persunas mortas en **Tujetsch** en cuort temps. Sin la supplica d'avat Augustin da **Mustér** ha il prefect dils paders caputschins giu tarmess pader Amadeus de Mortara quei temps en **Tujetsch** e quei per plirs meins. Il sulet pader caputschin che ha carteivel pastorau en **Tujetsch**.
- 1596 Desax Andriu lus alla catscha sin gaglinas selvadias, vegnius ella lavina, bess sur in grep giu e restaus morts.
- 1622 Onn da fom e miseria.
- 1667 18-01 ei Melchior dil Toni vegnius en in squatsch neiv e morts si **Caspausa**.
- 1667 06-09 ei Durschei Martin daus sur in precipezi ella **Val Mila** e rut la totona.
- 1670 25-08 ei Giachen de Salins vegnius per la veta, rumpend giuado crappa giud in cuolm.
- 1691 18-05 ei Ludovic Durschei daus sil **Cuolm da Vi** sur in grep giu e staus morts.
- 1691 12-08 ei Margreta, dunna dil Giachen Gion Pieder, sedisgraziada, curdond in quader dalla baselgla veglia da Sedrun sin ella.
- 1695 26-10 ei Gion Jagmet curdaus ella **Val Strem** sur in precipezi e morts.
- 1702 06-06 ils 6 da zercladur ei Nadeler Mathaeus ex **Stiria** schelaus e morts sil **Pass Alpsu**.
- 1704 28-08 ils 28 d'uost han ins satrau a **Sedrun** in pigrer da **Bergamo** ch'era vegnius ella lavina en **Curnera**.
- 1707 «hai jeu satrau a **Sedrun** in pigrer, ruclaus a **Curnera** e staus morts sillas rivas dalla **Curnera**», scriva il sur plevon da **Tujetsch** el cudisch da morts.
- 1708 21-03 ils 21 da mars ein vegni ella lavina dadens **Tschamut** Gion Rest Peder e Simon Oliva.
- 1712 29-09 ils 29 da settember ei Catrina Nurschei vegnida sut in lenn egl uaul e stada smaccada e morta.
- 1719 10-01 ils 10 da schaner ei Catrina e Margreta de Vienna a **Selva** vegnidas ella lavina ellas **Vals da Selva**.
- 1730 31-03 ils 31 da mars ei Martin Rumias Curschellas vegnius ella lavina a **Vidauas/Tschamut** e morts.
- 1731 14-07 ils 14 da fenadur ei Giusep Sievi daus sur in precipezi ella **Val Strem** ed ha stuiu murir.
- 1734 17-07 ils 17 da fenadur ei Felici Durschei daus giud il tetg d'in clavau e staus morts.

- 1736 26-01 ils 26 da schaner ei Giuliana Schrefer da **Tschamut** vegnida ella lavina ella **Val sogn Martin**, dado **Selva**.
- 1738 11-07 ils 11 da fenadur ei Maria Culastia Casperin, ina mattatscha da circa 14 onns, dada ell'aua e vegnida anflada morta suenter dus dis.
- 1746 26-10 ils 26-10 ei Pieder Paul Hendry vegnius per la veta sut in lenn.
- 1749 06-02 ils 6 da fevrer, la sera allas diesch, suenter haver neviu e cuflau ina entira iamna, sederschan las duas lavinas da **Pulanera** e **Val Mila** a val. La lavina destruescha 23 casas, 33 truaschs, 39 nuegls, 5 mulins ed ina resgia. Ella satiara 100 persunas e 327 animals; 43 carschi e 19 affons han anflau la mort. (La lavina che ha pretendiu ils pli bia morts ell'**Europa**.)
- 1749 Il medem di sco sura ein plevon Giachen Biart cun aunc 5 persunas vegni ella lavina dadens **Zarcuns**; el e treis cumpogns han ins cavau ora morts. Els fuvan sin via per dar agid als disgraziai a **Rueras**.
- 1750 28-05 ils 28 da matg ei Giachen Caviezel morts tut anetgamein orasi la **Val (Val Bugnei)**; ei fuva la damaun da Sontgilcrest.
- 1755 29-10 ils 29 d'october ei Onna Margreta Capieder, dunna da Clau Riedi, returnond dad **Ursera**, morta dil freid sil **Cuolm d'Ursera**.
- 1757 14-11 ils 14 da november ei Gion Capaul vegnius sturnius dad ina buora ch'el ruclada giu digl uaul **Niregl**.
- 1764 32-06 ils 23 da zercladur ei Martin Riedi daus ell'aua e morts.
- 1768 29-08 ils 29 d'uost ei Casper Riedi daus sur in precipezi giu en **Val Strem** e restaus morts sil plaz.
- 1769 19-06 ei il giuven Giachen Antoni Schmed, 28 onns vegls, vegnius sut in pégn en egl uaul **Cavorgia** e staus morts.
- 1774 19-04 ils 19 d'avrel ein Franciscus Doval da **Paris** e la Maria Crois, dunna da Samuelis Mercier da **Berna**, schelai "in **Monte Crispaulta**".
- 1782 Ils 23 da mars ein tschun umens mond per fein a pastg ella **Val Gierm** vegni ella lavina: Gion Antoni Pally, Giusep Maria Casparin, Gion Flurin Casparin, ils dus frars ed il bab Gion Casparin, stalter Giusep Maria Beer.
"Sur els ella neiv mava in uors che leva untgir els. Sut ils peis da quel ei la neiv sbuada ed ha formau ina lavina che ha tratg igl uors ed ils umens giuaden ella profunditad dalla val. In ei vegnius anflaus plinensi tut smaccaus. Ils dus auters giudem la val, mo tuts treis sturni." La veglia scartira che relata quei fatg remarca cheutier: Ils umens ch'eran babs da bia affons han ins deplorau, mo pigl uors ha negin bargiu.
- 1784 A **Cavorgia** ella caplutta da sogn Leci fuva pli baul igl usit da recitar suenter rusari tschun paternos per ils tschun vischins da **Cavorgia** ch'ein vegni ils 23 da mars en ina lavina sil **Vanatsch** ella **Val Gierm**. Els havevan leu ina meidia fein a pastg. La disgrazia ha tuccau str. Beer Sep Maria, Casperin Gion cun ses dus fegls Gion Flurin e Sep Maria e de Pelly Gion Antoni. Quei bi usit ei semantenus entochen entuorn 1930.
- 1785 15-10 ils 15 d'october ei igl entir vitg da **Selva** barschaus giu.
- 1786 18-06 ils 18 da zercladur, Sontgilcrest da **Rueras**, ei il capitani da mats, Giachen Antoni Alig vegnius sittaus giu sper portabaselgia, entras malprecauziun dad in auter; el veva 30 onns.
- 1787 04-06 ils 4 da zercladur ha la vischnaunca da **Tujetsch** giu fatg ina processiuin a **Trun** tier Nossadunna dalla glisch. Returnond a casa ei str. Giachen Antoni de Florin sederschiu e restaus morts oragiu sut il vitg **Mumpé-Tujetsch**.
- 1789 02-09 ils 2 da settember ei Paul Andriu Gieriet vegnius per la veta da far fein a pastg ella **Val Mila**. Il liug senumna aunc oz la "**Pala digl Andriu**".
- 1792 10-09 ei la giuvna da 27 onns, Maria Victoria Venzin, ruclada da rischlar fein a pastg en **Val Giuv**.
- 1793 27-11 ils 27 da november ei Martin Caspar Quinter da **Bugnei**, fagend lavur cumina, vegnius smaccaus dad in grep ch'ei ruclaus giu sin el.

- 1794 28-06 ils 28 da zercladur ein las duas soras Onna Maria Berther, dunna da Gion Battesta de Pelly e la giuvna Maria Culastia Berther, returnond dad in pelegrinadi a **Nossadunnaun**, mortas dalla stauncladad e ferdaglia ella **Val Strem** (neu dil **Pass dallas Cruschs**).
- 1797 22-03 ils 22 da mars ei Giachen Antoni Fidel de Florin, in um maridau, vegnius sut in lenn en e morts ella **Val Bugnei**.
- 1797 10-06 ils 10 da zercladur ei Mathias Caviezel, in um maridau, vegnius sturnius dad in crap orasi la **Val Bugnei**.
- 1797 18-11 ils 18 da november ei Barclamiu Berther, in um maridau, ius alla catscha e vegnius anflaus morts sut greppa en.
- 1799 06-03 ils 6 da mars ein sur Giachen Antoni Condrau, caplon da **Rueras**, e Gion Fidel Venzin da **Rueras** vegni pigliai dils Franzos, menai a Mira, nua ch'els ein vegni mazzai da quels barbaricamein.
- 1799 06-03 Il medem di ein vegni sittai giu dils Franzos: il giuven Giachen Martin Berther da **Camischolas a Putnengia**, stalter Giachen Venzin el vitg **Bugnei**, vulend fugir ord casa e Gion Gieri Monn en sia atgna casa, vulend sedefender.
- 1799 03-05 ils 3 da matg ein ils suandonts Tuatschins curdai ella battaglia encunter ils Franzos:
Giossi Gion da **Bugnei**
Giossi Clau
Beer Vigeli Giusep, **Sedrun**
Schmidt Vigeli Giusep
Soliva Giachen Antoni
Schmidt Giachen Antoni e
Curschellas Martin, **Cavorgia**.
- 1799 18-06 Andriu Schnoz da **Sumvitg** morts en consequenza dils strapazs da purtar la bagascha dils Franzos sul **Cuolm d'Ursera**.
- 1806 19-02 ils 19 da fevrer. Gest sur **Selva**, ella **Val da Plaun**, destruescha ina lavina ina casa dubla.
- 1808 ils 12/13 da december destruescha ina lavina la gronda part dil vitg da **Rueras**; 25 persunas ein vegnidas satradas ed han anflau la mort, 17 dels perencunter ein vegni spindrai.
- 1809 Il schaner ein dus umens vegni satrai dalla lavina dador il vitg da **Selva**.
- 1810 Emprem da schaner. La lavina dils **Tschenghels da Rusas** e quella dalla **Val Ruinatsch** destrueschan ina casa a **Selva**.
- 1811 25-04 ils 25 d'avrel, returnond Maria Barla Monn en da **Mustér**, eis ella dada sur in piogn giu el **Rein** (perveseders han anflau ella l'auter di o l'**Acla** e tratg ella ord l'aua).
- 1812 07-09 ils 7 da settember ei Giusep Antoni Giossi ruclaus da far fein a pastg silla **Plaunca Droz (Val Bugnei)** e vulend alzar si eis el morts.
- 1816 24-09 ils 24 da settember ei Vigeli Liberat Monn serendius da notg ord tegia dil **Cuolm da Vi** e curdaus sur in precipezi giu el **Drun da Bugnei** e staus morts.
Balzer Riedi morts ella lavina dalla **Bullatscha**
In Schnoz morts cun aunc in auter um en ina lavina dadens **Carmihut**.
- 1817 Epidemia a **Selva**, bia morts.
- 1817 06-03 ils 6 da mars, la sera allas 8, ei la secunda gronda lavina da Rueras vegnida a val. En quella han 28 persunas anflau la mort, 19 autras han ins pudiu spindrar.
- 1817 28-03 ils 28 da mars han ins anflau Vigeli Giusep Riedi, returnaus dad **Ursera**, schelaus sil **Cuolm d'Ursera**.
- 1817 Onn dalla fom e miseria
- 1821 12-09 ils 12 da settember ei Vigeli Giusep de Florin vegnius per la veta cun far fein a pastg el baun **Tschinglatsch**.

- 1822 11-07 Per il di da sogn Placi ei igl entir vitg da **Camischolas** barschaus giu. Duas persunas ein daventadas las unfrendas dallas flommas: Onna Maria de Pally e Maria Liberata Rothmund, ina mattatscha da 7 onns.
- 1829 23-08 ils 23 d'uost ei il nurser Beer Rest Valentin da **Camischolas** daus sur in precipezi giu silla "**Puzza**", els **Neidis**, e staus morts.
- 1833 06-03 ils 6 da mars ei Gion Rest Monn da 17 onns vegnius en in squatsch lavina ella **Val da Claus** e restaus morts.
- 1834 22-06 ils 22 da zercladur ei il mattatsch da 15 onns, Rest Giusep Riedi daus en in vadretg ellas **Vals** e vegnius anflaus morts suenter 4 dis buca dalunsch dil liug dalla disgrazia.
- 1836 24-12 Nadal. La sera, circa allas quater, ein statalter Giachen Antoni Monn da **Zarcuns** e Sep Lurenz Schmed da **Rueras** vegni ella lavina a **Giuv**, ferton ch'els pervesevan. L'auter di ein els vegni cavai ora morts. Aunc quater auters perveseders ein vegni quei di ella lavina, ein denton mitschai cun la veta.
"Ei vegn detg ch'en **Tujetsch** a **Sogn Giachen (Rueras)** hagi la lavina priu dus giuvens. Ei fuss d'augurar che quella nova seconfirmass buca." (Il Grischun Romontsch 1837, nr. 45, dils 3-1) Probabei ils sura dus.
- 1843 23-05 ils 23 da matg ei Giusep Martin Peder da **Rueras** vegnius per la veta en in squatsch lavina en la **Val Giuv** sut il **Draus** cun far nitschuns. El veva 53 onns.
- 1850 Destrucziun d'ina casa a **Selva** entras ina lavina.
- 1853 09-10 Quei medem onn ei probabel era Balzer Antoni Curschellas da **Surrein** sedisgraziaus sper la punt da **Cavorgia**.
- 1853 30-11 Il november ei Sep Antoni Giossi da **Surrein** sedisgraziaus dadens **Nacla**, selischnond dalla glatscha giu entochen en via encunter ina buora.
- 1854 22-06 Quei onn ei Tumaisch Giusep Schmed da **Rueras**, in buobet da siat onns, daus en in vadretg enasi la **Vallatscha (Val Mila)** per vigelgia sogn Gions, ed ei morts e tratgs ora dadens ils praus da Milar.
- 1859 06-12 ei Vigeli Venzin da **Selva**, returnond da **Segnas**, daus per tiara vi amiez il vitg da **Sedrun** ed en paucs muments staus morts.
- 1863 11-01 **Val dil Plaun**. Ina lavina destruescha dus clavaus a **Selva**.
- 1863 20-06 ils 20 da zercladur ha il buobet da 9 onns, Caspar Muggli da **Rueras**, catschond duas vaccas sur la punt da **Rueras** vi, survegniu dad ina da quellas in stausch ch'el ei daus ell'aua. Pér sut **Sedrun** giu eis ei reussiu da trer igl affon miert ord il **Rein**.
- 1865 04-02 ils 4 da fevrer ei il giuven Flurin Venzin da **Selva** vegnius ella lavina visavi **Selva** els **Banaus**, mond alla catscha sin cots selvadis.
- 1866 "La davosa fiera da **Ligiaun** ei ida buca mal, aschia era la fiera d'**Alddorf** dils 19 da november. In marcadont da **Medel** che ha frequentau quella, ha stuiu schar ventscher sill'**Alpsu** duas vaccas ella lavina, duas ha el pudiu liberar, mo stuiu schar ventscher ellas la notg sil cuolm. EI sez e siu cumpogn da viadi ein dalla lavina vegni fiers vi el lag, mo ein mitschai cun la tema e cun schar anavos ella neiv caput e capetsch." (Gasetta Romontscha, nr. 49, 5-12-1866)
- 1868 october Aua gronda. Donn da praus sut **Rueras**. Sbuaus a **Sedrun**. Donn da 8665 frs. (1- 4 d'october)
- 1869 In paster da **Tujetsch** ha anflau sur il **Lag da Tuma** sper il **Badus** l'ossa d'in carstgaun, carteivel d'in mistergner che veva avon entgins onns falliu la via sur l'**Alpsu**.
- 1870 "Ella cufila dils davos dis d'october havess in Cavegn da **Breil** gleiti anflau la mort sill'**Alpsu**. Venderdis vargau ha el bandunau Ursera pér allas duas suentermiezdi. Vegnend sisum il lag, er'ei stgir ed el veseva buca pli ils barricars sco fastitgs della via. Per buca rescar ded ira surengiu ella stgiraglia seresolve el da restar grad eri. EI batta in toc buna via e va cheu a spass en tutta aura dallas sis della sera entochen las sis della damaun.

Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella Rheinquelle a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia."

GR 1870, nr. 44

- 1871 "Dacuort vegnan dus Inglès giu dal **Badus** el hotel Rheinquelle a **Tschamut** e spetgan leu sin lur tierz cumpogn, che fuva restaus empau anavos sul lag da **Tuma** si. Ei vegn notg ed igl Inglès selai aunc buca ver. Ses camerats plein tema, ch'el hagi falliu la via, ni ch'ei seigi schabiau zatgei, tarmettan umens cun latiarnas e proviant sil **Cuolm** per encurir el. L'entira notg traverseschan quels plirs cuolms e **Vals**, greschan e schulan, mo anflan negin fastitg dil sepiars. Allas treis arrivan els anavos a **Tschamut** e declaran, che sch'el sesanfli aunc sil cuolm, seigi el buca pli en veta, tschelluisa havessien ei cun dar sinzur stuii anfla el. En mesa desperaziun van allura ils dus Inglès culs dus umens sin nova tscherca, ferton ch'ei vegneva a **Sedrun** patertgau vid il cavar fossa per il disgraziu. La nova expediziun ei buca stada s'avanzada ton lunsch, ch'ella entaupa igl Inglès cartius morts. Quel di, ch'el vevi falliu la via e nunsavend nua semanar el stgir, seigi el sefiers sin ina meidia fein a pastg e durmiu stagn e bein tochen per la damaun vi. En triumf meinan ei el el hotel, nua ch'el ha dustau siu appetit inglès cun in brav solver "alla savetscha" e pagau generusamein ils umens, che vevan encuretge el. Ina tala aventura vala bia marenghins els eglis d'in Inglès."
- 1872 12-09 ils 12 da settember ei Giachen Fidel Maria Cavegn vegnius tuccaus dad "in crap ruclont" en **Val Giuv**.
cun cavar cristallas e vegnius bess en ina fessa d'in glatscher, nua ch'ins ha anflau el schelaus e stagn morts.
- 1876 10-01 ils 10 da schaner ein statalter Stiafen Schmed, in bab de nov affons, ed il giuven Gion Fidel Peder de 18 onns, omisdus da **Tschamut**, vegni ella lavina, fagend via ellas **Vals** (da **Curnera**) per vegnir ora cun fein a pastg. Dus auters giuven, in da sedisch e l'auter da schotg, han ins aunc pudiu cavar ora vivs. GR 1876, nr. 2
- 1880 09-10 Entuorn ils 9 d'october ei Gion Antoni Deragisch da **Sedrun** morts o **Bigliel** da far si magliacs. En sia memoria pendeve ina crusch vid il clavau sper il stradun a **Bigliel Sura**.
- 1888 14.02 ils 14 da fevrer, per mardis-tscheiver, ein ils dus giuven frars, Barclamiu e Vigeli Giusep Peder da **Selva**, mond per ina vaulta draussa, vegni ella lavina gla beinmarvegl en **Plaun Viradas**, nua ch'els ein vegni bess sur in grep giu el **Rein**. Barclamiu veva 15 onns e siu frar Vigeli Giusep 17 onns. In han ins anflau pér la primavera en ina buola sut **Selva**. Els fuvan fegls da statalter Gion Antoni Peder da **Selva**.
- 1888 "Il caverer Giachen Antoni Curschellas de **Surrein**, in giuven de circa 17 onns, ei sin ina plaunca semess giu per durmir, la capiala sut il tgau ed il fest enta maun, mo ei buca levas si pli. Vegnend las cauras la sera persulas a casa, han ils vischins sminau ina sventira, ein spert i alla tscherca de lur caverer, ed anflau quel morts ella posiziun descreta. Cumpatg ch'ei era vegniu giu in crap, che ha sturniu el." En sia memoria steva ina crusch vid il **Sontget** dils mats dil maun dadora. GR 1888 nr. 25 (21-6).
- 1890 Gion Antoni Jacomet da **Sedrun**, in affon da dus onns, ei daus ell'aua sper il fallun da **Salins** e vegnius tratg ora morts.
- 1892 04-02 ils 4 da fevrer ein ils dus giuven frars Giusep e Vigeli Giusep Valier da **Camischolas** vegni ella lavina en las **Ruinas da Pardatsch** cun ir per lenna e restai morts.
- 1892 07-02 gronda lavina a **Caspausa - Milez - Rivas**. Grond donn vid praus ed uaul.

- 1896 Il zercladur ei Gion Antoni Gieriet da **Sedrun/Gonda**, in buob da pressapauc 8 onns, daus en in vadretg sil **Crest Liung** en **Val Mila**. Ins ha anflau el l'auter di morts sur la **Punt Miez**.
- 1896 Il fenadur ei il caverer Sep Martin Lutz da **Soliva/Medel** ruclaus ella **Val Strem**, el **Pastuir digl Albin**, encunter **Cuolm da Vi** e morts en paucs dis per consequenza dallas blessuras.
- 1896 Quei medem onn ei Margreta Monn da **Rueras** morta orasi **Sur Giassa** ina dumengia da stad, mond a **Sedrun** a messa. Ina crusch steva leu en memoria.
- 1902 Il november ei Onna Catrina Deflorin da **Tschamut** dada ella aua ella **Punt Nova** cun in buordi draussa si dies e morta.
- 1903 Il settember ei Francestg Jacomet da **Sedrun**, in buob da siat onns, daus giud la punt da **Sedrun/Surrein**; ins ha tratg ora el morts in tschancun oragiusut, nua ch'el era sefermaus vid in cagliom.
- 1905 08-06 ils 8 da zercladur ei Sigisbert Berther da **Rueras** vegnius sut in cusch en cun resgiar ora lenn egl uaul **Cavorgia** e restaus morts.
- 1906 Lavina caschuna gronds donns vid igl uaul **Cavorgia**.
- 1907 Barschament a **Cavorgia**. Baghetg da Alois Jacomet.
- 1907 Lavina a **Mila**. Donnegiau baghetg da Giachen Antoni Venzin.
- 1909 Barschament a **Gonda**. Baghetg da ...
- 1915 Lavina dil **Tgom** caschuna gronds donns d'uaul.
- 1917 Gronds donns d'uaul a **Plaun Miez**.
- 1922 08-12 ils 8 da december. Lavina dalla **Val Mila** tochen cuort sur **Rueras**. Donns vid baghetgs.
- 1926 19-07 ils 19 da fenadur ei il buobet Ignazi Cavegn da siat onns, fegl da Florentin Cavegn da **Sedrun**, vulend traversar il stradun, vegnius sut in automobil brasillan ed ei staus morts. Paucs onns avon era ina buobetta da Florentin Cavegn vegnida sut ina pluna lenna e restada morta.
- 1927 28-07 ils 28 da fenadur ei in automobil ius surengiu el tierz caraun sur la tegia dils viers, silla vart grischuna dall'**Alpsu**. Ei fuva treis dels: Cont Wilhelm da Waldburg-Zeil da **Rimpach, Württemberg**, cun sia dunna e sia quinada. Il cont ei restaus morts, la quinada ei vegnida blessada, ferton che la dunna, che menava igl auto, ei restada intacta. GR 1927, nr. 31
- 1931 07-07 ils 7 da fenadur ei il recrut Gustav Hunziker da **Turigt** sedisgraziaus en **Val Maighels** duront in exercezi da sittar culla maschina da buis. EI ei vegnius tuccaus d'ina balla amiez il cor e staus morts sil plaz.
- 1932 26-01 sedisgraziescha Remigio Locatelli mortalmein da transportar ina pegna cun ina sliusa da corns. Vegnend da **Gonda** giu, vegn el buca da frenar e cupetga encunter il sontget dils mats.
- 1936 06-08 Gion Giachen Monn ruclaus ella **Val Mila** e morts.
- 1942 15-10 Isidor Loretz, buob da 13 onns, sedisgraziaus a **Sontga Brida**.
- 1943 02-07 Ludovic Pally sedisgraziaus egl uaul **Surrein** cun far giu lenna ils 2 da fenadur.
- 1944 11 da fevrer: Lavina destruescha baghetgs e caschuna gronds donns a **Selva**.
- 1944 18-02 Lavina da **Mulinatsch**
- 1944 Il paster Placi Cavegn da 10 onns ei daus ell'aua ella **Val Strem**.
- 1945 27-10 Franz Loretz sedisgraziaus da transportar draussa cun ina suga a **Tschamut**.
- 1947 22-12 ils 22 da december. Lavina giud il **Calmut** caschuna gronds donns vid pastira e praus.
- 1949 11-06 ils 11 da zercladur barschament a **Selva**. Gl'entir vitg daventa ina unfrenda dallas flommas cun excepziun da duas casas orasisum.
- 1950 14-08 **Tgom**: scolast Giusep Beer, 23 onns, morts en consequenza d'ina attacca dil cor duront ina spassegiada.
- 1950 06-12 Ludovic Monn sedisgraziaus da pinar lenna vigl uaul **Cavorgia**.

- 1951 20-01 Onn dalla neiv gronda. Lavinas a **Selva**. Scolast Gion Giusep Giossi piarda la veta en quella dils 20 da schaner. Ina lavina a **Tschamut** destruescha la sala dil hotel Rheinquelle e la casa d'inschignier Bernasconi.
- 1951 16-09 Hedwig Hausherr sedisgraziada ella **Val Strem**.
- 1952 24-06 Baseli Schmed sedisgrazias ad **Andermatt**.
- 1953 15-07 ils 15 da fenadur sedisgraziescha Ludivic Caduff mortalmein en ina gallaria sil **Schneehühnerstock**.
- 1958 01-01 Regula Cavegn, buoba da siat onns, sedisgraziada culla scarsola dalla via giu per baselgia.
- 1958 15-07 Leci Antoni Caduff tuccaus mortalmein dil cametg si **Cuolm Val**.
- 1958 21-08 ils 21 d'uost Stiafen Giger daus ell'aua ella **Val Curnera**.
- 1959-1968 Duront las lavurs vid ils mirs artificials da fermada a **Nalps** e **Curnera** sedisgrazieschan 22 persunas.
- 1959 17-09 barschament el magazin dalla firma Murer a **Mira/Sedrun**. Josef Decrusch vegn per la veta ellas flommas.
- 1959 03-10 Giusep Antoni Giusep Antoni Albin sedisgrazias cun auto dadens **Tschamut**.
- 1959 10-10 disgrazia mortala duront in cuors militar (Grüter Edwin).
- 1959 16-12 Vigeli Deragisch sedisgrazias a **Basilea**.
- 1959 17-12 ils 17 da december ei Vigeli Cavegn sedisgrazias cul trax giul **Drun/Sedrun**.
- 1960/61 Nundumbreivels squatschs neiv sin la via **Alpsu** denter **Tschamut** e **Selva**.
- 1961 15-04 accident cun auto dador **Selva**, Ignazi Venzin sedisgraziescha.
- 1962 11-02 Pius Cavegn, 9 onns, daus ell'aua e negaus giul **Drun/Sedrun**.
- 1962 Aviun cupetga encunter il **Pez Tgietschen/Val Strem**, 6 morts.
- 1965 04-11 ruclaus dil **Pez Cavradi**, Grassi Renato, **Italia**.
- 1967 21-03 ils 21 da mars accident sil **Pass Alpsu**. Lavina destruescha pliras baraccas, 5 morts.
- 1969 14-09 mazzament a **Sedrun**, 2 morts; denter quels Anton Deragisch da **Sedrun**.
- 1969 11-10 attacca dil cor duront l'ascensiun alla tegia da **Maighels**, Casper Cadonau, **Flem**.
- 1969 29-10 ils 29 d'october barschament digl uaul **Caschlè**.
- 1970 25-07 accident sin via dil **Pass Alpsu**. Morts ei Edmun Simon da 35 onns.
- 1970 20-02 morts en consequenza d'in accident sin via. Vegnius tuccaus d'in auto a **Rueras**, miera Gion Antoni Monn, 76 onns.
- 1972 02-03 ils 2 da mars vegn Antieni Cavegn, **Sedrun**, ella lavina a **Milez**, **Plaunca Biala**.
- 1973 08-10 accident mortal sin via a **Bugnei**, in miert
- 1975 18-04 Giachen Cathomas, contact cul conduct electric dalla VFA sill'**Alpsu**, morts.
- 1975 Neiv gronda. Pliras lavinas ils 5/6 e dils 6/7 d'avrel: Lavina dalla **Val Vallatscha** destruescha lingia electrica da tensiun aulta, lavina da **Liez** donnegescha in baghetg a **Giuv**; lavina dalla **Val Ruinatsch** destruescha plirs baghetgs a **Selva**. Duront gl'unviern vegnan 20 baghetgs d'economia destrui totalmein entras lavinas, plinavon destrueschan lavinas pressapauc 5 ha uaul.
- 1977 17-07 Willi Hagen, BRD, ruclaus si **Siat Fontaunas**, morts.
- 1977 31-07 auva gronda a **Rueras**, **Val Mila**, l'auva destruescha punt dil vitg da **Rueras**, per part la resgia entadem il vitg ed inundescha l'entira insla giusut **Rueras**.
- 1977 17-09 Ulrich Remund sedisgrazias mortalmein cun auto a **Sontga Brida**.
- 1977 18-09 Alexi Giossi sedisgrazias cun cavar cristallas en **Val Giuv**.
- 1978 23-08 Stiafen Valier sedisgrazias en **Val Giuv** cun ir per cristallas.

- 1978 01-03 Serafin Cavegn sedisgrazias cun ir cun skis a **Scharinas/Cuolm Val**.
- 1979 01-01 lavina **Alp Tschamut/Tgatlens**, 4 morts.
- 1980 22-02 Daniel Gut, 16 onns, rocla cun skis sil trasse dalla viafier, vegn tschaffaus dil tren e miera, sur **Rueras**.
- 1980 14-07 buoba tschechoslovaca da 12 onns seleischna sin ina penda da neiv silla spunda occidentala dil **Péz Cavradi** e rocla 150 meters a val e resta morta.
- 1981 14-04 Ursula Schaad, tier la descensiu cun skis dil **Péz Tgietschen**, ruclada 100 meters sur in grep giu e stada morta.
- 1981 08-09 attacca dil cor, in um hollandes da 61 onns, a **Dieni**.
- 1982 07-10 Johann Bissig, ruclaus sut **Tschamut** sur in grep giu, sefatgs mal e stuiu murir.
- 1983 29/30-06 Florentin Monn sedisgrazias da cavar cristallas en **Val Strem/Cuolm da Vi**.
- 1983 14-09 in Polac sedisgrazias a **Sumsassi**, seruclaus sur la via giu, carteivel pigliau mal.
- 1983 15-02 ils 15 da fevrer. Attacca dil cor duront ina spassegiada sur **Rueras**. Morts H. Jörg von Scarpatetti da 47 onns.
- 1984 14-07 Otto Gerber sedisgraziescha d'ir per crappa.
- 1985 19-08 attacca dil cor duront ina spassegiada en **Val Giuv**, R. Schwarz da 65 onns.
- 1986 26-04 aviun militar cupetga encunter la costa dil **Pez Nurschallas**. Il pilot J.J. Bischof piarda la veta.
- 1986 29-05 disgrazia mortala el tunnel dalla VFA sil **Pass Alpsu**. Entras contact cul conduct electric piarda Volker Bräuer la veta.

Fontaunas

Anniversari da 1456

Cudischs da morts da 1664 - 1986

Cudischs digl uffeci civil 1860-1986

Gadola, Guglielm. Cruschs e dolurs ord la Val Tujetsch. En: Il Glogn, 1943, p. 8-26

Inaga la pestilenza - ed oz?

Ins ha era numnau la pestilenza autruisa, sco per semeglia: muria, pesta, epidemia da vischigias e biernas ed aschia; en mintga cass ina malsogna tarladida sco il puccau mortal ch'ins savess cumparegliar cul cancer da nos dis ed ussen era sida.

Oriundamein ina malsogna dils animals, sco per exempel dils ratuns. Ils ezs ein vegni cun lur magliadiras, en tuttacass culs pelischs e lur miersa, quella dils pelischs, ha caschunau la malura. Las bacterias ein sepigliadas ed ein dadas afuns els muscals u vid las glondas dil culiez e viaden el schegn e buca il davos sut bratsch ed han fatg marscha. L'attacca dalla bacteria sil lom ei aunc stada mendra. Il tissi el spidatsch ha infectau e la contagiusedad ei vegnida gronda.

Igl ei da crer ch'ils ratuns seigien vegni a pèr culs marcadonts e la schuldada neu dall'**Asia** minura ed orasi dall'**Africa** settentriunala. La malsogna ei aunc ozildi buca morta ora dil tuttatfatg; ella furiescha meinsvart ella **Mandschuria**, ellas Indias, lunsch viers miezdi a **Madagascar** e nuotatonmeins ella **America** dil sid.

Dils emprems simtoms san ins atgnamein pauchet; enzatgi fa valer enzanua ch'ei entscheivi cun stuer sturnidar sco da ver priu ina sturnidella. Ed ils vegls seigien sedustai cun ragisch rena, tamar e geneivra e surtut cun paternos e processiuins dallas confraternitads.

Gia dil temps digl imperatur Justinian el sisavel tschentaner hagi la pestilenza fatg sc'ina stuorna ed avon l'invasiu dils Saracens hagi **Mustér** e ses contuorns semegliantamein fatg atras ina pervia dalla pestilenza. Ils onns 1347-1352 seigi la muria vegnida per da detschiert en nossas regiuns ed ils vellers seigien stai mal en pugn. Perencunter dil sedischavel e dil gissiatavel tschentaner san ins dapli.

Avon che la pestilenza ei dada a dies els vischinadis da **Tujetsch**, fuvan ils avdents gia miez piars. Carplinas e fomaz vevan smagrentau la glied e biars vischins ein vegni afuns cun pastg en bucca e muort lur fleivlezia ein naparts dai ellas greflas dils lufs. E cun gnarva spossada han ins buca pudiu tener la dira. Nevadas ed auas grondas ed onns ora raccoltas fallidas. Sche ch'ins tili in encunter l'auter e fetschi persenn - sco per semeglia ils prezis digl onn 1585, s'entelli midau dils risculdis ella valuta da francs:

in malter garnezi (22 curtaunas) custava	38,60 frs.
ina tschuncheisma fein ha custau	10,40 frs.

Per capir tucca ei da metter en cumparegliaziun cun la vendita ed il gudogn da lezs onns:

ina vacca cun vadi ha pagau allura	34,00 frs.
ina femna (fumitgasa) gudignava per onn	11,90 frs.
la schurnada d'in um ha muntau a	0,20 frs.

Las cefras dils morts en **Tujetsch** durant la pestilenza ein bein in schazetg, pressapauc, buca dapli e secunterdian tscheu e leu ellas indicaziuns. Ed il diember fa tut tema, sch'ins mira per propi:

1556	600 persunas mortas
1568	200 persunas mortas
1584 (Ardüser di 500)	800 persunas mortas
1635	70 persunas mortas

E quei dess tuttina entir 1670 persunas mortas dalla pestilenza. La damonda seriusa stat osum la bucca: Veva la cuort da **Tujetsch** da lezzas uras insumma tonta glied? Tenor las statisticas da silsunter ha **Tujetsch** permanentamein giu pressapauc 850 habitonts, silmeins dapi l'entschatta dil schotgavel tschentaner e mo ual ils dus onns 1796 e 1835 dapli che melli persunas.

In'ulteriura caussa vegn aunc vidlunder. Igl onn 1628 ei vegnius cun ina gronda pupira. La mesadad dalla populaziun tuatschina ha in entir onn buca giu paun en casa. Naparts hagian vendiu il fatg miez per nuot e 200 persunas seigien idas naven. Ils logs vegnan indicai cun: **Vaniescha, Vienna, Hollanda**.

Igl ei forsa bien da trer era cheu ils fatgs en consideraziun; dar las emprovas fuss ina resca. - En connex cun la pestilenza en **Tujetsch** ein dallas uisas famas sefatgas, famas ch'ins di agradora e stat sissu, era lu, sch'ellas ein tuttavie buc adina probablas. Ch'ins laschi pia mitschar ora:

- Dadens **Sumsassi** fuvì ei vanzau sulettamein duas persunas. E quellas duas vevien nuota propi bugen ina l'autra; ellas vevien e tema da sepigliar. Tondanavon - che l'ina mavi dalla vart da Surrein encunter la **Bullatscha** per ir anora, l'autra encuntercomi atras las plauncas e siviars **Caspaua** dad ir a messa a **Sedrun** - pervia dalla tema dalla pestilenza. Da **Putnengia** anora assistevien ellas alla messa e turnavien silsuc dalla medema via anen.

- La mumma de Castelberg, ina femna da **Sedrun**, eri enten spitgar sia greva ura. Plein tema seigi ella fugida si **Cungieri**, leu nua ch'ella hagi parturiu schumellins, dus buobs da num: In ei vegnius avat, l'auter mistral. Ad ella sezza hagi la pestilenza rut il fil dalla veta - e quei ual suenter la pigliola.

- Il Duri de Florin hagi sez aviert la biergna igl onn 1637 ed el seigi sescumpentaus. Igl ei dign d'esser saviu, da tgei ch'ils vallers da **Tujetsch** mieran ozildi. L'indicaziun (dils 26-1-1986) digl uffeci federal a **Berna** ha fatg da saver e quei naven da 1969-1984, numnadamein da 180 mortoris ella **Val Tujetsch**. E la statistica muossa ora:

1969-1984 = 180 mortoris

motiv dalla mort	persunas	per tschien
reps (cancer)	45	25,00%
cor (circulaziun, infarct)	43	23,90%
malsognas ordinarias (vegliadetgna, feivlezia)	35	19,45%
accidents	20	11,10%
tschurvi e sias veinas	16	8,90%
zucher	7	3,90%
asma	6	3,35%
grippa	5	2,75%
malcostas	3	1,65%

Fontaunas

Berther, Baseli. Avon onns. Dis commemorativs ord la historia della Cadi. Mustér 1928

Gadola, Guglielm. Murias e miserias en Surselva. Ina pintga contribuziun alla historia de nies pievel. En: Il Glogn 1934, p. 100

Pfister, Alexander. Sur la carschen e digren della populaziun el Grischun. En: Annalas 1914,p.35-98

Rensch, Mathias. La pestilenza (Pechtialtyphus) el Grischun cun entginas autras notizias. En: Annalas 1914, p. 99-123

Uffeci federal da statistica, Berna (= Bundesamt für Statistik, Bern) Communicaziun dils 26 da schaner 1986 alla canzlia communal da Tujetsch pert. la raschun da mort dils defuncts da Tujetsch duront ils davos 20 onns.

XIV Isonzas

Sontgaclau

Igl usit da Sontgaclau ei fetg vegls. Cura che quel ha giu sia entschatta en **Tujetsch** ei buca stau dad eruir.

A mi ei quella isonza il pli enconuschenta a **Camischolas** e **Zarcuns** che fuorman in vischinadi. Il temps da mia affonza e giuventetgna eran cheu ver 20 giuvens e giuvnas, aschia ch'els fuvan el cass da realisar denter els quei usit impurtont. En ils auters vischinadis vegneva ei praticau pressapauc tuttina.

Aschia circa ei igl usit sepassaus durent mes giuvens onns: Ei stauscha encunter il december. Sontgaclau croda sils 6 dil meins. La detga di ch'il Sontgaclau seigi gia l'enschatta december arrivaus tochen a **Tschamut** cun sia fumeiglia e prepari las metgas per ils affons dall'entira val. La mumma fa attents ils affons ch'els duessien entscheiver a dir paternos per il Sontgaclau, sch'els giavischien ch'el porti enzatgei. Scadin noda mintga paternies ch'el di en in carnet, fatgs aposta per quei intent. Quel dat el lu al Sontgaclau, cura ch'el arriva.

Entgins dis avon il renomau datum, serimnan ils giuvens en casa da scola per sediscuorer, tgi che hagi da far il sogn, il schuldau ed il Mehel. Ils auters giuvens han da sedar neu sco asens ni catscha-asens. Arrivada la sera, ein tuts sin lur posts. Igl εμπrem selaian ils catscha-asens udir cun lur schlops da gheislas per spuenter las marveglias dalla buobanaglia che leva forsa mirar da finiastr'ora. Aschia vess ella saviu seperschuader, da tgei ch'ei setracta en realitad e piarder la cardientscha en il Sontgaclau, enten il qual ella carteva songamein, silmeins tochen en ina certa vegliadetgna. Ei vegneva entschiet odem il vitg **Camischolas** ni a **Zarcuns** ed iu casa per casa. Ils asens cun lur scalinem pir ch'ina muntanera entscheivan a far giomers. Cun in fraccass penetreschan els en casa tochen avon igl esch-stiva. Ils affons che fuvan stai quei di aschi pulits e quiets sco aunc mai, entscheivan a grir e tremblar, secargan vid la mumma ch'ella ei strusch stgisa da sedustar. Finalmein cumpara il Sontgaclau en ornat d'uestg. El ei in um vegl cun ina barba alva e liunga ed egliers. Cun el vegn in schuldau en uniforma ed il Mehel tut ner cun in sac si dies. Il sogn dat en dad esch e di: «Ludaus sei Jesus Cristus» e camonda als affons da serimnar entuorn el e da star en schanuglias. Duess in ni l'auter far resistenza, vegn el mess el sac dil Mehel. Cheu ha ei dau bein enqual scena pauc edificonta e buca fetg conforma al senn digl usit dil Sontgaclau che vul far plascher e legria als affons. - Il Sontgaclau enconuscha secapescha mintgin per il num e damonda in suenter l'auter, schebein el seigi staus pulits ed hagi fatg obediencia als geniturs, hagi mai priu zatgei discus ni dau encunter. «Vais era detg paternos pal Sontgaclau?» Quei vegn secapescha confirmau e tuts dattan ad el lur carnets. «Scheia, quai e ussa pulit e persianter dat il Mehel anzatgei bien da mintgin.» Alla mumma tonscha el denton ina torta per cass da basegns. Sinquei lai il sogn bitschar ils affons la crusch, dat la benedicziun e banduna la famiglia cun tutta curtesia. Ussa ei la tema dils pigns puspei vargada e da prescha enqueran els ensemen las nuschs, ils maruns ed aschia vinavon, tut quei ch'il Mehel veva dau.

Suenter in mument di la mumma: «Tanai andamain quei tga Sontgaclau o detg ad ussa stuais i a letg. Per cass tg'l Sontgaclau dalla notg vess aun da vegni, stu mintgin metter sen meisa in taglieir cun ain siu num.» Quei daventa senza targlinar e tuts van a letg. Secartend che tut seigi ruasseivel, empleina la mumma ils tagliors cun ils schenghetgs preparai. L'autra damaun a bun'ura e senza far clamar, vegnan ils affons cun prescha en stiva per mirar, tgei ch'els hagian survegniu. Tgei cunfar quei dat. Tut vul haver il meglier. Perfin metgas e bienas ha ei dau. Els san buca capir, co il Sontgaclau ha rabbitschau tut quei tras escha serrada.

Las visetas allas familias ein alla fin; ei vegn ruasseivel. Sin via sediscuoran ils giuvens, tgei che hagi da succeder. En ina casa ein las mattauns en arma ed han preparau enzatgei per ils mats. Ils mats havevan observau che mintgina era vegnida cun in pac sut bratsch. Els van - e detg e fatg: Ellas han preparau ina stiva sco ina ustria. Las measas ein emplenidas cun in pushegn savurus. Quei plai als giuvens, suenter in viadi aschi grond e fadigiis. Suenter che tut ei puspei stau en uorden, vegn ei sedivertiu

tochen ditg viaden ella notg. Mo il sault ei scumandaus. Paupra sche zatgi havess ughegiau da far da quei duront il temps d'advent. Lu vess il plevon dau nobis en siu priedi dalla dumengia proxima.

Sco gia detg vegneva igl usit da Sontgaclau praticaus els auters uclauns circa ella medema moda e maniera sco a **Camischolas e Zarcuns**. Ei deva enzacontas differenzas, aschia plidava il sogn da **Camischolas** tochen approximativamein 1970 sut vusch (vusch aulta) per buca ch'ils affons enconuschien sia vusch. Ils sogns dils ulteriurs vischinadis tschintschavan cun vusch bassa. A **Sedrun** udeva aunc in aunghel tier la suita. Legreivlamein ei igl usit da Sontgaclau semantenus entochen il di dad oz. Muort munconza da glied, ei la giuventetgna da **Camischolas** s'unida cun quella da Sedrun per saver menar atras quella isonza. Suenter la realisaziun serimna l'entira societad en'ina ustria per serecuvrar dils strapazs. Ina midada positiva ei il fatg ch'ins vul oz en emprema lingia far in plascher als affons e buca tementar els.

Ir per biemaun

Ei mava encunter il december. Per tut ils affons in temps empau da temas, pertgei il Sontgaclau haveva fatg stem da tut las furbarolas digl entir onn. Mo quellas temas eran prest vargadas ed ils affons selegravan da gleiti saver ir per biemaun tier padrin e madretscha. Els speravan mo che l'invitaziun tier omisdus crodi buca sin la medema dumengia e ch'ei vegni ensemen ina detga bargada. Per ordinari fruntava igl ir per biemaun naven da l'entschatta da december entochen Buania. In di haveva ei num a casa: «Dumengia ais anvidaus dad i per biemaun!» La dumengia suenter messa gronda serimnavan figliols e figliolas tier padrin ni madretscha, enqualga 10-15 affons. Quei fuva lu legher! Igl emprem vegneva ei surviu in gentar da perdanonza che secumponeva per ordinari d'ina suppa da giutta cun spinals e gnocs, da carn caura ni furtem nuorsa, da truffels en sal e lu dil «sucmies», quei era pera tosta cotga, figs ni zuescas. Salata e verduras deva ei buca aunc da quei temps; ils legums ein vegni en diever per suenter la secunda uiara mundiala.

Il pli legher era il suentermiezdi. Tut tenor l'aura vegneva ei dau troccas ni fatg differents giugs, sco per exempel fatg da sezuppar ni da pigliar, la vacca tschocca ed aschia vinavon. Tgei rueida enqualga! Tut quellas activitads duvravan energias, aschia che la marena era beinvegnida e lu aunc tgeinina: paun, pieun schuber, ligiongia, andutgel, carnpiertg, schambun, calun caura ni nuorsa, magnuc d'alp, petta d'uetas, nuschs e sissu magari creflis. Finida la tschavera, vegnevan ils biemauns reparti cun la cundiziun dad arver ils pacs per a casa. Quei vegneva denton buc'adina observau! Per ordinari vegneva ei schenghegiau teilas per far bategls per ils figliols. Cun in «Dieus paghi» e cun la speranza da puspei saver vegnir in auter onn, prendeva igl entir marighel cumiau da lur padrin ni madretscha, leds e cuntents dil bi di passentau.

Igl usit dad ir per biemaun ei per part semantenus tochen il di dad oz. Il bia offereschan il padrin ni la madretscha denton mo ina marena, denton cun ils biemauns ein els vegni pli generus. Ils ins ni l'auters secumentan era da dar mo biemaun.

Daniev

Sco ei lai segiramein supponer, ein las isonzas da Daniev fetg veglias, matei praticadas dapi tschentaners. Ellas secumponan dil Daniev dils affons, dalla giuventetgna e dils carschi.

Ils affons

Daniev muntava bein per ils affons il pli grond eveniment. Els savevan ir a cattar biemaun. Gia dis avon havevan els fatg las preparativas per vegnir a fin cun il tur giavischau. La damaun a bun'ura mavan els en trops sco ei fruntava da famiglia tier famiglia. Cura ch'els eran en stiva, schevan els il verset: «Bien di, bien onn e dei biemaun; nus giavischein ina biala fiasta ed in bien niev onn.» Persuenter survegneva scadin enzacons raps. Il bia deva ei mo cotschens (dad in e da dus raps), alvs sco ins scheva (da 5 raps ensi) deva ei tier padrin e madretscha, dapli era ina raritad. La viseta

tier il padrin ed il caplon era resalvada per tut ils affons suenter messa gronda. Quels devan 20 raps.

Sche l'aura lubeva e las relaziuns eran in tec in tec favoreivlas, vegneva ei «fatg atras» quasi tut ils vischinadis dado igl uaul. Perfin tochen a **Surrein** e **Cavorgia** vegneva ei calzerau enqualgada. Leu mavan denton mo ils pli gronds e da raschun quels che havevan parents da **Maunsut**. Quels dadens igl uaul, ils affons da **Selva** e **Tschamut**, eran pli robusts ed entschevevan lur tura da stgir odem **Sedrun** e finevan ella a **Tschamut**. Lur viadi tochen a Sumsassi fagevan els communablamein sin scarsolas e per anflar la via, duvravan els magari latiarnas. Essend ils Tarlepers, sco quei ch'els vegnevan numnai, buca adina dils pli fins, vegnevan els serrai ora mintgaton, quei che deva reacziuns corrispudentas. Denton era denter la buobanaglia dall'ulteriura val deva ei enqual pli selvadi. Ils pli gagliards selubevan magari da far duas visetas tier la medema famiglia. Per buca dar en egl, midavan els capetscha ni sch'ei fageva basegns, perfin il tschiep.

La sera ualti tard e pulitamein staunchels arrivavan ils affons a casa. Cun in tschaffenun fagevan els cassa ed havevan in terment quiet dad haver cattau 4-5 francs. Quels astgavan els lu deponer sin in carnet da spargn. Quei era per ordinari ils sulets daners agens per quei onn. Pli tard ei il recav carschius considerablamein. Dar mo in da tschun raps valeva sco zanur.

Cul temps ha il turissem priu in pli grond svilup en nosa val. Quei ha giu influenza sin igl ir a cattar biemaun. Cun la viarcla che quei seigi in disturbi pils hosps e pauc sanadeivel per ils affons dad ir en tuttas ferdaglias e nevaglias entuorn, han ils ins ed ils auters buca lubiu pli quei usit a lur affons ed han entschiet a serrar igl esch-casa. Denton era ils affons sezs, cunzun ils pli gronds, han buca schi grond tschaffen pli dad ir a cattar biemaun; els han gie raps avunda ... Aschia vegn quei bi usit praticaus pli e pli pauc e vegn probablamein a svanir in di.

La giuventetgna

Pil di ora mavan ils giuvens e las giuvnas tier lur padrins e madretschas per giavischar ad els ils megliers giavischs ed auguris. Quella viseta valeva sco caussa d'honor e vegneva consequentamein fatga sche zaco zaco pusseivel. Secapescha ch'ei vegneva surviu ad els ina stupenta marena. Encunter sera serimnava in pulit triep mats e mattauns en ina casa, nua ch'els savevan far empau legher. Igl εμπrem vegneva ei offeriu in pushegn, pressapauc sco quei ch'els havevan survegniu tier il padrin e la madretscha. Quel consisteva da paun, ligiongia, andutgel, schambun, magnuc, petta d'uettas, caffè e secapescha era dil vinars. Tut tenor igl appetit ni la seit deva quei magari ina pulita surlischada allas provisiuns en casa. Suenter haver magliau e buiu dil bi e dil bein, sediverteva la giuventetgna cun raquintar empau praulas e pulaccas e cun cantar, magari cun accumpignament da suna da bucca. Ordinariamein cuntinuava quella legra societad lur visetas en ina ni schizun pliras casas dils presents. Ei capitava, quei denton fetg darar, ch'in ni l'auter stueva suttacumber alla forza dil vinars ed il viadi a casia deva empau discussiun ed enqual fastedi.

Ils carschi

Ils carschi, quei vul dir ils maridai ni ils pli passai, havevan il dretg dad ir a giavischar in ventireivel niev onn entochen Buania. Quei ch'era denton zaco pusseivel, gliez vegneva denton fatg il di da Daniev. Ei vegneva visitau ils geniturs, fargliuns, padrins e madretschas, cumpars e cumars, amitgs e vischins. Cheu vegneva ei secapescha surviu las meglieras tratgas sco gia descret vivon. Buca darar capitava ei ch'ei serimnava en ina stiva 5 tochen 10 personas alla ga. Quella viseta cuzzava per ordinari ina uretta. Ei aveva num parter en bein il temps, sch'ins leva vegnir atras cul program. Beinsavens capitava ei ch'ils perveseders eran quella sera bravamein en retard. Igl ir a far Daniev vegn praticaus aunc oz, denton buca schi intensiv pli. Ins serestrenscha dad ir mo tier ils pli tierparents e quei aunc buca adina.

Ils treis sogns Retgs

Da Buania van ils treis sogns Retgs che vegnan fatgs da treis buobs, da casa tier casa, cantond ina veglia canzun. Il text ei vegnius adattaus al dialect tuatschin e secloma sco suonda:

Tuts treis che contan:
Nus trais vegnin scu als sogns retgs,
Caspar, Meltger e Baltasar
Per adurar al retg dals retgs.
O Jesus, Jesus, Jesus car.

Caspar che conta:
Ju sun Caspar, al retg nair,
E te als Jesus al retg vair
E a te miu aur, a te miu cor
Ugen te dundel or

Tuts treis che contan:
Caspar, Meltger e Baltasar
Jesus von per salidar,
Arvan se als lur buccals,
Dattan vi als lur regals.

Meltger che conta:
Ju sun Meltger al secund,
Intscheins de Saba tut radun
A te, miu Diu carin, ju dun,
E tiu survient ju sun.

Tuts treis che contan:
Caspar, Meltger e Baltasar
Jesus von per adurar,
Jesus intscheinseschan,
esus carezeschan.

Baltasar che conta:
Baltasar al tierz ju sun,
A te bambin ju mirra dun
Per me carin te vul muri,
cun te vi ju muri.

Tuts treis che contan:
Caspar, Meltger e Baltasar,
Nus ruiain tier Jesus car,
Ch'el meini era nus scu vus.
E spindri era nus scu vus. Amen.

Ils davos onns han ils treis sogns Retgs era cantau la canzun «Nus essan ils sabis» (Alleluja, nr. 131) ni «La steila da Nadal» da Paul Burkhard cun ina versiun romontscha da Pieder Simeon. Suenter ver cantau la canzun, survegnan ils buobs ina recumpensa che va il bia en favur d'ina renovaziun d'ina baselgia ni caplutta. Igl usit dils treis sogns Retgs vegn fatgs schibein a **Sedrun** sco a **Rueras**, quei ch'ins seregorda, ed ei semantenus entochen il temps hodiern.

Fontaunas

Maissen Alfons. Ils treis sogns Retgs. En: Radioscola, ann. 7, 1. cudischet, 1962

Il tscheiver d'avon onns

Carteivlamein vegnev'ei fatg pli bia tscheiver avon onns ch'el temps present. Mo ei deva lu era ina differenza denter tscheiver e cureisma! Cun la fiasta da Buania annunziava il prenci Tscheiver l'avertura da quei temps hilaric cun la parola:

«Buania, mintgin tier la sia
Tgi che ha buca ina, va ell'ustria
Tgi ch'ha buca daners, stat a casa sia.»

Tscheiver da famiglia

Inaga ch'il temps da tscheiver era arrivaus, mavan ils menders la sera da tutta stgiraglia per las streglias entuorn a catischond, sch'ei fussi zanza stivas illuminadas, nua ch'ei savessi esser tscheiver. Da gliez temps era l'illuminaziun electrica en nos vitgs ualti munglusa ed ei duvrava saver bein la geografia da streglias e gassas, per buca curdar sur mirs giu u scarpitschar els lidimers ni forsa pugnar cun seivs e mugrins. Savens capitava ei che pliras partidas da mats mavan sin la medema tscherca. Magari envidava ina partida ora l'otra cun sblatschar ils mauns. Quei deva veta als menders e fineva cun beinenquala pugnada e secargada. Ils fermes e gagliards havevan secapescha igl emprem access en la casa da tscheiver. Forsa veva la partida fleivla zanza auter meglier cletg ni ch'els fagevan magari plans da vendetga per lur terrada.

Eran ils mats sesluitai tochen avon esch-stiva, veva il pli versau da plidar sut vusch tras ina sdrema aviarta digl esch. Schi lunsch sco el pudeva tscharner ils hosps da tscheiver, deva el ad els enqual tecca. Cunzun mats e mattauns che havevan relaziuns amicablas stuevan udir admoniziuns e cussegls en abundanza. Suentar ver fatg empau il narr, selamentavan ils mats leuora ch'els hagien freid ed era fom e tulanavan, sch'els savessien buca vegnir silmeins in tec sper la pegna scaldada. Per far fin cun quei tulanem mulestus e per vegnir libers dall'aria freida che targeva en dil pierti, vegneva ei per ordinari lubiu d'entrar en stiva. Inaga mitschai el cauld dalla stiva, era ei si l'aura per ils mats e prest eran els era serevegni dalla schenadadad e cuninaga havevan els era fatg enconuschientscha culs hosps da tscheiver. Cun stuschar empau sutgas e bauns vi e neu dev'ei lu plaz per quella viseta nuncalculada. Quella scena haveva interrut empau la concentraziun dils giugadurs da troccas ed els eran vegni ord il giug. Gleiti mava ei denton puspei vinavon cun tut ardiment sin la catscha da retgs e bagat e quei duront in per uras. Cheu deva ei naturalmein dabia canera e febra, sch'ei mava buca sco calculau. Paupra quel che fageva in buc! El survegneva lu reprimandas savurusas da siu congiugadur.

Denton veva la massera ensemen cun las feglias semtgau il pushegn e tgeinin! Las meglieras buccadas giu dalla combra da carn havevan stuiu svanir giu dalla festa ed eran vegnidadas cavigliadas sin bialas plattas, sco sch'ei fuss fiasta gronda. Sper paun e pischada vegneva ei aunc surviu tuorta, barbaladas, creflis, nuschs e spagnolas e surengiu in bien caffè cun latg. Per il pushegn da tscheiver vegneva ei nuota sriblaur e schau muncar ni breigias ni cuosts. Malemperneivel era ei denton per la massera, sch'ina partida da menders haveva pudiu penetrar en cuschina u tgaminada. Lu eran els buca stai maufers da dar ina detga surlischada al pushegn preparau.

Suentar quei buontad past envidavan ils umens lur pipas crutschas e gradas ch'ei deva en buca dito, ina fimera ch'ei vess tunschiu da «fimentar» las schettas carnpiertg. Per quei anflava la massera per bien dad arver la finiastra e schar ir giadora quella vapur grischa e schar entrar aria frestga. Cun quei era la sera da tscheiver denton aunc buca alla fin. Ils trochists passiunai cuntinuavan da sigliantar narr e bagat, ferton che la giuventetgna prefereva da far differents giugs e surtut da saltar. Per la musica da sault deva ei buca grondas cumplaziuns. Inaga sunava in giuven melodias da sault cun ina suna da bucca, in'otra ga cun ina harmonia. Sch'ei deva musica da grammofon, era quei lu schon zatgei meglier e singular! Tras la stiva sgargnevan lu melodias da valzers,

polcas e marschs en in tun stetg ed en ina ritmica senza regla. Legra e cuntenta saltava la pera dil bi e dil bein, da maniera ch'il plantschiu ballantschava. Aschia vargavan las uras sco in dulutsch siemi.

Affons da scola astgavan era prender part dil tscheiver. Per quels muntava il pushegn la part principala. Per ch'els sappien durmir ora empau l'auto di, vegneva il tscheiver da quellas famiglias fatgs per ordinari la sonda sera ni la vigelia avon in firau, sco per exempel avon sontga Brida ni Nossadonna da candeilas. Duront ch'ils gronds devan troccas, sedivertevan ils pigns cun dar pischaletg ni muntafun. Ei schabegiava era ch'ils affons devan scenas humoristicas, sco per exempel ord la veta dils parlers che visitavan mintgaton nies vitg. Imitond las personas tipicas dils parlers, sco per semeglia il cuntschacazzettas, il canistrer, il mulet, il peinaparisols e secapescha era la parlera cun ruogs, scadialas, pezs e pindels. La purschida fuvava ina variaziun ed era el cass d'interrumper ils pli passiuai trochists en lur giugs. Aschia vegneva pign e grond tier siu divertiment. Suententer il pushegn che cuzzava pressapauc in'ura, devan ils affons la buna notg als carschi e mavan leds e cuntents a letg, semiond dalla biala sera da tscheiver. Vonzei bandunavan era ils ulteriurs hospis la stiva, priu ora la giuventetgna che teneva ora tochen la damaun. Avon che ir dapart, vegneva ei aunc discussiunau dil proxim tscheiver e fatg las invitaziuns envi ed enneu. Aschia veva la giuventetgna caschun da far tscheiver seras en e seras o, cun ni senza invitaziuns, inaga tier la vischina, l'otra ga tier l'onda u tier l'amic ed aschia vinavon. Quei deva plaunsieu cundiziun el vegliar. La giuventetgna schava buca bugen encorscher lur geniturs ch'ella piteschi d'ina sien sgarscheivla. Ins fageva tscheiver tier mintga caschun che sepurscheva, manegiond che durmir ora sappien ins lu la cureisma.

Tscheiver general

La culminaziun dil tscheiver per la giuventetgna da **Sedrun** e **Gonda** era il tscheiver general che vegneva fatgs annualmein. Enzacu avon la sera da tscheiver haveva in triep giuvnas e giuvens da lavar e sgarar las aissas malulivas dil plantschiu dalla sala da teater ella casa da scola. Zacons mats havevan da procurar per measas e bauns e far las preparativas necessarias per il tscheiver general. Las mattauns havevan l'incumbensa honorifica da procurar il canaster da pushegn ch'ellas preparavan cun gronda breigia e carezia. Scadina matta voleva haver il meglier canaster, emplenius cun dallas meglieras maglias. Cheu dev'ei bugen concorrenza!

Finalmein era la sera ton desiderada dil tscheiver general arrivada. En buca ditg era ina numerosa e legra cumpignia da giuventetgna serimnada ella sala. Las mattauns deponevan lur canasters sin ina meisa semtgada aposta per quei intent. Cun empau sestrer vidaneu e schar reverir prendevan mats e mattauns plaz entuorn las grondas measas, tut tenor cuida e calculaziun, mo era cun enqual trumpada. Cuninaga seformavan gruppas per entscheiver la sera cun in per scarts troccas. Quei giug era denton buca il principal divertiment dil tscheiver general. Dapli calamita purscheva il bien pushegn e suenter oravontut il sault! Ferton ch'ei vegneva siglientau narr e bagat vevan zacontas giuvnettas retschiert las ordras dalla presidenta da preparar il caffè. Cargadas cun hontas da biutsch, puorla da caffè e latg mavan ellas cun tut quei hardumbel sin casa mulin tier l'onda peca e la Marionna. Dapi in per onns fagevan quellas bunas vischinas quei survetsch per la giuventetgna cun preparar in bien caffè. Cu tut era semtgau, annunziava il president dalla giuventetgna ch'ei seigi da sepreparar per il pushegn e declarava, co las mattauns hagian d'eleger lur partenaris. El mument ch'il musicant intonava il sault, fagevan ellas combas per gie puder tier il saltunz preferiu e cumpogn da pushegn. Havevan ellas fatg l'emprema selecziun, vanzava ei il bia aunc ina partida giuvens. Entras in secund sault vegnevan era quels envidai a pushegn. Aschia dev'ei mattauns che havevan da dar pushegn a dus mats, quei ch'ellas havevan era calculau e per quei empleniu il canaster leusuententer. La procedura d'eleger ils mats da pushegn ei pli tard vegnida remplazzada entras trer la sort. - Inaga ch'ils «perlis» eran seformai, seplazzavan els entuorn las measas sco ina gronda famiglia, «tuts da buna luna». Cun luschezia ragudavan las mattauns il bien cuntegn ord il funs dil canaster. Ellas munglavan nuota far dad envidar, pertgei ch'ina tala tschavera dev'ei buca mintga

di. Duront il pushegn fageva il president beinvegni ad in e scadin. Enqualga haveva el schizun fatg ina ballada da sgnoccas e teccas. Aschia vegneva il past savurus mischedaus cun bia humor. Era il cant astgava buca muncar, cunzun la canzun «Nus stein cheu si legher ensemen». Inaga che l'entira raspada da tscheiver haveva dustau igl appetit, sefageva in zappitschem malruasseivel valer. Ins spitgava vess la part la pli attractiva, il sault. Capeivel, saver saltar muntava surtut per ils menders e las giuvnettas che fagevan per l'emprema ga tscheiver general in eveniment extraordinari. Cun pintgas pausas cuzzava quei divertiment duront in per uras. Denteren vegneva ei fatg differents giugs. Memia spert passavan las uras ed ei era daditg vargau mesanotg, cura ch'ils emprems, forsa ils pli tschentai, devan la buna notg e cumpignavan las mattauns da pushegn a calur. Dasperas dev'ei mats e mattauns che vevan nuota sien e vessen il pli bugen saltau aunc l'auter di. Ei stuschava encunter la damaun, cura ch'il musicant annunziava il davos sault. Bugen ni nuidis stuevan era quels da buna cundiziun sesuttametter allas ordinaziuns da surengiu e festginar dad ir a casa per buca s'entupar culs perveseders. Il tscheiver general era puspei vargaus, laschond anavos bialas regurdientschas.

Era els ulteriurs vischinadis vegneva il tscheiver general fatgs pressapauc tuttina sco a Sedrun. Ins ha manteniù quei usit per part entochen circa igl onn 1980.

Gliendisdis tscheiver

Gliendisdis tscheiver organisavan la societad da musica ni il chor viril in concert en sala da scola. Sper las produzioni musicalas astgava il toc humoristic buca muncar. Quei concert haveva adina gronda attracziun e calamita e vegneva frequentaus stediamein da giuven e vegl. Cunzun ils pli avanzai che mavan schiglioc quasi mai giuadora la sera, levavan buca mumentar quei divertiment. Suenten il concert selubevan ils biars aunc dad ir ell'ustria per star si da frestg ni per dar in per scarts troccas. La giuventetgna veva enqualga la caschun da saltar, sch'ina uustria procurava per musica da sault. Quei era lu schon ina purschida speciala. Il far mascradas u bagordas duront il tscheiver era lu buca usitau. Il plevon vess era buca lubiu quei.

Mardis tscheiver sera, cura ch'il zenn da miert annunziava la fin e mort dil tscheiver, stuevan quels menders che vevan fatg tscheiver scosauda, udir l'admoniziun ch'els dueien trer en tschiep ner ed ir suenter bara al tscheiver. Carteivlamein stevan quels denton buca mal per las uras ch'els vevan vegliau, seconsolond ch'ei detti avunda caschun da durmir ora la cureisma. Auters devan denton si in schem: «Diu sei ludaus tga quai tschaiver dal huz e vargiaus e tga quella banadida curaisma entschaiva finalmain.»

Il temps dad oz

La moda e maniera da far tscheiver descretta ei oz svanida per gronda part. Ins enquera il divertiment ellas ustrias e bars, nua ch'ei vegn per part era fatg mascradas. Zatgei niev ei il til dils scolars che vegn apprezziaus grondamein dalla populaziun. Las scolas edeschan dapi 1982 era ina gasetta da tscheiver. Il medem fa era l'uniun da mistergners che publichescha naven da 1983 «La guila». Naven da 1987 cooperescha ella era al til da tscheiver.

Magliar groma

Avon onns sespruava scadin pur dad haver enzanua in bien mises per saver passentar bunamein in meins e miez Ina vera veta primavauna cun siu muvel. Ils mises eran fetg tschercai e bein pagai. Ils principals da quels fuvan **Mulinatsch**, **Milez** e **Scharinas** cun mintgamai 10-12 purs. La stagiun da mises era propi il temps dils buobs. Els stevan en quei liug senza vegnir a casa, excepriu ina fiasta da parada sco Sontgilcrest ni sogn Vigeli. Lu mavan els buca nuidis puspei tier la mamma ed ils ulteriurs fargliuns. Si mises gudevan ils buobs ina certa libertad, eran els gie duront il di il bia persuls, ferton ch'ils umens mavan a casa, sch'els havevan buca gest da caschar. Da l'autra vart havevan els era ina certa responsablada, havend els da ver quitaun dils tiers. Ei valeva per honor da

buca schar ruclar in armaul. Era stuevan els schiglioc saver seriscuder, seigi enten ademplier certas lavurs en tegia ni en nuegl ed enten cuschinar, quei che vegneva magari fatg da cuminonza. Dasperas havevan ils buobs denton aunc bia bialas uras, nua ch'els fagevan beinduras era enqual cattavegna. Mintgaton deva ei enqual carplina e sedada denter els e specialmein culs buobs dad auters mises.

Il meins da zercladur haveva ina ga 4 firaus, sco per exempel sogn Gions (ils 24) e sogn Pieder e sogn Paul (ils 29). Quels dus firaus fuvan destinai d'ir si mises a magliar groma. Roschadas, specialmein giuventetgna, prendevan art e part. Il meglier seregordel jeu da Milez, nua che jeu sun staus entochen 15 onns sco pastur. Cunzun da sogn Pieder e sogn Paul havevan nus buobs in grond cunfar, co sepreparar per quella glied fina. Oravontut havevan nus da spuentar il cucu per ch'el fetschi buca la groma ascha. - Aschi prest sco ils hosps fuvan el liug e sereparti, vegneva la tschavera offerida dils purs che havevan dau gronda breigia leutier. Era havevan els schubergiau la tegia e lavau la stiva schuber e bein. La groma bein tratga vegneva svidada dalla panaglia. En la fueina dasperas era ina cazzetta plein pulenta cotga en uorden che tarlichava dalla pischada cungida. Quei era la principala tratga da mises. Tut che sepustava a meisa e magliava la pulenta gustusa ord la cazzetta e la groma ord ils burtgets emplenì. Ei vegneva denton festginau d'emplenir ils maguns per esser presents al concert dalla musica instrumentala che vegneva ina ga ni l'otra si Milez, per dar il rin, la scua, far la vacca tschocca e secapescha era per saltar. Tut quei haveva liug el Plaunders, in grond e bi plaun, nua che tuts, era quels d'auters mises, serimnavan.

L'avertura deva la musica da **Sedrun**. Silsunter entscheveva la part humoristica. L'emprema scena fuva il dar il rin. Cheu stuevan ils participonts dar il maun in a l'auter e formar il rin. Lu entscheveva in ord la retscha a cuorer entuorn il rin. Vonzei deva el ina tecca ad in ni ina. Quei tal stueva empruar da puder tier l'auter e sche quei era pusseivel, turnava el en siu plaz e l'auter stueva cuntinuar, cun l'intenziun da tucclar in pli plaun che stueva lu ir entuorn il rin. Aschia cuntinuava quei giug entochen che silmeins ils biars eran stai en roda. Secapescha ch'ei deva meinsvart ina cambrola e sgulada, quei che fuva il gaudi dils aspectaturs.

Il dar la scua era in giug da saltar. Ils giuvens e las giuvnas formavan «perlis». Quei giuven che veva buca ina matta, stueva secuntentar dalla scua. El sespruava da dar ella vinavon, aschispert sco pusseivel ad in cumpogn per saver saltar cun la matta da lez, pertgei cura che la musica calava, stueva quel cun la scua salvar ella ed astgava buca saltar pli. Era la giuvna che veva buca saltunz, stueva far il medem. Aschia restava il davos mo in «perli» che survegneva lu in premi.

Nus buobs eran sil **Cuolm Val** vid ils tiers ed uhegiavan mintgaton da cuchegiar giu **Milez**, tgei ch'ei succedi tocca ch'in scheva vonzei: «Oz stuain nus stavla ple baud ils tiers ad i cun els a **Milez** - per tg'ls magliagroma sappien aun schagie il latg da nossas vaccas tg'on magliau oz mu matun.» Quei ei era daventau ed ad uras e cun in detg quet essan nus vegni cun nossa muntanera da ver 100 tocs dils trutgs giu. - Pil soltt era ei bia aspectaturs, excepiu forsa enqual «perli» che fuva secumblidaus enzanua. Avon che arrivar leugiu, vein nus magari detg in siper l'auter: «Nus stuain ussa dabot aun selava ain quai dutg, pertgei la fatscha o dapi tga nus essan se cö betga viu aua.» Ed enten salidar fuvan nus strusch d'enconuscher pli, pervia dalla prova che nus vevan fatg. La sora ha manegiau sissu: «E te pign munglass ju matai aun starglie empau, pertgei ins so mai, tgei i vegn aun nonavaun.» «Forsa schon», vai jeu detg, «mu ju a mal viu ne anflau anzatgei aparti.»

Finidas las formalitads, vegneva ei aunc offeriu a tuts in bien latg ual mulsch. Sin giavisch vegneva ei dau in bien caffè ni magari in stel vinars per tgi che haveva forsa «pischada» el magun. Silsunter serimnava l'entira cumpignia per serender comunablamein encunter casa, in e scadin cuntents dil bi di passentau.

Igl usit dad ir a magliar groma ei semantenus ualti ditg. Mond il diember dils purs anavos, ei l'isonza tschessada successivamein. Differents dils purs restonts van buca a mises pli, bein era per quei ch'ils buobs han dad ir a scola. In ni l'auter pur va denton aunc oz a mises e porscha groma mo a singuls hosps. Igl ir a magliar groma en grolldas cumpignias exista struschamein pli.

Nozzas

La sera avon las nozzas serimnavan ils giuvens dil vischinadi avon la casa dalla spusa ni dils spus per dar salvias cun buis ni magari schizun cun murters, cun ils quals igl ei denton vegniu scumandau da sittar suenter in grev accident a Rueras, quel digl onn 1927. - Sco remuneraziun per las salvias vegnevan ils giuvens lu envidai ad in refrestg, quei che negin refusava. Enqualin haveva fatg far la mumma truffels barsai da tscheina, cun la cunzina da buca spargnar cul sal ... Era las giuvnas vegnevan vidlunder, suenter haver ornau l'entrada dalla casa cun in tschupi da dascha e da flurs. Sisum era in placat cun ina inscripziun che giavischava ventira als spusai. Quei tschupi vegn aunc fatgs ozildi.

Avon onns vegneva ei fatg nozzas mo il mardis ni la gievgia e quei cun messa avonmiezdi. Ils nozzadurs fuvan vestgi en ner. La spusa purtava in tschupi. Pli tard ei vegniu vitier in vel alv e las spusas han entschiet a preferir in vestgiu alv. Il spus haveva in matg sil tschiep e purtava ina capiala nera.

Il gentar da nozzas haveva per ordinari liug en casa paterna dil spus ni dalla spusa, semplamein leu nua ch'ei era il meglier plaz. Ina cuschiniera ed ina cameriera jastra havevan da procurar per las tratgas. Per haver avunda plaz, vegneva ultra dalla stiva era il stebli duvraus. Leu eran il bia ils affons. La sera deva ei ina tscheina per las famiglias dils spusai e per ils giuvens dalla cumpignia da mats. Quei era la part hilarica! Entuorn 1930 han ins entschiet plaunsiu a festivar las nozzas el hotel. Ina midada ha ei era dau circa 1970, cura ch'ins ha entschiet a far la messa da nozzas per suentermiezdi e far amogna als envidai «mo» ina tscheina.

Parada e perdanonzas

Avon pressapauc 20 onns festivavan ils Tuatschins aunc 7 fiastas da parada.

A **Sedrun**: Sontgilcrest; sogn Vigeli, patrun dalla baselgia parochiala (26 da zercladur, dapi in per onns la dumengia avon ni suenter); fiasta dil scapulier (tiarza dumengia da fenadur); fiasta dil sogn rusari (emprema dumengia d'october).

A **Rueras**: Sontgilcrest (dumengia suenter il Sontgilcrest da **Sedrun**); Cor d'Jesus (ina dumengia dil zercladur); Cor da Maria (davosa dumengia d'uost). La fiasta dil scapulier ed il Sontgilcrest da **Rueras** ein vegni dismiss avon enzacons onns.

Far parada

Astgar far parada las fiastas muntava per ils mats ina gronda honor ed obligaziun per aschia embellir il survetsch divin. Cun plascher e slontsch marschavan ils mats stediamein sut il commando dil capitani cun bandieras sgulatschontas e buis sin schui suenter la societad da musica. La scharscha da capitani e sergent dalla cumpignia da mats eran uffecis ualti tschercai. Capitani e sergent stuevan ver 25 onns per saver retscheiver quell'honor. Quella sebrattava giu, ina ga a quels da dado il Dutg grond e l'otra ga ad in giuven da **Rueras**. Mintgaton vegnevan era quels da **Maunsut** (**Cavorgia** e **Surrein**) ni quels da **Dadens igl uaul** (**Selva** e **Tschamut**) honorai cun capitani u sergent. Era ils bandierels stuevan ver ina certa vegliadetgna per astgar purtar in fengli. Ina gronda honor veva quei mat che astgava purtar la fana biala. - Pli baul eran ils commandos dil capitani en tudestg sco el militer. Avon ver 50 onns ha Gion Felici Monn (1876-1954) da **Camischolas** procurau per il commando en romontsch. Da lezs onns era ei tradiziun ch'il capitani da mats fageva in plaid da Sontgilcrest. Suenter viaspras serimnava in grond pievel avon la casa pervenda, nua che la societad da musica ed il chor mischedau seproducevan. Lu suandava il plaid dil capitani da mats. Il plevon scheva semegliontamein enzacons plaids d'engraziament. Finidas las ovaziuns, envidava el la cumpignia da mats, la societad da musica e la suprastonza communal ad in refrestg en easa pervenda. Per in'uriala stevan ins si da cumpignia cun cantar bialas canzuns popularas. Il caplon da **Rueras** haveva era la buontad da dar in refrestg alla cumpignia da mats la fiasta da Sontgilcrest. Tier las fiastas da parada da **Rueras** cumpignava la societad da musica ed ils mats da dado il **Dutg Grond** mintgamai il plevon e caplon da **Sedrun** a **Rueras** e lu puspei anavos, secapescha tut a pei.

Ils mats che fagevan per l'emprema gada parada havevan da cumparer ina dumengia avon l'emprema fiasta a Tgamaura per vegnir instrui dil capitani e sergent, co els hagian da marschar e purtar la buis. Capeivel, havevan ils responsabels gie empau quet da presentar ina cumpignia bein disciplinada.

Suenter las festivitads dalla davosa fiasta da parada (sogn rusari) offerevan il capitani ed il sergent in refrestg alla cumpignia da mats e societad da musica sco engraziament per l'honor retscharta ed era sco renconuschientscha per igl engaschi duront las fiastas da parada. Tier messas nuvialas vegnev'ei era fatg parada e lu stediamein, era da mats pli vegls.

Pli baul fagevan ils mats parada entochen 30 onns. Lu retschevevan els ina menziun d'honor. Oz han ins surschau il far parada plitost als giuvens gest ord scola. Igl ei donn che mo paucs mats sur 20 onns han buca ton ideal da serrar las retschas da parada dalla cumpignia da mats.

Ir per negla

Il purtar negla sin la capiala las fiastas da parada s'udeva senz'auter tier l'honor dil mat. Mo las neglas setschentavan nuota da sezzas sin la capiala. La sera avon la fiasta havevan ils mats dad ir per neglas tier las mattauns. Avon in tempset vevan els observau, nua ch'ei seigi crunas ornadas cun bialas neglas ed ellas, las bialas, vevan da tener pinau. Quei ir per negla procurava per dabia variaziun e concorrenza. Cunzun ils novizs stuevan quintar cun enqual setrumpada e forsa schizun cun ina frestgentada ella fontauna. Ils mats che vevan ina ga pudiu sesluitar cun empau inschign en stiva dallas mattauns, vevan lu nuota fuola dad ir a casa. Cheu deva ei buca ura da polizia. Suenter in per uras da buna cumpignia, devan las mattauns in bien pushegn e lu vonzei astgavan ils mats retscheiver la negla desiderada ord ils mauns dalla biala matta.

A caschun dallas seras dad ir per negla dev'ei magari strolis che fagevan zanuua ina filistucca. Els prendevan per exempel ils graniuns giud cruna e deponevan quels zanuua el liber ni bloccavan igl eschcasa a quels ch'eran en stiva cun la matta. Mender er'ei cura ch'ils mats ughegiavan da dar vid las tratgas preparadas per la fiasta. Quei caschunava lu confusiun allas masseras che eran sedadas gronda breigia da porscher in gentar da nui per ils da casa e per ils hosps. Da lezs onns era ei tradiziun che parents ed enconuschents da **Rueras** mavan a gentar tier ils parents da leuora (**Sedrun** ecetera) che fagevan lu cuntermiseta a caschun dallas fiastas da **Rueras**.

Perdanonzas

Excepiu sogn Vigeli eran las fiastas da parada buca perdanonzas, quei vul dir dedicaziuns da baselgia. Quellas vegnevan festivadas per propri mo a **Cavorgia** ed a **Tschamut**. La pli biala era quella da **Cavorgia** che curdava sin la secunda dumengia da settember. Suenter il survetsch divin ella caplutta da sogn Leci serendevan ils envidai da **Maunsura** tier lur parents ed enconuschents da **Cavorgia**. Ina emperneivla odur dallas tratgas delicatas fageva beinvegni als hosps da perdanonza. E tgei purschida che fageva ir la spida: suppa da schambun cun savurus tschagugliuns, fortem cun truffels novs, carn da vanaun cun spinals survi cun verduras digl agen iert e sco finiziun tuorta e groma cun in bien caffè. Quella buna tschavera procurava per buna luna e sligiava la faviala. Ils pli avanzai stevan cumadeivlamein ensemen e raschunavan dils problems da mintgadi. Ils principals temas pertuccavan la raccolta da fein e risdiv, il fein a pastg e lu secapescha era las fieras da biestga. La giuventetgna serimnava denton el **Plaun sogn Leci** per sedivertir. Ella fageva differents giugs, sco per exempel il rudi cun metter il fazalet, il rudi cun la scua ed aschia vinavon. (Pli bia dils giugs mira sut igl usit dad ir a magliar groma!) La casa da scola surveva sco local da recreaziun e sault en cass da malaura. Quellas uras vargavan schi spert che la giuventetgna emblidava bunamein dad ir a marena. Gliez fuss stau donn, pertgei ch'ina da quellas tschaveras dev'ei buca mintga di: schambun sechenta, ligiongias dallas uisas, andutgel sechenta e lu barbalada e creflis en abundonza.

La perdanonza da **Tschamut** che croda sin l'emprema dumengia da settember haveva pli baul ina speciala muntada ed attracziun per la giuventetgna. Ils ustiers dalla

«Rheinquelle» procuravan per ina musica da sault che carmalava neutier dabia giuventetgna, era sch'ella stueva ir a pei ni cun velo tochen a **Tschamut**. Oz ein las perdanonzas deplorablamein svanidas dil taliter e cun ellas era las sentupadas denter ils parents.

Vegls giugs

Differents giugs d'avon onns ein svani ni sil precinct dad ir a piarder. Per ch'els mondien buca dil tuttafatg en emblidanza, hai jeu nudau enzacons.

Pitg pètg

Pitg pètg ei in giug cun in cunti da sac. El vegn daus da dus ni era plirs pasturs sin in toc pastira cun bien tratsch e senza crappa. Igl emprem giugadur semetta en schanuglias, arva la nezza ni la sibla dil cunti ed entscheiva il giug, schend mintgamai ils plaids dallas suandontas fasas:

Pitg pètg: Il cunti vegn tschaffaus cun il maun dretg per il moni, aschia ch'il pez mira engiu e tratgs ella tiara, nua ch'el sefetga (pitg). Quella procedura vegn repetida aunc ina gada (petg).

Schnic schnech: Il giugadur pren cun il maun dretg il cunti per la nezza, aschia ch'il moni mira encunter el. Lu tila el il cunti giun plaun, dend ad el ina menada ch'el semeina per 360 grads ell'aria e sefetga ella tiara (schnic). Quei vegn aunc repetiu ina gada (schnech).

Palma: Il cunti schai ella palmamaun dretga cun il pez anavon. Il giugadur tila il cunti ad ault e quei aschia ch'el semeina per 270 grads per sefitgar ella tiara. Igl ei era lubiu da volver el per 360 grads e pigliar el per il moni. Palma vegn dau en tut 4 gadas (palma 1, palma 2 ecetera).

Ureglia: Il giugadur pren cun il maun dretg il cunti per il pez dalla nezza - semegliont sco tier «schnic schnech» - va cun il maun seniester sut il bratsch dretg e peglia il pez dall'ureglia dretga. En quella posiziun tila el il cunti giun plaun (ureglia 1). La medema procedura vegn repetida, denton cun midar ils mauns (ureglia 2).

Pezzi: En posiziun verticala vegn il cunti tenius cul maun dretg vid il pez dalla nezza. En in spert moviment va il maun dretg igl emprem ensi e lu engiu e lai dar il cunti che semeina per 180 grads e sefetga ella tiara. Quei vegn repetiu 3 gadas (pezzi 1, pezzi 2 ed aschia vinavon). Igl ei era pusseivel da dar al cunti ina menada da 270 grads e pigliar ei pil moni.

Tgau: Il maun dretg tegn la nezza cul pez ensi sil frunt. Lu fruscha ei en in spert moviment il cunti giu dil tgau che quel semeina per 180 grads e sefetga ella tiara. Quella procedura vegn fatga mo ina gada, probabel perquei ch'ella ei la pli difficultusa.

Suenter quellas fasas tila il giugadur il cunti ell'aria, schend ils plaids: «Barla Catrina, sufl'il tgil e fetga!» ni «Barla Catrina, sufl'il tgil e fetga betg!» Quei vegn fatg treis gadas.

Gartegia ei tenor giavisch, fa il giugadur maximum treis puncts. Secapescha ch'il cunti vegn tratgs aschia ch'el fetschi tenor giavisch. Quei gartegia denton tuttina buca adina.

Ussa entscheiva il giug puspei davontier cun pitg petg e quei entochen ch'il cunti sefetga ina gada buca ella tiara. Lu vegn il proxim buob vidlunder. Per ordinari gartegia ei buca da dar il giug en ina gada entochen la fin. Specialmein il dar tgau ei difficultus. Fa il giugadur in sbagl, quei vul dir sefetga il cunti buca, sto ei spitgar entochen ch'el vegn puspei en tur e cuntinuescha leu, nua ch'el haveva giu discletg. Quel che ha il davos ils pli biars puncts ha gudignau.

Dar prau

Dus ni plirs pasturs enqueran in bi toc pastira, ord la quala els taglian sdremas graschlas dil tschespet che fuorman in rectanghel ni in quadrat. Suenter partan els si quei «prau» en parts ulivas tenor il diember dils participonts. Il pastur che ha l'emprema part dil «prau», entscheiva il giug, targend il cunti cun tutta forza ella tiara. Lu taglia ei in toc tschespet ord sia part e quei tenor la lunghezia che la nezza ei stada ella tiara. El sto denton gartegiar sia part, schiglioc astga ei tagliar ora nuot. Il giugadur che ha tagliau naven igl emprem siu tschespet, ha gudignau. Il davos sto ir in toc en brauncas cun ils tschespets tagliai ora si dies. El fa quei cun tutta precauziun, perquei sch'in tschespet

croda giu da dies, han ils cumpogns il dretg da fierer quel sin el. Magari raghezzan ils pasturs il camerat per ch'el vegni malruasseivels e stoppi schar curdar ils tschespets giun plaun. - Ils purs han nuota ton bugen, sch'ils buobs dattan prau. Capeivel - vesa ei gie ora en certs loghens sco sch'ei fuss arau. Igl ei era gia capitau che la vischnaunca ha scumandau quei ging.

Castrar la nebla

La tschaghera ei ina caussa ordvart mulestusa per ils pasturs. Per cletg enconuschan els denton in remiedi per far svanir ella, numnadamein il castrar la nebla. Ils buobs siaran in lenn rodund cun pez da mintga maun denter la sava ed igl esch-nuegl, mettan entuorn quel in corda e tilan vi da quella - in dad in e l'auter da tschei maun digl esch-nuegl ch'in tierz ha da tener - entochen ch'ei entscheiva a fimar. En quei mument entscheiva la nebla a svanir. Striegn manedel!

Trer ora il cucu

Il cucu che fa vegnir aschs latg e groma si mises, san ils pasturs scungirar. ils buobs ch'ei in per l'emprema gada si mises, han dad ir sin tetg dalla tegia e trer per in terschiel ch'ils cumpogns pli vegls tonschan atras ina ruosna dil tetg. Sin camond dils socis en tegia, tilan ils novizs cun tutta forza vid il terschiel ch'ils «buns» camerats lain tuttenina liber, aschia ch'ils buobets schulan giu da tetg ellas urtgiclas e lavazzas.

Mirar las steilas

In giug pils novizs si mises ei era il mirar las steilas. Cun tutta innocenza e fidonza mira il pign vadler atras ina mongia d'in tschiep per veser las steilas, sco quei che ses cumpogns han dau da crer ad el. Enstagl da veser steilas, survegn el in tschallat aua giu per la fatscha. Forsa vesa el lu veramein steilas!

Tauna dall'uolp

Medemamein la «Tauna dall'uolp» ei in giug per ils pigns innocents ch'ei in l'emprema primavera si mises. Il noviz ei l'uolp, ses cumpogns ein ils catschadurs. Ei «l'uolp» en prighel da vegnir pigliada, sa ella prender refugi ella tauna, quei vul dir, ella sa seser sin las schanuglias d'in cumpogn. Quel arva denton las combas e «l'uolp» croda en in buatsch.

Bal cun bengel ni cun palutta

Dar bal cun bengel ni cun palutta ei in giug che vegn daus per ordinari dils buobs, la primavera avon far mundi ed igl atun suenter ver dau lartg, sin ils praus. Igl emprem mettan ils giugadurs ils tiarms: dus lenns en ina distanza da ver 5 m in ord l'auter naven da leu, nua ch'il bal vegn fiers cul bengel, dus lenns circa 8 m plinensi ni plianen (zin pign ni era zin miez ni mesaun) e naven da leu en ina distanza da 25-30 m puspei dus lenns (zin grond). Suenter quella funcziun, serepartan ils giugadurs en duas gruppas. La rolla preferida, fixada igl emprem entras la sort, han ils giugadurs ch'ei «si». Els san sittar il bal che ha in diameter da ver 5 cm, pressapauc sco in bal da tennis. Ils giugadurs dalla cunterpartida ein «giu». Els serepartan empau dapertut sil prau. In dalla partida «giu» ha da tschentar il bal, quei vul dir, da trer il bal in tec ad ault per che siu adversari sappi sittar el cun il bengel. Vegn lu in dalla gruppa «giu» da pigliar il bal senza schar dar el giun plaun, daventan el e ses cumpogns «si» e san sittar il bal. Ei quei denton buca il cass, cuora mintgin che ha sittau il bal, entochen tiel zin grond ed anavos, observond ils confins indicai entras ils tiarms (lenns). Ordeifer quels astga el buca cuorer. Tochen tiel zin pign ei il currider schurmegiaus, naven da leu tochen tiel zin grond, ch'ei medemamein ina zona da schurmetg, astgan ses «inimitgs» sittar sin el. Da vegnir anavos ei quei lubiu entochen tiel zin giudem (ni entadem u odem, tut tenor sco ei vegn fiers il bal). Vegn il giugadur gartegiaus dil bal, ei sia gruppa «giu». - Il giugadur che ha sittau il bal, cuora tiel zin grond ed anavos mo lu, cura ch'igl ei favoreivel, quei vul dir, cura ch'el ha tratg il bal ina detga toccada ni forsa en direzziun uiarscha, quei ch'ei denton buca propi fatg da camerat. Schiglioc va el en tutta ruasseivladad tochen

tiel zin pign, nua che forsa aunc auters cumpogns spetgan ina buna caschun. En gliez cass cuoran els comunablamein encunter lur mira. Tut tenor la situaziun fa il giugadur sia cuorsa tiel zin grond ed anavos en ina gada. Ei la situaziun denton malsegira, seglia el igl emprem entochen il zin grond, nua ch'el spetga ina caschun favoreivla da returnar. El ei denton buca obligaus da star el zin grond, el sa bandunar quel e vegnir precautamein e forsa en etappas anavos. - Mintgaton emprova in giugadur da cuorer naven dil zin pign tiel zin grond, avon che siu cumpogn hagi gartegiau da sittar il bal. Quei ei denton malsegir. Immediat tila il tschentader il bal ad in da ses cumpogns ch'emprova In da «sittar giu» siu adversari.

Chis chès

Per dar chis ches drova ei in lenn da 10-15 cm lunghezia e d'ina grossezia da quadrat ni rectanghel. Davon e davos vegn ei fatg pez e quei aschia che las lingias che fuorman in pez, ein parallelas. Il lenn vegn mess cul pez sur in tgierp cantunus ora (crap, quader, tschep da lenna ed aschia vinavon). Davon il tgierp cantunus noda in giugadur in miez rudi da 30-40 cm ella tiara, il schinumnu zin. In giugadur, designaus entras la sort, entscheiva il giug schend «chis» - siu cumpogn rispunda «chès» - e dat da tutta forza cun in fest sin il lenn che quel sgola ina toccada naven. Siu cumpogn emprova da pigliar il lenn sgulont cun ils mauns ni cun la capiala. Reussescha quei, vegn el en tur da sittar il lenn. Gartegia quei denton buca, pren el il lenn enta maun, fa treis pass en direcziun dil zin ed emprova da trer il lenn el zin. Reussescha quei, obtegn el la rolla da sittar. Siu adversari che stat el zin, emprova denton da rebatter il lenn cun il fest da sittar che sto denton adina star ell'aria. Naven dil plaun astga il lenn buca vegnir fiers naven. Sa el denton rebatter il lenn ell'aria, astga el sittar il lenn da leu, nua ch'el ei setschentaus (naven dil plaun) e quei treis gadas. Lu vegn ei mesirau cun pass ni cun il fest da chis ches la distanza naven dil zin entochen leu nua ch'il lenn ei setschentaus la davosa gada. Mintga pass ni fest ha in cert diember puncts. Tgi che ha il davos ils pli biars puncts, ha gudignau. Chis ches vegn daus da dus ni era plirs giugadurs, specialmein la primavera suenter ch'igl ei terren entochen ir si mises. - Magari vegn il sittar treis gadas naven dil plaun schaus naven. Gudignau ha lu quel che ha saviu sittar il lenn las pli biaras gadas.

Trer paliats

Ord ina slonda fa in buob cun siu cunti da sac il paliet ch'exista d'in moni e d'ina palutta che san haver differentas mesiras. Per ordinari ei il moni pressapauc 20 cm liungs e 2 cm lads ed ha in pez davontier. La palutta ha ina ladezia ed ina lunghezia da ver 10 cm. Ella vegn dulada entochen ch'ella ei satella. Enamiez dil paliet, exact leu nua ch'el ha la pesentincl, fa il buob ina crena el moni en direcziun dil pez. En quella crena metta el ina corda da circa 50 cm cun in nuv davostier. Il maun dretg tegn la fin dalla corda stendida encunter tschiel, il seniester la fin dalla palutta parallela cun la corda. Ussa tila il buob il paliet che sesligia dalla corda e sgola ina tilada ell'aria.

Suflar il tschanc

Il giug «suflar il tschanc» dat la giuventetgna per ordinari duront il tscheiver. Giuvens e giuvnas sesan davos meisa da stretg in sper l'auter, ina gruppa dad ina e l'atra da tschella vart. El miez dalla meisa ei in toc launa. Ussa entscheivan ils participonts a suflar sin quella ch'ella sgola per l'aria entuorn, envi ed enneu. Sto in giugadur schar mitschar la launa sur sia schuviala ora, sto el far in castitg.

Troccas

Troccas ei il pli vegl giug da hartas en **Tujetsch** e vegn aunc daus oz cun tschaffen ed anim. Igl ei buca enconuscent, dapi cura ch'el ei derasaus en nossa val. Cun «resdar» han ins denton entschiet per suenter la secunda uiara mundiala. Probabel han ils umens a militar empriu quei da ses cumpogns d'anoviars. Pertuccont la historia e las reglas dil giug da troccas dattan las scartiras indicadas giudem sclariment.

Cun il giug da troccas san ins era dar pischaletg. Ins metta tut las hartas indentergliauter cun il dies ensi si meisa. In giugadur volva ina harta, ils auters ston

litgar, quei vul dir, prender si hartas, entochen ch'els hart gartegiau la colur tschentada. Quel che gudogna il ste, cuntinuescha il giug. El dat sepudend da quella colur, nua ch'el ha dabia hartas per ch'ils auters stoppien litgar. Quei va vinavon aschia, entochen ch'il mun hartas si meisa ei alla fin. Per ordinari ha ussa mintga giugadur in cert diember hartas enta maun. Quel che ha gudignau il davos ste, entscheiva. Lu suondan ils auters da dretg a seniester. Ha in giugadur buca la colur giavischada, sto el litgar las hartas da ses cumpogns. Lu dat igl emprem giugadur puspei ina harta. Hart lu tuts colur, entscheiva quel che ha gudignau il ste, schiglioc sto ei puspei vegnir litgau. Gudignau ha quel che ha sco emprem neginas hartas enta maun. Quel che ha sco davos aunc hartas ei il «pischaletg» e quei tenor il diember dallas hartas ch'el ha aunc. - Pischaletg vegn daus per ordinari d'affons che san aunc buca dar troccas.

Ils giugs dallas buobas

Il di che las buobas calan da far termagls culla poppa, van ellas ordaviert e dattan giugs da cuminonza. Accurat sco ils buobs che han mess d'in maun las vaccas-lenn ch'il bab veva dultgau u fatg ora cun la resgia rodonda. Ed ellas fan buca mo da pigliar e tschettabiget, mobein giugs in bien ton pli pretensius, sco per semeglia:

Las colurs

Duas buobas s'allontaneschan dil marighel ch'ei secavigliaus giu e spetga. Ellas duas han la rolla digl aunghel e dil giavel. - Ina tiarza buoba surpren la reschia, stat sin peis enamiez il marighel, va dad ina tier l'otra e scutina mintgamai ad ina e scadina ina colur ell'ureglia, sco per exempel: azur, clar tgietschen, viv-mellen. Il mument che mintgina dallas buobas ha sia colur, cloma la meinagiug igl aunghel.

Lez arriva e di: «Clinclin!»

La meinagiug: «Tgi ei cheuora?»

Igl aunghel: «Igl aunghel culla steila.»

Tuttas: «Tgei vul el?»

Aunghel: «Colurs.»

Tuttas: «Tgeininas?»

Igl aunghel numna entochen treis colurs. Sch'ina dallas buobas ha ina dallas colurs numnadas, astga ella star sin peis ed ir naven cugl aunghel.

La meinagiug cloma il giavel; il giavel arriva e di: «Hallo, hallo!»

La meinagiug: «Tgi ei cheuora?»

Il giavel: «Il giavel culla corna.»

Tuttas: «Tgei vul el?»

Il giavel: «Colurs.»

Tuttas: «Tgeininas?»

Ed el di tocca treis colurs, exactamein sco igl aunghel ha fatg. Tgi che ha ina dallas colurs numnadas, ha da star sin peis ed ir naven cul giavel.

Igl aunghel ed il giavel tuornan duas, treis, quater ga ed aschia vinavon, tocca mintga buoba ei vegnida vidlunder dad ir, u cugl aunghel ni cul giavel. E tgi che ha il grond diember da buobas, igl aunghel u il giavel, lez ha cattau.

Dar il fazalet

Ina fa il rin; enstagl da dar la tecca, lai la buoba ch'entscheiva a siglir entuorn il rin dar giu il fazalet davos il dies d'ina buoba. Las participontas han tuttas da mirar agradora, denton dad esser fetg spanegiadas, per cass ch'il fazalet vess dad esser enina davos ils calzers. Suenter la tschentada dil fazalet emprova la curridra da siglir entuorn il rin entochen el plaz dil fazalet mess. La buoba che ha buca viu il fazalet ha spiars e sto bandunar il giug. La curridra perencunter pren sezza il fazalet si da plaun e seglia e tschenta el danovamein. Priu denton che la participonta encorschi la messa dil fazalet, pren ella quel e dat suenter la curridra che emprova da serrar il rin. Po ella tier ella avon ch'ella seigi el plaz, sto la curridra ir ora ed ha spiars. Buca encorscher la messa dil fazalet u schar pigliar ei spiars. Il giug sefa entochen ch'ei vonza la finala ina suletta cul fazalet.

Ris e groma enta parvis - fiug e flomma (u scaffa da pelischs e plugls) egl uffiern

Duas dallas mattatschas bandunan il tschuppel e van d'ina vart. Ellas secusseglan e dian tut da bass. Treis nums da buobs (sco per exempel Giachen e Gion. e Martin) ni era treis nums da flurs (rosa e gelgia e striauna). Ils ins dils nums muntan il parvis, ils auters igl uffiern.

Las duas mattatschas sepeinan, stendan ora la bratscha e sepeglian culs mauns, ferton che quellas che spetgan en ina colonna vegnan ina suenter l'otra, stattan giuaden e seferman eifer la bratscha dallas duas buobas. Alternativamein damondan ellas, tgei num u tgei color ella giavischi, quella ch'ei vegnida stat e spetga. Secund l'elecziun va ella mintgamai d'ina u l'otra vart. Il mument che tuttas ein idas atras la bratscha ed han eligiu in num, vegn ei da detschiert. Las duas buobas dalla bratscha aviarta ballontschan in tschec mument, semeinan la finala encunter ils dus muns e dian encunter igl in:

- ris e groma enta parvis

encunter l'auter:

- fiug e flomma (u scaffa da pelischs e plugls) egl uffiern.

-

Mirar anen

La meinagiug tegn las palmas cul polisch sin l'altezia dils egl, siara els e sepusa encunter ina preit, in mir u ina plonta. Las ulteriuras buobas ein in brav tschancun naven (diesch pass forsa) ed han la mira da vegnir el zin fixau, el zin ella vischinonza dalla buoba che meina il giug e stat encunter enzatgei. Ella ha dad esser fetg allerta ed udir mintga pass che s'avischina. Enaquella ch'ella sevolva, ed ella sevolva anetgamein e savens, ston las autras ch'ei laghegiadas da vegnir encunter, star gradagraderi. Semuenta ina mo in smiul, ha ella scochemai da turnar anavos el liug da partenza. Tgi che po el zin senza esser traplaus, ha gudignau e meina silsuenter sez il giug.

Dar cul crap

Las buobas fan sin ina penda (in toc prau) in rectanghel e dividan el en otg quadrats. Tuttas sepostan pressapauc in meter e miez navenda, suenter che mintgina ha semtgau in crap plat (in che fa buca segls e setschenta silsuc bi ademplat) enta maun. La principianta betta il crap egl empren quadrat; per cass ch'ella gartegia buc, vegn la secunda vitier. Ha ella denton siu crap egl empren quadrat, s'approximescha ella sin ina comba al crap, sa seruassar sin omisduas combas egl empren quadrat - e cuntinuescha puspei sin ina comba digl empren el secund quadrat, dil secund el tierz ed aschia vinavon entochen egl otgavel e puspei anavos el marighel, s'entelli sin ina comba. Gartegia il stuc, betta ellail crap el secund quadrat, va sin ina comba entochen sper il crap, seruaussa spel crap sin omisduas combas, repeta accurat sco l'emprema gada, tuorna anavos el marighel per entscheiver cun la fiersa dil crap el tierz quadrat ed aschia vinavon, tocca ch'ins ei atras tut ils quadrats. Enina vegn bunamein negin atras; plitost vegn la secunda e la tiarza vidlunder ed aschia. E quella che ha fatg in sbagli vegn per vidlunder, cura che las autras han tuttas fatg puspei lur emprova. Il ging ei da cuoz e pretenda inschign.

Retg, retg, cons pass dei dar?

Liug: en curtgin u sin ina penda prau. Il retg ei sisum ed il migliac buobas forsa diesch meters naven, plinengiu.

L'emprema buoba damonda:

«Retg, retg, cons pass dei dar?»

«Dus», rispunda il retg.

La secunda damonda: «Retg, retg, cons pass dei dar?»

«In ed in miez», fa il retg.

Ed aschia damonda igl entir tschuppel, ina suenter l'otra, cons pass ella astgi dar. Per cass ch'ina u l'otra vegn onz datier e s'avischina al zin, camonda il retg ad ella da far in

u dus u aschia pass anavos. E la mira ei da gie impedir ch'ina vegni el zin. Ed igl ei pli u meins in giug da simpatia. Vegn ina denton malgrad aschilunsch, eis ella si ed ei retg ed il ging entscheiva danovamein.

Caputschinerum

Il tschuppel sesa en in marighel; mintgina dallas buobas tegn treis caussas per sesezza (fils, lenns, rispials, stumbels, ragischs, pupials ed aschia). Mintga ga ch'ella fallescha, ha ella da surdar in da ses objects, entochen ch'ella ha nuot ed ha spiars e sto sissu ir ora ed ha la finala da spitgar in «strof» alla fin dil ging.

Il caputschinerum ei plitost d'in maun ch'el survesi gie tuttas. El entscheiva cun ina historia, tila ella bravamein alla liunga e seglia enina denteren cun siu caputschinerum. Sil plaid caputschinerum han tuttas da dar il tgau; dat ina buc u memia baul, ha ella scochemai da dar giu ina da sias caussas. E sco detg, suenter treis fallidas, ha ella dad ir naven e spitgar il castitg.

Las buobas malas e finas sedostan e lain buca puder tier, tocca che ina gudogna la finfinala ed astga sezza esser il caputschinerum.

Fontaunas

Dicziunari Rumantsch Grischun, t. 2, p. 493-495.

Dicziunari Rumantsch Grischun, tom 7, p. 100-101.

Masüger, J.B. Leibesübungen in Graubünden. Chur 1946, p. 133-135.

Berther, Norbert. Survesta historica dil giug da troccas. Reglas dil giug. Da Norbert Berther e Gieri Carigiet, Cuera 1985.

Deplazes, Carla. Troccas, ein interessantes Spiel, Chur 1984.

XV Idiom e svilup dalla cuminonza

Il patua da Tujetsch

Dalla **Val Tujetsch** ha enzatgi scret dabia prosa e schizun enqual poesia. Praulas e detgas e nums locals dian ed il dialect tuatschin ei apartis. Era scribents dalla val muossan ora, con rehs e variaus ch'il patua da **Tujetsch** ei en sesez.

Forsa che ual quella fontauna ei in muossadet ed influenzescha il Rumantsch grischun dad ozildi. Ils Tuatschins sezs ein pertscharts da lur dialect e fan e valer el el discuors da mintga di, schebi ch'els scrivan il lungatg sursilvan. En mintga cass han ils creaders dil Rumantsch grischun fatg persenn; en lur Pledari sefa e viva l'expressiun da Tujetsch buca mal.

Perfin eifer las scheinas dalla **Val Tujetsch** sezza dat ei remarcablads. Denter ils avdents da dadens il **Dutg Grond** e dadora (l'aua giud la Londadusa sparta ils vischins da **Rueras** da quels da **Zarcuns** e **Camischolas** e **Sedrun**) dat ei struschamein variaziuns, forsa foneticamein enqual plaid u l'autoer. Ils vischins da **Cavorgia** perencunter ein onz pli singulars (ins patratgi da Vic Hendry). Essend ch'els ein tschentanners ora stai da lur persei e da negin, ein singularitads linguisticas sefatgas, tuttavia denter la glied pli passada. Eis ei stau l'influenza dils uauls, ni il contact culs vischins entasi dallas **Cavorgias** (mises da **Mustér**) u sulla cresta da **Stagias** e la sentupada culs pasturs da **Mumpe-Medel** ella **Val Gierm**. Buca sclausa ei schizun la fruntada culs pigurers neuasi dil miezdi (**Cuolm Cavorgia** e **Nalps**). - In bien ton pli gronda denton ei la differenza da «dadains gl'auat», dils avdents da **Selva** e **Tschamut**; la stretga da **Sumsassi** ei ina stagia scosauda. Ed ins numna quei pievelet da dadains la siara era ils Tarleps e ch'ins declari il surnum sco ins vegli; els han en mintga cass nuidis, fetg nuidis da vegnir bullai cun la tezla da Tarleps.

Las semeglias suandontas dattan perdetga:

Dadains gl'auat

affon

caglia

camon

marenda

dents

dadens

venter

render

dadora **Sumsassi**

uffaun

tgaglia

tgamon

marianda

dians

dadains

vianter

riander

La differenza lai, silmeins per part, era motivar:

- la isolaziun (ins patratgi dil liung unviern)

- caplons e scolasts da sutensi (d'ordeifer la **Val Tujetsch**)

- in'ulteriura raschun stat osum la bucca. Aunc ei sedischavel e gissiatavel tschentaner han ins detg a **Selva** «im Holz» ed a **Tschamut** «Zmut». Ton ch'ils Gualsers han giu ina gronda influenza sin quels da «dadains gl'auat». Stat bein siper la detta, sch'ins patratga dallas colonias da num els plats da **Caspaua** e **Scangleras**, **Planatsch** e **Mulinatsch**.

En scadin cass ei la **Val Tujetsch** aviarta da tuttas quater varts:

encunter sera:

Cuolm d'Ursera

encunter miezdi:

Lucmagn, **Nalps** e **Curnera**

encunter damaun:

il fons dalla val e l'aua dil **Rein**

encunter mesanotg:

il **Pass dallas Cruschs** e viagiu ella **Val da Fier**

Eifer il **Cuolm d'Ursera** e **Garmischeras** ein ils svaris dil lungatg semantunai e sestagnai; la isolaziun ei stada gronda.

S'entelli ch'era las ulteriuras vischnaucas dalla **Cadi** e dalla **Surselva** han lur atgnadads linguisticas, mo schi da num sco ellas vals da **Medel** e **Tujetsch** ein ellas negliu. Matei che la geografia dalla val ei stada impurtonta.

La scienza sezza ei tuttavia buca dapertut dil medem meini. - Leonard Caduff ha per exempel en siu «Essai sur la phonetique du parler rhetoroman de la **Vallee de Tujetsch**» cumparegliau la fonetica dils patuas da **Tujetsch** e **Medel**. El scriva ch'il patua da **Tujetsch** e quel da **Medel** s'audien senza dubi alla famiglia dil retoroman sursilvan. Fenomens fonetics e grammaticals muossien denton principalmein en **Tujetsch** ina fuorma fetg spontana e pli veglia che las ulteriuras vischnauncas dalla **Cadi**. Leonrad Caduff anfla parallelas ell'**Engiadina**, el **Grischun** central sco era en la **Val dil Blegn** ed ella **Leventina**.

Il commers e la marcanzia sur il **Pass dil Lucmagn**, pia encunter miezdi (ual sco la **Giadina** ed il **Grischun central**) ein stai da gronda purtada. E quei sur la cresta da Stagias, atras l'entira **Val Medel** epi encunter la vart meridiunala. Ensemblamein culs marenghins pils bos ed ils mutgs han ils purs da **Medel** e **Tujetsch** era rabitschau enqual expressi un si dil miezdi - e buca mo cauras e pulenta.

Il transit neu sul **Cuolm d'Ursera** ei semeglientamein buca staus maneivels ed ils vischins digl **Uri** e dil **Valleis** han giu da dir enzatgei, el lungatg era. Schebi ch'ils raps ed ils praus ed ils ers han muntau ad els dapli.

Robert Loriot ha intercuretg originalitads da nies dialect ed ha cumparegliau el cun ulteriurs idioms. El ha denton buca anflau ina scienza precisa dil daco e dil dacum dil patua da **Tujetsch**. Igl ei ludeivel che Arnold Büchli ha rimnau e nudau praulas e detgas da **Tujetsch**, e quei el lungatg original.

Milsanavon ei Karl Hägler sedaus giu culs Tuatschins; el ha fatg studis antropologics ed ei vegnius dall'idea ch'il pievel da **Tujetsch** seigi plitost in raz dil mesanotg, dils habitonts dinars. Gnanc diesch per tschien muossien ora atgnadads meridiunalas.

Ton che la razza tuatschina ei singulara; igl ies dil frunt ha ina cusadira permiezgiu ed il mesiratgaus Karl Hägler stat sissu.

Ina caussa stat sidavon; students dalla romanistica vessen in stupent intsches per ulteriurs studis ella **Val Tujetsch**, essend ch'in bien ton ei aunc adina curclau. Alluscha gliez bein, il vegl lungatg retic ed il latin vulgar, ual sco l'influenza da tuttas quater varts e la stagnaziun ella izolaziun, quei tut ensemen ha dau ina tschecca summa, numnadamein il dialect da **Tujetsch**.

Ch'ins volvi e meini sco ins vegli; ei vala en mintga cass la peina da mantener il patua da **Tujetsch**, da tschintschar el bein ed endretg, tuttavia durent il discuors da mintga di, senza scumbigliar el cul lungatg da scartira e tschintschar mo ina mistira. S'entelli ch'il lungatg da scartira duei esser e restar il lungatg dalla **Surselva** che fa tscheu e leu enqual difficultad (tuttavia la fonetica) al pievel tuatschin.

Enzacontas differenzas denter il lungatg da scartira ed il patua da **Tujetsch**

carn	tgarn	ault	aut
casa	tgesa	dultsch	dutsch
cauld	tgaud	maulta	mauta
comba	tgomba	saltar	sutar
gagl	giagl	maner	manai
gat	giat	ner	nair
gassa	giassa	per	pair
gonda	gionda	plascher	plaschai
leu	lo	meisa	maisa
neu	no	neiv	naiv
ha	ho	preit	prait
va	vo	seit	sait
jeu	ju	denter	dianter
gliud	gliud	ensemen	ansiamen
lieunga	liunga	tempra	tiampra
pieun	piun	venter	vianter

Cumpareglia era il text screts en dialect da **Tujetsch** da Francestg Berther!

Fontaunas

Caduff; Leonhard. Essai sur la phonétique du parler rhetoroman de la Vallée de Tavetsch. Tavanasa 1952. (Diss. Fribourg)

Gadola, Guglielm. Ina remarcablada linguistica ord la Val Tujetsch. En: Il Glogn 1930, p.24-26

Loriot, Robert. Les caracteres originaux du dialecte du Val Tujetsch (Tavetsch) dans la famille des parles sursilvans. En: Melanges de linguistique et litterature romanes, tome III, 1952. (Paris, Libr. Didier)

Widmer, Ambros. Uettas ord il lungatg popular. En: Calender romontsch 1987, p. 286-293

Impressiuns d'in contemporan

En nossa giuventetgna essan nus vegni confruntai cun ina autoritad nundescribbla, oz struschamein imaginabla. Famiglia, scola e baselgia han funcziunau en quei grau ina cun l'otra senza paregl.

Suenter l'emprema uiara mundiala ei nossa generaziun vegnida viaden els onns da crisa cun ina brava hipoteca dad ideas conservativas. E negin che ha susteniu, ni stadi ni baselgia, aschia naven dils 1919-1939.

Entuorn ils anno 1937 e 1938 ha la tensiun cun la **Tiaratudestga** entschiet; la Svizra sezza ha fatg atras ina, tuttavia duront la secunda uiara. - La plipart dils umens ha giu dad ir en survetsch militar. Las femnas ed ils umens vegls ein sedustai; lur prestaziun ei stada considerabla.

Denton han ils onns da trentel era purtau bein enqual caussa ch'ei stada d'engrau. Il contact cun la schuldada ch'ei vegnida en quartier ei staus d'avantatg. Ins ha empriu vitier ed ei ruts atras la classena dall'isolaziun.

Biars han fatg lur quen cun la fin dalla secunda uiara e cul svilup economic che vess atgnamein giu da vegnir immediat. Igl ei denton buca stau aschia. Il terren agricol ei vegnius scarts ed il tscheins ei carschius. Ils prezis pils products dils purs ein stai schliats e ton sco nuot fadigia ella val.

Da far il schuldaun vevan nos umens empriu enzatgei; ed els ein lu scochemai s'interessai dalla lavur ordeifer las stagias, sco per semeglia da lavur d'uau el **Tessin**. - Ina secunda gruppa ei seschada en cun l'industria giu a **Schaffusa**. Ed aschia ein plirs dalla val semplamein i egl jester, empau dapertutanavon en **Svizra**. Naparts han schau encrescher ed han spitgau vessamein ina caschun da turnar. Auters puspei ein e buca turnai. Ed igl ei singular che quasi negin tuorna suenter la pensiun.

Dils onns 1948 e 1949 seregordan ins bugen; l'introducziun dalla segirada da vegls e survivents ei stada ina lutga scosauda. L'impressiun che la **Surselva** e la **Cadi e Tujetsch** han fatg arisguard la votaziun ei en mintga cass buca da ludar. E tgei lessen nus era pigliar amauns oz senza quei progress che fa mintga di dil bien ad enzatgi.

Duront ils onns sequents ein nossas autoritads communalas seschadas en pervia dalla vendita dallas auas e dils implonts electricis. Interessents ein daveras stai avon maun, sco per exempel CKW (Centralschweizerische Kraftwerke) e la NOK (Nordostschweizerische Kraftwerke). Las contractivas ein stadas liungas; la vischnaunca da **Tujetsch** ha vendiu sias auas alla NOK e la regenza grischuna ha sancziunau ils 28 d'avrel 1955 la concessiun.

L'entschatta ei stada dada e l'economia communal ei sefatga bein. Tut tgi che ha vuliu luvrar, ha era retschiert lavur. Gia igl onn 1956 han ins entschiet cun las lavurs grondas ella **Val Tujetsch**; plirs Tuatschins ein turnai digl jester, auters ein semess en cun in emprendissadi ed ils tiarzs han mess neu ina atgna fatschenta. Ils vischins ein sedestadai e la midada ei stada gronda.

Aschidadir - nua che Niessegner ha ina baselgia, ha il giavel ina caplutta, sedi ei. Pervia dil schischuri da lavur e traffic han ins en buca ditg dismiss las processions dallas rogaziuns, sco per semeglia la procession a Nossadunna da **Zarcuns**. Era firaus han ins mess d'ina vart (sco sogn Gions e sogn Pieder e sogn Paul) - forsa cugl intent da puspei metter neu ils firaus pli tard. La dismissa ei stada definitiva e negin vess giu pli la curascha. Cun la fiasta dil Sontgilcrest da **Rueras** eis ei iu accurat tuttina; schebi che ual

quella fiasta ha uniu sco mo paucas la concordanza denter ils vischins dadens e dadora il Dutg grond.

Las lavurs vid ils implonts electricis ein idas alla fin, pressapauc entuorn igl onn 1966; dils nos ein separticipai vinavon dallas lavurs da **Sontga Maria** ed aschia. Mo las autoritads communalas han giu igl egl aviert; mirar ch'ils luvriers hagien lavur han ins mess sidavon. - A per ei la societad acziunaria pils runals sefatga, quella digl onn 1962, **Valtgeva** e **Milez**. In onn sissu han ins aviert tut ils indrezs; la fadigia ei stada beinvegnida. Ils jasters han entschiet a vegnir da detschiert; la glied da cheu e quella da naven ha fatg stediamein diever dallas grondas cumadeivladads. Hotels ed ustrias e bars dallas uisas endridan la glied - e ch'ei vegn meinsvart fatg surdiever, gliez stat siper la detta. En vesta da tons indrezs fuss ei forsa cunvegnent da tener buna mesira. Las casas da vacanzas ein schi numerusas ch'ellas savessen vonzeivi daventar in buordi economic.

Ils prezis ein carschi fetg e biaras dallas famiglias giuvnas han grev d'ereger in'atgna habitaziun. Il tscheins-casa ei en **Tujetsch** memia aults. Ed igl ei evident che bein enqual possessur d'ina casa lai pli bugen a tscheins siu possess als jasters che a famiglias indigenas.

Aschia il relasch dil turissem. La part morala ei onz pli nauscha. Il regl da far suenter ils hosps ei vegnius gronds. Sch'ils ezs vegnan cun biala vestgadira da far sport, vulan nos affons naturalmein era. Poda ch'ins patratga memia pauc che la glied da vacanzas ha spargnau malamein quels raps per ir en vacanzas. Sch'ils jasters tilan la consequenza e manegian che cheu stoppi ins esser beinstonts, ei quei buca in tanien attestat ed esser da buna mesira quenta.

Avon onns ha zatgi fatg valer da vuler gidar ils purs; ton ch'ins ha decidu la megliuraziun e l'arrundaziun dil funs. Ils giuvens stettien lu pli tgunsch vidlunder; nuotatonmeins vegn il diember dils purs en **Tujetsch** onn per onn dil meins. Certas caussas ein schizun vegnidadas mendras. In gudogn denton ei buca da survever, sco per semeglia las vias da funs e quellas che meinan ellas aclas. Ils purs san far diever da lur maschinas e pils turists ein las vias semegliantamein enzatgei da num. Tscheu e leu vess ins forsa aunc saviu far in tec dapli ella periferia. Ils praus mess bein ensemen ein da grond gudogn, era allura, sche la bonitad ei struschamein gartegiada dapertut. - Ina megliuraziun ei facticamein ina interpresa; certins dils purs ein vegni bein a quen, auters perencunter, glied pli modesta, ils ezs han tratg ina mendra sort. L'esperienza da mes otg decennis muossa ora: Cun la gestadad vegn ins in tschancun pli lunsch.

Ed jeu vegn buca libers dil presentiment; jeu vesel stgir pil puresser. Ils tscheins da praus ein cun mo pintgas excepziuns memia aults e sulettamein il bien prau quenta. Purs cun 20-25 envernontas ein pli d'engrau; ins promovava els dapli che quels cun mo 15-18 envernontas, schebi ch'ils davos han e in avegnir, en mintga cass, sch'ils dels dalla famiglia segidan. In di surpren tonaton mo in sulet il fatg. E las entradas per ina famiglia cun 2-3 affons ein sufficientas; ins vegn atras. Il pur grond perencunter, quel d'in inventari stravagau, pereclitescha l'existenza dil pur mediocher e quella dil pur pign ed ei savess allura tgunschamein capitar ch'il pur permiezvi ed il pli pign tilan il puresser da leu vi. Epi - il resultat. Pli paucs affons e pli paucs vegnentsuenter e las vals sedepopuleschan. Il puresser ei era la basa dil turissem e buca il davos per la cultura dil vitg.

La politica dalla agricultura ei ina caussa impurtonta.

Tgi che va suenter, lez fa persenn. Las alps da **Tujetsch** han ina historia che astga sefar da grond. Oz ei la structura alpestra dil tutfatg decadenta e tondanavon midada che mo fetg paucs purs ein cuntents dil fatg. Schebi ch'ils umens che han dau la decisiun ein stai scolai e vessen giu da saver. Ils davos quendis onns han ils vischins da **Tujetsch** investau e baghegiau ora stabiliments sin las alps da vacas per igl import da passa in quart milliun. Il nez da quella investiziun sesminuescha onn per onn. - Tschels onns fageva il signun cun pressapauc 35 liters latg in kilo pischada e cun endisch liters latg in kilo caschiel. Nuot da quei pli! La nova organisaziun vegn cul latg ella cascharia da **Sedrun**, ina comunabla per tut la val. Poda che la lavur dil pur ei pli pintga; per encomi dat ei ni magnuc, ni pischada, ni tschagrund dad alp.

Da l'autra vart - la fumeiglia dad alp ei in problem. Nossa glied vul buc ir ad alp. Jeu crei che duront la stad 1985 seigi mo pli il nurser staus ina persuna indigena. Sch'ins patratga: Inaga ei la fumeiglia dad alp stada enzatgi per propi. En quei grau ei la nova lescha da scola stada ina catastrofa (il temps da scola ei prolungius). Per gronda part han nos buobs ed ils giuvens piars il contact cul muvel ed aschia era nuotatonmeins cun la natira. La poesia da mises e dad alp ei naven. Seras libras e liber il davos dalla jamna, quei ha num vus ed aunc dapli raps suren!

Ei vonza in'ulteriura caussa, quella dalla religiun e dalla baselgia. La midada dil cult liturgic ha dau in bien ton da risdar. Ed igl ei buca da metter d'in maun che la generaziun pli veglia ha fatg vess. Sco nus essan tuts; nus essan cumadeivels e fagein e pli bugen pauc. Il suentermiezdi dalla dumengia ei libers dil tut (viaspras e rusari ed aschia); enstagl fan ins sport ed excursiuns dallas uisas e sch'ils purs han da rischlar, vegn ei rischlau, era lu, sch'ei ha fatg duront la jamna entira mo bialaura.

Tgi dat leutier la lubientscha?

Ina caussa surtut, la penetienza; lezza ha dau dabia da patertgar. La plipart dils nos va oz buca pli en confessiunal. Sa e tgi che conceda oz da ver fatg falliu? Gliez drova character e humilitonza.

Ins sedamonda. Tgi ei la cuolpa dalla gronda midada, ils prers, ni la baselgia? Tgi ei la baselgia? En mintga cass - las propostas derivan dils uestgs e dil clerus insumma; muort munconza da spirituals e per beinvulientscha pils fideivels; quei ei commovent! Ed auncallura -paucs cartents pli che giavischan in retuorn al puritanissem ed allas stravaganzas da nos vegls.

La damonda tgi e tgei che la baselgia seigi insumma, lezza ei clara. La glied battegiada e cresmada ei segiramein buca senza cuolpa dil manco da spirituals. Neve - tgi che ei senza ... lez tili igl emprem crap. Igl andament dalla religiun sco tala sa semidar, mo sche Niessegner dat la grazia leutier. Ch'El gidi, il Bab!

Fontaunas

Frey Oskar, ORA, Sedrun

Lüthi, signun, Sedrun canzlia communal, Sedrun

Il trend dils nums

Mess il cass che **Tujetsch (Tivez)** deriva veramein da tegia, sefa la historia dalla val en moda naturala. Quellas empremas camonas cun lenna rodonda aschia amiez ils uauls che vegnan a ver dau suost e refugi als emprems rots ch'ina aura emperneivla ha carmalau neutier. Ed igl ei da schar valer ch'ils vellers seigien dai da sutanenasi. Tocca il di che la sauna raschun ha detg ad els da rumaner e cuntschar aunc meglier las travs dalla runca.

Cura che quei ei facticamein schabegiau, gliez ei ina damonda seriusa. Igl ei da supponer cuort suenter la colonisaziun da **Mustér**, pia pressapauc entuorn ils anno 750. D'anora anen e cun tempronza e la casa da Diu ed ils vischins da leu han giu il plaid grond, dapi l'entschatta e per ditg e ditg, per bunamein adina.

Ferton ch'ils umens dils uauls che han endiriu la breigia e las runcas ein sefatgas, oravontut amiez ils plauns e silsuenter dallas spundas si. Plirs tschentanners ein ils vellers da **Tivez** stai sut e vertiu - entochen ch'els ein semess en moviment ed ein sezs i per reliquias ed han baghegiu sanctuaris. Aschia zanza d'in maun han els buca giu outras letgas; il Segner sez ei vegnius gronds ella val ed ils vischins han mirau ruasseivlamein en fatscha allas hurschas.

Culs onns ei glied d'ordeifer dada neutier, glied che ha mirau suls spartius e ch'ei setenida vid l'idea, vid l'idea ch'ei fussi bi da vegnir e semetter en culs vellers da **Tivez**. Schi bialas seigien las seras e las damauns negliu.

Quella glied semplia ed endirida ch'ei vegnida sul **Cuolm d'Ursera** vi ed ei setenida plitost sils aults per buca dar discumet ad enzatgi. A **Caspausa** e **Scangleras**, a **Malamusa** e **Cungieri** han els mess ora lur runs ademplat. Schebein la glied egl iral hagi vertiu ils colons senza far liungas, gliez per cass selai dumandar. - En tutta cass ha la famiglia de Pultengia fatg buna frina, sco l'erecziun dil casti sil con da **Pultengia** dils

anno 1200 muossa ora evidentamein. Malgrad la curiosadad dil lungatg e dil spert aleman dils Schniders e dils Schuhmachers e dils Schrefers, mo era dallas ulteriuras schlatteinas dils Gualsers, sco per semeglia: Monn, Berther, Schmed, Loretz, Beer, Muggli, Hetz e Brugger. Las treis empremas schlatteinas ein svanidas, las ulteriuras perencunter ein quasi tuttas vegnidas grondas e secasadas els preuls dalla val. Buca mo ils Gualsers han fitgau pei en **Tujetsch**, semegliontamein ils immigrants neu dil miezdi, sco per exempel: Galli e Gieronimi ed era Gamboni. Sclaus eis ei buc - ch'els seigien vegni atras las vals da **Nalps e Curnera**, sco pasturs per semeglia; probablamein denton sur il pass dil **Lucmagn**. E neu da lezzas varts ein aunc auters vegni, in entir tschuppel, per cass, quels che han tenu mirau dalla muota dil **Stagias** anora, aschidadir ils de Medell, Peli, Oliva, Perde, Cazirauns e sogn Gagl. Era suenter il Rein ein ils dels d'ordeifer sefatgs neutier, buca il davos ils de Ragisch, de Cunel, de Garmischeras e de Peisel.

Ina mischeida semeglionta ha dau culs onns in raz saun e resistant; il pievel da **Tujetsch** ei serefatgs e vegnius gronds e sesparunaus encunter las auras. E lasezzas ein daveras buca stadas adina maneivlas, sco las maluras dallas uisas dian evidentamein. Nuota il davos las murias differentas e las cardientschas faulsas, il tschorvament dallas strias tuttavia. - Ed in pievel d'ina vart aschia ha stuiu mirar sin mintga bluzcher; quei dian las scartiras trasatras. Biars dils affons ein i vi tier Niessegner avoncaduras e zanua ha ei puspei dau in plaz liber. En sesez in fatg da star mal. Nuotatonmeins han las maridaglias en famiglia promoviu il pertschien da mortalitad.

La tiara sezza ei buca vegnida pli gronda, enstagl ein ils pursepens vegni vits. Secapescha ch'enqual um ei ius ordeifer a gudignar il paun, sco per semeglia plirs umens da **Tschamut a Neapel**, sut crunas. Dallas ulteriuras uclivas era, en tiaras jastras - e buca tuts ein turnai.

In tozzel affons fa pretensiuns; bein enqual famiglia ha giu aunc dapli e pretender che Niessegner detti a mintga tschut e il pastget ei sco envidar ora. Ed ei cunterfa buca alla verdad, sch'ins di semplamein ch'ins seigi seregulaus, lezs onns. Co ins hagi fatg denton, gliez ei in ughetg da dumandar. - Era sche las scartiras dian pauc surlunder, han nos vegls empruau tgei ch'ei vul dir. Sch'ins ha per exempel paschentau ils affons siper las crestas ed izuns e garnedels fuvan dil meglier duront la stad ed igl atun dils anno 1817. La historia dils Schuobacheclers ei ina turpegientscha; ch'ins cumprendi - datier da quatertschien affons ch'ins ha rimnau ellas valladas sco ins rimna cauras e nuorsas e catschau els giul **Schuob**. Las cefras ein quellas digl onn 1859 ed avon la mesadad dil schenivavel tschentaner fuva il diember in per gadas pli gronds. La sort da quels affons ei buca da descriver, en mintga grau buc, era lu, sch'enqualin ha gartegiau in tec meglier, schi pulit ch'ei ha dau ina relaziun denter las casadas. En mintga cass ein differentas familias da **Tujetsch** emigradas giun **Baviera**, sco per semeglia: Muggli, Decrusch, Caduff, Berther e Monn, per dir mo entginas aschia. La plipart ei seschada en el puresser ed ha fatg commerci cun latgiras. - Forsa ch'igl ei maisudiu da dir, mo ils dels ch'ei in naven, han fatg plaz ad auters ed in pli pign diember ha stuiu ir per l'escha a rugar. Ed ils dis dalla betleraglia fuvan fxai, en **Tujetsch** era.

Duront la revoluziun franzosa ha la populaziun da **Tujetsch** dau in detg cal, pressapauc tschiensiatonta persunas pli pauc; buca tuts ein curdai, mo zaco ein els stai naven. En ton sco nuot ein las casadas carschidas puspei, tocca sin varga endischtschien. In diember semegliont fuva semplamein damemia per igl intschesch determinau dalla val. L'in sbluttava l'auter, els uclauns tuttavia - e citai seigien ils exempels da **Cavorgia e Surrein**.

Tocca il di che certins ein semuentai ed han patertgau dad ir naven - ella **Merica** per exempel. Viaden ella secunda mesadad dil 19avel tschentaner s'ei schabegiau. Pongir ventgatschun pertschien dalla populaziun da **Tujetsch** ei emigrada, buca sin in plum, plitost enteifer sis entochen siat decennis, oravontut matei a **Stillvater**, ella preria da **Dakota** epi a **Sogn Paul**, ina cefra rodonda da 240 persunas. Bein ina surlischada maisecattada ella historia da **Tujetsch**. **Sedrun e Rueras** han fatg persenn dils emigrai, ils uclauns odentuorn perencunter han pudiu si cul flad. - E las familias ch'ei cuntuadamein stadas osum ein idas, quellas che vevan struschamein da clamar in gat

orasut pegna, sco per semeglia: Muggli e Giacumet, Biart e Balzart, Schmed, Deragisch e Peder. Secapescha buca mo - denton plitost bein, sch'ins mira propi.

Placi Hendry da **Surrein**, atgnamein oriunds da **Cavorgia**, e siu quinau Vigeli Monn ein stai dils davos emigrants dil grond exodus.

Nuotatonmeins che tons e tons ein setratgs naven, ils onns avon l'emprema uiara mundiala e quels sissu ei la strebladad carschida e carschida. Il gudogn pagadus trasatras ha teniu sut. E per la crisa dils anno trenta, lezza tegn ins endamen. Schebi ch'ils dis atras la secunda uiara ein stai stuffis, ella ha aviert burals ed orvas da differentas varts. Il contact culs vischins d'ordeifer ei en mintga cass staus d'engrau. - Ton ch'ils anno 46 ein ina partida umens dalla **Val Tujetsch** sefatgs si ed ein serendi a **Schafusa** e semess en tier l'interpresa da Georg Fischer. Entgins han anflau leu in suttetg endretg, la plipart ei turnada ella val.

Sch'ei fuss succediu nuot, lu paupra! Plaun e plaun eis ei daventau zatgei; l'economia dallas auas ei sefatga e bunamein a per la gronda avertura dil turissem, oravontut dils logs da skis. L'erecziun dils runals da **Dieni** ed a **Valtgeva** ei stada ina causa da liunga vesida.

Aschidadir, il svilup dils davos trent'onns ei oz strusch da surveser. Entirs tschentanners ha **Tujetsch** buca fatg atras ina da quellas midadas; l'ovra hidraulica ed il sport insumma han dau e dattan paun e ponns a biaras e biaras famiglias, pongir a tut tgi che ha buca schau serrar igl esch si pil nas.

Dils Tuatschins ein naparts turnai, da quels che fuvan serendi egl jester per emprender enzatgei; els han mess si sezs ina fatschenta e bein enqualin ha survegniu ina stupenta piazza ed ha saviu secasar aschia ella val. - Senza intercurir da rudien, sefan ins struschamein en, la structura ch'ei sedada ussen. Il svilup dils nums e dallas famiglias fa smarvigliar, tondanavon che tut las midadas dils tschentanners vargai pon buca tener tila. Ch'ins cumparegli pia! Nums dil tuttafatg jasters sefan en **Tujetsch**, da quels neu digl exteriur, sco per exempel: Indipendenza, Dal Farra, Di Bella ed aschia. E si digl intschess aleman derivan las schlatteinas ed ellas suondan tenor frequenza:

Wyss	6 persunas
Hutter	4 persunas
Scherrer	6 persunas
Frey	4 persunas
Dettling	5 persunas
Lergier	4 persunas
Pfiffner	4 persunas
Müller	4 persunas
Hüssy	4 persunas
De Vries	4 persunas

Schi da daditg enneu eis ei e buc, ch'ina mumma da **Sutsassiala** ha detg siper enzatgi: «Avon che schar maridar mia feglia cun in um da **Tujetsch**, rumpel jeu ad ella l'ossa». Ed oz vess ins daveras in entir migliac ossa rutta, ni? Las schlatteinas ch'ei puspei indicadas tenor diember muossan ora:

Flury	10 persunas
Degonda	5 persunas
Cathomas	10 persunas
Bass	5 persunas
Bearth	8 persunas
Levy	5 persunas
Caderas	7 persunas
Soler	5 persunas
Maissen	6 persunas
Arquisch	5 persunas

Las schlattas tuatschinas han semegliontamein fatg atras ina metamorfosa, e quei malgrad ch'ils Monns ed ils Berthers stattan aunc adina sisum. Ord la schlatteina dils Schmeds ha ei dau ordlunder Schmid e Schmidt e Schmet ed il num ei carschius considerablamein, derivonts la plipart ch'els ein da **Tschamut** e da **Cavorgia**. Auncallura la famiglia Hendry, vivon duas sulettas famiglias dil **Plaun sogn Leci**. - Autras perencunter peglian digren, sco las indicaziuns dalla statistica muossan ora.

Il carschament

Monn	173 persunas
Deflorin	53 persunas
Berther	163 persunas
Venzin	39 persunas
Cavegn	128 persunas
Giossi	38 persunas
Schmid	115 persunas
Deragisch	35 persunas
Hendry	80 persunas
Beer	34 persunas

La digren

Deplaz	4 persunas
Albin	9 persunas
Peder	5 persunas
Gamboni	14 persunas
Pally	6 persunas
Valier	16 persunas
Brugger	8 persunas
Decurtins	20 persunas
Gieriet	9 persunas
Hitz	20 persunas

In maletg singular dattan ils loghens d'origin dallas partenarias e dils partenaris.

Tujetsch ha en quei mument (temps da controlla il meins da schaner 1986) 365 lètgs. Buca odentras la mesadad dils Tuatschins han maridau Tuatschinas; las ulteriuras partenarias ed ils ulteriurs partenaris (e ch'ins fetschi stem, schebein il partenari seigi lu e veramein da **Tujetsch**) serepartan sco suonda:

Diember total dallas lètgs 365 = 100%

Tujetsch (omisduas parts da Tujetsch)	172 lètgs	=	47,15%
Mustér (consort u consorta da Mustér , e quels che vegnan suenter è)	29 lètgs	=	7,95%
Medel	5 lètgs	=	1,35%
Sumvitg	27 lètgs	=	7,40%
Trun	9 lètgs	=	2,45%
Breil	4 lètgs	=	1,10%
Foppa	6 lètgs	=	1,65%
Lumnezia	12 lètgs	=	3,30%
dad auters logs romontschs	7 lètgs	=	1,90%
ulteriurs (Alemans en special)	49 lètgs	=	13,45%
digl exterior	7 lètgs	=	1,90%
letgs d'ordeifer (omisduas parts)	38 lètgs	=	10,40%

Fontaunas

Berther, Vigeli (pader). Genealogia dalla famiglia G.F. Berther-Hendry, Rueras. Mustér 1973
Berther, Vigeli (pader). Giachen Martin Hendry, in emigrant d'avon varga 100 onns ell'America. En: Igl Ischi semestril, nr. 4, 1975, p. 59-70
Berther, Vigeli (pader). Rodel dils emigrai tujetschins ell'America suenter 1900. En: La Tuatschina, nr. 16, 1975
Canzlia communal da Tujetsch. Termin da controlla dils habitonts, schaner 1986
Gadola, Guglielm. L'emigraziun tujetschina ell'America. En: Annalas 1936, p. 137-173
Gadola, Guglielm. Veglias schlatteinas tuatschinas. En: Igl Ischi 1943, p. 169-170
Giossi, Patrizia. L'emigraziun tujetschina ell'America 1850-1910. Rueras 1979. (Lavur da patenta al Seminari da scolasts, Cuera)
Hendry, Toni. Il vischinadi da Cavorgia. Notizias historicas. Sedrun 1979
Huonder, Placi. Genealogia Huonder. Sils fastitgs dils perdavons. Ca. 1650-1983. Trun 1984
Schmid, Theophil. Famiglia Schmid dil Plaun Cavorgia e ses descendents. Da Th. Schmid e Giusep Berther. Sedrun 1978

Affons dian lur meini dalla Val Tujetsch

Tujetsch ed jeu

Tujetsch schai sisum la **Surselva** ed ei ina vallada da purs. Dils indigens ei quella val zun carezada. Denton era ils jasters visetan la vallada da tuttas stagiuns. Nus habitein en ina cuntrada da muntognas. Las muntognas ein in grond scazi per mei. Aschia ei il viver ella **Bassa** per mei bunamein nunpusseivels. Ils habitonts da nossa val fadigian lur paun da mintgadi cun luvrar tier la vischnaunca, en scrinarias, cun far il pur sco era cun far miradur. Naturalmein vivin nus era dil turissem d'unviern. Senz'il turissem havessen biars stuiu prender cumiau dalla val ed ir ella **Bassa**. La stad lavuran biars jasters tier nus, specialmein Spagnols, Jugoslavs e Talians. Era quels ston bandunar lur carezada patria per fadigiar il paun. Sche nus fussen en quella situaziun? Era sche nossa val ei aunc buca aschi surbaghegiada, ei nossa natira buca aschi sauna. Dapertut anflan ins pegns ch'ei periclitai dalla malsogna dil bau. Era quei ei in grond problem. Igl uaul ei per nus in grond scazi. Gest nus stuein cultivar el zun fetg. Havessen nus negin uaul, fuss il viver ella val nunpusseivels. Igl uaul schurmegia nus da lavinas e bovas. Malgrad tut quellas malsegirtads ei quei mia carezada val. Passentar vacanzas egl jester ei zatgei bi, denton a casa eis ei aunc adina il pli bi. Igl ei capeivel ch'els indigens laian encrescher ella Bassa, encrescher pils cuolms, encrescher per la biala natira, encrescher per la **Val Tujetsch**.

Petra Berther, 1971

Tujetsch ed jeu

Tujetsch schai sisum la **Cadi** en ina biala val, circumdada dad ina cadeina da pezza. La **Val Tujetsch** dumbra oz circa 1500 habitonts, da quels ein in sisavel purs, quater sisavels mistergners ed in sisavel da tuts han empriu ora nuot, quels mo gidan.

Il vitg principal da **Tujetsch** senumna **Sedrun**. Leu sesanfla il sulet santeri dall'entira val. Era las bancas, il bogn ed igl unviern il glatsch, sesanflan a **Sedrun**. Mintga duas jamnas vegn ei dau ora la Tuatschina. Quella cuntegn tut tgei ch'igl ei schabegiau en Tujetsch, tgi che baghegia enzatgei, tgi che vul maridar, cura ch'igl ei messa eav. Dalla Tuatschina san ins s'orientar fetg bein sur dalla **Val Tujetsch**.

Igl unviern ei fetg bials cheu, mo ei vegn era malsegir da lavinas. Cunzun ussa, ch'ins di ch'igl uaul mieri vi. Senza uaul fussen biars vitgs en grond prighel igl unviern.

Ils purs che han nuot da far igl unviern van tiels runals a luvrar. Quei ei ina buna occupaziun per els, sper il pover.

Igl unviern vegn mintg'onn bia turissem ella val per ir cun skis. Mo era la stad vegnan biars jasters tier nus. Cheu san els ir a spass, silla pezza, sur pass e naturalmein era mirar co nus vivin cheu.

Cun la lavur eisi buca propi bien cheu. Ils biars che vulan far in mistregn ston ir naven da casa. Igl εμπrem eisi clar ch'ins lai encrescher, mo cul temps s'endis'ins. Jeu per exempel savess buca tgei far, sche jeu astgass mai pli vegnir si cheu en la biala **Val Tujetsch**.

Adrian Berther, 1972

XVI Persunas che stattan davontier

Ils mistrals da Tujetsch

Il cumin dalla **Cadi** va anavos el 13avel tschentaner, pia el temps dalla fundaziun dalla **Svizra**. Igl εμπrem mistral enconuschent che ha giu quella dignitad la fin dil 14avel tschentaner ei Ulrich Balletta (1368) staus. Ils tschentaners suandonts vegnan plirs Tuatschins honorai culla mistralia. Ils biars da quels serecruteschan dalla schlatteina dils Berthers. Era dalla famiglia Deflorin, Beer e Gieriet derivan plirs mistrals. In mistral han las suandontas famiglias giu: Pultengia, Soliva, de Medell, Monn, Decurtins e Venzin. Tochen oz enconuschent ins ella **Cadi** 187 mistrals, dils quals **Tujetsch** ha giu 27. Dils 581 onns da mistralia dalla **Cadi** ha **Tujetsch** giu l'honor da ver 46 onns in parsura dil cumin. Ils pli biars onns ei **Mustér** representaus en quei uffeci cun 175 onns, lu suonda **Trun** cun 91, **Sumvitg** cun 75, **Breil** cun 73, **Medel** cun 18 e **Schlans** cun 4 onns.

Denter ils mistrals da **Tujetsch** sesanflan enzacontas personalitads interessantas ed impurtontas. Ina da quellas ei Martin Berther, president dil cumin anno 1501/02. Igl onn 1499 haveva el menau cun grond inschign la truppa dalla **Cadi** all'uiara dalla **Tgalavaina**. Enconuschents ei era Duri Berther. El ei staus buca meins che 4 gadas mistral, numnadamein 1504/05, 1518/19, 1522/23 e la davosa gada 1551. Era ordeifer la **Cadi** ha el fatg carriera. Ella Ligia Grischa eis el staus 3 gadas landrechter, il pli ault uffeci da quei temps en nies intschess. L'honor da mistral e landrechter ha era Peter Berther giu 1545/48 e 1549. Ius ella historia ei medemamein Giachen Berther sco mistral dil cumin furibund da 1656. Da quella tschentada dueien ver 2000 umens haver priu part. Ei mava per il combat denter igl uestg da **Cuera** ed igl avat da **Mustér** pervia dall'incorporaziun da pliras pleivs alla claustra da **Mustér**. La partida digl uestg sut l'influenza dil renomau plevon Mattias Sgier ha sfurzau igl avat da extradir ad ella la bulla papala cun il contract dall'incorporaziun. Giachen Berther duessi lu ver scarpau ella en tocs publicamein. Quei contestescha denton Pader Baseli Berther. La dispeta ha saviu vegnir pacificada per igl atun sissu en favur digl uestg. - Las persunas principalas da quella carplina havevan stretgas relaziuns cun **Tujetsch**: Alla testa dil cumin era, sco gia menziunau, Giachen Berther; avat dalla claustra era Adalbert de Medell, medemamein da **Tujetsch**, ed il grond agitatur dalla partida episcopala, Mattias Sgier, ch'ei staus plevon a **Sedrun** naven da 1642 entochen igl onn commemorabel 1656. Era in auter temps burasculus steva in mistral da **Tujetsch** alla testa dil cumin dalla Cadi, numnadamein Duri Monn. Ei era la perioda dallas carplinas pervia dallas dieschmas. Las vischnaucas dalla **Cadi**, cun excepziun da **Mustér**, havevan refusau da pagar las dieschmas usitadas alla claustra. Ei ha dau pliras radunonzas denter las partidas en dispeta, mo ins ei buca vegnius ad ina sligiazion. Il mistral Duri Monn teneva en principi cun las vischnaucas resistentas. Damai che quellas eran denton dil meini ch'el hagi buca fatg avunda per lur interess, han ellas pudiu effectuar ch'el ei vegnius relaschus sil cumin extraordinari dils 4 d'october 1735 ch'era vegnius salvus encunter la veglia dil mistral regent. En siu stagl ei Hans Gieri Beer, semegliontamein in Tuatschin, vegnius eligius. Dil mistral relaschau vegn ei pretendiu ch'el extradeschi il sigil dil cumin. Duri Monn ha denton buca schau stermentar ed ha snegau dad ademplir il giavisch dalla partida rebellonta. Sin quei ein 100 umens armai da **Breil**, **Medel**, **Trun** e **Sumvitg** serendi a **Mustér** per sfurzar il mistral da dar ad els il sigil. Per evitar ina rebelliun ed ina uiara burgheisa, ha mistral Monn cedi allas pretensiuns dils vischins irritai. Pli tard eis el schizun vegnius exiliaus.

In renomau mistral ei Johann Deflorin staus. El steva a **Mustér**, era denton oriundamein da **Tschamut**. El ei il fundatur dallas famiglias Deflorin da **Mustér** e **Rueun**. 1549 e 1557 eis el staus mistral e dus onns eis el era staus landrechter. Avon sia carriera politica ha el fatg survetsch militar sco capitani en **Frontscha**. Era per fatgs religios eis el s'engaschus, numnadamein sco mess digl avat da **Mustér** al concil da **Trient**. Il 19avel tschentaner vegn Gion Christian Venzin (1818-1820) da **Rueras** mistral. El daventa era enconuschents sco editur dil legendari dils sogns en 3 toms ch'el ha ediu ensemen cun plevon Giusep Maria Camenisch che haveva ina mumma da **Tujetsch**. Igl

atur dil legendari ei medemamein in convischin da **Tujetsch**, numnadamein sur Christian Venzin da **Rueras**, staus onns ora plevon a **Tersnaus**; 8 onns suenter l'elecziun da Christian Venzin, pia 1826, ei puspei in vischin da **Rueras** vegnius tscharnius sco mistral. Igl ei quei Hans Giachen Gieriet. Sto esser ch'ils dus mistrals da **Rueras** erien buca maneivels, ha gie la regenza grischuna anflau per bien da tarmetter 2 polizists si **Tujetsch** 1847, igl onn dalla uiara separatistica (Sonderbundskrieg), per tener bein en egl ils dus mistrals che simpatisavan per ils cantuns catolics. Il 20avel tschentaner han entochen dacheu dus convischins astgau retscheiver il manti dalla mistralia: Vigeli Berther (1929-1933) e Theophil Schmid (1971-1975). Pli bia sur da quellas duas persunas mira el proxim capetel!

Fontaunas

Berther, Baseli. Il cumin delia Cadi de 1656 e mistral Giachen Berther. In niev document per la historia della Cadi cun notizias. Mustér 1911

Gadola, Guglielm. Il cumin della Cadi. En: Il Glogn 1944, p. 31-125

Müller, Iso. Eine bedeutsame tessinisch-bündnerische Urkunde von 1317. En: Bündner Monatsblatt 1954, p. 404-424

Müller, Iso. Die Entstehung des Grauen Bundes 1367-1424. En: Zeitschrift für Schweizer Geschichte 1941, p. 135-199, specialmein p. 145-151

Ils presidents communal da Tujetsch dils davos navonta onns

Anselm Capeder, Rueras	1897-1907
Gion Felici Monn, Camischolas	1907-1915 e 1929-1935
Gion Andriu Berther, Camischolas	1915-1919
Vigeli Venzin, Rueras	1919-1923
Vigeli Berther-Flury, Camischolas	1923-1929
Baseli Berther, Dieni/Rueras	1935-1943
Placi Jacomet, Sedrun	1943-1947 e 1951-1959
Hans Giachen Decurtins, Sedrun	1947-1951
Christian Berther, Sedrun	1959-1963
Theophil Schmid, Sedrun	1963-1971
Vigeli Berther-Jacomet, Camischolas	1971-1981
Sep Fidel Berther, Rueras	1981-1987

Anselm Capeder 1855-1924

Anselm Capeder, feagl da Nicolaus Capeder, ei naschius igl onn 1855 a **Mustér**. Suenter esser ius a scola sin claustra, eis el vegnius scolast ed ha dau scola a **Cavardiras**, **Rueras** e **Sedrun** epi el cantun da **Friburg**. Ils anno 1886 ha el maridau la Sabina Caveng, la feglia dil Lucas, hotelier dalla Cruna a **Sedrun**, ina femna spir curtesia. Il per ei scochemai secasaus a **Rueras** ed ei pli tard staus ella casa che s'auda oz als artavels da Leci Giger-Monn.

Igl Anselm, essend in um da duns e spir bunaveglia pil beinstar general, han ils vischins da **Tujetsch** fatg president da vischnaunca, diesch onns sin in plum, naven dils 1897-1907. Onns ch'ins ei vivius plitost alla stretga; in panziersurtut ei staus sidavon, quel dall'aua da beiber, ton sillas alps sco els vischinadis rasai ora. Ch'ins patratgi en emprema lingia dallas grondas preparativas dall'aua dil **Tgom** e da quella dalla **Val Bugnei** pils vischins da **Sedrun**. Pongir - sin bunamein mintga vischnaunca ch'ins ha schau clamar, han ils umens turschau la pasta dallas alps. El niev uorden dad alp digl onn 1905 han ils pursanavels calau dad ir en roda a caschar; els han pladiu signuns stabels.

Dasperas han era ils uauls dumandau dabia temps, sco per exempel la plontaziun da **Niriel**. Ed ei stat bein siper la detta che Anselm Capeder ei seprius en pil transit, cura ch'ins ha menau il raschieni dalla viafier si da **Glion** epi surtut quella neu da **Brig**, il mument che **Tujetsch** ei adina staus tondanavon d'in maun.

Sco scolast e parsura dalla vischnaunca e commember da differentas suprastonzas ei Anselm Capeder staus in crap da cantun ed in tegn pigl um cumin, nuotatonmeins sco deputau giu **Cuera**.

Sco derschader da cumin ha el giu biars onns da tschercar il dretg e dar decisiuns. Forsa ch'el ei s'obligaus da sorprender onz bia ed ei buca vegnius cun tut a cantun. A casa veva Anselm Capeder tuttina nov affons - dils quals mo ual treis ein carschi si. Anselm Capeder ei la finala setratgs naven e morts ils 20 da settember 1924 a **Trun**.

Capeder, Dumeni, Lucerna. Tgei che jeu sai da miu tat. Brev dils 27 da settember 1984.

Gion Felici Monn 1876-1954

El sco il mistral Vigeli Berther-Flury, dus pilasters omisdus ch'ei stai en baselgia in sper l'auter el baun dalla spunda ed han bunamein adina purtau il baldachin.

Siu bab Martin Felici ha disdiu agradgiu ch'il fegl vegni linguist; el hagi da vegnir prèr e stgavo.

Gion Felici Monn ei naschius ils sedisch da mars 1876 a **Zarcuns**; ni ils paders da **Mustér** ni ses mussaders a **Sviz** ein vegni a sté da perschader il studetgel. Vegnir prèr ei iu al Gion Felici cuntercor; il bab perencunter ei insistius ed el ei turnaus a casa ed ha fatg il pur, si'entira veta. En sia sinceradad ha el è concediu da ver fatg vess. La scola da recrut ha la finala purtau agli in tec variaziun e Gion Felici ha fatg la scola da caporal.

Sco fatgs ch'el fuva da star davontier, han ins scochemai proponiu el per litinent. Il bab a **Zarcuns** ha cunterdetg agli per in'autra ga. E Gion Felici Monn ha stuiu ceder.

Cun ventgatschun onns ei Gion Felici Monn semess en cun sia spusa Maria Nescha Cavegn a **Camischolas**. Da ses tschun affons ein dus morts da pign, il sulet buob, il Luis, veva gia diesch onns. Cuort sissu ha la consorta Maria Nescha stuiu prender cumiau da quest mund; il mariu ei sefidaus d'enzatgi. La vieua Onna Maria **Riedi** da **Rueras** ha detg da gie; els ein semaridai e sias treis feglias han giu ina mumma e l'Onna Maria sezza ei aunc daventada mumma da dus agens affons.

La sort a casa ha buca dumignau il Gion Felici Monn da volver il dies als fatgs publics. Bunamein il cuntrari, sco cassier communal e genau ha el gudignau giu las cordas ed ei sinquei enina vegnius parsura dalla vischnaunca. Buca meins che duas ga ha Gion Felici Monn fatg president communal, en tut quitordisch onns, da quei tschentaner il pli ditg da tuts insumma. Il cumin dalla **Cadi** ha fatg el derschader cirquital e deputau - per differentes biennis.

E durent quell'activitad politica ein dallas caussas succedidas. Sidavon stattan la lavur ed il quitau da stabilir ina comunicaziun neu dad Ursera e da sutensi, si da **Glion**. Per ina regiun da siu persei sco **Tujetsch** ein las viasfier stadas d'impurtonza. Ella val sezza ha la meglieraziun dallas alps ed ils aquaducts dau in bien ton. Siu meret per igl implont electric da **Tujetsch** ei gronds e sco parsura ha Gion Felici Monn fatg ina liunga experienza.

Il consum liber ei staus in da ses ulteriurs intschess; ils protocols ella nudauna ein enzatgei da num. Sco carstgaun d'enconuschientschas ha el giu interess divers. Gion Felici Monn ei staus buns per la fundaziun dalla scola secundara a **Camischolas** dils anno 1908. Per la scolaziun digl anim e dil spert ha el ora ed ora giu in bien ton danvonz. E medemamein per l'educaziun fisica; ch'ins patratgi oravontut dil club da skiunzs e da sia promoziun cuntinuada pil turissem.

Enzatgi veva giu detg ch'il Gion Felici Monn laschi anavos «mo empau» cudischs e scartiras. Buca mo, mobein era! Dapi da daditg enneu, dapi da student, eis el seprius en pil romontsch, sin via ed enten far cusseida, dapertutanavon. Il vocabulari da Ramun Vieli e la prosa da Sep Mudest Nay han mussau agli ina buna via. Da translatar Jeremias Gotthelf e differentes teaters, sco per semeglia «Igl aungel dalla pasch» e «Garcia Moreno» ei Gion Felici Monn semussaus ora. Onns ora ha el fatg il regissur e tut tgi ch'ei staus datier ed ha tedlau - lez ha saviu emprender.

Monn-Decurtins, Felici. Indicaziuns dils 5 d'uost 1984

Gion Andriu Berther 1868-1953

Camischolas sedat impurtonza e fa amogna ina entira paletta da politichers da num; enteifer ils davos decennis buca meins che tschun presidents communal.

Els ein stai dus buobs, il Gion Andriu ed il Stiafen, il miedi da pli tard. Entochen vegn onns ei il Gion Andriu Berther ius a scola a per cul Stiafen, a **Sarnen** ed ha empriu. Enstagl da finir il gimnasi eis el turnaus a casa e surpriu il menaschi puril ed ha tratg profit d'enzatgei. La famiglia veva in fatgun e la spusa Barla Tresa dil Duri Berther da **Zarcuns** ei vegnida cun rauba. Aschia eis ei stau bi da semetter en ed ils Gion Andrius vevan liunga cua. En in dai fuva el vegnius genau militer epi suprastont; all'entschatta dall'uiara, ils anno 1915, ha Gion Andriu Berther surpriu la presidenza communal. Che la Barla Tresa ei stada encunter ha giu negin valzen. Nuotatonmeins ei la consorta ida ensemen ed ei ha tuccau ad ella ed als affons da schar pigliar cun in fatg semegliant. Ei fuva tuttina temps d'uiara e buca daried. Ils umens han giu dad ir sils confins e tut tgi ch'ei stau a casa ha stuiu luvrar da schluppar, las femnas ed ils affons tuttaviva.

Enaquella ch'ei ha giu num da metter ils internai sut tetg, ein ils meinis traso stai sin ballontscha. Quels Tudestgs! Il president Gion Andriu Berther ei meinsvart staus denter mazza e marti. E la letargia fuva vegnida gronda; el ha stimulau ils decuraschai ed ha giu endamen dil fein e contas envernontas ei possi vertir. Damaneivel dils vischins ha Gion Andriu udiu las battidas dil puls e sco commember dil chor baselgia eis el vegnius datier. Schebi ch'el ei mal staus in um da gronda canera. Perencunter ha el fullau via da tut temps dad ir o **Mustér** e survir sia glied cun sal. Quei franc per mintga sac ha gidau a pagar ils deivets; ed ils quatertschien francs sco president communal ein el ed ils ses vegni maneivel da metter giu da maun.

La Barla Tresa ha stuiu murir avoncaduras; siu sulet frar, il Vigeli Berther e posteriur mistral, ei ora ed ora vegnius en agid cun plaid e cussegl. - La Maria, la feglia ledia, ha fatg bien cul bab, ton che la sera dalla veta ei stada sereina.

Berther-Deragisch, Gion Andriu. Nies bab. Intervista fevrer 1984

Vigeli Venzin 1875-1951

Ils anno 1919 han ils vischins da **Rueras** tschentau si in president. Vigeli Venzin ei vegnius eligius orembora, damai ch'ils umens dadens il **Dutg Grond** han tenui enzatgei per siu meret, fuva el tuttina s'engaschus per l'ustanza sisum il vitg e la punt fier sur il Rein vi. Al pur da tiers manedels eis el vegnius en agid cun amegliar la tratga da nuorsas.

Vigeli Venzin ei naschius ils 25 da settember 1875 a **Rueras** ed ha giu da sedrizzar tenor las relaziuns ualti semplas. Igl onn 1903 eis el maridus cun la Barla Giger, la feglia da Gion, in vischin neu dad **Acla**. Il Vigeli ei semess en cul sir ed ha fatg il pur. Sia Barla ha parturiu dudisch affons dils quals quater ein morts da pign. Il medem onn sco si'elecziun da president ei la Barla morta ed il pign dils affons veva quendis dis. Um cartent sco el fuva - eis el semess en da detschiert ed il tat Gion cun el a per. Dall'orgla anora veva il Vigeli assistiu a memia bia messas da bara per buca vegnir a ste ... Ed el ei adina staus in prima organist dalla baselgia parochiala a **Sedrun**.

La casa sper via a **Rueras**, oz habitada da sia feglia Lucia, ha el giu survegniu da sias uras per in prezi raschuneivel. La filiala dil consum liber e l'ustria han gidau a tener la famiglia agradi ed ils affons hart fatg bien. - Duront ses dus biennis da parsuradi ei Vigeli Venzin s'interessaus tut specialmein pils vischins odentuorn. La scola da **Selva** han ins priu ord la casa dalla caplania e mess ella en ina casa nova a **Sutcrestas**. Ils vischins da **Cavorgia** han finalmein survegniu lur via atras las vals; els ch'ei ora ed ora vegni vessamein tier lur fatg.

Il Vigeli Venzin veva empriu enzatgei dalla veta e veva sia filosofia, sch'el scheva per semeglia:

- ch'ins tegni sco parsura ils egls giun plaun
- da giuven tucca ei da far giu la corna
- va ord via al boy, agl eiver, al malsau da spert

Ils siat dil meins da Maria 1951 ha zatgi auter intunau il Deprofundis e zatgi auter ha sunau las orglas duront sia sepultura.

Venzin, Ignazi. Nies bab. Intervista, primavera 1985, Rueras
Venzin, Gion Antoni. Extract da protocols da vischnaunca, 1838-1948
Privat. Giusep Alig-Venzin, Salins

Vigeli Berther-Flury 1878-1964

Datier da tschuncont'onns ha Vigeli Berther-Flury giu il plaid grond el mument decisiv sin vischnaunca. En la scartira dils anno 1978 «Tschien onns mistral Vigeli Berther, **Camischolas**» fa siu fegl giuven, dr. iur. Toni Berther, attents da quei fatg e dil decuors da sia veta.

Vigeli Berther-Flury (ch'ins sbagli buca el cun siu fegl Vigeli che ha maridau ina nata Jacomet) ei naschius ils 20 da settember 1878 a

Camischolas, vegnius gronds a **Zarcuns**, puspei semess en a **Camischolas** ed ha fatg il pur sia vet'entratga. Il talien leutier ei staus s'artaus neu da siu bab Duri Battesta che ha dil reminent tarmess il Vigeli ordeifer a scola, a **Mustér** ed a **Zug**. Sco sulet fegl e cun in ferm suttapei ha ei tucchau al Duri Battesta da ver quita ed el veva probablamein e fatg ses plans. Ed in tec scola ein premissas da num.

Igl onn 1903 han ins priu il Vigeli Berther ordamiez la cumpignia da mats ed ils umens han confidau agli igl uffeci da cassier communal. Cun sia bellezza biala scartira ha il Vigeli fatg smarvigliar enzatgi; la scharscha d'ufficial dil register funsil ei sefatga e cuninaga in'ulteriura, igl uffeci civil. Sco titular ha Vigeli Berther empriu dabot da menar e direger e la sentupada culs vischins ei stada da nez.

Cun la Marta Flury da **Segnas** ha il mat da **Zarcuns** fatg ina prima partida; ils otg buobs e las quater buobas han dau tschaffen e fastedi a lur geniturs. Buca meins che tschun affons ein morts avon ch'il bab, affons els megliers onns ch'ins vess predetg in stupent avegnir. Vigeli Berther ha purtau cun resignaziun ella veglia dil Segner, era la sperdita da dunna Marta che la sort veva giu tarschinu tondanavon.

Sis onns, naven dils 1923 entochen 1929 ha Vigeli Berther tgamunau la vischnaunca. La disposiziun ed igl uorden dad alps e pastiras, dil funs e digl uaul (**Niregl e Flurin** oravontut) han cuntinuadamein pretendiu enzatgei e president communal Vigeli Berther ha giu la habilitad d'ordinar. Epi las contractivas pervia dall'erecziun dalla viafier sul **Cuolm d'Ursera**! Sco per semeglia il trasse e las staziuns els vitgs mintgamai ed aschia. La cusseida ellas pli differentas cumissiuns ha priu naven agli dil temps.

Enamiez ils vischins fuva il Vigeli Berther da **Camischolas** vegnius gronds e la nomina da mistral dalla **Cadi** ei stada la consequenza sissu. Ultra da quei fuss ei e da far valer che **Tujetsch** veva dapi passa tschien onns buca giu in soll mistral; ils umens da cumin ein stai raschuneivels, il mument ch'ils Tuatschins han proponiu cun vigur in um adequat.

Era pil secund bienni ha mistral Vigeli Berther fatg ina famosa tscharna; cumpatg ch'el ei staus semussaus en uorden. - Ses dudisch onns da deputau (1927-1939) ed ils biars onns da president digl uffeci tutular dalla **Cadi** han dumandau dad el temps e lavur. Ed a casa ha zatgi giu da desister. Mistral Vigeli Berther ei nuotatonmeins ius bugen «in tec dianter la gliut» sco el scheva magari, enten star eri, cargar la pipa e ver endamen. E la gliעד - lezza ha dumandau el per cussegl. Da dar plaid e fatg ha Vigeli Berther era fatg persenn, cons che savevan segidar mal. E l'esperienza sco confundatur e parsura dalla cassa Raiffeisen ha adina puspei enrihiu el danovamein.

Mistral Vigeli Berther ei staus in um sc'in cuolm e d'ina sanadad da fier e la finala ha el tuttina bunamein saviu murir surura.

Berther, Vigeli. Brev dils 2 d'uost 1984

Baseli Berther 1887-1970

- Gliez stun ins di -

- Gliez stun ins sche -

ei stau aschia in da ses plaids favorisai, in plaid che muoss'ora ch'el ha dau adatg da l'in e da l'auter enten cumpignar el d'in smani dil tgau e dalla bratscha. -

Baseli Berther ei naschius ils 30 d'october 1887 a **Dieni**, ell'ucliva cun duas casas ed entgins clavaus. Siu tat ed ils augs fuvan sefatgs valer cun baghegiar ora la via dall'**Alpsu** ed ein passai sco beinstonts. Culla cumpra da funs han els mess il gudogn bein giu da maun. Il bab, il Sep da **Dieni**, ei staus sc'in tuc ed ils frars dil Sep ein nuotatonmeins stai pader Baseli e sur Tumaisch. In suttapei da num ed anovians portas aviartas.

Sco sulet salvaschlatta ha il Baseli e giu dad ir empau a scola, on claustra ed aschia. Empei da far vinavon eis el cuninaga turnaus a **Dieni** ed ha gidau il bab. Atgnamein ha el priu bien e baul la Mariuschla per dunna (ina nata Gieriet da **Sedrun**) e - quitordisch affons ha giu num vus. Dus dils sis buobs ein vegni prers, ferton che la Mariuschla ei ida d'ina vart ed ha detg rusari ed il Baseli ha giu tschaffen da siu fatg ed ei sedaus neu pil general. El vitg da **Rueras** e sin vischnaunca eis el daus els egl, quei pur fatg si cun pugn ed in plaid aviert osum la bucca. Ei fuva scart, scartezia e mo las bunas genetschas han pagau lezs onns passa quaterstschien francs. Vi suls confins ora tunava ei mal; sch'ins tegni vinavon adanfetg, mondien ils prezis engiu e l'uiara seigi inevitabla. Cura ch'il Baseli da **Dieni** ei vegnius president da vischnaunca, ils anno 1935, fuva ei semplamein da tener adaquen. E ch'el sappi, veva el demussau a Dieni. Surtut serrar giu bein il quen da vischnaunca, sinaquei ch'ins seigi da sia partida. Quels onns ch'ins ei sefidaus da mintga rendita en favur dalla vischnaunca. Las lennas da condotta ed il tscheins dall'alp **Tschamut** ein stadas dallas meglieras entradas. Suren han ils vischins schau vi las cavas da scalegl a **Nual** e sil **Calmut** ed aunc fatg pagar per encurir ils izuns sigl uaul **Flurin**.

La crisa ei vegnida gronda e l'uiara ei rutt'ora. L'impurtonza dalla traversala neu dil **Valleis** e sur il **Cuolm d'Ursera** ei stada sidavon e la glied giudapeis ha giu il gudogn. Bein enqual schuldau ha retschiert congedi ed ei ius ellas gallarias. L'entira truscha dalla raziunalisaziun, plontaziuns e vias (**Uaul Flurin** e **Caschlè**) e vivon la clupaziun digl uaul han dau dabia. President Baseli Berther ei vegnius a ste ed ils vischins han fatg persenn ses merets e mess el per dus biennis giu **Cuera** sil Cussegl grond.

Suenter las nozzas d'aur digl onn 1962 ha la Mariuschla fatg ualti cuort ed il Baseli Berther da **Dieni** ei silsuenter ius a star egl asil da sogn Vigeli a Sedrun.

Berther-Berther, Plancarda. Intervista. Primavera 1984, Dieni

Placi Jacomet 1896-1975

Ins ha detg ad el semplamein il Placi dils Lecis; el e siu frar Vigeli ein stai purs da vaglia che han aunc fatg dasperas ils marcadonts da biestga.

A **Surrein** ein els stai en treis, ils dus frars e la Nescha Monn, la feglia da president Gion Felici Monn ch'ils geniturs, la Cristgina ed il Leci, han giu priu si d'affon pign. - L'ucliva da **Surrein**, entuorn sontg Antoni, ei empau dapersei e dus mats sco ils Jacomets ein stai, han giu autras schanzas. La casa sper via a **Sedrun** ed ina partida bials frusts (neu dils Mugglis) ein buca vegni agradneu; ins ei segidaus e la spusa Zaria Gamboni ha semegliantamein giu enzatgei enta maun. Ton ch'ils dus frars Placi e Vigeli ein semess sut il medem tetg sper via a **Sedrun**.

Onns plitost nauschs; perencunter ei la famiglia dil Placi e dalla Zaria Jacomet-Gamboni vegnida gronda e siat affons ha tuttina num vus. Ils vischins odentuorn e quels dalunsch han ladinamein fatg stem digl um capavel e da paucs plaids; enina han ins eligiu il Placi Jacomet ella suprastonza communal. Sco viceparsura ha el onns ed onns nudau claramein ils protocols, laschond tuttas firilifanzas d'ina vart. Il survetsch activ e las munconzas dall'uiara han dau da lignar. La consorta Zaria ei ida a per ed ha schau rischliur nuot. Ton ella sco ils affons han dau bratsch ed ein s'interessai per enzatgei. Tondanavon ch'il Placi Jacomet ha ils anno 1943 surpriu la presidenza dalla suprastonza

comunala, per dus biennis. Denteren ha el fatg in paus, per silsuenter surpender danovamein ils anno 1951 la scharscha da president communal e quei ual per otg onns. Cefras che valan pauchet, ella retrospectiva tuttavia.

Il temps da siu parsuradi ei denton d'ina impurtonza nundetga; igl ei la perioda dallas auas, dalla vendita e digl implont electric. L'emprema emprova ei fallida; ils cumpraders dall'ovra centrala a **Lucerna** han ins fatg ir naven, damai ch'il cantun **Grischun** veva giu decidiu da buca menar las auas digl intschess grischun en ulteriurs logs dalla **Svizra** ed explotar ellas ordeifer. El cass da **Tujetsch** ella **Val d'Ursera**.

Enzatgi ha giu mess il fil en guila; ils 13 da fevrer digl onn 1955 ha la radunonza da vischnaunca dau la concessiun d'explotar las auas dil **Rein** cun ses flums laterals. Forsa ch'igl ei stau fatg onz bia enina e la finala han ins pudiu retener la vendita dall'aua davart seniastra. - Ils explotaders dall'ovra dil **Rein** anteriur ein semess alla lavur e la truscha da tgi ch'ei staus davontier ei carschida da di en di. Oravontut ein las vias als implonts sefatgas valer, sco per semeglia: **Sedrun-Nalps** e **Tschamut-Curnera**. E dallas caussas maneclas ch'ei dadas a dies eis ei bunamein meglier da quescher. - Mo igl ei buca da zuppentar vi che la meglieraziun e l'arrundaziun dil funs a **Selva** ed a **Surrein** ein stadas diras nuschs.

Placi Jacomet e sia suprastonza han teniu quen dils luvriers ch'ei vegni ella val e dalla carschen dalla populaziun. Problems dallas uisas ein sefatgs e l'orgla nova ella baselgia da sogn Vigeli ei buca staus in dils gronds. Perencunter la colonia dils luvriers dall'ovra electrica **Rein Anteriur** a **Camischolas** epi surtut, nua ch'ins vegli metter las scolas da **Sedrun**.

Igl uffeci da derschader cirquital ha Placi Jacomet acceptau bugen, schebi che el sco um da siu fatg ei s'exponius nuidis.

Jacomet, Maurus. Brev dils 30 da fenadur 1984

Hans Giachen Decurtins 1885-1951

La glied pli passada scheva magari ad el ed a ses fargliuns ils Mugglis; la mumma ei numnadamein stada la Barla Catrina Muggli.

Hans Giachen Decurtins ei naschius ils 21 da settember 1885 a **Sedrun**. On claustra e giu **Cuera** ha el giu la veglia d'emprender ed ei vegnius scolast. A **Sumvitg** e **Camischolas** e **Trun** eis el setenius vi ed ha fatg scola. Igl onn 1913 ei Hans Giachen Decurtins semaridus cun Luisia Agosti da **Trun** ed ina famiglia da sis affons ei sefatga. En ton sco nuot ei il giuven per setratgs naven, igl empres a **Trun** e silsuenter a **Glion**. Sco marcadont da biestga e da lenna ei Hans Giachen Decurtins vegnius enconuschents empau dapertutanavon. L'emprema uiara ha giu sias consequenzas ed el ei sedecidiu da turnar en **Tujetsch** ed ha surpriu da ses fargliuns il hotel dall'Alpsu. El cun ulteriurs pioniers dalla val han fatg da saver la bellezza dil liug; **Tujetsch** ei vegnius neunavon. A per ha Hans Giachen Decurtins fatg il pur e sco tal ha el fatg persenn dils quitaus dils vischins. El veva tschaffen da star davontier, ellas uniuns per exempel e sco parsura dalla societad electrica ha el giu in egl aviert. Ed ils onns suenter la secunda uiara mundiala ein stai pagadus detgavunda; ei seigi buca da schar per breigia e tener adaquen. In'otra devisa ha el si'entira veta buca udiu.

Igl onn 1947 ei Hans Giachen Decurtins staus neu ed ha fatg president da vischnaunca. Ils raps pil conduct ad aulta tensiun ch'ins ha schau ereger permiez la **Val Tujetsch** han ins saviu cavigliar bein giu da maun. La nova casa pervenda sco per semeglia ei buca stada in grond luxus. - Il barschament e cuort sissu la lavina da **Selva** han fatg quitaus. La reconstrucziun dil vitg ei sefatga e Hans Giachen Decurtins ei seprius en. E ch'ils vischins han purtau el sco deputau dil Cussegl grond, gliez ha el tuttavia saviu grau, el che veva plascher d'enzatgei.

Plans e plans vess el aunc giu pil tgau, aschia a pro da sia vischnaunca; enzatgi ha giu destinau autruisa.

Monn-Decurtins, Felici. Brev dils 5 d'uost 1984

Christian Berther 1910-1966

Empriu da rudien da pur, administrau onns ed onns il fatg dalla vischnaunca e morts avoncaduras sco hotelier dalla Cruna a **Sedrun**. Christian Berther ei naschius ils otg da november 1910 a **Camischolas**; el ei staus il feagl vegl dil mistral Vigeli e lez veva fatg cun el in quen da spir speranza. Dil Plantahof ei Christian Berther turnaus a casa ed ha schau dar el tgau enzatgei. Cun in menaschi puril scol siu vevan ins tuttavia las letgas ed il mistral ei staus leds, damai ch'el fuva en differents uffecis.

Cun ventgasiat onns ei Christian Berther secavigliaus sisum **Gonda** cun sia dunna Maria Monn; las sis buobas ed in buob ein stai agli ina buna caparra.

Da casa anora ei il Christian staus in bien quintist ed ils umens han cuninaga mess el cassier communal. Ed en sedisch onns ha Christian Berther survegniu ils quens dalla vischnaunca siper la detta ed ins ha fatg el per dus biennis president. All'entschatta da sia emprema perioda sco parsura ein in tschuat caussas stadas messas tut en moviment, surtut l'explotaziun dallas auas ch'ins veva vendiu all'ovra electrica Rein anteriur. En ina debatta nundetga reussescha ei als vischins da **Tujetsch** da far ir en nuot la vendita dils flums **Val Giuv**, **Val Mila** e **Val Strem**. A quella decisiun d'impurtonza ha Christian Berther contribuì il siu. - Ed ins ha entschiet a far preparativas en caussa meglieraziun ed arrundaziun dil funs. Ed ual a per ed ualti dabot ei il svilup anetg dil turissem vegnius. La vusch da runals ei sefatga valer e che la spunda dil **Cuolm Val** seigi la megliera leutier, gliez veva ins detg e repetiu, suenter ch'ils dado il **Dutg Grond** vevan retschiert il **Cungjieri** ed enina cun **Dieni** aunc ils runals da Valtgeva. Sco coniniziant dall'entira interpresa ei Christian Berther vegnius eligius emprem parsura dalla societad acziunara ed ha dau il tagl. Bein ina casa pleina da lavur, sco per seineglia aunc uffical civil, archivari da vischnaunca e deputau dil Cussegl grond. Ed aschia dasperas veva el cumprau il hotel dalla Cruna. Segiramein cul quen ch'ina fatschenta taluisa stoppi prosperar; el cun sia glied ch'empermetteva tuttina in bien ton. E la mort prematura ha mess in tierm.

Berther, Vigeli. Indicaziuns a bucca ed a scret dils 2 d'uost 1984, Camischolas

Theophil Schmid-Valier 1912

La moda da scriver la schlatteina «Schmid» ei zun differenta en **Tujetsch**; ils ins ein i naven da Schmed neu tiel Schmid, auters perencunter han bandunau Schmedt e fan valer Schmidt u schizun Schmet.

Theophil Schmid-Valier ei naschius ils sedisch d'october 1912 sco emprem affon da Ludivica e Placi Schmid-Desax a **Sedrun**. Dus onns sissu ei la mumma vegnida en pigliola ed ha stuiu murir. La sperdita ei stada dolorosa ed ha cuzzau vinavon, schebi ch'il bab ha turnau a maridar e sia secunda dunna, l'Onnamaria Deragisch, ha fatg bien. Suenter las scolas dalla val ei Theophil Schmid ins a **Mustér** ed a **Sviz** ed ha fatg latin, ha midau e serrau giu cul diplom mercantil. - Duront quels onns da magliar pupira ha el surviu tscheu e leu d'emploiau, entochen ch'el ha turnau ad ir a scola e fatg da scolast el seminari a **Cuera**.

Las cordas ha Theophil Schmid gudignau giu a **Cavorgia** per silsuenter secavigliar en da detschiert ella scola gronda da **Sedrun**, tut ensemen passa vegn onns da scolast. A per ha el dirigiù la musica ed insumma staus in fervent commember dallas uniuns culturalas. En cumissiuns dallas uisas ha Theophil Schmid fatg buna cusseida. - Lura ha el mess d'ina vart la clamada da surmeister ed ha surpriu il menaschi dalla firma Murer, ina fatschenta da baghegiar neu dad **Ursera**.

Sia dunna Marta Valier da **Camischolas** ha tratg ulivamein a per; la famiglia da tschun affons ei sefatga ella casa nova giudem il vitg da **Sedrun**.

Per cun varga tschuncont'onns ei Theophil Schmid sedaus neu detschartamein per la politica ed ha surpriu enina il tgamun dalla vischnaunca. E las scharschas ein vegnidas tut a dubel: deputau, derschader cirquital e la finala eis el ius sin la buora sco mistral. E sco mistral dalla **Cadi** eis el sepius en per la tschentada ed ha gidau a dar al cumin ina constituziun. El Cussegl grond ei mistral Theophil Schmid sefatgs grondamein meriteivels da baghegiar ora il stradun da **Mustér** a **Sontga Brida** e da modernisar tecnicamein la

viafier dall'**Alpsu**. Buca mo sco commember dalla Cumissiun d'educaziun ha el contribuì il siu, mobein era sco commember e parsura d'ulteriuras giuntas.

Daferton che Theophil Schmid ha presidiu la vischnaunca da **Tujetsch**, ha ei dau la gronda viulta. Ed ei ha tuccau agli da star davontier ed impunder bia forzas; il mument che tontas innovaziuns ein sefatgas, sco per semeglia:

- ils projects da plontaziun e lavineras
- l'illuminaziun els differents vischinadis
- casa Sogn Vigeli
- la vischnaunca surpren l'ovra electrica
- arrundaziun e meglieraziun da fons
- planisaziun da zonas
- preparativas per il bogn cuvretg

El medem temps cun la lavur gronda ha mistral Theophil Schmid era scret differentas caussas, sco per exempel dil traffic atras la val e dils stabiliments ch'ei sefatgs enteifer ils onns. Ed ils vischins han fatg persenn ses artechels ella Tuatschina ed ella Gasetta Romontscha.

Schmid, Theophil. Indicaziuns a scret, primavera 1984, Sedrun Intervista, stad 1985, Sedrun

Vigeli Berther-Jacomet 1922

Da lezzas uras ein ils vischins da **Tujetsch** senuspi da pigliar tontas caussas instradadas e las intenziuns sin rucca pil fauls cantun. E Vigeli Berther-Jacomet ha schau reverir da sorprender il presidi dalla vischnaunca. Vev'el tuttina fatg pli ch'ina experienza e la luna sc'in pieun culau ei buca da cuoz. - Ils dus da zercladur 1971 eis el semess en cun omisduas e ses diesch onns da parsura ein stai enzatgei da num.

Vigeli Berther ei naschius a **Camischolas** sco dieschavel affon da Vigeli e Marta; siu bab ei vegnius pli tard mistral ed el ei semplamein adina staus il Vigeli dil mistral, alla cuorta: Vigeli mistral.

La sentupada culs purs dalla val ha aviert agli ad uras ils egls per lur stenta e sco praticant dil Plantahof ha el empriu enzatgei vitier. A casa denton ein ses frars semess el puresser ed il Vigeli ei vegnius scolast. Scolasts ha ei dau allura tut put ed ellas scolas sigl ur dalla vischnaunca, a **Selva** ed a **Cavorgia**, ha zatgi detg agli ch'el hagi d'emprender da viver. Silsuenter ha Vigeli Berther fatg da scolast secundar a **Friburg**, dau scola secundara a **Lumbrein** epi adina en **Tujetsch**, entochen la primavera 1985 ch'el ei ius en pensiun. Ses semesters a **Perugia** ed a **Paris** e las activitads differentas duront la stad han surtut gidau el a constatar e tener ferm. Per bien e ditg suenter ils trent'onns ei Vigeli semaridau cun la Tresa, la feglia dil president Placi Jacomet; da ses treis buobs ha el tschaffen e metta peisa sin els.

Sco mussader en ina regiun d'ina vart ha ei tuccau a Vigeli Berther da star sidretg davontier en suprastonzas dallas uisas. Ellas uniuns culturalas ha el adina puspei danovamein dau bratsch e la capientscha pil sport e turissem ei stada sidavon. Cun la realisaziun dil bogn cuvretg ed in biro dall'uniun da cura e traffic sin sesez ed in emploiau stabel ha el sco parsura mussau ora zatgei ed ils vischins ein scochemai sefatgs en.

Aunc ei il niev president communal buca staus s'installaus dil tut, che la nova suprastonza ha suttamess als vischins la revisiun dalla lescha da taglia e l'introducziun da quella sil schischom. Ins ha acceptau ella ed ils mieds finansials ein stai avon maun. Ed ina caussa suenter l'otra ei vegnida tratga a strada e per menar tontas novaziuns a buna fin ha ei tuccau d'impunder tuttas forzas.

Cun l'avertura dil turissem ha ei entschiet e pervia dalla protecziun digl ambient ei Vigeli Berther staus tut agrads e botta per dabia. - La zavrada dils differents territoris d'utilisaziun, sco per semeglia la zona da baghegiar e digl ulteriur intsches, gliez ha per cass dau in tschuat da lignar. Enteifer ils quater onns da bloccada da construcziun han

ins giu temps da disponer e metter si prescripziuns. Ed ils votants han acceptau la planisaziun locala ed igl uorden da baghegiar.

Malgrad ch'ils deivets ein s'emplunai ed han fatg mun, han il president communal e ses consuprastonts giu quita ad uras; ins ha priu decisiuns gagliardas, sco per exempel:

- ina nova constituziun communal
- separaziun dalla vischnaunca politica da quella dalla pleiv
- prolungaziun dil temps da scola sin 40 jamnas
- **Tujetsch** daventa commember cumplein dalla corporaziun da vischnauncas **Surselva**
- la pladida d'in miedi stabel en **Tujetsch**
- erecziun dall'ovra electrica **Val Giuv**
- canalisaziun generala e serenera
- vias pils uclauns, **Selva** e **Maunsut** (la via a **Surrein** e **Cavorgia** ei stada ina dira nuscha ed ha pretendiu in engaschament persunal)
- vias dad uaul (**Tgom** e **Cavorgia**)
- la Tgèsa communal e las localitads da schurmetg a **Sedrun** ed ordeifer
- cumpra d'ina casa pil museum da **Tujetsch**

La summa d'activitad ei immensa, schebi ch'ins ha stuiu desister da quintar las caussas maneclas. Alla fin da siu parsuradi ei Vigeli Berther vegnius deputau; el ha dau il davos stausch per menar atras la via da **Cavorgia** epi eis el seprius en surtut per il stradun da **Mustér** a **Sedrun** e per las tariffas da transport d'autos cun la viafier sur il **Cuolm d'Ursera**.

Berther, Vigeli. Indicaziuns a scret dils 2 d'uost 1984

Sep Fidel Berther 1929

Suenter bunamein curont'onns ha ei puspei tucchau als vischins da dadens il **Dutg Grond** da far in dils lur president; ed ins ha giu fatg stem d'enzatgei.

Sep Fidel Berther ei naschius ils otg d'avrel 1929 sco premgenitura da Gion Antoni e Lisabet, ina nata Deplaz; siu bab ei staus scrinari ed el ei semess en ed ha fatg il medem, Il mistregn da lennari e scrinari rabetscha enzatgei e vegn e buc ord moda. Da lezzas uras ein els stai pil solit en dus, oz perencunter han ils dus frars, Sep Fidel e Flurin, dudisch luvrers - e quei che pertucca per semeglia la construcziun da palancau ei l'interpresa predominonta lunsch entuorn.

Denter la giuventetgna da **Rueras** ei Sep Fidel Berther staus davontier e sco suprastont e parsura dil consum liber e dalla cassa da Raiffeisen ha el adina puspei danovamein empriu vitier.

Cun trent'in onn ha el priu la Cecilia Deflorin da **Zarcuns** per dunna; dils tschun affons ein mo dus vegni gronds, ils auters ein morts da baret.

Igl onn 1963 han ils umens eligiu Sep Fidel Berther ella suprastonza communal. Sin vischnaunca vevan ins tuttina priu ina decisiun suenter l'otra e tonta realisaziun ha giu num vus. Sco viceparsura ei Sep Fidel Berther staus mess ora ed enzatgi ha pretendiu enzatgei. Gia suenter dus biennis eis el seretratgs; d'in maun ha el giu perspectiva. Ed enteifer ils onns eis el vegnius versaus en pli ch'ina caussa. Ils anno 1981 han ils vischins purtau el president communal. Dabia fuva tratg a strada, sco per semeglia: l'entira canalisaziun e la realisaziun dalla serenera, completaziun dils differents quartiers e tschalers da schurmetg e buca il davos igl entir indrez dil museum. Tenor ina sempla cusseida ei Sep Fidel Berther semess alla lavur - e lavur ei daveras avon maun.

Berther, Sep Fidel. Intervista. Primavera 1985, Rueras

Ils amitgs dalla plema

Pader Baseli Berther 1858-1931

Igl ei da schar valer che pader Baseli Berther ei staus il cronist il pli enconuscent dalla **Val Tujetsch**. Vegnius gronds a Dieni, ius a scola vinavon, a **Mustér**, a **Sviz** ed a **Friburg**, fatg la matura a **Cuera**, vegnius officier e fatg silsunter studis universitars on **Tiaratudestga**. Puspei vegnius a casa - ed ius en claustra. Ses merets en la claustra da **Mustér** ein considerabels, sco professor e prefect e nuotatonmeins sco rimnader e fundatur dalla biblioteca romontscha dalla claustra. - Da sias publicaziuns vargan las suandontas ora:

- Sas era nua **Giuf** ei?
- Sin **Cadruvi**
- Selva avon 100 onns
- Il cumin della **Cadi** de 1656 e mistral Giachen Berther
- A **Camischollas**
- Ils Bannerherrs della **Cadi**
- Baselgias, capluttas e spiritualessers de **Tujetsch**

Tut quei che pader Baseli Berther ha scret ha il suer dalla tiara e **Tujetsch** stat davontier. Il stil ei da buna mesira ed adattaus al cuntegn, buca schavets e tuttina senza il levgiament dalla Erica. Perencunter dattan ses plaids perdetga d'ina gronda seriusadad.

Ed aschia en quei senn sedattan las lavurs da siu sutnevs canoni Tumaisch Berther, da pader Vigeli Berther e semegliontamein da siu frar Francestg Berther. Pressapauc il medem savess ins dir da Theophil Schmid e novissimamein da Norbert Berther; tut cronists che han priu ina buna direcziun.

Toni Berther 1927

Toni Berther ei il beniamin dalla famiglia numerosa da mistral Vigeli Berther-Flury a **Camischollas**. El ei naschius ils quater d'uost 1927, fatg il gimnasi a **Sviz** e silsunter ha el studegiu giurisprudenza all'universitad da **Friburg**. Sia lavur da dissertaziun ha anflau renconuschientscha; dapi igl onn 1956 ei dr. iur. Toni Berther emploiau tier il departement da giustia e polizia a **Cuera**; sco schef dalla polizia da jasters ha el ina piazza exponida.

Toni Berther ei maridau ed ha famiglia.

Dapi da daditg enneu ha Toni Berther talien pil romontsch; entschiet ha igl interess probablamein cun las disposiziuns ch'el ha sco Romontsch giu da vertir neu dil lungatg tudestg. Ses carnets dalla Ovra svizra per lectura dalla giuventetgna (OSL) sefan bein e suren enqual poesia, aschia cuortetta che tucca nuota mal ils schabetgs da nos dis. - Culs dus Tschespets 51 e 55 ch'el metta sutvi siu num ha el priu amauns dapli. Ils raquents ein divertents e setegnan en in tun popular; siu humor ei schetgs e la satira manecla ei miez per nuot.

Dapi entgins onns ei Toni Berther parsura dalla Uniun da scripturs romontschs.

Berther, Toni. Brev dils 15 da zercladur 1984

Vic (Ludivic) Hendry 1920

El ei naschius ils schotg d'uost dils anno 1920; oravontut eis el staus Tuatschin e vischin da **Cavorgia**. Suenter la scola publica eis el ius giu **Cuera** e vegnius scolast; igl emprend ha el mussau en **Tujetsch** (a **Selva**, a **Camischollas** ed a **Sedrun**) e sissu ha el dau scola secundara el marcau da **Schaffusa** e quei duront sia entira veta.

Vic Hendry ei semaridau cun la Zaria Venzin ed ha giu quater affons, dils quals il pli giuven, il Martin, ei ius vi tier Niessegner cun biabein vegn onns - quei ch'el ha maina surventschiu.

Baul e tard e pli e pli ha Vic Hendry scret raquens e romans e historias entiras. Culs onns eis el daus vid las historias cuortas ed ha anflau dapli suatientscha. Atras ses texts sefan adina puspei danovamein las enzenas tenor l'esperienza da mintga di.

Hendry, Vic. Jeu. 1984

Gion Antoni Venzin 1896-1962

Sin pupi nausch da pac ha Gion Antoni Venzin scret e scret e sias notandas ein da valeta. Sesez ha el zuppentau vi e las curiosadads persunalas mauncan dil tuttafatg. - Cura ch'il mal dallas giugadiras ei vegnius gronds ed el ei staus encadenaus denter las quater preits, ei la scartira vegnida mendra. Pongir - la premura ei semantenida tocca il davos mument.

Gion Antoni Venzin (dils Pauls Venzins) ei naschius ils treis da settember 1896 a **Rueras**, staus leu adina e morts en casa paterna ils 13 da matg 1962.

Sis decennis e miez ein buca ual in tschuat; ses commentaris denton stgisan e dian ch'el hagi observau exactamein, sco per semeglia las lavurs dils purs, en casa ed ora. Ils plaids da capitani da mats han flad e dattan perdetga da sia attaschonza alla caussa indigena. Sco secund genau e suprastont dil consum general ha ei tucchau agli da scriver ils protocols ed ils fatgs manedels ein nudai tondanavon ch'els fan impressiun.

Guglielm Gadola ha fatg stem dil Gion Antoni Venzin - ed il redactur dil Glogn e digl Ischl ha adina puspei ugliau el danovamein da metter en scret la summa dil luvrer e dalla luvrera entuorn el sez. E - lavurs, sco per semeglia:

- Glin e semglin
- Caltschina viva
- Cuntrasts dalla veta
- Fil dat teila per dir aschia in per dallas lavurs edidas (la plipart ei inedita) che stattan bunas per in prima dun d'observaziun.

Venzin, Gion Antoni. Extract da protocols da vischnaunca, 1938-1948 Privat. Giusep Alig-Venzin, Salins

Oreste Zanetti, vischin tuatschin a Luorscha/Olivone

Cura ch'ins sfeglia e tscherca en cudischs vegls da nies archiv, croda ei savens si che certs nums da veglias schlattas svaneschan, gie, vegnan insumma buca pli numnai. El medem temps sa ins constatar l'arrivada da novs nums aunc mai stai cheu. Sur entginas schlatteinas arrivadas en nossa vallada el decuors dil 18avel e 19avel tschentaner vala ei la peina da setener si.

Nus entschevein cun la schlatta dils Zanettis. Els habitavan entuorn igl onn 1768 giu

Surrein-Tujetsch. Igl onn avon, 1767, haveva in Josef Maria Zanetti, ord la **Val Calanca** spusau la Onna Maria de Salins. Ils 17 da december dil medem onn neschan ad els duas buobettas: Maria Dominica e Maria Ursula. Cheu a **Surrein (Tujetsch)** habitava era il bab dil sura numnau Josef Maria, il Gion Battesta Zanetti. Ei vegn scret expressivamein che quel derivavi dalla Val **Calanca**: pater illi ex vale **Calanca**.

1792 marida Maria Ursula Zanetti cun in Gion Battesta Degonda. Sia sora Maria Dominica in Vigeli Giusep Wallier. Duas schlatteinas: Ils Degondas che fuvan pli baul fetg numerus en nossa val ein per decennis svani. Ils Walliers denton entupein nus cheu per l'emprema gada. Els derivavan da **Sursaissa Tudestga**. Oz scrivan ei denton Valier. - In'autra schlatta che arriva era si dalla **Val Calanca** ein ils Gambonis. Els vegnan avon l'emprema gada 1829 en la persuna da Fidel Antoni Mudest Gamboni.

La quarta schlatta che cumpara en quels onns ein ils Loretz: Giusep Antoni Loretz, da **Val Sogn Pieder**, marida 1823 ina Maria Peder e 1826 marida in Franz Giusep Loretz ina Onna Maria Werth a **Selva**: Il bab da quels veva era giu num Franz Giusep e veva maridau a **Selva** ina Catrina Berther. Berthers dev'ei lu era aunc a **Selva** e **Tschamut**. Pli baul scrivevan ei denton Berther ed in temps perfin Berchter. In perscrutader da

historia ha pretendiu inagada che quei num pudessi derivar da «Border»; vul dir: 'gliued dallas plauncas'.

Zanetti

Danunder ch'els derivan e cu els ein vegni a **Tujetsch** ei gia vegniu menziunau. Il gia numnau Joseph Zanetti ha era giu 1782 in feagl Wigeli Giusep. Quel marida Maria Catrina Deflorin, feglia da Giachen e Maria Agatha Deflorin-Gieriet, e habitavan a **Camischolas**. Dils affons dalla famiglia Zanetti-Deflorin numnein nus mo il feagl Giachen Antoni ch'ei naschius 1811. El marida 1839 Maria Barla Rothmund. Ord quella lètq neschan 9 affons: otg feagls ed ina feglia. Da quels partan sis la sort d'emigrant. Wigeli Giusep (*1840), Hans Gieri (*1842), Gion Battista Alois (*1850) e Hieronimus (*1856) prendan dimora el **Württemberg**. Leu fundeschan els atgnas famiglias. - Ils dus frars Placi Sigisbert (*1846) ed il Giachen Antoni (*1848) van el cantun **Tessin** a **Luorscha/Olivone**. Giachen Antoni sespusa cun ina Cesarina Ferioli, feglia da Giovanni e Maria Dalberti. Tochen igl onn 1892 vegn quella lètq benedida cun 4 feagls e 6 feglias. Il giuven da quella famiglia ei gest quei Oreste Martin Zanetti ch'il cudisch da **Tujetsch** muossa sin la davosa pagina. La suttascripziun leu ei cuorta e laconica:

Oreste Martin Zanetti 1892-1985.

A sia memoria less jeu dedicar enzacontas lingias sur da sia veta. Fatgs che jeu hai retschercau tier persunas che han viu ed enconuschiu el. El ei ius persuls tras la veta, buca maridaus, mo ha era aschia dumignau ella. 1972 cumpara en la periodica meinsila della '**Valle di Blenio**' in artechel: «Un ortigiano ingignioso». «In artist inschignus» cun il suandont cuntegn: «S'approximond als 90, luvrus, allerts e plein inschign, exprima Oreste Zanetti l'activitad artistica, luvrond cun il lenn ed il fier. El sefutra dil malesser dalla vegliadetgna, pertgei el enconuscha la forza dils recepts e daguots dallas jarvas naturalas e maglia cun gust la sanadeivla 'minestra di ortiche'. El refusescha il progress, per exempel la forza electrica. Mo tuttina drova el in dinamo da benzin che metta en funcziun las maschinas en siu luvratori e la illuminaziun necessaria. Cheu modellescha, fuorma e scalpra el objects digl art, schizun fins e schubers instruments da musica Cun caschun d'ina intervista scriva ina schurnalista en la medema gasetta: «Il pli vegl dils umens da **Luorscha**, suenter Antonio Neri, ei igl artist Oreste Zanetti che ha cumplenu siu 90avel ils 13 da mars 1982. Cun el vein nus priu la peina da far in'intervesta e havein anflau cheu in original sco ins sa veramein mo s'imaginar: Nus vesein el cheu cun la gegia construida dad el sez avon siatonta onns, e cun igl artg cun il qual el sunava la mazurca sin ils bals duront il carneval.»

Ord in'autra intervista fatga cun Oreste rapporta la medema gasetta: «El viva ad Olivone, ei in original strusch imaginabels. Sia veta ei lu nuota sesplegada per semper en la «val del sole» (aschia vegn la **Val Blegn** numnada). El ha viu e viviu en las tschuffas e stgiras neblas da **Londra**. Leu eis el emigraus en ses giuvens onns sco «cuoco». Mo siu grond plascher ei adina staus il luvrar vid il lenn.

Siu bab veva dau ad el il surnum «lazarone», smarschun, perquei ch'el leva saver nuot da daners e lavurs servilas. Pruamein ha el era dumignau aschia la veta da mintgadi, mo savens odiau il progress exagerau en si'atgna casa. Ils dus davos onns lavura el pauc pli. - Ord il temps dall'**Engheltiara** ha el aunc adina in violoncello ch'el sez ha construiu leu duront lezza dimora: «Igl artg hai jeu piars, mo igl instrument ha siatonta onns.» Sco el raquenta ei era sia veta buca stada preservada da surprisas. Certinas da quellas ch'el hagi buca adina acceptau fetg bugen, da quellas hagi el giu pli che ina.

Cun plascher muossa el al visitader sia pli gronda e biala per aschia da dir monumentala ovra artistica. 34 onns ha el luvrau vid quella. Igl ei ina combra matrimoniala, enzatgei senza paregl che fa smarvegliar ed admirar il grond dun digl artist. Mo sco giu detg, eis el restaus persuls sil viadi tras la veta. Sia forza ei sebasada sin la libertad externa dil possess, ina forza che para en nos dis dad esser svanida.

Cun quellas lingias hai jeu empruau da dar in maletg da quei um. Entras siu legat ha el facilitau la finanziaziun dil cudisch da **Tujetsch**. Eis ei stau in segn da simpatia per la patria da ses antenats, ni schizun in segn d'engrazieivladad ad ella? Varga 100'000

francs ha el fatg si a sia vischnaunca. Suentar ch'il fiscus ha giu laguttu sia part; eis ei aunc vanzau biabein 70'000 francs.

Engraziament

Havend legiu il cudisch hai jeu schau vegnir endamen ils plaids che nos vegls vevan la moda da dir cu ins veva stuiu dumandar per in survetsch: Veis engraziu ... ?» e lu hai jeu scret quei. -

Aschia resta ei a mi d'engraziar a sur Ignazi Pally, **Ruschein**, che ha giu la buontad da dar a mi las informaziuns sur la persuna dil legatur. Lu era a nos canzlists communal, a nies archivar Tarcisi Hendry. Jeu sun en da quels graus in individi mulestus.

Ussa aunc in Dieus paghi a nies benefactor ch'ei morts ad **Acquarossa** el spital. Lein ver speranza ch'el hagi contonschiu la «vale dil sole» perpetna.

Francestg Berther